

# الطبوتها المارية

تاليف

يوسوسي (اوركست

النائر مكت مكت المحالة مكت بيمص ألى مكت المجالة ٢ منابع كامل مع مدى - المجالة

> دار مصر المطاعة سعد جوده السمار وشركاه

#### مقدمة

### بقلم: الدكتور طه حسين

هذا الكتاب ممتع أقدمه للقراء سعيدا بتقديمه أعظم السعادة وأقواها ، لأن كاتبه من هؤلاء الشباب الذين تعقد بهم الآمال وتناط بهم الأماني ليضيفوا إلى رقى مصر رقيا ، وإلى ازدهار الحياة العقلية فيها ازدهارا .

وكان كل شيء في حياة هذا الشاب الأديب جديرا أن يشغله عن هذا الجهد الأدبى وأمثاله بأشياء أخرى ، ليست أقل من الأدب نفعا للناس وإمتاعا للقلب والعقل .

فهو قد تهيأ في أول شبابه لدراسة الطب ، ثم جد في درسه وتحصيله حتى تخرج وأصبح طبيبا . ولكن للأدب استئثارا ببعض النفوس وسلطانا على بعض القلوب لا يستطيع مقاومته والامتناع عليه إلا الأقلون .

وقد كلف هذا الشاب بالقراءة ، ثم أحس الرغبة في الكتابة . فجرب نفسه فيها ألوانا من التجربة ، ثم لم يملك أن يمضى في تجاربه تلك ، وإذا هو أمام كتاب يريد أن يخرج للناس فيخرجه على استحياء . ويقرأ الناس كتابه الأول و أرخض ليالى ، فيرضون عنه وبستمتعون به ، ويقرأه الناقدون للآثار الأدبية فيعجبون له ويعجبون به ويشجعون صاحبه على المضى في الإنتاج ، فيمضى فيه ويظهر هذا الكتاب .

وأقرأه فأجد فيه من المتعة والقوة ودقة الحس ورقة السذوق وصدق

الملاحظة وبراعة الأداء مثل ما وجدت في كتابه الأول ، على تعمق الحياة وفقه لدقائقها وتسجيل صادق صارم لما يحدث فيها من جلائل الأحداث وعظائمها لا يظهر في ذلك تردد ولا تكلف ، وإنما هو إرسال الطبع على سجيته كأن الكاتب قد خلق ليكون قاصا ، أو كأنه قد جرب القصص حتى استقصى خصائصه ونفذ إلى أسراره وعرف كيف يحاوله فيبرع فيه . وكنا نعجب فيما مضى بطائفة من الكتاب المجودين في الغرب لم يتهيأ واللأدب عن عمد و لم يجعلوه لحياتهم غاية ، وإنما أنفقوا جهدهم كله في درس الطب والتخصص فيه وفرض الأدب نفسه عليهم فرضا فبرزوا فيه أى تبريز . ثم رأينا هذه الظاهرة نفسها تمس بعض أطبائنا فينشأ منهم شاعر بارع كالدكتور إبراهيم ناجى رحمه الله ، وينشأ منهم الكاتب المتفوق الذي يتاح له من صفاء الذوق ونفاذ البصيرة وسعة العلم والفقه بأسرار الحياة ، فيخرج في اللغة العربية كتبا أقل ما توصف به أنها تجمع بين الروعة والمتعة و تغنى حاجتنا إلى القراءة التي تلذ القلب والذوق والعقل جميعا كالدكتور محمد كامل حسين .

وكاتبنا هذا يمضى في هذه الطريق ثابت الخطو ، وما أشك في أنه سيبلغ من الأصالة والرصانة والتفوق ما بلغ الذين سبقوه .

وهذه ظاهرة جديدة في أدبنا العربى الحديث إن دلت على شيء فإنما تدل على أن سلطان الأدب العربى ما زال قويا ، وقدرته على الاستئثار بالقلوب والنفوس ما زالت نافذة ، وعلى أن جذوة الأدب يذكيها ويقويها أن تجاور العلم في بعض القلوب والعقول فتستمد منه قوة وأيدا ومضاء قلما يظفر بها الذين يفرغون لتنميق الكلام ويصرفون عن حقائق العلم صرفا . وأى فنون العلم أجدر أن يفقه الناس بالحياة ومشكلاتها وما تكلف الأحياء من ألوان العناء من الطب . فالطبيب يخالط الإنسان مخالطة لا تتاح لغيره من أصحاب العلم ،

يخالطه صحيحا ويخالطه عليلا ويبلو ألم جسمه وآلام نفسه أصدق البلاء وأعمقه ، ويفتح له ذلك أبوابا من التفكير تنتهى به أحيانا إلى الفلسفة العليا ، وتنتهى به أحيانا أخرى إلى الأدب الرفيع الذى يحسن فيه الانسجام بين الحس الدقيق والشعور الرقيق والذوق المرهف والعقل المفكر ، وتتيح له ذلك كله قدرة على التصوير الفنى لحياة الناس وما يزدحم فيها من الألم والأمل ، ومن السخط والرضى ، ومن الحزن والسرور ، قلما يتاح لغيره من الناس .

وربما منحه قدرة أخرى على فهم الملكات الإنسانية ، ورد أعماله وما يختلف عليه من الأحداث وما يكون لهذه الأحداث من تأثير فيه إلى أصولها ومصادرها التي أنشأتها وصورتها تصويرا لا يحسن فهمه إلا من يعرف دقائق النفس والجسم جميعا ، وما يكون بينهما من توافق أحيانا ومن تخالف أحيانا أخرى . وإذا أتيح الفن الأدبى للطبيب امتاز أدبه بالدقة والصدق وتجنب الألفاظ العامة المبهمة ، والعبارات التي تبهر الأسماع ولكنها لا تصل إلى القلوب ولا تحصل في العقول شيئا .

وقد أتيح لكاتبنا من هذا كله الشيء الكثير فهو لا يحب التزيد في القول ولا يول أنهو لا يحب التزيد في القول ولا يألف تبهرج الكلام ، ولن تجد عنده كلمة قلقة عن موضعها أو عبارة إلا وهي تؤدى بالضبط ما أرادها على تأديته من المعانى .

هو طبيب حين يكتب يضع يده على معناه كا يضع يده على ما يشخص من العلل حين يفحص مرضاه ، وينقل إلينا خواطره كا يصور أوصاف العلل وكا يصف لها ما ينبغي من الدواء .

وله بعد ذلك خصلة تميزه من غيره من كتاب الشباب ، فالميل إلى تصوير الحياة الاجتماعية ظاهر عند أدبائنا من الشباب تختلف حظوظهم منه ويختلف توفيقهم فيه . ولكن كاتبنا لا يميل إلى تصوير الحياة الاجتماعية وما فيها من

الآمال والآلام فحسب ، ولكنه يحسن تصوير الجماعات ويعرض عليك صورها كأنك تراها .

فلم أر تصويرا لشارع أو ميدان تختلط فيها جماعات الناس على تباين أشكالهم وأعمالهم وألوان نشاطهم كا أرى عند هذا الكاتب الشاب .

ثم لا يمنعه ذلك من أن يفرغ للفرد فيحسن فهمه و تصويره فى دقة نادرة ، كل هذه الخصال تبشر بأن كاتبنا جدير أن يبلغ من فنه ما يريد ، ولكنى أتمنى عليه شيئين . . أحدهما ألا ينقاد للأدب ولا يمكنه من أن يشغله عن الطب أو يستأثر بحياته كلها . فالأدب يجود ويرقى ويمتاز بمقدار ما يجد عند الأديب من مقاومة له وامتناع على مغرياته وانصراف عنه بين حين وحين . .

وما أشك في أن عنايته بالطب حين تتصل وتقوى ستمنح أدبه غزارة إلى غزارته وثروة إلى ثروته ، وستزيد جذوته ذكاء وقوة ومضاء .

والثانى أن يرفق باللغة العربية الفصحى ويبسط سلطانها شيئا ما على أشخاصه حين يقص كا يبسط سلطانها على نفسه ، فهو مفصح إذا تحدث ، فإذا أنطق أشخاصه أنطقهم بالعامية كا يتحدث بعضهم إلى بعض فى واقع الأمر حين يلتقون ويديرون بينهم ألوان الحوار .

وما أكثر ما يخطىء الشباب من أدبائنا حين يظنون أن تصوير الواقع من الحياة يفرض عليهم أن ينطقوا الناس في الكتب بما تجرى به ألسنتهم في أحاديث الشوارع والأندية. فأخص ما يمتاز به الفن الرفيع هو أنه يرقى بالواقع من الحياة درجات دون أن يقصر في أدائه وتصويره.

والأديب الحق ليس مسجلا لكلام الناس على علاته كما يسجله الفونغراف ، كما أن المصور الحق ليس مسجلا لواقع الأشياء على علاتها كما يصورها الفوتغراف ، وإنما الفرق بين الأديب والمصور وبين هاتين الأداتين

من أدوات التسجيل أنهما يصوران الحقائق ويضيفان إليها شيئا من ذات نفسيهما هو الذى يبلغ بها أعماق الضمائر والقلوب ، ويتيح لها أن تبلغ الأديب والمصور من نفوس الناس مايريدان ، وإلا فما يمنع الكاتب من أن يصطنع أداة من هذه الأدوات التي تسجل ألفاظ الناس ثم يضيف إلى أصواتهم صوته بلغتهم التي يتكلم بها هو حين يتحدث إليهم ، ثم يعرض عليهم ذلك كا يعرض تسجيل الأصوات لا يتهيأ له ولا يتألق فيه .

ليصدقني الشباب من أدبائنا أن من الحق عليهم لمواهبهم وأدبهم أن يتمعنوا فهم المذاهب الأدبية أكثر مما يفعلون .. وألا يخدعوا أنفسهم بظواهر الأشياء فيفسدوا مواهبهم ويفسدوا أدبهم أيضا .

أما بعد فإنى أهنىء كاتبنا الأديب بجهده هذا الخصب ، وأتمنى أن أقرأ له بعد قليل كتبا أخرى ممتعة إمتاع هذين الكتابين وتمتاز عنهما مع ذلك بصفاء اللغة وإشراقها وجمالها الذى لم تبلغه العامية ، وما أرى أنها ستبلغه فى وقت قريب أو بعيد .

## جههورية فرحات

ما كدت أدلف إلى القسم ومعى الحرس حتى أحسست بانقباض مفاجئ ، لم تكن تلك أول مرة أدخله ولكنها كانت المرة الأولى التى أرى القسم فيها فى الليل ، ولهذا شعرت حين تخطيت الباب أنى أدلف إلى خندق سفلى لا يمت إلى الحاضر ولا حتى إلى الماضى القريب .. جدران يكسوها حتى منتصفها سواد على هيئة طلاء وكآبة تكسو نصفها الثانى .. وبقع بيضاء مبعثرة هنا وهناك لا تخفف السواد بقدر ما تظهر بشاعته ، وأرض لزجه لا تدرى إن كانت من الأسفلت أم من الطين ، ورائحة .. رائحة لا تستطيع أن تحدد كنهها وإنما لابد أن تحس معها بغثيان ، وضوء باهت يأتى من مصابيح بالغة القدم عشش عليها الذباب وباض .. مصابيح معظم ضوئها محكوم عليه بالسجن المؤبد داخلها ، والقليل الذي يتسلل منها هاربا لا يبدد الظلام بقدر ما يحتمى به ويتستر ، وإن وقع على الأشياء والناس فإنما ليظهر كل ما بها من حزن وقبح وبشاعة..

وأحسبت حين احتواني هذا كله وأصبحت جزءا لا يتجزأ منه ، والناس من حولي على سيماهم جد خطير يمشون كالمنومين ، وصناديق الفاكهة وعربات اليد وكراسي المقاهي التي صادرها بوليس البلدية وهي مكومة في ركن ، وأصحابها متناثرون حول الجدران والأركان متهالكين على الأرض وريوسهم مائلة على حجورهم ، والعساكر يسدون في أرديتهم السوداء كعفاريت منتصف الليل ..

أحسست حين احتواني هذا كله أنني لابد أنا الآخر قد ارتكبت جريمة ونسيت ، وتمنيت أن أهرب من المكان بأسرع ما أستطيع . و لم أكن أستطيع مغادرة المكان فقد كان على أن أحجز في القسم ليلة لأرسل إلى النيابة في صباح الغد . . واحتاروا أين يضعونني فالحجز كان ممثلنا ، والحجرة الأخرى التي يوضع السياسيون فيها عادة تعج بالمراقبات وصاحبات الحرفة ، و لم يجدوا لى في النهاية خيرا من حجرة الضابط النوبتجي . . وهناك تركت ومعمى حارس . .

كانت الحجرة على سعتها تضيق بمن فيها ، وكان أبرز الموجودين جميعا الضابط النوبتجى . وحين رأيته جالسا إلى مكتبه كالحكمدار وعلى يمينه فوهات أكثر من خمسين بندقية مغمدة فى فضاء الحجرة ، وخلفه اللوحة الخشبية المثبتة فى الجدار والمثقلة بألوان وأشكال من السلاسل والقيود والدروع والبلط والخوذات ، وعلى يساره الخزانة الحديدية القديمة . حين رأينه هكذا تخيلت إلا حدود لرهبته وقوته ، وأنه يستطيع ببساطة أن يقضم ذراعى أو يضع أصبعه فى عينى ، مع أنى كنت متأكدا ألا شأن لى به ولا شأن له بى ..

ووجدتنى أترك كل ما فى نفسى وكل ما يشغلنى وأنضم إلى جيش العيون المنصبة عليه من الناس المزدحمين أمامه ، والذين لا يفصله عنهم إلا سور خشبى منخفض ..

وبدا لى أول الأمر وكأنه ليس بكائن حى .. وإنما جسده قد صنع من طلاء الجدران الأسود ، ورأسه خوذة من الخوذات المعلقة وراءه ، وعيناه فتحات بنادق ، ولسانه لابد كرباج ..

ولكنى حين هدأت قليلا واعتدت على المكان ، وتأملت كيف وضع « الكاب » فوق رأسه في وقار مخيف ، وزرر معطفه الضباطي ـــ على غير العادة \_ إلى آخر زرار فيه ، وشد جلد وجهه فى تزمت صارم فاختفى كل ما فيه من تجاعيد وأصبح أملس كجلد الطبلة المشدود ، وأضفى على نظرات عينيه بريقا تحس معه أنه لا ينظر بهما إلى الناس بقدر ما ينقر ويلسع ، وحمل صوته ما لا يطيق وهو يشخط ويهدر بكلمات غير مفهومة كأصوات الرصاص ..

حين تأملت كل هذا بدا لى حينئذ كأحد الجنرالات الطليان الأسرى الذين كنا نراهم أثناء الحرب . . وحدث أن جاء شاويش أو بيتشاويش لا أذكر ووقف أمامه ونادى عليه :

ــ يا فرحات ..

عجبت كيف ينادى بلا تكليف هكذا ، ولكن عجبى زال حين قال مرة أخرى :

ــ یا فرحات .. یا سی فرحات ..

و لم يرد الضابط النوبتجى إلا بعد أن قال له الرجل .. يا حضرة الصول .. وكنت قد اقتربت حتى استندت مع غيرى من المستندين على السور الخشبي وسمعت لهجته التي فيها أثار باهتة من ريف الصعيد . ونم صوته العالى عن الفضاء الواسع الذي ترعرع فيه ، وعن مستلزمات الوظيفة من شخط ونظر وقد عملت عملها طوال تلك السنين فأتلفت صوته وأضافت إليه حشرجة كالتي تلحق براديو القهوة البلدى من كثرة رفع صوته . وذهب الجنرال من خاطرى تماما ووضحت أمام عيني ملاعه التي كان يلفها ضباب الرهبة والسلطة ، ورأيتها صعيدية خالصة بأنفه الكبير كأنف رمسيس . وجبهته الحادة العالية كجبهة منقرع ، وشيخوخته التي تنم عن تاريخ حافل ف خدمة البوليس إذ أنه لابد قضى أجيالا حتى يصل إلى رتبة الصول ، وقد دخل خدمة البوليس إذ أنه لابد قضى أجيالا حتى يصل إلى رتبة الصول ، وقد دخل

الخدمة ( نفرا ) ككل الأنفار . ورأيت جسده العجوز على حقيقته مستقيما في أجزاء منبعجا في بعضها الآخر ، وقد فرضت عليه البدلة العسكريـة والحذاء الثقيل و « القايش ، . . فرضت على جسده شكلها فرضاكا يفرض قالب المكوى على الطربوش شكله وأبعاده . وكان من الواضح أنه يحب هذا المركز حين تسند إليه مهمة الضابط النوبتجي ، ويحب أن يعامله الناس كضابط بحق وحقيق وهو الذي \_ بلا شك \_ قد قضى ثلاثة أرباع عمره يحلم بهذا وينتظر اليوم الذي يحمل فيه كتفه ( النجمة ، .. وكان باديا أن كتفه لن تحمل شيئا من هذا القبيل، فهو وإن كان يقوم أحيانا بدور الضابط النوبتجي إلا أن الإحالة إلى المعاش كانت تبدو وشيكة ، ونجمة الفجر أقرب إليه من نجمة الملازم الثاني .. وحين تركته وأدرت بصرى في الحجرة ورأيت المكاتب الخاوية التي تركها أصحابها . ودولاب الدوسيهات ، والمروحة القديمة الموضوعة فوق الخزانة والتي كان يبدو أنها لم تستعمل منذعشر سنين على الأقل وقد صنع التراب من نفسه عناكب فوقها ، والمصباح الكهربائي الذي له ﴿ برنيطة ﴾ من الصاج ، والذي يتدلى من السقف حتى يوازي رأس فرحات المائل على ما أمامه من أوراق ، والناس المزدحمين حول الحاجـز. الخشبي والذين يكونون خليطا ــ إن تنافر في أشياء ــ فإنه يتفق في نظرات القلق والحزن الغاضب والوجوه المتقبضة الجامدة كان معظمهم متهمين عائدين من تحقيق النيابة وتضمهم سلسلة حديدية طويلة ، تبينت بعد حين أنهم لا يقيمون وزنا للسلاحليك أو السلسلة أو الصول فرحات نفسه .. فشخطته تقابل بزمجرة وأحيانا برد لايقل عنها قسوة ، حتى انفجر أحدهم مرة لأن فيشه وتشبيهه لم يكن بعد قد جاء من تحقيق الشخصية وكان عليه لهذا أن يمكث في الحجز بلا إفراج حتى يجيء ، انفجر ولعن الدنيا والحظ والفقر

والذين كانوا السبب ، ولولا الملامة للعن الضابط النوبتجى هو الآخر . ولحمت الضابط الذى هو فرحات يعانى الحرج الشديد وهو يسمعهم يهدرون ، ولكثرتهم وشراستهم وضربهم الدنيا صرمة لا يستطيع \_\_\_\_ كالضباط الحقيقيين فى نظره \_\_ إخماد ضجتهم ، ولما انتهى منهم ومضوا وعسكرى فى أول صفهم وعسكرى فى آخره ، والسلسلة ترن وتصلصل وهم لا يزالون يسبون ويلعنون ، تنهد فرحات تنهد الذى وضع أصبعه فى الشق ..

حين تركته وأدرت بصرى لكل هذا وعدت إليه و جدته حينئذ يبدو شيخا كبيراً جدا .. شيخاً إلى الدرجة التي تحس معها أنه عهدة من عهد الحكومة عثرت عليه ذات يوم أثناء ( كبسه ) على بلدته فصادرته ، و ختمته بالطربوش الأحمر والبدلة الميرى ، وظل في مخازنها حرزا من الأحراز يبلى و يصبح كهنة ولا تبلى ما عليه من أختام .

وقال وهو يجوس بعينيه خلال الموجودين :

\_ أف .. أقسم بالله الأشغال الشاقة أرحم من دى شغله .

وتوقفت عيناه على وفيها دعوة واضحة ، وكنت أنا الآخر لي ساعات وأنا صامت فوجدت نفسي أقول:

\_ إيه .. الشغل كتير والا إيه ؟

وكمن كان ينتظر الفرج من زمن رأيته ينفجر:

ــ يوهوه يا أستاذ .. هو ده شغل ؟ .. دا سرك .. دا موريستان .. الناس اجننت .. يعملوا إيه ؟ .. حيخس عليهم حاجة ؟ كله على دماغنا ! والنبى أنا اشتغل في الحديد ميت سنة ولا أقعد هنا ساعة .. والأكاده إن كله كلام فارغ .. كله كذب .. تبالى وحياتك .

اللى معور نفسه .. واللى ضاع منه شاكوش .. واللى كان نايم قال وراحت طاقيته .. ونروح بعيد ليه ! مش دى واقفة من الصبح ؟ مالك يابت ؟ أبقى مش الصول فرحات إن ما قالت إنهم ضربوها وأخدوا سيغتها ! .. مالك يا بت ؟ فيه إيه ؟

وكانت ( البت ) امرأة واقفة ضمن الواقفين ترتدى ثوبا كان أسود ثم أحاله ساحر الحاجة إلى رمادى ، وتتعصب بمنديل كالح لا يخفى إلا القليل من شعرها البنى الأكرت القصير وقد تلوت نهاياته وتنافرت ، وكان وجهها غامقا أسمر ، وفي عينيها كحل أفسدته الدموغ ..

وردث تقول في ذلة:

\_ أم سكينه والبت عيوشه وبنت اختها نبويه والواد ..

\_ مالهم ؟ مالهم ؟

\_ أتلموا على وضربونى فى بطنى .. آه يانا ..

وفى ومضة خاطفة كانت فى حالة بكاء تـام ، وأضافت والدمــوع والشهقات تختلط مى حلقها ..

\_ وام سكينه .. عضتنى .. هنا .. فى كتفى .. وزغدتنى فى بطنى .. والبت عيوشه قلعتنى الحلق ..

وقهقه الصول وخشخش صوته وقال:

\_ شایف یا أستاذ ؟ شایف ؟ مش قلتلك ؟ كله وحیاتك كدب .. نصب واحتیال .. بقی بزمتك دی حیلتها البلی الأزرق ؟ حلق إیه یا بت اللی خدوه ؟ حلق حوش ؟

\_ حلق دهب يا بيه وغويشتين ..

والتفت الصول إلى وقال بلهجة ذكرتني بنجيب الريحاني :

\_\_ تفتكر والنبى مين المجنى عليه فى الحكاية دى ؟

\_ أنا ! .. أنا يا فندم .. ماهو الكدب العلنى ده يبقى سرقه بالإكراه .. ومحضرها المصيبة من صورتين ، والمصيبة الكبرى ان أنا اللى حاكتب الصورتين ..

واستدار إلى المرأة ولسعها بنظرة كاوية فيها آثار من لمعة الضحك ، وأمسك القلم وفتح دفتر المحاضر الكبير وكأنه يفتح بوابة المتولى وقال : \_ هه .. إلهي وانت جاهي ربنا ياخدكم ويخذني معاكم خليني استريج .. ولما انتهى من كتابة مقدمة المحضر سألها :

\_ اسمك إيه يا بت ؟

و لم ينتظر أن تجيب أو يحفل بإجابتها ، وواجهني مستأنفا كلامه وأنا أحسّ أنه يحدث نفسه أكثر مما يحدثني :

... أنا والنبى المجنى عليه .. ومش فى الواقعة دى بس .. فى ألف واقعه .. فى دشليون .. يمكن ما تصدقش .. اتفضل آدى دفتر الأحوال .. اصطبحنا بهتك عرض فى الطريق العام و ٩٢٥ اللى بعدها نشل حافظة نقود قال فيها قال ١٤٧ جنيه و ٨٣ صاغ وورقتين بوسطه .. أقسم بالله ما كان فيها إلا الورقتين . ويمكن لجل الحلفان خمسة تعريفه كان ، واللى بعدها قال سرقة نحاس .. قايلين فى البلاغ إن النحاس وزنه ، ٥ رطل ومتهمين الخدامه .. حتة بحت قد كده .. متطلعشى كلها على بعضها عشرة ارطال .. وغيره وغيره من الصبح وانا إيدى وقفت من الكتابة .. وكله ملاليم وكلام فارغ وكدب .. يا شيخ فضك .

والتفت إلى المرأة يسألها:

\_ ما تنطفی یا بت .. اسمك إیه ؟

وقبل أن تجيب ضحك وقال كمن تذكر نكتة :

واللا الجثة اللي لقيوها في الخرابة مالهاش صاحب ..

قصدى صاحبها مجهول .. لقيوا السر الإلهى طلع منه كده لوحده ومن غير ما حديكلمه .. قوللى ؟ .. اشمعنى نقى الخرابة دى يموت فيها ؟ .. يعنى ضاقت الدنيا فى وشه .. ما كنشى يتمشى لحد شبرا مثلا ؟ الله يرحمه مات .. واتعذب أنا ليه ؟

نهايته .. كتب عليكم الهم والغم كما كتب على الذين من قبلكم . وأدار رأسه إلى المرأة :

ـ يا وليه اسمك إيه ؟ ...

ــ خديجة ..

\_ خديجة إيه .. انطقى ..

\_ خدیجه محمد ..

ــ يا وليه تحركى .. محمد إيه ..

وقبل أن تجيب أرقد قلمه .. وأسند كوعيه إلى الصفحة ووضع رأسه بين يديه وقال من تحت حافة ( الكاب ) ، والمصباح الذي أمامه يهتز كالبندول فيتحرك ظل رأسه على الحائط الذي خلفه .. يتحرك رائحا غاديا كقرد كبير :

\_ أنا المجنى عليه والنبى .. هى حكاية محضر ؟ هو أنا عجزت من شويه ؟ ثلاثين سنة خدمة وحياتك ويوميا بهذا الشكل .. جبتها من المنزلة لعنيبة ومن العريش لمرسى مطروح .. وشفت اللى ادبح عشان عود قصب ، واللى حرق جرن عشان كوز دره .. الناس اجننت .. هو الواحد شاب من شويه ؟ ..

وأنهى كلامه فجأة وانقض على يد كانت تمتد إلى المكتب وخبط عليها بعنف وعصبية قائلا:

- قلتلك ميت مره شوفلك نشافه تانيه .. هو ما فيش فى القسم كله إلا دى ؟ .. أعوذ بالله أحنا فى سوق النور ؟

قال هذا وانتظر حتى اختفى صاحب اليد مهيض الجناح ، والتفت إلى بوجهه الجاد المشدود الملامح :

ـــوالواحد يبقى حارق دمه .. وأولاد الـ « ... » ولا هاممهم وعمالين بهزروا ...

وكان يشير بعينيه وهو يتكلم إلى حجرة التليفون حيث اجتمع بعض العساكر حول زميل لهم بدين مترهل وله كرش كبير ، وكان بعضهم يكتفه والآخرون يحاولون جذب بنطلونه وإنزاله ، والرجل يلهث ويناضل بكل ما يسمح به شحمه من قوة ..

وبركن عينى لمحت الصول فرحات يبتسم ويضحك ويقهقه ، ثم ينسى كل شيء ويمد رقبته يتابع المعركة .. وظهر عليه أسف حقيقى حين انتهت المعركة بانتصار صاحب الكرش تخلصه ممن حوله . ورفع حينئذ صوته قائلا بلهجة صعيدية خالصة :

ـــآه يا نسوان .. ما قادرنشى على أبو كرش كليته ( شغت ) ؟! وما كاديتم كلامه حتى فتح باب جانبى وظهر المعاون فى الفناء ، وأصبح القسم فجأة أصم أبكم وهبطت الصرامة تجمد كل شيء ، وقال الصول للمرأة فى حزم :

ــ بتقولى أسمك خديجه محمد إيه ؟ ..

وتركته يحقق وشغلتني عنه داورية الليل وقد بدأت تتجمع في الفناء .

وحين تجمعت بدا منظرها عجيبا .. صفان من الظلام التام ليس فيه إلا بريق الزراير النحاسية الصفراء ، وفوق الظلام نار من الطرابيش الحمراء الفاقعة .. وأمام كل صف صف آخر من الأيدى الممدودة تسند البنادق بلا حماس .. وتسمع في الظلام همهمات وضحكات تموت سريعا كالشهب ، وقد يشذ عن الأيدى الممدودة كوع ويلكز جاره .

وفتش عليها المعاون وأنفه ــ كالديك الرومى ــ فى السماء ، وعينه على زرار لا يبرق أو حذاء نفض عنه بعض سواده ، وراح و جاء ثم دخل حجرته ، والظاهر أنه تعشى فقد خرج وهو لا زال يمضغ وعلى شفتيه لمعة ، وفتش مرة أخرى وهو يجفف يديه بعد أن اغتسل ..

واندكت الأرض بالأحذية وكعوب البنادق مرات ، وعوقب بعض وكدر آخرون ..

تمم ..

جنبان سلاح و .. كتفان سلاح .. و .. داورية .. معتادان مارش .. وخرجت داورية الليل تئز وتتايل وفي آخرها العسكرى البدين يحاول عبثا أن يوفق بين جسده غير المنتظم وخطواته المنتظمة ..

وأصبح فناء القسم بعد خروجها خاويا كعربة قطار الليل حين يقترب من آخر محطة ، وعدت إلى الصول فرحات فوجدته لا يزال يحقق مع المرأة ويسألها :

- ـــ اتلموا عليكي فين ؟ ...
  - ــ جوه السيما ..
- \_ وإيه اللي دخلك السيما يا بت ؟ ...
  - \_ محمود ..

- \_ محمود مين ؟ ..
  - ــ محمود !! ..

وهنا بدت على الصول فرحات صعيديته ، وسألها وجبهته معقودة دون أن يكتب في المحضر :

- \_ محمود دا إيه يا بت ؟ ..
  - ــ ابن خالتي ..

ووضع القلم من يده وهو يقول:

ــ اه يا بلد كابوريا ياولاد ال ...

وأخرج من جيبه علبة صفيح قديمة من التي تباع فيها السجاير الغالية ، ولمحت فيها سيجارتين سادة وواحدة بفلة وعلبة كبريت . وأشعل السادة وغمغم بأشياء مبهمة تمس الآباء والأجداد وانجاب الإبهام حين قال لنفسه : \_ سيما .. هه .. قال سيما قال ؟.. وتدخلوا السيما تنيلوا إيه ؟ .. هو انتو بتوع سيما ؟ ..

وانفلت من حديثه لنفسه يسأل المرأة وقد ثنى ظهره إلى الوراء ووضع ساقا فوق ساق :

\_ وتدخلي سيما يا بت مع واد زي ده ليه ؟ ..

وبحث بعينه ناحيتي ولعله كان يود أن يشهدني على إجابتها فقلت له:

ــإيه .. هو المحضر لسه ؟ ..

\_ آه .. لسه .. هو هيخلص ؟ .. حاضر .. أنا عارف انى عطلتك .. دقيقه واحده وافضالك ..

والظاهر أنه حسبني شاكيا أو مبلغا .. ربما هذا .. وربما وجدنى أصليح مستمعا يفضفض لي بما عنده في ليلة من لياليه الطويلة فآثىر أن يؤجسل انصرافي .. و كتب شيئا وهو يبتسم ويقول لى :

ـــوادى انت بتتسلى .. مش بزمتك أحسن م السيما ؟

وتنهد وسأل المرأة ..

ـــ هيه .. وطليقك سلط عليكي ليه ؟ تروحو السيما تنيلو إيه ؟ .. ما تتكلمي يا بت طليقك سلط عليكي ليه ؟ ..

\_ أصلى واخده عليه حكم نفقة ..

وكتب كلمة أو اثنتين والتفت إلى بنظرة فيها استنكار:

ــروايات ؟ سيما ؟ روايات إيه اللي بيعملوها دى ؟ يبلوها ويشربوا ميتها أحسن !

\_ ليه مبتعجبكش ؟ ...

ـــ تعجبنى ؟ تعجبنى ازاى ؟ الفيلم لازم يملا مخ الواحد .. إنما إيـــه المسخرة والرقص اللي لا تجيب ولا تودى ..

وأمسك القلم ووضع سنه على الدفتر وبدلا من أن يكتب قال لى بفتور: ـــ أنا مثلا لما قرفت من الروايات عملت مرة فيلم.

و لم تجعلنى قلة حماسته أصغى إليه تماما ، ولكن كلامه وقع فى أذنى موقعا نقلت :

- \_ عملت إيه ؟ ...
- ــ عملت فيلم .. رواية ..
- \_ عملته ازاى ؟ مثلت فيه والا إيه ؟!
- ـــ لأ .. فيلم ألفته مخصوص عشان السينهات ..

وكدت أستخف بالأمر كله وأضحك فقد اعتقدت أنه لا بد شاهد حادثة أو جناية من الجنايات التي تحفل بها حياته ويريد بسلامة نيته أن يجعلها فيلما ،

فقلت وأنا أكتم ضحكى:

\_ فيلم إيه بقى ؟

فقال ببساطة ودون أن يتنحنح أو يعتدل أو يضع القلم ، أو حتى يلقى بالا إلى المرأة والناس الذين عند الحاجز .

\_ كان واحد هندى جه يزور مصر .. راجل غنى قوى .. من الجماعه اللى عندهم فلوس قد الفقر اللى عندنا .. الراجل جه .. وقعد فى لوكانده فخمه قوى زى ما تقول لوكاندة مينا هاوس واللا شبت .. وكان فيه جدع غلبان زى حالاتنا كده .. وانتبهت حواسى كلها فجأة ..

وملت على السور كثيرا حتى لا تفوتني كلمة من كلماته ..

وأقبلت امرأة تستغيث في شبه صراخ ، وكانت بيضاء حلوة وحواجبها مخططة بعناية فائقة .. وزمجر فيها الصول فرحات :

\_ مالك يا وليه ؟ .. مالك ؟ القيامه قامت ؟ ..

\_ الحق يا خويا .. الحق .. الواد موت أمه م الضرب !

\_ واد مين يا وليه ؟

\_ الواد ابن جارتنا ..

ــ واحنا مالنا ؟

\_ يوه .. مش انت يا خويا النبي حارسك البوليس ؟

\_ وهو يصح إن البوليس يدخل بين الواد وأمه ؟

ــ يه .. ولما يموتها الدلعدى يا خويا ؟!

\_ تبقى تفرج .. نبقى في الحالة دى نروح نمسكه ..

ويئست منه المرأة فانتحت ركنا قصيا بالعسكرى الذى كان يحرسنى ، وراحت تهمس له بالقصة وتهمس له أكثر بحواجبها ، ثم غادرت القسم والعسكرى ساهم وكأنما أعجبته همسات الحواجب .

وعاد إلى الصول فرحات وقال:

\_\_ أما مصایب صحیح .. واد قال ! .. بس .. الجدع الغلبان ده كان خالی شغل .. یعنی زی ما یبقولوا موظف فی كوبانیة الشمس .. یعنی الشمس طول النهار فی قزایز ویسرح بیها فی اللیل هیء هیء .. أمال ! .. آه .. فتك فی الكلام .. الراجل الهندی ده مره طالع م اللو كانده فوقع منه فص ألماظ یسوی النهارده بالمیت سبعین تمانین ألف جنیه ، شافه الجدع المصری قام واخده ومدیه للغنی الهندی ..

\_ فص إيه يا راجل يا بكاش ؟

والتفتنا سويا ، وكان الذي قال هذا شاويش طويل معه دوسيه ما لبث أن سأل فرحات :

ــ عملت إيه فى المتوفى المجهول الاسم ؟

وهب فيه فرحات :

ــ حاعمل إيه يعنى ؟ أمشى فى الشارع أقول ياللى ضايع له ميت ؟ ... ــ أنا رحت المستشفى وشفته ..

ـــ تشرفنا ..

ــ شوف يا سيدي عينه عسلية وشعره شايب وعلى صدغه الأيمن ..

ثم التفت إلى قائلا: الراجل الهندى جه يدى للمصرى فلوس إلا رأسه وألف سيف ما ياخد ولا مليم ، يهديك يرضيك مافيش فايدة فكبر قوى ف عين الهندى واكيف منه تمام .. راحت الايام وجت الايام وروح الغنى بلده وهو محتار يجازى المصرى ده إزاى ، فلقى ان أحسن طريقة إنه يشترى باسمه

ورقة لوترية .. تعرف البريمو كانت تكسب كام ؟ والا استنى أما نشرب شاى ..

وصفق كثيرا حتى جاء صبى البوفيه ، وطلب الشاى واختلف معه طويلا على الطلبات التى تناولها فى يومه .. الصبى يقول: ثلاثة وهو يقول اثنين، ولم ينته الخلاف حتى بإحضار الشاى .

وسمعنا باب المعاون وهو يفتح والمعاون يخرج ويقف فى الفناء ويتمطى ، وعاد فرحات يسأل المرأة :

\_ هيه .. إيه الحكاية ؟

\_ هوس .. كفاية لحد هنا .. واتلموا عليكي في السيما ؟

ــ أيوه وفضلو يضربو فيه لما كانوا حيسقطوني ..

\_\_ إيه ؟

\_ أصل أنا حامل في ست أشهر .

وترك الصول فرحات المحضر وقد استولى عليه حب الاستطلاع وأعجبته القصة وسألها :

\_ يخرب بيتك .. حامل من مين يابت ؟

ــ منه يابيه .. من طليقى ..

\_\_ إمتى ؟

\_ قبل ما يطلقني ..

ــ وجوزك ده طلقك ليه وانت حامل ؟

ــ عشان وقع على اليمين ..

ــ يمين إيه ؟ وطلقك إمتى ؟

ـــ ليلة أول رمضان اللي فات .. كسرت قلة امه وانا قايمة اتسحر فحلف طلاق بالتلاته ليكسر قصادها دراعي ! ..

ــوكسر دراعك ؟ ..

ــ لا .. طلقني .

ــ أنا قلبى كان حاسس والنبى .. بقى قلة أمه هى السبب ؟ بقى عشان قلة أمه اكسرت فى رمضان اللى فات ، يتحرق دمى النهارده طول اليوم .. قلة تمنها ساغ يا عالم أروح أنا ضحيتها ؟

اسمعى يابت! هل لديك أقوال أخرى ؟ عايزه تقولى حاجة تانية ؟ ...

ــ أيوه يابيه .. عيوشة هي اللي مقلعاني الحلق .. وآمها هي ..

\_ أف .. يابت أقوال أخرى غير اللي قلتيها ؟

\_ هو أنا لسه قلت حاجه ..

و لم أتمالك نفسي فضحكت ، وتحول غضب الصول هو الآخر إلى قهقهة عالية وانتهى من المحضر ، وتنهد وتثاءب وهز رأسه ..

وخرجت المرأة ومعها خطاب للكشف عليها .. ولدهشتى خرج معها كل الناس الواقفين ..

- هيه .. كانت البريمو تكسب كام ؟ ..

ــانت لسه فاكر ؟ .. تكسب مليون جنيه .. ما هي كانت غالية كان !
واشترى ميت ورقة عشان يضمن المكسب ، وجه السحب واحدة منهم
كسبت البريمو .. مليون من غير الضريبة ، وفكرشي الراجل إنه يطمع عليها
ولا حد شاف ولا حد درى ؟ أبدا .. عمل إيه ؟ راح شارى غليون بضاعة
كبير قوى .. ووسقه حرير هندى من اللي على أصله .. وإشي عاج .. وإشي

ريش نعام .. وإشى جوخ وكشمير ومابوليا محترمة .. وراح باعت المركب بالطقم بتاعها باللي عليها على اسكندرية ، وراح باعت عقد البيع والبوليصة خالصة كل حاجة لصاحبنا على مصر .. يعنى ما عليه إلا يستلم .

وهب .. وصلت المركب اسكندرية .. حاجة باسم الله ماشاء الله .. وبتاعة مين يا جماعة ؟ .. بتاعت فلان .. بالاختصار الراجل باع البضاعة اللي عليها واشترى بها مركب تانيه ، وخلَّى مركب رايحه بلاد بره شاحنة ومركب جاية شاحنة ، وإذا كان حتة الطرد اللي قد كده الواحد بيخلص عليه في السكة الحديد بكذا .. شوف بقى مركب زى دى تكسب قد إيه في السفرية ..

واندفع فى هذه اللحظة إلى الداخل رجل قصير نحيل يرتدى جلبابا كله زيت وبقع ورأسه عار .. ويرتدى قبقابا له صوت مزعج ، اند فع كالسهم داخلا وهو يقول وعلى وجهه ألم عظيم :

\_ يافندى .. يافندى ..

وضايق دخوله الصول فرحات . وكأن أحدهم قد صوب إلى أرنبة أنفه لكمة فاستدار إلى الرجل وأرعد فيه :

\_ مالك ؟

\_ ما ليش يافندى .. واد ابن حزام حدف طوبة كسرت لوح القزاز بتاع بترينة الدكان .. لوح القزاز اللي معرفشي أجيبه النهارده .. بنور بلجيكي من الأصلى اللي قبل الحرب .. تلاتة متر في تلاتة .. روح الله يخرب بيتك يا بعيد زي ما خربت بيتي ..

\_ د كان إيه! ..

ــ بقالة المودة والإخاء في الشارع العمومي ..

\_ عارفها .. اللي عالناصية قدام الجاراج ؟ ...

\_ أيوه .. إلهي يعمر بيتك .. ربنا مايوريك ..

\_ البترينة نهين اللي اكسرت .. اللي عالشارع والا التانية اللي ع الحارة ..

\_ الكبيرة يا فندى اللي ع الحارة ..

فقال الصول وهو ينفض يده من الأمر ويستعد لمتابعة الرواية :

\_ تبقى مش تبعنا .. تبع بولاق ..

\_ إزاى يابيه والبيت تبعكو ..

\_ الناحية اللي ع الحارة تبع بولاق.

\_ یا فندی اعمل معروف ...

\_ قلتلك مش تبعنا .. روح قسم بولاق ..

\_\_ ياف ...

\_ روح .. جك ريح خماسي ..

واندفع الرجل يقبقب خارجا كالسهم: وانتظر فرحات حتى اختفت دقات القبقاب ثم رجع محاولا أن يستعيد الجو الذى عكره البقال .. وثنى ظهره إلى الوراء كثيرا ومال الكرسي لانثنائه .. وخلع الكاب وأمسك به فى يده يديره أحيانا وأحيانا يهف به وقال :

\_\_الراجل كان طهقان قوى من مراكب الخواجات . ففى ظرف سنة ربنا الداله واتسع قوى . وحبه بحبه راح شاريلك مراكب اسكندرية كلها . وما أصبحشى فيه مركب انجليزى . . طليانى . . تلتانى . . كله رفع العلم الأخضر . . .

ولاحظت أن ملامح الصول فرحات قد تراخت وانزاح عنها كل ما فيها من صرامة واشمئزاز واتخذت طابعا عجوزا راضيا ، وعيناه هامتا في سماء الحجرة كفراشتين حالمتين ، وصوته خلى من كل تشويش وحفل بنشوة طارئة حلوة كانت تخرج الكلمات من فمه لذيذة وكأنها محلاة بعسل النحل ، فلا تملك إلا أن تحبها وتحب رعشتها الممتلئة بالرنين وهي تنساب في تؤدة من خلال السكون الحزين الذي خيم حتى أصبح القسم كسرادق المأتم في آخر الليل ، حين لا تسمع فيه إلا فحيح الكلوبات .. وهمسات المعزين :

\_ وأصبح للراجل مراكب لا تحصى ولا تعد .. أصغر ما فيهم تيجى قد القسم دهه عشرة خمستاشر مرة . يسكتشى على كده ؟ . أبدا .. الفلوس مالحستشى عقله فراح شارى بالإيراد بتاع المراكب مصنع نسيج كبير قوى .. وشغل فيه ييجى نص مليون عامل .. بعد شهر واحد مصنع النسيج عمل مصنع قزاز .. والقزاز عمل مطاحن .. ومضارب رز .. وبعد كده إشى محل مسكر .. واشى جاز .. واشى ورق .. واشى مكن .. واشى صلب .. المهم أنه جه يوم عليه امتلك فيه مصانع مصر كلها ..

وما عجبوش الحال الملخبط ده فراح لام المصانع وبناها على جتة تطلع ألف فدان لأ .. ألف إيه ؟ .. هى الألف تنفع .. يبجى عشر آلاف فدان .. خستلاف منهم مصانع والخمستلاف التانية سكن فيها العمال .. مش سكن كلشنكان .. لا .. سكن .. بيت .. بجنينه ببلكونة وحاوى مما جميعه حتى فيه عشش الفراخ والأرانب .. ومش بس كده كان ما يخدش من عرق العامل حاجة .. اشتغل بخمسة ياخد خمسة .. بعشرة بعشرة .. ما هو لا مؤاخذة فى دى الكلمة العامل لما ياخد اللى يقضيه يشتغل ويتفرعن فى الشغل .. واحنا شعب وارث الفرعنة أبا عن جد .. فبدل ما يطلع متر يطلع مترين .. وبدل جزمة جوز جزم .. مهو كده هات وخد .. ادينى حقى وخد حقك .. انت راخر العامل أصبح حاجة تانية .. هدوم نضيفة أربعة وعشرين قراط ،

عفريته مكوية يروح بيها الشغل، ويبجى بعد الضهر يلبس بدلة الأيافة والطربوش النسر والجزمة الاجلسيه . وقهاوى إيه وجناين إيه وكازينات إيه وأبهة إيه .. والناس بقوا حلوين وفرحانين ومبسوطين .. ولا قرف ولا بلاوى .. طول النهار ضحك وفرفشة والليل يروحوا السيمات .. والسيمات دى مهمة قوى .. فى كل شارع سيما وبالأمر لازم كل كبير وصغير يخش .. والأفلام ، أفلام تمام .. وبوليس ، مفيش بوليس .. العسكرى بدل ما يتلطع ٨ ساعات فى الداورية له كشك قزاز فى قزاز فى وسط الشارع .. ومكتب صغير واللى عايز حاجة يجيله ..

استنی بقی لحسن الواغش بعید عنك جه .. أما نشوف إیراد النهاردة حیبقی كام ..

وحقيقة كنت أسمع الضجة الرابلة التى أخذت تترى من ناحية الباب ، ولكنى كنت أنا المنساق هذه المرة وراء ما يقوله فرحات وما ذهلت له تماما .. والتفت ناحية الباب فوجدته قد ازدحم بأربعة مخبرين أو خمسة طوال عراض أيضا ويرتدون اللبد ، وقد أمسك كل منهم فى كل يد من يديه قبضة أطفال مشردين ، ومتسولين عجائز وكل منهم يجر مافى يديه جرا . وقد ربط جلباب الطفل فى جلباب الآخر .. وكان المخبرون يبدون كالعمالقة الطوال ، والأطفال يبدون بجوارهم قصارا صغارا كالكتاكيت المذعورة ، وعبروا الفناء ووصل ركبهم إلى السور الخشبى ، وكذلك وصلت ضجتهم فأنهى الصول فرحات كل الأصوات بقوله :

ـــ بس .. اخرس انت وهوه .. وقفهم طابور یابو طه قدامی .. بطل کلام عمی فی عینك ..

وذهب باقي المخبرين واصطف الطابور في سكون ...

ورجع الصول فرحات إلى الوراء كثيرا وهو لا يزال فى نشوته فقلت : ــــوبعدين ..

\_ ولا قبلين .. حالا مكن من ألمانيا جـه .. والمهندسين والعمـال اشتغلت .. وراحوا زارعينلك الصحرا كلها .. شوف بقي الرملة دي كلها لما تزرع ؟ .. الإكس يمشى فيها سبع تيام ما يحصلش آخرها .. وأهم من ده وده إن مافيش قولة حاجة اسمها توابيت محاريت . سواقي .. كلام فارغ من ده .. كله مكن .. الرى بمكن والدراس بمكن والسباخ بمكن .. وحتى كان فيه مكن يجمع القطن ويحش البرسيم .. والفلاح اللي عليه العمل .. مفيش قولة جلابية .. طاقية .. بشت .. أبصر إيه معرف إيه .. أبدا كله بدل .. بنطلونات كاكي لحدالركبة وبرانيط بيضة نظيفة وجزم بنعل دوبل مايدوبش أبدا .. والفلاحين يسرحوا طابور يشتغلوا لغاية الضهر بس وبعدين يرجعوا طابور .. والنسوان كذلك .. بس دول في غيط ودول في غيط .. والبيوت كلها حجر .. ولمض جاز تبطل خالص كله كهرباء والسحب على صاحب الأرض .. وكل صف بيوت له ميز ياكلوا فيه ويرجعوا لبيوتهم يقيلوا ، وبغدين العصر طابور على المدرسة يقروا ويكتبوا ويعرفوا اللي لهم من اللي عليهم . بس ياسيدي ماطولشي عليك الراجل من كتر الفلوس عنده زهد فيها كانت أرخص من التراب .. وحاكم الفلوس لما تبقى بالشكل ده الواحد لازم يقرف منها . اللي ياكل تفاح كل يوم بيقرف منه .. ففي يوم من الأيام أعلن في الراديو .. أيوه .. مهو نسيت أقولك إنه عمل محطة إذاعة وعمل ليها في كل بيت من البيوت وصلة .. أعلن في المكرفون أنه متنازل عن جميع ..

وكان الصول فرحات ينظر إلى ويقول كلماته الأخيرة وكأنه يفكر فى مشكلة أخرى ..

وقال للعسكري فجأة:

\_ انت واقف بتعمل إيه يا جدع ؟! انت ما وراكشي شغل ؟ .. وقال العسكري في صوت متقطع :

\_ أصل .. الأ .. الأفندى .. أنا مستلمه ..

\_\_ مستلمه ؟ ليه ؟

\_\_ حرس عليه ..

واستدار إلى الصول فرحات وألقى على نظرة ما رأيتها منه قبل الآن واستمر يحدجنى طويلا ، ولا ريب أنه لم يجدنى أصلح كى أكون قاتلا أو سارقا أو خاطف طفل ولست أدرى ما كان يعنيه حين قال فى بطء وشك كثير :

\_ آه . الأفندي ده . هو انت منهم ؟ ..

فقلت وأنا أبتسم:

\_ من مين ؟ .. المهم .. الراجل أعلن إيه في الإذاعة ؟ ...

واستمر ينظر إلى ثم قال بصوت تائه :

... والله مانا فاكر .. يا شيخ فضك .. أهو كلام .. انت بتصدق ؟ ثم شد جلد وجهه حتى عاد كالطبلة الصارمة ، وجذب ( الكاب ) حتى بلغ موضعه التقليدي من جبهته تماما ، وهوى على ( المتسول ) العجوز الواقف في أول الصف بنظرة صاعقة من عينيه ، وانطلقت جعجعته المعهودة :

\_ ما تنطق يابجم .. اسمك إيه ؟!

### الطابور

تتشابه الأسواق في الأرياف ولا تكاد تختلف ، فكل منها فضاء واسع يحده سور ، وله باب وعلى أرضه دكاكين بضاعة ذات رفوف فارغة قد لوحت أخشابها حرارة الشمس وليالى الشتاء ، ثم مصاطب مبعثرة مصنوعة من تبن يؤلف بينه طين ..

ويوم السوق هو بلا شك أروع الأيام وأشهرها ، وهو الزحمة التي تحدث كل حين مرة معلنة وكأنها ساعة بشرية هائلة انقضاء أيام سبعة ، وفراغ جيوب وامتلاء جيوب ، وقبض أجور واختلاس أجور ، وشبع ناس وجوع ناس ، وتقيس العمر ..

وبعد أن ينفض السوق يبقى الفضاء لا تؤمه إلا الغربان وأسراب الخرفان والماعز الطوافة ، وفرق الرياضة من التلاميذ ، والمباريات وكرة القدم . . وتتشابه الأسواق في الأرياف إلا سوق السبت في تلك الناحية ، فقد كان يتميز بظاهرة ، غريبة ، فسوره كله كان مصنوعا من حدائد لها أطراف مدببة ما عدا جزء صغير منه لا يتجاوز المترين قد بني من الدبش والأسمنت وأحكم مناؤه . .

ومن قديم والناس يختلفون فى أمر ذلك الحائط الصغير .. كانوا يقولون أول الأمر أن تحت الحائط كنزا يفتح على ديك يؤذن ذات فجر ويكون للموعود، ولكن ما لبث هذا القول أن بهت وأصبح التسليم به كالإيمان بطلوع ليلة القدر ، حكاية تذكر من قبيل التمنى ..

ثم قالوا إن الحائط أقيم فوق فوهة بئر كانت تتسرب منها الجن من باطن

الأرض إلى ظاهرها ، فأقيم الحائط ووضع فيه مصحف وبخارى وأحجبة وقطع زجاج مكسور ليمنع تسرب الجان ، ولكن هذا القول كسابقه لم يعمر طويلا ..

تم شب جيل كان أقل خيالا من سابقيه رأى في الحائط الصغير تجربة كان القصد منها بناء السور كله من الدبش والأسمنت ، وفشلت التجربة ..

ولا يكف الناس أبدا عن إيجاد تعليل ..

ومع هذا بقى السبب الحقيقي لا يكاد يصدقه أحد ..

فالسوق أول الأمر لم تكن سوقا وإنما كانت قطعة أرض بور لا ينبت فيها زرع .. رأى أهل القرى المجاورة أنها أقرب مكان يفدون إليه مثقلين بالغلة والجبن ، ويعودون وقد خفت أحمالهم بالدمور والمرايا والسكاكين الخارجة لتوها من تحت يد الحداد . وكانت تلك الأرض جزءا من الأملاك الواسعة التي آلت لأحد أعيان الجهة الذي ينحدر من سلالة من ترك أو مماليك .. الله وحده يعلم ..

ورأى المالك فى قدوم الناس ومواشيهم إلى أرضه البور كسبا له وطريقة لإخصاب الأرض حتى يزرعها بعد حين ، ولهذا سمح لهم بالقدوم بل كان يشجعهم على القدوم حين يمر وسط زحمتهم راكبا فرسه وموزعا ابتساماته الراضيات ..

ولما رأى أن الأرض قد استؤت للزرع بما خلفته فيها المواشى من بقايا ، أراد حرثها ، ومع هذا قدم إليها الناس مثقلين وغادروها خفيفين ، وبططوا الحرث وأقاموا السوق ..

وطرد الناس وحرثها مرة أخرى .. وفي الأسبوع التالي أقيم السوق أيضا وبطط الحرث . وأشار عليه أيامها ناظره العجوز أن يستغل الأرض بطريقة أخرى ، فيترك الناس يجيئون على أن يأخذ ضريبة على المتسوقين . وأخذ المالك بنصحه ، وفى الأسبوع التالى انطلق محصلوه يترصدون القادمين ويجمعون الأتاوة ، ولكى يزيد الإيراد ويقلل المصاريف أقام حول الفضاء سورا من الخشب جعل له بابا على الطريق الزراعي وجعل على الباب محصلا واحدا . .

وهكذا وجدت سوق السبت ، وما لبثت أن عمرت وازدهرت وأضيفت إلى بلادها بلاد ، وأضيفت إليها هي سويقات للحمير والجمال ، واكتملت أصنافها حتى من ( البوظة السادة ) والعرقسوس ..

وكنت تعرف أن السبت يومها حين تجد الناس فى الصباح الباكر يزحفون صوب السوق من كل اتجاه ، وتجد الطرق المؤدية إليه قد حفلت بلابسى العمائم والجلاليب والذين بلا عمائم أو جلاليب ، وراكبى الحمير وساحبى الأبقار ، وحاملي المقاطف وطالقي الجواميس والمتوكلين على الله ..

ولم يكن على أهل القرى الغربية أكثر من أن يعبروا الطريق الزراعى ويدخلوا من الباب ليصبحوا فى قلب السوق .. أما أهل القرى الشرقية فالمسألة بالنسبة إليهم كانت أصعب ، فالمشايات التى تنحدر من قراهم كانت تلتقى عند الساقية القديمة فى مشاية واحدة ضيقة تنتهى عند نقطة فى السور الشرقى تقابل الباب فى السور الغربى ، وكان عليهم لكى يدخلوا من الباب أن يلفوا حول السور كله وفى هذا تعب ومشقة ودوشة لا لزوم لها . فاختصروا الطريق إذن وكسروا خشبة من أخشاب السور وأصبح الأمر لا يكلفهم أكثر من المروق بين خشبتين ليصبحوا فى قلب السوق .

وبمضى الوقت أصبحت المشاية الضيقة طريقا معترفا به من السوق وإليه ، وأصبحت الفجوة التي في السوق بابا كأجسن ما يكون الباب . وكان لصاحب الأرض ( سرايه ) تطل على السوق ، كلها مشربيات وشرفات وسلامليكات وأشياء من هذا القبيل ، والظاهر أنه كان واقفا فى شرفته ذات يوم فرأى طابورا لم يكن يعرف كيف يبدأ ولكنه رآه ينتهى فى السوق من خلال السور ، فجن جنونه وركب رأسه ، وركب كذلك حصانه ، وانطلق يرى الأمر . وهناك رأى الفتحة فشلضم وبرطم وأمر بإصلاح الخشبة المكسورة فى الحال ..

ويوم السوق التالى وقف فى الشرفة يشمت فى الطابور الذى لا ريب سيتكسر عند السور ، ولكن آلاف العفاريت ركبته حين رأى الطابور يواصل سيره المعتاد ..

ولما أسرع يعاين وجد الخشبة الجديدة مكسورة ، ويقولون أنه جلد النجار الذى أصلحها وجلده مرة أخرى ليصلحها ، بل وقف على رأسه حتى أتمها وامتحن متانتها بنفسه . وفي السبت التالى روع الرجل بالخشبة مكسورة .

واحمر وجهه بالحمق حتى كاديدمى .. وقطع شجرتين من أشجار السنط وكومهما حتى سدت الفجوة ..

وما مر الأسبوع حتى كانت الشجرتان كل في أقصى ناحية والطابور لا يزال لا بداية له ، ولكنه ينتهي داخل السوق من خلال الفجوة ..

وكاد شريان من شرايين الرجل ينفجر ، وهذه المرة كلفه استعمال عقله ليلة بأكملها . وفي الصباح أحضر فرقة من الصعايدة بكريكاتهم وفئوسهم ، وما انتهى الأسبوع حتى كانوا قد حفروا ترعة حول السور كالخندق وأطلق فيها الماء . . .

و لم يتعب نفسه ويقف يوم السوق في الشرفة ولا ما بعده من أسواق ، فقد ( جمهورية فرحات ) كان متأكدا تماما من انقطاع الرجل ..

والذى حدث أن شجرتى السنط جىء بهما ووضعتا فى الخندق وبقى ظاهرا منهما ما يكفى ليخطى الإنسان عليه فى أول سوق بعد الترعة ، ثم قلقلت كتل من الطين الجاف ، نفس الطين الناتج من حفر الترعة وأسقطت فوق فروع السنط ، وبعد أسابيع ردم جزء من الترعة أصبح يصل بين المشاية والفجوة .

ويبدو أن الرجل كان راكبا فرسه يتنزه ذات يوم فوجد المشاية واصلة إلى السور وظل يسب ويرطن أياما ، وظل كذلك يكظم غيظه ، وقد أصبحت المسألة مسألة كرامة وعند وتحد من الفلاحين العبط . فانتقى من بين خفرائه ثلاثة طوالا عراضا وقال لهم : خراب بيوتكم إن نفذ أحد ..

ويوم السوق تلكاً الطابور لأول مرة وما لبث أن توقف ، فقد نشبت عند السور خناقة كبيرة ، وفي الضحى حمل الطوال العراض إلى السراية ودمهم يسيل ..

واستعاد الطابور بقية اليوم سيره وسرعته .. وطاب الخفراء وعدادوا يحرسون الثغرة ، ونشبت معارك أقل حدة ، وتلكأ الطابور مرارا ثم كف عن تلكته واستأنف سيره تحت وابل من حقن الجميز ، أو خيارتين ، أو طورة بلح ، أو نفس دخان ، أو حتى عواف عليكو يا رجاله ..

وذات مرة رأى صاحب الأرض خفراءه جالسين يستظلون بشجرة الجميز وتأتيهم المنح من الذاهب إلى السوق والعائد منه فطرد الخفراء وأحضر بنائين وأحجارا وبنى ذلك الحائط العالى الذى أغلق الفجوة تماما وجار على ما حولها ، وأغلق كذلك كل فجوة فى نفسه ممكن أن يتسرب منها الشك فى احتال فشل الحائط .

و لم یکد سبت واحد بمضی حتی اکتشف الرجل مخبولا أن الخشبة التی بجوار الحائط تماما قد کسرت ، وأن فجوة جدیدة قد صنعت ..

وأقسم يومها أن يبيع السوق ...

ولم يتح له أن يبر بقسمه إذا استولت عليه شركة الأسواق ، بناء على مرسوم وامتياز وبأقساط طويلة الأجل ..

ومع أن الشركة قد أقامت بدلا من الخشب سورا من حديد كلما بلى جددته ، ومع أنها لم تركب رأسها كالصاحب القديم فتستأجر فتوات أو تقيم حيطانا ، بل استعانت بالمركز فجعل لها كل سبت كوكبة صغيرة من الخيالة تجوب السور رائحة غادية ..

مع هذا إلا أنك إذا وقفت فى الصباح الباكر من أى سبت ، فسوف تجد المشاية تحفل بالطابور الذى لا تعرف كيف يبدأ ، ولكنك تراه ينتهى فى السوق من خلال السور ؟

ودائما ستجد هناك حديدة مكسورة ..

## رمضان

كان فتحى \_ وهو صبى فى العاشرة من عمره \_ ثائرا جدا على الرجال الكبار وعلى أبيه بنوع خاص ، فمن حوالى ثلاثة أعوام على ما يذكر ، طلب من أبيه أن يصوم رمضان فقال له أبوه . لا يصح قبل أن تبلغ الثامنة . وكظه فتحى صبره وانتظر عاما طويلا على مضض . وحين حلت مقدمات رمضان من العام التالى وبدأ يرى و الفطرة ، و و النقل ، و و عين الجمل ، تملأ الأجولة أمام الدكاكين ، لم ينتظر حتى يفاجأ بالأمر الواقع وإنما قبلها بكثير انتهز لحظة انسجام من لحظات أبيه \_ وفتحى يعرف أن لحظات الانسجام تلك تأتى فى أول الشهر \_ انتهز الفرصة وذكره بما قاله فى العام الماضى . وأردف هذا بقوله إنه خلاص قرر أن يصوم . وادعى أبوه النسيان التام فى أول الأمر ، ثم لما أخذ يذكره ويضيق عليه الخناق قال له : لا صيام لمن لا يصلى . وكانت إجابة فتحى حماسة صريحة إنه حتما سيصلى .

وحسب أن الأمر لن يكلفه أكثر من الوضوء والصلاة ، ثم يتاح له بعد ذلك أن يصوم .

وكان فى هذا متفائلا جدا إذ لم يتح له أبدا أن يصلى كما أراد .

فقد توضأ كما تعلم فى المدرسة ، وفرد و سجادة ، أبيه ليصلى عليها فإذا بأبيه يسبقه ويطويها . ولما سأله فتحى عن السبب أجابه بأنه يشك فى وضوئه وطهوره ، ويخاف على السجادة أن تلحقها النجاسة . فترك السجادة وصنع لنفسه مصلى من جلبابه القديم النظيف ، و لم يعترف أبوه أبدا بطهارة الجلباب وبالتالى لم يعترف بصلاته ، وقرر فتحى حينئذ أن يجبر أباه على الاعتراف

فيذهب ويصلي في الجامع .

وملأه الجامع روعة وأحاسيس رنانة فيها دمدمات موسيقية ضخمة .. يكح المصلى من هؤلاء فيكح فراغ الجامع الهائل كله ، وإذا قيلت : بسم الله الرحمن الرحم فسرعان ما تتضخم وتتضخم ، وترن وترن ، وتكبر وتكبر ، وتتموج وتلد بسملات أخريات تتصادم وتتكسر عند الجدران العالية الملساء .

ويكون الجوفى الخارج نارا وقيظا والجامع وحده هو الذى يحفل بطراوة ممدودة حلوة ترد الروح . ويكون الضوء فى الخارج فظيعا فى كثرته وقوته ولكنه يتهادى فى النهار إلى الجامع من البرج الذى فى أعلاه المصنوع من زجاج ملون ويسقط منه على المصلين فيلونهم تلوينا جميلا . . وجه يبدو أحمر والرقبة التى بجواره زرقاء ، وعمامة صفراء ، وعين بنفسجية . . وفى الليل تضئ الثريات . . يا سلام على نورها الكثير وبللورها الذى يشع وينور ويزغلل .

أما المصلون أنفسهم فكان فتحى لا يحبهم إلا إذا صلوا جماعة واصطفوا صفوفا وراءها صفوف فى نظام وخطوط مستقيمة ، ويقول الإمام: الله أكبر فيردد المصلون جميعا وراءه: الله أكبر ، وكلهم فى نفس واحد وكأنهم رجل واحد ، كبير جدا أكبر من سيدنا الحسين ، وصوته ليس مرتفعا يخيف إنما صوته يرن رنينا حلوا يحس معه فتحى أنه لا يصدر عنه وإنما بصدر عن ملائكة كثيرين يملئون صدر ذلك الرجل الكبير .

ثم الأروع من هذا حين يسجد المصلون ويراهم فتحى باركين على الأرض .. باركين ، مئات الظهور المنحنية كلها متشابهة وإن اختلفت فى الوان ملابسها ، صانعة بهذا سجادة عالية محببة مزخرفه بكل الألوان تفرش المسجد من الحائط للحائط ..

وفي الجامع أيضا لاقي الأمرين .. فإذا ذهب يتوضأ من الحنفيات ترك الرجال الكبار وضوءهم ومضوا يترقبونه ويتمنون له الخطأ . ويتدخل أحدهم قائلا : إغسل اليدين حتى المرفقين يا ولد .. فإذا غسلهما للمرفقين تصدى له آخر : يا ولد .. ذراعك التي غسلتها لا مست ذراعك التي لم تغسلها .. أعد الوضوء .. ويعيد الوضوء مع أنه يكون متأكدا أن ذراعه لم تلامس ذراعه الأخرى ولا قاربتها . أو قد يبتسم له شيخ له لحية طويلة ابتسامة صفراء ويقول : انت استنجبت يا شاطر ؟! ويخجل فتحى جدا ويهز رأسه ، ولكنه يترك الوضوء كله وينفض يده منه ويذهب ليتوضاً في بيتهم حيث لا رجال ولا شيوخ ..

وإذا ما وقف ليصلى جماعة لاقى الصعاب ، فإن الذى بجواره يدفعه من كتفه قائلا : روح للصف الثانى . والصف الثانى يدفعه إلى الثالث ، وهكذا إلى أن يجد نفسه فى النهاية واقفا فى الآخر بلاصف . ويجد نفسه هو والصغار الآخرين الذين ذهبوا يصلون منبوذين مطرودين فيصنعون وأمرهم إلى الله صفا أخيرا . وما أسرع ما أدرك فتحى أن الوقوف فى الصف الأخير له ميزة إذ يتاح له من مكانه هناك أن يشاهد المصلين جميعا وهم راكعون أو ساجدون ، ومن فرط ما أحب فتحى مشهدهم ذاك كان إذا صلى جماعة وركعواهم كلهم أو سجدواييقى هو وحده بلا ركوع أو سجود ، ليستطيع أن يستمتع بمشهدهم . . حتى إذا ما قاربت الحركة على الانتهاء سارع هو بالركوع أو السجود لئلا يلحظه أحد . .

وهو في صفهم الأخير ذاك كان لا يعدم الأمر أن يأتي مصل مسن متأخرا ليلحق بصلاة الجماعة ، فما أن يرى صفهم حتى يهب فيهم : صلاة إيه دى اللي كلها عيال .. امشى قليل الأدب منك له . ويتفرقون ويتبعثرون ويطيرون تاركين المسجد كله للكبار .. وإذا كان سعيد الحظ ورضى ابن حلال أن يوقفه بجواره في الصف ، فلابد أن أحدهم سيخرج من صلاته ليقول له : يا وله .. انت بتصلى من غير طاقية .. امشى شوف لك طاقية عمى في عينك ! ولهذا لم يتح لفتحى أبدا أن يصلى بانتظام ، وكذلك لم يتح له أن يوفى الشرط الواجب للصوم . وكان يهمه جدا أن يصوم .. و لم يتحمل كل هذا العناء سدى .. كان يهمه أن يصوم ليستطيع أن يتناول السحور فلا يتناوله إلا الصائمون ..

وكان السحور عند فتحى تعادل لذائذه كل القصص التى قرأها والأفلام التى شاهدها ومرأى الأسود والقرود فى حديقة الحيوان .. وكل لذائذ أخرى موجودة فى العالم . ولم يكن قد أتيح له أن يحضر السحور أو يتناوله . كان سمعه ..

فحين يعود بعد أن يكون قد شبع نطا وجريا وصراخا ولعبا مع غيره من أطفال الحارة \_ والظاهر أن رمضان يغير من عادات الكبار \_ فالكبار يودون للأطفال دائما أن يحيوا حياة مثل حياتهم .. حياة كلها جدوخطورة ، فهم لا يلعبون ولا يودون لهم اللعب ، وهم لا يستسيغون الصراخ والقفز ولا يودون للأطفال أن يقفزوا أو يصرخوا ، بل يريدونهم دائما أن يظلوا جالسين مؤدبين متزمتين مثلهم . وكان رمضان إذا جاء وأكل فيه الكبار وشربوا \_ ورمضان الذي هو شهر الصوم يأكل فيه الناس أكثر مما يأكلون في أي شهر آخر \_ إذا أكلوا وشربوا ، تحدثوا وسهروا وتناقشوا وأصبحوا أكثر إنسانية ، فليس غربيا إذن أن يسمحوا للأطفال أيضا باللعب وبالبقاء خارج البيوت وقتا أطول .

كان فتحى يعود وقد استهلك كل طاقته الصغيرة من النشاط ، ومع

هذا .. ومع ما يكون فيه من تعب لا يأتيه النوم ، فبعد وقت قد يطول وقد لا يطول يبدأ السحور ، وحينئذ يرقد فى فراشه وكأن قد انتابته نوبة ملاريا خبيثة تؤرق جسده فينقلب إلى اليمين وسرعان ما يمل اليمين فيفتعل الحركة إلى اليسار ، ويطوح بيده ويشد الغطاء ويرخيه ، وأذناه وعقله وانتباهه كله .. فى الحجرة المجاورة حيث أبوه وأمه يتناولان السحور ..

كانا يبدآنه بصمت لا يسمع فيه إلا تثاؤب أبيه ، وأمه وهى تغمغم بآهات وتشكو من تعبها ومفاصلها ومن الجيران ومن قطط الجيران وكلابهم والعيش الذى جف . ثم كان أبوه يتطوع ويقول كم الساعة وقتها دون أن تسأله أمه ، ولا ريب أنه يفعل ذلك ليفتتح حديث السحور وما ألذ حديث السحور .. كان أبوه هو الذى يتحدث في الغالب ، وإذا تكلمت أمه تقول كلمات مقتضبة أو تعيد الشكاية من مفاصلها . وكان فتحى يجب أباه لحديثه ذاك حين يتكلم بصوت فيه تلك الرنة التي تصاحب صوت المستيقظ لتوه من النوم ، ويخرج كلامه إلى الظلام والسكون فيبللان ذلك الرنين ويحيلانه إلى نغمة حبيبة تنفذ إلى قلبه وتنغزه ، فيتمنى لو قام في التو وعانقه وقبله ..

وحين يتحدث أبوه وفى فمه بقية من طعام .. ويمضغ قليلا ثم يتابع الحديث الذى تحيطه هالة موسيقية من أصوات الملاعق وهى ترن فى دقات معدنية هامسة ، كان حينئذ يتصور أن أباه ينطق شهدا ، ويستعذب الطعام الذى يمضغه دون أن يعرف ما هو حتى لو كان طعمية ، ويطوح بيده ويشد الغطاء ويرخيه ويتمنى أن يقفز من الفراش ليكون قريبا من حديثه ونبراته ..

وحين كان الحديث يعرج على الأولاد ــ أى على فتحى وأخوته ــ كان يتمنى أن يتعثر بائع الزبادى الذى ينادى بصوته المزعج في الخارج ويسقط في حفرة فيسكت ، وأن يضرب جارهم امرأته التي تصرخ بصوتها الملسوع ولا تتوقف ويأمرها بالسكوت ، وتصمت الدنيا كلها ليستطيع أن يسمع أباه وأمه وهما يتحدثان عنه . فأمامه في النهار لم يكونا يتحدثان إلا ليلوماه أو يأمراه بإحضار شيء أو يشتهاه ، أما حديثهما من ورائه ــ وهما معتقدان أنه نائم ــ فقد كان يود بحياته كلها أن يسمعه ، ويسمع المشاريع التي يدبرانها له . يقول أبوه : نشترى له بدلة كاملة للسنة الجايه ، ويدق قلب فتحى و كأن البدلة جاءت وارتداها . وتقول أمه : أحسن نوديه الزراعة المتوسطة يخلص بسرعة . ويغتاظ فتحى ويكاد في مرقده يقول لا بأعلى صوته ، ولكن أباه يتولى الإجابة ويصر على دخوله الثانوى ، فيقول فتحى في سره : يحميك يا أبي .

ويصبح حينئذ طرفا ثالثا في الحديث ، طرفا بعيدا يسمع ويرضى ويفرح ويسخط ويثور ، وهو آمن أنه يستمع إلى الحقيقة المجردة ، وأن ما يقوله أبواه هو الذي سيقرر مصيره وليس الكلام المنمق الذي يسمعه في النهار ..

ثم الكارثة .. حين يحس فتحى ــ وقد تربى له من أجل ذلك إحساس مخصوص ــ أن الطعام قد انتهى .. فيبدأ بطنه يمغص ولعابه يسيل ، حين تنساب إلى أذنيه أصوات أبويه وهما يغمغمان فى إبهام ، وتبدأ أصوات مضغهما تأخذ طابعا معينا يعرفه فتحى جيدا ، إذ فى هذه الأثناء يكون دور الكنافة » أو « قمر الدين » أو باقى القائمة قد أتى ، ومع أن فتحى يكون عالما تماما أن سيناله من كل صنف نوب فى الصباح ، إنما فرق كبير بين أن يأكل الكنافة فى السحور هكذا والسكون شامل والدنيا ظلام والنور جميل ، وبين أن يأكلها فى وضوح الصبح وشمسه الكثيرة وذبابه وضجيج أخوته ومنازعاتهم .. فرق كبير ..

حين يبدأ السحور كانت تبدأ سعادات فتحى .. وكذلك تبدأ متاعبه ،

فإذا لم يعجبه الطعام ظل راقدا مستيقظا أسعد ما يكون برقدته واستيقاظه وسماعه حديث السحور ، أما إذا لم يعجبه الحديث وسخط على مشاريع المستقبل أو هفت نفسه إلى صنف من أصناف الطعام ، كان حينئذ لا يتحمل الرقاد فيقوم مدعيا الذهاب إلى دورة المياه مارا بالصالة ، وحريصا على أن يرى نفسه لوالديه في ذهابه وإيابه ، وأن يريهم بالذات وجهه المتجهم الذي يكاد يبكي .. بل أحيانا كان يبكي ، وأحيانا كان يسأله أبوه عن سبب بكائه فيبكي أكثر ، فإذا ألحف أبوه ادعى بعد لأى أن عنده مغص مثلا أو أن برغاثا قرصه ، فإذا ضحك أبوه ازداد بكاؤه .. وكل همه أن يشعرهم أنه غاضب . وأحيانا كان يدعى أنه يحلم ويصرخ فيجرى عليه الوالدان ويمثل دور المستيقظ لتوه من كابوس تمثيلا ـــوالحق يقال ـــرائعا ، حتى أن واحدا من والديه لم يشك أبدا فيه . وكان ما يضايقه جدا أنهما لم يفهما أبدا و لم يدعواه أبدا إلى مشاركتهما السحور أو حتى الجلوس والاستماع إلى الحديث .. كل مـــا يقولانه .. نام يا خويا .. نام يا حبيبي .. اسم الله عليك .. وكلام مثل هذا من كلام الشبعانين المتحدثين المستمتعين ...

كان من الضروري جدا أن يصوم فتحى ..

وظل ساخطا على الكبار وعلى أبيه بصفة خاصة ، حتى أجابه إلى مطلبه أخيرا .

جاءت ليلة النصف من شعبان وأنذرهم فتحى بأنه لا محالـة صامم ، فطبطب أبوه على كتفه وقال : إن شاء الله .

وافرح يا فتحى وأخبر كل الأولاد والقرايب والعمات والخالات .. خلاص انتهى كل شيء وابتسمت الدنيا ، أجل سيصوم ! قال له أبوه هذا وانتزع التصريح من أمه .

وجاء رمضان ، وليلة أول سحور لم ينم بل حتى لم يخرج من البيت ليلعب مخافة أن يغافله أبواه وهو في الخارج ويتسحرا . فإذا أصبح الصباح قالوا معلشي لقد فاتك السحور فلا ينبغي أن تصوم ..

وحين جلس الثلاثة في النهاية هو وأبوه وأمه ، كان فتحى حريصا جدا ألا يحدث صوتا أو يسقط شيئا ، فقد كان خائفا خوف الموت أن يصحو أحد إخوته الصغار ويصر على السحور ، قائلا وهو يبكى بكاء سخيفا : اشمعنى فتحى ؟ . . ومن يدرى فقد يرق قلب الوالدين ويوافقان ؟ فتفسد الوحدانية التى يتمتع بها معهما ويفسد تعب السنين .

وحدث لأمر ما أن قام أخ من إخوته وعبر الصالة إلى دورة المياه ، فقال لأبيه : على فكرة .. دا قايم يتمحك وبس . أوعوا تسالوا عنه ..

ومهما كان ما حدث فى ذلك السحور .. وكان أول سحور فى رمضان ويزخر كالعادة بأطايب الأطعمة .. مهما كان ما حدث فإن فتحى لم يجد له ذلك البريق الذى أحرق خياله أياما وليالى ، بل ناله ما يناله دائما إذا وجد فى حضرة الكبار : هات دى .. ودى دى .. ناولنى ده .. شوف إيه اللى بياكلنى فى ضهرى .

ونام فتحى ..

وصحا متأخرا ، بل استيقظ مبكرا ولكنه آثر أن يبقى متناوما حتى يغادر الفراش فى الضحى كما يفعل الكبار تماما .. صحا وفى عقله حقيقة واحدة : ألا يسهو ويشرب فقد حذره أبوه مرارا من هذا ..

وراح ينظر إلى إخوته وهم يحدثون بكلامهم وعبثهم ضجة الصباح الوجلة ، التي تكفيها شخطة واحدة لتنتهى .. راح ينظر إليهم ويستصغرهم ويستصغر ما يقومون به قائلا في سره : لهم حق .. فهم فاطرون . ولكنهم

بدءوا يحلون لغزا كان واردا بإحدى المجلات .

ووضح من كلامهم أنهم يلفون بعيدا من الحل ، وكان لابد أن يقنعهم بأنهم صغار وأنه ذكى ولا بد أن يحله هو قبل أن يصل واحد منهم إلى حله .. فتخلى عن الفراش وقام ببطء وهو يحس أن شيئا كبيرا ثقيلا يملؤه ، وأن في فمه طعما غريبا قابضا ..

وحين جلس معهم وحاول حل اللغز ففشل أدرك أنه لغز تافه لا يستحق اهتمامه ، بل بدا له أن كل ما يحدث في العالم إن هي إلا أشياء تافهة لا تستحق عناء الجلوس . وعاد إلى النوم مرة أخرى . . عاد وهو مطمئن فهو في إجازة ، ورمضان كان طيبا فجاء في الصيف هذه المرة . .

واستيقظ فتحى لا لأنه كان يريد أن يستيقظ ، ولكن لأن شيئا أقوى منه أجبره على أن يتململ ثم ينتبه ويصحو . كان الطعم الذى فى فمه قد تغير وأصبح فمه جافا يكاد يكون لا طعم له ، وأحس لحظة أن فتح عينيه أنه عطشان . وفى الحال قام ووجهته الماء . ولكنه توقف حين طردت الخطوات القليلة التى خطاها البقية الباقية من النوم فى رأسه ، وأدرك أنه صائم . وفرح وكأنه كان سيسقط فى حفرة ثم تبينها . ولكن عجيب هذا . . إنه ما إن أدرك أنه صائم حتى ازداد عطشه .

وجلس على الكنبة التى فى الصالة .. كانت أمه فى المطبخ غارقة لأذنيها فى المعام وأبوه فى الشغل وإخوته لا يبدو لهم أثر ، والساعة حوالى الثانية عشرة . وكان عليه أن يتخلص من ذلك الإحساس السخيف الذى يملاً فمه . حاول أول الأمر أن يتخلص منه بتجاهله فذهب يبحث عن شىء يشغله ، وكان من زمان يريد أن يفك ( المنبه ) ويتفرج على ( العدة ) التى بداخله .. وأسرع يبحث عن معدات الفك ، ولكن مسمارا استعصى عليه ورفض أن

يدور إلى اليمين أو إلى اليسار ، فرمى المنبه . لم يكن يقصد أن يرميه وإنما وجد نفسه هكذا يدفعه مرة واحدة من فوق الترابيزة فيسقط وتتكسر زجاجته . وانحنى يلم الزجاج المكسور ويخفى الجريمة ويخفى المنبه هو الآخر ..

وهبط من المنزل بعد تجربته العقيمة تلك يبحث عن إخوته أو عن أطفال في الحارة فلم يجد ، كلهم كانوا في تلك الساعة الملعونة في بيوتهم ، والحارة ليس فيها إلا الشمس الحارقة والتراب وما عليه من ذباب ..

وعاد إلى البيت وهو أكثر عطشا ، والضيق قد بلغ به حدا جعله يتمنى أن يقف موقفا من المواقف التي كانت تخذله فيها شجاعته ويتغلب عليه فيها حياؤه وخنوعه .. كان يتمنى أن يجابه موقفا كذاك ليرى الناس العين الحمراء ، والضيق من العطش قد طرد منه كل خنوع وحياء ..

وحاول أن ينام لما لم يجد موقفا ولا ناسا .. وباءت محاولته بفشل ذريع . وسرعان ما مج الفراش و فكر فى أن يجرى ويلف فى البيت ويكركب أشياء ثم ينظمها عله يساهى الشعور بالعطش الذى كان يفرى نفسه ..

ولكن ما إن بدأ يتحرك ويلف حتى جلس على أقرب كرسى وقد أيقن أن كل حركة تزيده عطشا على عطش ، وأن نتيجة محاولاته لنسيان المشكلة أنها تعقدت وازدادت حدة وخطورة ، وأصبح فمه ينبح ويصرخ ويتلوى وكأنه تناول حفنة من الشطة واستشرت حرارتها تلهب كل جوارحه ..

وبدأ فتحى حينئذ يفكر .. بل هو فى الحقيقة بدأ يتململ من الصيام ويدرك وعورة الطريق الذى اختاره .. بل الذى تمناه وهفا إليه عدة رمضانات . بدأ يفكر ويقارن بين العذاب الذى هو فيه واللذة التى حظى بها ساعة السحور . والحق أنه لم يقارن ، فكل ما كان يشغله هو العذاب .. وكل ما كان يبحث عنه هو المهرب ..

كان من لحظات قد سمع الراديو يدق عند جيراتهم معلنا الواحدة ، أي باق من الزمن خمس ساعات حتى يستطيع أن يشرب .. خمس سباعات ؟ يا للهول .. خمسة في صفر بصفر وخمسة في ستة بثلاثين ومعانا صفر .. يعني ٣٠٠٠ دقيقة . لا يمكن ! لا يمكنه أبدا أن يستمر حيا يعانى ما يعانيه ٣٠٠ دقيقة . ٣٠٠٠ يبدو أن هناك خطأ . لا . هناك صفران فقط . يعني ٣٠٠ دقيقة ولو .. لايمكنه أبدا أن يمكث ولاحتى ٣٠٠ ثانية . اسمع يا ولا يا فتحى .. خليك جدع .. واصبر وصابر .. وتحمل الألم حتى يحين موعد الإفطار وتشرب ثم تسترخي كايفعل أبوك والصائمون ، وتتحدث عن العطش الذي لازمك من أول النهار وتبالغ في وصفُ أهواله .. آه .. يجب أن يحتمل .. خصوصا وأنه سمع شيخا من الذين يكثرون من زيارتهم في رمضان يقول: إن الجزاء يزداد بمقدار ما يتحمله الصائم من ألم .. هه .. يعني إيه ؟ سيتحمل ولن يهمه .. كلهاكم ساعة وينتهي .. كم ساعة ؟! ٣٠٠ دقيقة . يعني واحد اثنين تلاته .. عشرة عشرين .. ثلاثين .. مضت دقيقة .. يا نهار أبيض .. باقى ٢٩٩ مرة مثل هذه .. لا لا لا .. لن يستطيع التحمل! نسيموت ، ويستشهد ، ويذهب إلى الجنة حدف ، والجنة فيها ماء .. ياللهول ! ليس فيها ماء .. لقد سمع أن فيها أنهارا من الخمر واللبن والعسل .. أف .. أعوذ بالله .. إنه لا يطبق ذُكر العسل فهو يعطش .. إنهار عسل ولين ، ولكن ليس فيها ماء . وإذا عطش عطشا مثل هذا في الجنة فكيف يشرب ؟ وهل يرتوي من اللبن ؟ .. اللبن الأبيض السميك الذي .. أعوذ بالله .. إخص .. ما هذه الخواطر ؟ إنه الشيطان .. لابد أنه الشيطان يوسوس في صدره . ابعد أيها المتجوس لن أسمع كلامك .. أبدا .. أبدا أنت تدلني على الفساد .. لن أسمع كلامك ..

وسمع فتحي في تلك اللحظة \_رغم ضجة الوابور \_الحنفية مفتوحة في

المطبخ والماء يندفع منها كركر كركر .. لا ريب أن الشيطان هو الذى فتحها أو وسوس لأمه حتى فتحتها .. سحقا لك أيها اللعين ! والله لو حتى صببت الماء فى فمى لن أشرب .

وضم فتحى فمه بشدة وكأن هناك ماء حقيقيا سيدخله ، وظل على وضعه ذاك مدة وقد خيل إليه أنه إذا فتح فمه فسيفطر لا محالة ..

ولكن الشطة استعرت حرارتها داخل فمه المضموم ، وكان حلقه قد أصبح جرحا كبيرا ملىء بها وأشعلت فيه نارا وألما . وحاول أن يبتلع ريقه ومصمص ودار بلسانه داخل فمه كله محاولا عبثا أن يجد نقطة بلل واحدة .. وكان الماء لا يزال يهطل بشدة من الحنفية ويدخل أذنه حتى خيل إليه أنه يشرب الصوت من خلال أذنه ، فسد أذنيه ومع هذا ظل خرير الماء ــ أو إبليس ــ يخترق أصابعه ويداعب آذانه ..

وطوف خاطر في عقله وحوم .. إنه لن يفطر قطعا ولكن ماذا يفعل بذلك العطش ؟ إنه يذكر أن ذات الشيخ قال إن المضمضة ليست حراما فلماذا لا يتمضمض ؟ وكان ما يخيف فتحى هو أن يتسرب بعض الماء إلى بطنه إن هو حاول ذلك ، ولكن إلحاح الخاطر أقنعه أنه لابد أن يثق في نفسه . وقام وذهب إلى نفس الحنفية اللعينة التي أرهقت أعصابه ووقف يردد النظر بين أمه وهي منهمكة في إعداد الطعام وبين الحنفية ، ثم مد يده وملأها من السيل المنهمر . ورأته أمه وهو يدفع الماء إلى فمه فشهقت شهقة عظمى وسألته عما يفعله ؟ فأجابها بأن ريقه جاف وأنه فقط يبلل فمه . فابتسمت ابتسامة من يشمت وقالت : مش قلتلك ؟ .. عامل لى راجل .. أما أشوف ..

واغتاظ فتحى جدا فأفرغ كل مافى فمه من ماء وراح يبصق بشدة حتى أتى على كل ما أحدثه الماء من بلل وريق ، وعاد إلى حيث كان في الصالة وفي صدره تصميم مانع قاطع أن يثبت لأمه ولكل الناس أنه رجل .. وأنه قادر على الصوم مثلهم وليكن بعد ذلك ما يكون ..

ولكن المضمضمة التى لم تتم أججت فقط كل النار التى فى جوفه ، وجعلت العطش يمتد داخل زوره إلى بطنه حتى بدأ يحس أن عامودا من نار وفلفل يحشو رقبته ويملأ فم معدته ..

لو يشرب مرة واحدة فقط لسكت هذا النباح واستطاع أن يواصل الصيام إلى منتصف الليل إن شاءوا ، ولكن الشرب معناه أن يفطر ولا يدعه أحد يتناول السحور بعد الآن وتسقط رجولته في أعين والديه ، ويعدونه طفلا فاطرا مثل إخوته الفاطرين ..

ولكن هل من الضرورى أن يعلم الناس أنه شرب هذه المرة ؟ ماذا لو شرب خفية دون أن يراه أحد ، ثم أمضى بقية اليوم في صيام ما بعده من صيام وسمح لنفسه حتى أن يشكو مما لاقاه من ظمأ بعد الإفطار ؟ ماذا لو حدث هذا ؟ إنه لن يفقد شيئا بالمرة ولن يعيره أحد بما فعل إذ إن أحدا لن يراه ، فهناك في الصالة قلة ماء لا تزال فيها بقايا من ساعة السحور ، سيأ خذها و يذهب إلى حجرة الجلوس و يغلق الباب و يفرغها في فمه بأسرع ما يستطيع ، ثم يفتح الباب و يتأكد من خلو الصالة و يضع القلة في مكانها ، و يلعب بعد هذا أو ينام و يمرح بقية اليوم ..

ولكن .. رمضان !!

إن رمضان سيعرف لأنه يرى الناس ولا يرونه . ويعرف إن كانوا يقطرون أولا يفطرون ...

وارتسم رمضان في عقل فتحى هائلا في حجم الدنيا كلها .. يجلس على عرش من ذهب وألماظ .. بعيدا .. بعيدا خلف الشمس ووراء كل النجوم

والسحب .. يعرف دون أن ينظر من الفاطر ومن الصائم .. ويبطـــــح الفاطر .. يلقى عليه حجرا يصيب منتصف جبهته ويسيل الدم .

وارتعش فتحى للرؤيا .. وأفاق منها قليلا وحاول أن يتذكر واحدا فقط يعرفه بطحه رمضان لأنه فطر فلم يجد .. ولكن من يدرى ربما يكون هو أول واحد ستناله البطحة .

وسأل نفسه سؤالا مفاجئا .. ألا يمكن أن تكون حكاية رمضان هذه كذبه وأنه لا يرى ولا يبطح ولا هو حتى موجود بالمرة ؟ لم يدر فتحي من أين جاءه السؤال .. لعله الظمأ .. ولكنه ظل حائرا بين الخوف الذي يدفعه إلى أن تكون الإجابة لا والظما الذي يهيب به أن يكون الجواب نعم ، ظل حائرا إلى أن عنت له فكرة: سيعد إلى ثلاثة ثم يحاول رفع ذراعه ، فإذا كان رمضان لا يريده أن يرفعها فليمنعه .. وعد .. واحد .. اتنين .. تلاتة .. وحشد كل قوته وقد خيل إليه أول الأمر أنه مهما حاول فلن تتحرك . وقفزت الذراع فجأة من جانبه في الهواء . وملأه الرعب ولكن بعد أن اطمأن قليلا وبدأت الثقة تأخذ طريقها إلى نفسه ، رأى أن يجرب تجربة جديدة فوقف وقال : سأمد رجلي وأخطو ، فإذا كان رمضان يراني ويستطيع منعي فليمنعني . ومدرجله فامتدت ، وخطا خطوة وثانية وثالثة وكاد ألا يتوقف ، وازدادت في نفسه الثقة وقلت الرهبة ، بل انتابه غير قليل من الاستخفاف برمضان ومحاولة تحديه ، ورأى أن يتحداه أكثر ليبين قوته إن كانت له قوة ، ويجرب تجربة أخيرة .. واخذ القلة إلى حجرة الجلوس وقال سأتذوق قطرة واحدة من الماء ، فإذا كان رمضان يستطيع أن يكسر القلة قبل أن تصل إلى فمي أو أن يقطع لساني إن كان جدعا فليفعل.

ومع امتلائه بالثقة والتحدى فقد رفع القلة فى وجل وهو يحملـق فى ومع امتلائه بالثقة والتحدى فقد رفع القلة فى وجل وهو يحملـق فى ومع المتلائه بالثقة والتحدى فقد رفع القلة فى وجل وهو يحملـق فى

انبعاجها وكأنه يتوقع في كل لحظة أن تنفجر .. ولم تحدث الكارثة وأيقن حينئذ أن رمضان وحجارته وبطحاته لابد خرافة وأفرغ كل ما تحتويه القلة من ماء في جوفه .. وكان يتوقف ليتلذذ بطعم الماء ويتساءل كيف لم يفطن أن للماء طعما من قبل ، بل وطعم حلو ساحر لم يتذوق مثله أبدا .

ورجع إلى جلسته فى الصالة ينتقم من الوقت الطويل الذى أمضاه فى لهيب العطش بوقت طويل آخر يمضيه فى نعيم الرى . ولكن شعورا بالانقباض بدأ ينتابه . كان هينا أول الأمر ولكنه ما لبث أن ثقل وتعمق . أحس بشىء يهبش صدره و يخيفه ويرهبه . . و لم يكن خوفه كخوفه من العفاريت أو الجن أو أبو رجل مسلوخة وإنما كان يحس بأنه خائف من شىء داخله ، وكأنه يخاف من نفسه

ولم يسكت ذلك الإحساس بل راح يدب ويتسلل إلى عقله ويملك عليه كل تفكيره. وأيقن أن لا بد أن تحدث كارثة ، لابد أن رمضان سينتقم منه ويجازيه .. فمن غير المعقول أن ينال متعة الشرب بعد الظمأ هكذا وبدون ثمن . وكان مستعدا أن يتقبل أى عذاب أو أية مصيبة ، فقط لو كان يعرف نوعها أو ما هى . أجل ، إذا كان رمضان لم يفعل شيئا قبل الشرب فلابد أنه فاعله بعده . ولكن متى ؟ وكيف ؟ ذلك هو ما يخيفه . هل يبطحه ؟ هل سينتقم منه بأن يجعله يرسب في الامتحان ؟ هل تقع فوق رأسه الصخرة المعلقة بين السماء والأرض والتي كثيرا ما حدثته عنها جدته وقالت إنها صعدت وراء النبي ؟ هل يمرض أخوه ويموت ؟ ..

وتوقع أن تحل الكارثة فى العصر .. ولما لم تحل قال بعد المغرب .. ومضى المغرب والعشاء ، وقبل أن ينام ضربه أبوه علقة ، وقال فتحى : بس .. هذا هو عقاب رمضان . ولكنه فطن حين رقد يبكى فى فراشه إلى أن أباه ضربه

لأنه كسر زجاجة المنبه وليس من أجل إفطاره ، وبالتالى لم يكن ما حل به هو العقاب المتوقع .

وانتظر فتحى أن تحل المصيبة فى الأيام التالية ولكنها لم تحل ، حتى بعد أن تكرر ظمؤه وتكرر شربه خفية ..

لم تحل إلا حينا ضبطته أمه وهو يشرب ذات يوم . وبعد أن انجابت لحظة مفاجأته وانتهت من تأنيبه وتعنيفه فرح فتحى فى قرارة نفسه لأنهم سوف يقولون إنه لا يستحق الصيام ويجعلونه يفطر ، ويستطيع بعد هذا أن يشرب ويأكل دون عقاب أو وجل . ولكن المصيبة الكبرى أنهم هذه المرة قالوا إنه باظ .. وضربوه علقة ، وأرغموه على الصوم بالقوة ، وراقبوا التنفيذ بدقة . واضطر فتحى أن يصوم بعد هذا ويواظب على الصيام لا خوفا من رمضان وبطحاته ، ولكن خوفا من أهله الذين لا يفيد معهم رفع ذراع أو إجراء تجارب ، إذ هم يعرفون كل شيء إن آجلا أو عاجلا ، وهم الذين يتولون بأنفسهم العقاب ، ويضربون العلق ويبطحون ولا يرحمون ..

## قصة حب

1

ليست أول محطة ترام فى شبرا البلد بداية خط فقط ، ولكنها قبل هذا مركز تفاعل مستمر بين القاهرة وضواحيها وبين المدينة والمصانع الكثيرة المبعثرة حولها . تجد عليها الفلاحين القادمين إلى مصر وقد أخذتهم رهبة المدينة مبهورين بطنين الحركة الزائدة والدنيا الجديدة ، وتجد العمال الزاهدين فى تلك الحركة الحاقدين على المدينة ولا يجدون منها خلاصا .

وتجد ، في ذلك اليوم من يناير ، حمزة واقفا كعادته ينتظر الترام الذي يتزك الصف الطويل من العربات المكدسة في أول الخط ويأخذ طريقه إلى « العتبة » .. ينتظر وهو يتنفس بارتياح فتلك المحطة كانت أيضا مركز تفاعل مستمر بين الحياة الخانقة التي يحياها في الصباح في المعاطف البيض وأحواض الصبغة وأنابيب الاختبار ، وبين الحياة الرحبة والواسعة التي كانت تبدأ حين يضع قدمه على رصيف المحطة ..

كان واقفا وقد أغمض عينيه قليلا خلف نظارته ليستطيع الرؤية بوضوح ، وكان يرقب الناس ويتململ قلقا ، وكانت الوجوه التي تقع عيناه عليها جادة صارمة يخيل إليه أن بريقها شرر رغبات كامنه تتحرر ، وانطلاق ثورة ، وعندما كانت تتناهي إليه الأصوات كان يحسبها دائما حفيف مظاهرات أو جئير إضرابات ، ورغم البرودة والغيوم التي تحجب وجه الشمس فالدنيا كلها كان لها رائحة .. رائحة خاصة ينتفض لها الجسد كرائحة فوهة بندقية

حديثة الإطلاق ..

واندفع ترام من أول العربات بادئا رحلته الطويلة .. وبالكاد قفز إليه حمزة واحتل مكانا بين الناس الكثيرين الواقفين وما انتهى الكمسارى من بيع التذاكر حتى كان الناس قد تآلفوا تماما ورفعت من بينهم أحجبة التحفظ والغربة .. واستمع حمزة إلى أحاديثهم وهو يرهف آذانه .. لا مشادات ولا اعتذارات أو نكات .. الإنجليز .. الإنجليز .. والكتايب والفدائيين وكفر عبده والدبابات .. أرسكين والعساكر المصريين .. أربعة إنجليز اتقتلوا .. عطة الميه اتنسفت .. ليهم يوم ولاد الكلب .. والله لنطلعهم من مصر بزفة .. لو فيه سلاح .. لازم السلاح .. نجيبه منين ؟ منين ؟ م الدنيا الواسعة .. بس لو كانوا يطلعوا انا واحد لواحد ! ..

وجاءت محطة حمزة بعد ثلاث محطات من بداية الخط في منتصف المسافة بين القاهرة وشبرا البلد . . وحين هبط لم تكن هناك منازل ولا عمارات . . مساحات واسعة من الأرض المخضرة وأعمدة تليفون وعشش مصنوعة من الصفيح وأكوام هائلة من القمامة . .

ومشى قليلا فى أرض مهجورة حتى وصل إلى المكان المهد الذى نصبت فيه خيمة ، وصنعت فى طرف منه ( تبة ) ضرب نار ، وأقيمت فى الطرف الآخر موانع من الخشب أمامها خندق محفور . وعند الخيمة وجد أيضا اليافطة المكتوب عليها بخط صغير : اللجنة العامة للكفاح المسلح ، وأسفلها وبخط كبير : معسكر تدريب شبرا . ووجد اليافطة معوجة فعدلها .. وأشار بيده محييا ورد تحيته شاب أسمر ضخم يرتدى بنطلونا طويلا أصفر وفائلة لها رقبة وأكام .. وكان الشاب قدرآه قادما فغادر جلسته على التبة وأقبل ناحيته ، وسلم عليه حمزة ثم دخلا إلى الخيمة يحتميان من الزمهرير ، وجلس حمزة على وسلم عليه حمزة ثم دخلا إلى الخيمة يحتميان من الزمهرير ، وجلس حمزة على

صندوق له مقابض على جانبيه وجلس الشاب على الأرض بجواره . وفرك حمزة كفيه ليدفئهما ونفخ في يديه دون جدوى فقال وأسنانه تصطك :

- ـ د الدنيا برد ..
  - \_ أوى ..
- ــ يا سلام على كباية شاى يا حسن!
  - ــ عاوز تشرب شي ؟ .
    - ــ يا سلام يابو على ..
  - ــ شى .. نعملولك شى ..

ومضى الشاب إلى وابور غاز برجلين اتنين ، وكوز صفيح وإبريق فخار كبير مملوء بالماء وعلبة فيها سكر ، وأخرج من جيب بنطلونه باكو شاى نصف أوقية .. وبينها كان يشعل الوابور سأله حمزة :

- \_ حدش جه ؟ .
- ــ ولا نفاخ النار ..
- \_ فیه واحد کان مواعدنی الساعة اتنین ودلوقتی وربع .. ما جاش یا حسن ؟
  - \_ ما جاش ..
    - ــ غريبة ..
  - \_ ما غريب إلا الشيطان ..
  - ثم نظر إليه الشاب وابتسم وأضاف:
    - \_ أنا موش مصدق ..
      - \_ إيه يا حسن ؟
    - \_\_إن حنعملو معسكر تدريب ..

- \_ ليه يابو على ؟.
  - \_ مش باین ..
- \_ بکره یبان فاهمنی إزای ..

وهب الوابور وملأ الخيمة لهبا ودخانا وكاد يأتى على سقفها ، فسب الشاب « ديك » الوابور وأصحابه ، وبعد أن هدأت العاصفة قال لحمزة :

- \_ تحبه تقبل ؟
- \_\_لأ .. نص نص ..
- \_ بس يا أستاذ حمزة شوية السلاح اللي عندنا دول كرب قوى .. دول ما ينفعوش ببصلة .
  - ــ متخفش .. البرتا عندك .. وريهالي .
    - **... ليه** ؟
    - ـــ وريهالي بس .

وقام الشاب إلى صندوق آخر وفتح قفله وأخرج « برتّا » لها ما سورة تلمع .. وتناولها حمزة وتفحصها وأغمض عينا ونظر فى ماسورتها بالعين الأخرى وهو يغمغم :

ـــ مليانه وساخة .. اديني شوية جاز وحتة اسطبة .. دى طلياني .. خدوها الإنجليز من الطلينه .. واحنا خدناها من الإنجليز ..

وغادر الصندوق الجالس فوقه ، ورفع غطاءه وعسعس حتى وجــد و مفك ، ، وأغلق الصندوق وجلس ومضى يعبث بمسامير ( البرئــا ) ويفكها ..

وتناهى إلى سمعهما صوت حركة في الخارج ، فرفع الشاب الأسمر طرف الخيمة ونظر وقال وهو لا يزال ينظر :

\_ أما غريبة ! إيه اللي جاب الناس دو لم هنا ؟

\_ مين يا حسن ؟ ..

قالها حمزة وهو منهمك في فك مسمار عاص ، فعاد الشاب يقول :

\_ واحد أفندى وواحدة ست ..

\_ فین یابو علی ؟

\_ جنب الخيمة ..

قالها الشاب الضخم ثم رفع صوته من خلال الفتحة:

\_ عاوز إيه يا فندى ؟

فرد صوت أخنف قليلا:

ـــ حمزة فين ؟ ...

فرد حمزة وهو لا يزال مشغولا:

ــ دا لازم سعد .. تعال يا سعد .. خش ..

ودخل سعد .. عصبی وأصفر وقصیر ، ویرتدی بلوفر من الجلد و منظار ا أسود واندفع یقول :

فرد حمزة:

\_ صباح الخير .. اقعد يا سعد ..

ـــ مش قاعد . . معايا ناس . . شغل . عشان تقوللي مابتشتغلش . . كفاح لا يهدأ . تعالى يا آنسة فوزية . . لتفضلي . . خشى ماتخافيش . بنى ادمين والله اللي هنا .

ومن باب الخيمة الصغير انحنت فتاة داخلة ، ووقفت عند الباب حائرة

مترددة تحدق في حمزة و ( البرتا ) التي أصبحت إجزاء سوداء بين يديه ، وفي الشاب الآخر الذي كان واقفا في منتصف الخيمة بفانلته الصوف الزرقاء ذات الرقبة الطويلة كارد خرج لتوه من قمقم ..

ورفع حمزة بصره ونظر إليها .. كانت متوسطة الطول مثله وأكثر منه نحافة ، لها وجه صغير أبيض وشفتان شديدتا الحمرة وشعر غزير ، وكانت ترتجف من البرد وفي وجهها شحوب ترتدى معطفا « بيج » ورغم هذا كانت ترتجف من البرد وفي وجهها شحوب وارتعاش ، ورغم ارتجافها كانت في عينها لمعات دفء ونشاط زائدين . وأحدث دخولها حركة في الخيمة .. قام حمزة من فوره وأفسح لها مكانا فوق الصندوق ومديده ليصافحها ، وحين وجدها تنضح بالجاز وسواد الصدأ مد لها ذراعه ، وأحس بأصابعها وهي تلتف حول ذراعه بازدة كالثلج ، ولكن قبضتها على غير ما توقع كانت قوية ..

وقبل أن يعود الهدوء قال سعد بكلماته المتقطعة السريعة:

\_ أهو ده الأستاذ حمزة يا ستى عضو اللجنة المسئول عن معسكــر التدريب ...

فقالت بلا وجل : أهلا وسهلا ..

وأردف سعد بسرعة:

ــ ودى يا سيدى الآنسة فوزية سكرتيرة لجنة المدرسات للمقاومة الشعبية ..

وتغيرت نظرات حمزة في الحال وصافحها مرة أخرى ، وهذه المرة بيده التي كان قد نظفها .

وأضاف سعد:

\_ دول لهم كفاح مدهش .. زى ما انت عارف كنا بنلم تبرعات ورحت

أجمع من المدرسة بتاعتهم فى المنيرة فتعرفت بيها . ولقيت أن المسألة أكثر من كده .. وأصرت على إنها توصل للجنة حالا . قلت أجيبها لك .. مش كويس .. هنينى بقى .

وكان حمزة ينظر إليه وهو لا يدرى أيثنى عليه أم يوبخه ، فقد كان من الضرورى أن يحدثه بهذا قبل أن يفاجئه بها على تلك الصورة . وقبل أن يقرر ماذا يفعله كان الشاى قد أعد وصبه الشاب الضخم فى ثلاث كوبات من الزجاج الرخيص الأزرق ذى القاعدة السميكة ، وصب البقية فى كوز صفيح كان يغطى فوهة الإبريق ، وقال لفوزية بصوته الغليظ وهو يمد لها يده بكوب :

\_ خدى .. لحسن دا انتى نازله رجف الأرا ..

ورغم هذا فقد تناولتها منه فوزية وأحاطت الكوب بيديها .. وأصر سعد على أن يشرب هو الشاى الذى فى الكوز ، ولم تفلح المحاولات التى بذلت ليقلع عن إصراره ..

وحفلت الخيمة بأصوات رشف الشاى الذى كان يتصاعد بخاره من الكوبات ومن أفواههم ، ويشيع فيهم نشوة دفء طارئة فى يوم له برودة الرصاص ..

وكان حمزة طول الوقت يختلس نظرات خفية إلى فوزية .. كانت تلك تكاد تكون أول مرة يجمعه العمل مع فتاة ، وفى أعماق نفسه لم يكن يثق بالفتيات ولا بما يمكن أن يقمن به وإن كان يردد دائما أن لا فرق بين الرجل والمرأة ، وأن لها مثل ما له من حقوق .. وصحيح كيف يمكن لفتاة ترتجف من البرد هى ومعطفها هكذا .. ولها رفع كهذا أن تخوض معركة مثل التي يخوضونها وتقف معه جنبا إلى جنب ؟ .

## وقال سعد:

ـــ كويس خالص مجهودكو .. حاجة عظيمة .. انتو عملتو الخشب اللي بره ده إمتى ؟!

\_ امبارح.

ــ كويس جدا عظيم خالص . وحيبتدى التدريب إمتى ؟ .

ــ بکره ..

ــداشيء غريب! داشيء عظيم! مدهش! بكره بكره ؟

\_ أيوه ..

· ـ عال جدا ، دى حاجة تستاهل التهنئة .. دى عايزة حفلة وأن شاء الله كده حتبدو بميت واحد .. لازم على الأقل ميه .

ــ حنبتدي بعشرة ..

ــ شوية جدا .. قليل قوى .. شوية خالص .. إيه ده ؟

\_ كويسين .. انت اتأخرت ليه ؟ مش كان معادك اتنين ؟

ــ أبدا . أبدا أبدا . كان اتنين ونص . أقسم بشرفى كان اتنين ونص . لا لا لا أنا فى مسألة المواعيد دى دقيق . . دقيق جدا . . اتنين ونص يعنى اتنين ونص . اقسم بشرفى كان اتنين ونص . انا دقيق فى مسألة المواعيد دى بالذات . .

ـــ كان معادك اتنين .. و بلاش حكاية شرفك دى فاهمنى از اى ؟ .. ياللا بينا ..

قالها حمزة وهو يقوم ، وخرج الجميع والشاى يشيع فيهم الثقة لمواجهة البرد .. الفضاء ساكن سكونا مذهلا والبقعة جرداء .. والسماء ملبدة بالسحب وكأنها توشك أن تمطر .. وهناك على مرمى البصر القاهرة في سمائها

غبرة رمادية ، ومنازلها تبدو مكدسة لا تشذمنها سوى عمارات قليلة ومآذن تظهر من بعيد وكأنها مداخن مصنع مهجور كبير ، والأرض الواقفون فوقها رخوة تكادتنوء بالأرجل ، وهواء خفيف أصفر يهب فى حدة ويداعب القش الكثير الذى يغطى وجه الأرض فتطير له قشاشات وتخرفش له الباقيات . وسألت فوزية :

\_ هو ده المعسكر ؟

فرد حمزة وهو ينظر إليها ويتأمل أنفها الصغير الذى احمرت قمته المدببة من البرد :

- \_ آه ..
- \_ وفيه متطوعين كتير ؟
- \_ مش کتیر إنما کل یوم بیکتروا ، بکره دی کلها حتتملی طـوابیر وتمرینات ..
  - \_ ومين اللي حيدرب ؟
    - \_ ضباط متطوعين .
      - \_\_ منین ؟
      - \_ من الجيش...
  - ــ بس ده إيه ؟ .. بتصريح ؟ ..
  - \_ هو فيه حاجة اسمها تصاريح!
    - \_ يعنى الحكومة تسكت ؟
      - \_ هو فيه حكومة ؟
  - ــ الله ! .. طبعا ! .. أمال مين اللي بيحكم ؟ ..
    - \_إحنا .. إحنا اللي ينحكم! .. الشعب ..

وحملقت فيه فوزية برهة وكأنها لا تصدق ...

وكان سعد في هذه الأثناء قد تركهم وراح يقفز من فوق الموانع الخشبية ويتفرج على الحندق ، وينام على بطنه عند تبة ضرب النار ممسكا ببندقية وهمية ، فقالت فوزية :

\_ أما غريبة قوى سعد .. شوف بيعمل إيه ؟..

ــاه . . هو متحمس . .

ثم سكت هنيهة وقال:

ـــ ألا قولي لي يا آنسة فتحية .. انتو اديتو سعد تبرعات ؟

ـــ أصدك فوزية .. أنا اسمى فوزية ..

واحمرت أذنا حمزة احمرارا شديدا وتلعثم كيانه ..

، وأضافت فوزية :

\_ بس أنا جاية مخصوص علشان أعمل علاقة مباشرة مع لجنتكم ، لأن هدف لجنتنا الأساسي هو خدمة الكفاح المسلح ..

وقال حمزة باهتام وبحرص وهو لا يزال يؤنب نفسه:

ــ كويس أوى ..

ـــ واحنا كنا لمينا شوية فلوس عشان نشترى بيهم إسعافات طبيـة للفدائيين ، إنما الظاهر انكو أنتم في حاجة أكثر للفلوس دى .

\_ الحقيقة إن احنا دايما في حاجة لفلوس ..

\_ طيب ممكن اقابلك بكره وأد يهملك ...

ــ ممكن جدا ..

\_ فين ؟ ...

ــــ أيوه يا ستى ...

وأخرج حمزة مفكرة صغيرة من جيبه قلب أوراقها ، ثم رفع رأسه ولمعت نظارته بشعاع من أشعة الشمس استطاع اقتحام السحاب والنفاذ من بينه ، وقال :

\_ تقدری تیجی هنا ؟

وفكرت فوزية لحظة ثم قالت :

\_ الساعة أربعة ؟

ــ يناسبني جدا .

ثم رفع حمزة صوته ونادى على سعد وانتحى به مكانا وظلا يتهامسان فترة ، ثم شد على يده مودعا وكذلك فعلت فوزية ، ولاحظ حمزة أنها تسلم بقوة غريبة على بنات جنسها وكأنها صديق قديم ..

وكان آخر ما رآه منها ابتسامة ، وحزام معطفها المفكوك والهواء يجذبه وراءها ويعبث به ..

وعاد حمزة إلى مجلسه فى الخيمة ، وإلى ( البرتّا ) وقطعة القماش والجاز ، وكان أحيانا يهز رأسه ويقول : غريبة ! ، فيسأله الشاب الضخم .. هي إيه اللي غريبة ؟! فيقول حمزة تائها : ولا حاجة .. وفى الرابعة من اليوم التالى كان المعسكر قد دبت فيه حياة عشرة شبان يرتدون ملابس التدريب ، وتهتز الأرض تحت أقدامهم وهم يروحون ويجيئون صفوفا ، وبين الحين والحين تتصاعد صرخات معلمهم آمرة . وكان حمزة فى قلب الخيمة ومعه الشاب الضخم ممسكا كل منهما بفأس وهو يحفر ويعمق إذا كان العمق غير كاف .

ورفع حمزة رأسه يقذف بالتراب اللين مرة فرآها ، وهنا فقط تذكر أن ميعاده معها قد حان وأحسن بنوع من الفرحة وهو يرى شبحها قادما من بعيد ، وانتظر حتى اقتربت فغادر قاع الخندق ومضى إليها وهو ينوء بحذائه الذى كان محملا بما لا يطيق من الطين اليابس ، حتى لم يجد بدا آخر الأمر من خلعه ..

وشدت فوزية على يده بنفس طريقتها القوية المتحمسة .. وهي تكاد تضحك على بنطلونه الذي شمره وقميصه المزدان بنياشين لا عدد لها من الوحل وجوربه الذي تطل منه أصابع قدميه متحدية البرد والأناقة ..

وأخذها بعيدا عن المعسكر ، وقد وجد الطابور الصغير من الشبان يلخبط ويسهو ويتغامز خفية حين رآها ..

وقبل أن يبدأ أي حديث فتحت حقيبة يدها وأخرجت منها قبضة جنيهات ناولتها له قائلة :

ـــ سبعة وعشرين جنيه ونص ..

ثم أضافت مبتسمة:

ــ دفعة أولى ..

وأحس حمزة بفرح حقيقى .. سبعة وعشرون جنيها .. بندقيتين « لى أنفليد » وكذا طلقة ، وقال وهو يعيد ترتيب النقود :

ـــ برافو والله ..

ودعاها للجلوس بجواره على الأرض وفعلت هذا دون تردد ، وانطلقت تحدثه عن لجنتها وعن نفسها حين طلب منها هذا .. مدرسة في مدرسة المنيرة .. قرأت كثيرا وفهمت كثيرا ولكن لم يكن لها أي نشاط ، فحين جاءت معركة القنال اندفعت من نفسها تناقش الأمر مع زميلاتها المدرسات وتم النقاش إلى تكوين اللجنة ..

وكان حمزة يهز رأسه ويحثها على المضى بإيماءاته ، ولدى كل كلمة يكاد ينظر إليها من جديد و يحاول أن يقنع نفسه أن المرأة ممكن فعلا أن تقوم بعمل .. وقبل أن يصافحها مودعا قال لها وهو يقلب مفكرته :

ـــ يوم الأربع زى النهارده حكون من بعد الساعة سابعة في مصر الجديدة على طول ، فممكن نتقابل هناك علشان ننسق الإتصال ..

ففكرت لحظة ثم قالت:

\_ ولو أن يوم الأربع عندى ست حصص إنما حاجي ..

\_ الساعة تسعة جنب قصر البارون امبان .. ممكن ؟

\_\_ ممکن ..

ــ وإذا حصل ومقدرناش نتقابل .. عارفه تعملي إيه ؟

ـــ إيه ؟ ..

ــ يبقى نفس المكان والزمان بس الأسبوع اللي بعده .. فاهماني إزاى ؟ .

وكان هو الذى شد على يدها بقـوة هـذه المرة حتـى كاد يخلعهـا . ومضت ..

ووجد حمزة نفسه تمضى وراءها وتفكر فيها .. في حجمها الصغير الدائب الحركة وكأن ثمة مولد خفى يغذيها بطاقة لا تنفد من نشاط ، وانفعالاته السريعة التي تتلاحق على وجهها واستجاباتها السريعة لانفعالاته ، يضحك فتكاد تضحك ملامحها ، ويأسف فيقرأ الأسف بوضوح في وجهها ، ودائما وهو يحدق فيها يعجب من الإحساس الذي يتملكه .. الإحساس بأنه قوى قوة لا حد لها وأنه ممكن أن يصنع معجزات ، ثم ملامحها الدقيقة الأنيقة التي في كل دقيقة منها وسامة وأمل . إنها حقيقة تبدو كصبية صغيرة لا ينقصها إلا المريلة لتصبح تلميذة بإحدى المدارس .

وكاد حمزة ألا يتوقف عن التفكير فيها لولا أنه نهر نفسه بشدة ، وعاد يغوص في قاع الخندق ويشذب حوافه .. فى مساء اليوم التالى كان حمزة جالسا على إحدى قهاوى ( القرين ) بمديرية الشرقية .. قهوة فى وسط القرية تطل على ميدان جاء صدفة فى وسط البيوت و لم يقصد به أن يكون ميدانا .

وكانت القرين أيامها تحيا على أخبار المعارك التي تدور وقصص البطولات واستعداد الإنجليز .. وتتحفز لضرباتهم . وكان حمزة قد انتهى من الاتفاق على صفقة سلاح .. ثلاثة رشاشات وخمسة مسدسات وصندوق ذخيرة .. يتم تسليمها في القاهرة في صباح باكر من أحد مقبل ..

والمساء في قرية كتلك كان شيئا جديدا على حمزة .. و كلوبات و شاحبة قليلة .. ومصابيح غاز بزجاجات وبلا زجاجات .. وأناس رائحون و غادون يأتون من ظلام شارع و يختفون في ظلام آخر .. وحركة بطيئة ميتة ، وبهائم سارحة وبهائم راجعة ، وبلد لا يمكن أن يصدق أحد أنها قتلت وحدها فى خلال سنوات مئات من عساكر الإنجليز ، حتى قدم بشأن نشاط أهلها المعادى للإمبراطورية البريطانية استجواب في مجلس العموم ..

ودقت الساعة الثامنة والنصف واستمع حمزة إلى الأخبار التى تجمع أهل البلدة جميعا لسماعها ، وعم لدى تلاوتها سكون عميق كالسكون الذى يسود صلاة الجمعة والإمام يخطب ، والغريب أن حمزة لم يسمع الراديو يعقب بكلمة واحدة على مذبحة المحافظة التى حدثت فى اليوم السابق .. وكانت الأخبار عادية .. وعن لصاحب القهوة أن يسمع تعليق الإنجليز على

الأخبار من محطة لندن ، فأتى بمنضدة ووقف عليها وأخـذ يبحث بين المحطات .. وكان حمزة منتبها أكثر إلى الرجل ووجهه الضئيل النحيل المنكب على الجهاز في حماس بالغ وهو يتابع مؤشر المحطات ، ومنتبها أكثر إلى الناس الذين لم يتفرقوا بعد ولا تزال أفواههم تفسر الأخبار وتتناقلها وتتنبأ ، وتتوعد .. ولكنه تنبه فجأة واستيقظت كل حواسه على صوت المذيع في لندن وهو يقول إن الأحكام العرفية قد أعلنت في مصر .. وأسرع حمزة يغادر مكانه ويقف بجوار الراديو ويكاد يلصق أذنه بالميكروفون .. الحرائق تجتاح القاهرة .. الأجانب يذبحون في الشوارع .. السلب والنهب والقتل يدور على قارعة الطريق .. الانفجارات تترى في أنحاء العاصمة والدماء تسيــل في شوارعها .. النحاس يطلب إعلان الأحكام العرفية .. مرسوم إعلان الأحكام العرفية .. قوات من الجيش تستدعى .. الحالة تنذر بخطورة بالغة .. و لم ينتظر حمزة لحظة واحدة واستأجر عربة أقلته حالاً إلى التل الكبير ، وهناك ظل يشير لكل عربة مارة على طريق المعاهدة حتى رضيت واحدة أن

وأوقعته أفواه الناس وهى تتناقل شائعات مبهمة سوداء لا رابط بينها فى دوامة ، ولكنه حين أصبح فى محطة مصر ورأى الأدخنة تنعقد كالحة فى السماء ، ومبانى كثيرة تتلظى الجحيم وتبدو حمراء غامقة فى سواد الليل ، وألسنة اللهب تطل منها كألسنة الشياطين ، ونار تتفحم وأخشاب تتوهج وعلات منتزعة الأبواب مدشدشة المحتويات ، والقاهرة الحبيبة تنزف أطرافها خرائب وأنقاضا وتتساءل بناياتها الواجفة عن المصير ، وعساكر الجيش بلباس خرائب وخوذاته ، ودوريات بوليس فى عربات ، والوزارة أقيلت وأحكام عرفية جاءت أسود من الأدخنة التى فى السماء وأفظع من اللهب الذى يجتاح

الأرض .. حين رأى وسمع شعر بالجو مشبعا بظلال أيد سوداء أثيمه ، والأرض مثبعا بظلال أيد سوداء أثيمه ، ورائحة مؤامرة تختلط برائحة بارود أجهض انفجاره ، والعلامات تشير إلى مستقبل قاتم ..

وبين حمزة والأحكام العرفية ثأر مبيت وتاريخ دام طويل يرجع إلى سنة وبين حمزة والأحكام العرفية ثأر مبيت وتاريخ دام طويل يرجع إلى سنة ١٩٤٨ ، ولذلك رأى ضرورة البحث عن مكان آجر يلجأ إليه وقد أصبحت حجرته في ظل الأحكام الجديدة غير مأمونة أبدا ..

واضطر إلى ركوب تاكسى فلم تكن هناك أية وسيلة أخرى للمواصلات .. وكان فى جوفه غليان لا يرحم والسؤال يطفو إلى وعيه بين الحين والحين : ترى هل يسعفه بدير هذه المرة أيضا ؟ ..

وتوقفت العربة فى شارع من شوارع الدقى وهبط ودق جرس الشقة رقم ه وظل يدقه باستمرار فالساعة كانت حوالى الثانية عشرة والظلام يغمر الشقة ، وفتح الباب فى النهاية وأطل بدير برأسه الضخم وجسده الممتلىء الشاهق وهو يوحوح من البرد ..

وباختصار أطلعه حمزة على الموقف وأبى بدير أن يصدق .. وجلسا إلى الراديو والمذيع يردد بين الآونة والأخرى : إيها السادة .. نحن في انتظار أنباء هامة ..

وجاءت الأنباء فى الثانية عشرة والنصف .. وفى الواحدة تلى مرسوم تشكيل الوزارة الجديدة . وطلب حمزة من بدير أن يبقى لديه بضعة أيام ، ووافق بدير وخيل لحمزة أنه يوافق على مضض ..

وقضى حمزة أياما كتيبة خانقة فى الشقة الفاخرة يروح ويجىء كالطلقة الحبيسة ..

الجرائد التي ينكب عليها طول اليوم فارغة خاوية .. اختفت منها تماما أنباء الكتائب والمعركة وحفلت بتأييد التجار والشركات لرئيس الحكومة الجديد منقذ البلاد وحامي حمى الأوطان ، نفس التجار والشركات الذين كانوا لا يتركون مناسبة تمر أيام الكفاح المسلح إلا ويعلنون تأييدهم التام للفدائيين وتبرعاتهم للكتائب ..

تاجر الأسلحة اللعين لم يحضر في صباح الأحد الباكر ولا في ضحاه .. حظر التجول مفروض والقاهرة تموت مع الغروب والشتاء بارد .. والخروج قد أصبح مخاطرة عظمى فالبوليس السياسي منتشر والحملات تتزايد كل يوم وهاكستب قد فتح أبوابه يستقبل الوطنيين ، وصلته قطعت بأعضاء اللجنة ، وحين طلب من بدير أن يذهب لمقابلة أحدهم قال له : اسمع يا خويا يا حمزة .. تقعد عندى في الشقة على عيني وراسي .. إنما تشغلني في الأمور بتاعتكو دى .. يفتح الله .

النقود التي معه مرصودة للسلاح و لا يمالك فيها تصرفا وما عاد معه نقود ، و فقد العمل ...

ومع كل هذا كان شيء ما في نفس حمزة يأبي أن يصدق ما يحدث وينكر أن كل شيء قد انتهى ، فكان أحيانا كثيرة يتحدث مع نفسه ومع بدير وكأن المعركة لا زالت قائمة ، وكأن الضربة المفاجئة الغادرة لم تكن .. وأحيانا كثيرة كان يفكر في فوزية ويعجب من الأمل الكبير الذي يعلقه على مقابلتها ، فلحظات معرفته لها لم تتعد الساعة ومع هذا فميعاده معها كان يبدو وكأنه كل ما تبقى له من أمل .

غير أن ذلك الأمل الأخير تبدد حين تذكر حمزة مفجوعا أن ميعاده معها . في التاسعة ، وأن حظر التجول يبدأ من السادسة ومن المستحيل عليهما أن يلتقيا ..

وجاء يوم الأربعاء . ميعاد اللقاء . ومضى اليوم وحنق حمزة يتضاعف ويتضاعف حتى ليكاد يطغى على حنقه لمؤامرة الحريق كلها ..

وفى صباح الخميس لم يغادر الفراش .. وهم قابض يخنق روحه وإحساس يتملكه أنه فقد شيئا غاليا كان يعتز به ، وكأن فوزية ماتت من حياته بل كأنها قتلت ، وكان قاتلها فى نظره هو نفس حارق القاهرة وفارض النوم من الغروب ، وخائن المعركة وسارق الأقوات ..

وتبين حمزة بعد أن إنجابت موجة حنقه قليلا أنه فعلا قد انتزع من حياته الحافلة انتزاعا ، وإن كفاحه قد تلخص فجأة في جدران بيضاء ملساء أنيقة ، ووجه الأستاذ بدير المحامي وجسده الضخم ، ويأس كبير قاتل ..

وأيقن أنه لا يمكن أن يقضى في حياته الجديدة تلك ساعات ، وأنه قطعا إذا بقى فيها سيفقد عقله ، ومع أنه لم يمت و لم يفقد عقله بل راح يمارس هوايته المحببة في التهام الطعام والتلذذ بأصنافه ، ويهيىء للوجبة نفسه و كأنه ذاهب إلى أهم المواعيد ، ويستخرج كل ما لدى بدير من كتب ويختار منها ويقرأ ، ويصادق الخادمة الصعيدية العجوز التي كانت تأتى كل ثلاثة أيام لتنظيف الشقة ، ويناقش بدير كثيرا في السياسة حتى استطاع آخر الأمر أن يقنعه أن الملك والإنجليز هم الذين حرقوا القاهرة .. وكان قبلا يقول .. ملك إيه اللي يحرق البلد ؟ بقى دا كلام ؟ .. أنا معاك صحيح أنه راجل خمورجي وبتاع

نسوان إنما حرق البلد دي مسألة تانية ..

مع هذا إلا أنه كان يقوم بما يقوم به من أعمال بميكانيكية لا روح فيها كمحكوم عليه بالإعدام انتهى أمله ..

غير أن أشياء صغيرة قد تحدث فتغير من حياة الناس .. وسمع حمزة في الراديو مرة أن حظر التجول قد رفع إلى العاشرة وكاد يمط شفتيه في ابتسامة من يقول :

\_ وماذا يضير الشاة سلخها بعد ذبحها ؟

لولا أنه فى أجزاء من الثانية كانت قد تجمعت فى عقله متباعـدات ، وانتصب أمامه أمل كاد من فرط الثقة به أنه يتخيله حقيقة واقعة .

لقد تذكر أنه قال لفوزية شيئا كهذا : إن لم يتم اللقاء فيكون الميعاد في نفس المكان والزمان من الأسبوع التالي ..

ولكن . هل لا تزال فوزية تذكر هذا ؟ وهل من المعقول ـــ إن هي تذكرت ـــ أن تأتى وقد انتهت المعركة ؟

ومن أين يأتيه ذلك اليقين الذى يملأ عليه نفسه ويؤكد له أنها لا بد قادمة ؟ ..

أسئلة مثل تلك عاش عليها الأيام الباقية من الأسبوع ، وكانت لا تزال تراود عقله وتلح وتتجسم فى خياله وهو واقف مساء ذلك الأربعاء بجوار قصر البارون امبان ومنظار أسود على عينيه ، وأنفه يشم من بعيد رائحة الآدميين ويتوقع فى كل لحظة أن يضع البوليس يده على كتفه ويقول : ياللا بينا يا حمزة ..

وفى تلك البقعة الموحشة من مصر الجديدة ، وفى ليلة شتاء كليلتها كان البرد متوحشا لا يهذبه نور ولا تقلم أظافرة مساكن . وكان السكون لا تقوى عليه أعصاب . . سكون بارد مخيف وكأن سكون قصر امبان المهجور قد عم

الدنيا .. سكون يكاد يتلون فيصبح كالظلام المحيط ، ويكاد يتجمد فيصبح كتلا سوداء كأسفلت الطريق . وكان الظلام ميتا لا حياة فيه وكأنما قتله البرد المتوحش وقبرته كتل السكون المتجمدة السوداء .

وقف حمزة وطالت وقفته ، وعقله ــ من فرط ما كان للحظات قيمة ــ يكاد يتحول إلى ساعة تعد الدقائق وتحصى ما تبقى على موعد حظر التجول وتضطرب إذا مرت الثانية ، وتكاد تتوقف إذا ما أحصت دقيقة كاملة ..

وتلاحقت ضربات قلبه فجأة ، ثم رأى شبحا صغيرا قادما من بعيد ، ووجد نفسه يتحرك ناحيته بلا أى تمعن أو انتظار ويا لروعة الوجه الأبيض الدقيق الذى أطل عليه من الظلام .

\_\_ أهلا ..

قالها وهو يودعها أسبوعا بأكمله من اليأس المر والأمل الخافت ، والترقب الذي دام أكثر من مائة ساعة . وما كانت الكلمة تغادر فمه حتى أحس باندفاعه أكثر من اللازم ، وحين سلم عليها فعل هذا بوعى حتى لا يعتصر يدها .

وسارا جنبا إلى جنب ، وكانت فوزية تبتسم باستمرار وتلمع عيناها دافئتين نشيطتين في الظلام كلما سقط عليهما ضوء بعيد . وسألته لماذا النظارة السوداء في الليل ؟ فأجابها :

\_ أصلي مختفي .. والنظارة تساعد ..

ـــولا تساعد ولا حاجة .. دانا عرفتك على طول .. عامل إيه بعد اللي حصل ؟ ..

ولم يجب حمزة فقد خيم عليه صمت ما لبثت عدواه أن انتقلت إليها ، كانت الضربة قد عادت بكاملها إلى وعيه وكأنما قد صوبت إليه لحظتها ، وأخيرا قال :

- \_ خسارة!
- \_ أيوه .. خسارة !
  - ثم أضافت:
- \_ تعرف إنى رحتلك المعسكر النهارده ؟
  - \_ ليه ؟
- \_ أصلى قلت يمكن تكون قصدت بنفس المكان المعسكر ، فقلت أروح هناك وإن ماجتش أجيلك هنا ..
  - \_ وازى المعسكر ؟ ..
- ـــ يدوب عرفته .. دا معدش فيه حاجة .. الخيمـة طبقهــا الهوا .. والخشب مهدود .. ولقيت هناك نقطة عساكر .
  - وعاد حمزة يقول من بين أسنانه:
    - \_ خسارة!
- وتنبهت الساعة التي في عقله إلى الزمن فجأة ، وكانا قد اقتربا من الشارع الرئيسي فقال حمزة بعد أن نظر في ساعته :
- \_ احنا لازم نرجع مصر بسرعة .. باقى تلت أرباع ساعة على حظر التجول ..
  - قال هذا وجری ببحث عن تاکسی ، وسألها وهو یجری :
    - ـــ انتى ساكنة فين ؟
    - فأجابته وقد بدأت تجرى هي الأخرى :
      - \_ فی شارع خیرت ..
    - وقال حمزة وهو يزيد من سرعته : ياه !
- وبدا عثورهما على تاكسى فى تلك اللحظة يكاد يكون مستحيلا ، ولكنهما وجدا واحدا كان فى توصيلة إلى مصر الجديدة ، وما كادا يضعان

أقدامهما فيه حتى انطلقت العربة كالقذيفة وسأل السائق:

- \_ على فين ؟
- \_ شارع خيرت أولا وبعدين الدقى ..

فقال السائق وهو يضغط على البنزين:

ـــ أما نروح شارع خيرت الأول .. وإذا كان فيه وقت نشوف حكاية الدقى دى ..

ومد حمزة يده واستخرج سيجارة من جيب سترته الأعلى فسألته:

ــ انت بتشرب سجاير والا إيه ؟ ...

\_\_ أبدا .. بشرب سيجارة كده كل ٣ أيام .. مش كيف فاهماني ازاى ؟

\_ بس بالطريقة دى حتبقى كيف ..

ــ متخفيش ..

وسكتت فوزية قليلا ثم قالت:

\_ أنا كنت ناوية أجيبلك فلوس المرة دى، إنما ٢٦ يناير ده لخبط الدنيا ... معلهش ..

\_ إنما لازم حاترجع كل حاجة زى ما كانت .. بل أقوى مما كانت .. \_ لازم ..

\_ حترجع المعسكرات والكفاح المسلح وكل المعركة ..

\_\_ لا بد حترجع ..

وسكت حمزة قليلا ثم أضاف:

ــدلوقت أنا بقيت في حاجة ماسة ليكي عشان نخلص بعض حاجات .. وأنا مش حاقدر أقابلك بعد كده بره ، وحاليا قاعد في شقة واحد صاحبي محامى ، وأنا معرفشي استعدادك إيه ؟ فاهماني إزاى ممكن تواصلي والا .. وفاجأته بقولها ..

\_ إديني عنوان البيت .. وأجيلك إمتى ؟

\_ أنا مش عارف نمرة البيت إنما حوصفهولك ..

وبعد دقائق كان التاكسي يتلوى مع شوارع مصر ثم يقف لدى بيت في شارع خيرت قريبا من ميدان لاظوغلى . ورفض السائق أن يوصل حمزة إلى الدقى ، ولكن تحت إلحاحه والورقة ذات الخمسين قرشا قبل ..

ودق جرس الباب .. وفتح بدير وقد ارتدى الروب دى شامبر فوق جلباب كستور وحبك طاقية صوف بيضاء على رأسه وتعمم فوقها بكوفية ..

وقال له بدير وهو يعود إلى جلسته:

\_ یا أخی سیبت رکبی .. أنا افتكرت إنك أكید اتمسكت .. كنت نین ؟

\_ كنت بدور على شغل ..

\_ ولقيت ؟

\_\_ أيوه ..

\_ إيه ؟

\_ حادى دروس خصوصية ..

\_\_ فين ؟

\_ هنا ..

وقهقه بدير ، واهتز الفوتيل بقهقهته وكذلك جريدة الزمان التي كان يقرؤها ، وأصبح الروب في أزمة ..

\_ هنا فین یاسی حمزه ؟

\_ في الشقة هنا ..

\_ لأكويسة .. ما انت دمك خفيف أهه .. أمال بيقولو عليك الكلام

الفارغ ده ليه ؟ المهم .. اتعشيت ؟

ـــ مليش نفس ..

ـــ أهو ده مش معقول . دا انت بسم الله ما شاء الله عمر ما كان مالكشى نفس .. دى معجزة دى .. لازم واحد يهودى مات ، نفس إيه يا شيخ ؟ لازم تتعشى .. اتعشى عشان عايز أكلمك شوية ..

و لم يستطع حمزة أن يقاوم أكثر ، واضطر للجلوس وازدراد اللقم .. وقال له بدير وقد اتخذت سيماه طابع الجد :

ـــ اسمع یا حمزة .. انت تعرف إن مصلحتك هی مصلحتی وانت زی أخویا تمام .. وبقی لنا ییجی ۱۰ سنة زملا وأصحاب .. وأنا عایز أقول لك حاجة ..

<u>- إيه ؟</u>

\_ ما تهدى بقى يا خويا يا حمزة وتفضك من الحكاية دى .. كفاية بقى ضيعت كام سنة من عمرك هدر وماعدشى فى العمر قد مامضى .. انت طول عمرك كده حتفضل هربان ومرفود وماانتاش لاقى تأكل . لا مؤاخذة يعنى يكن كلامى شديد شوية إنما الحقيقة كده ..

وابتسم حمزة وسأله:

\_ دا نفس الكلام اللي بتقوله أمي بالضبط. أهدى إزاى بقى ؟ ..

ــ تهدى .. تشتغل وتتجدعن وتتجوز وتعمل لك بيت وعيلة وتفوق لنفسك بقى .. واحد مثقف زيك ما يصحش يعيش كده .

\_ بس أنا سعيد جدا بالحياة اللي أنا عايشها دى ..

ــ سعید ؟ سعید إزای بقی ؟

ــ سعيد لأن المهم مش الواحد عايش إزاى والا فين المهم الواخد عايش ليه ؟ المهم الواحد بيعمل إيه للناس ؟

\_ أنا موش فاهم .. خدنى على قد عقلى يا أخى .. انت بتقول إيه ؟ . \_ ما هو طبعا لازم تكون موش فاهم .. انت راجل ليك حياتك الخاصة وبيتك الخاص وعملك الخاص .. أنا ماليش حياة خاصة .. أنا واضع نفسى وحياتى فى خدمة الشعب .. إذا استدعت الحاجة إنى أهرب أهرب أموت أسجن أسجن .. أموت أموت ..

ــده مش معقول .. بقى يعنى انت خلاص بقيت نبى والا ولى ما انتاش عايز حاجة من الدنيا ؟ مالكشى يعنى مطامح خاصة ؟

\_ مطاعى الخاصة هي بالضبط مطالب الشعب العامة .

\_إيه الحكم دى ؟ أفهم من كده بقى إن سعادتك لا حتتجوز ولا عمرك حايبقي لك بيت يعنى ؟

\_ لازم حتجوز وأخلف .. بس لازم جوازى يخدم قضيتنا مش يكون على حسابها .. ولازم حيبقى لى بيت بس بيت يهيألى فرصة أكبر لخدمة الشعب ..

\_ يبقى إن شاء الله حتفضل كدهه متشرد زى ما انت على طول .. \_ أبدا . اللى مشردنى هو نفسه اللى مشرد ملايين المصريين ، ومش ممكن الملايين تفضل مشردة على طول .

وسكت بدير طويلا ثم قال:

ــ هيه .. طيب الظاهر مافيش فايدة .. هيه .. تصبح على خير .. وجذب الغطاء وما لبث أن تصاعد شخيره وراح في النوم .

ولم ينم حمزة فقد ذكرته المحاورة التي دارت بالغربة التي أحسها منذ أن جاء إلى الشقة الفاخرة . حتى كلمة ( الشعب ) وهو ينطقها بدت غريبة هي الأخرى ، لا تكاد تجد لها مكانا بين النجف والأبسطة وقطع الأثاث المنمقة . وكذلك بدت الرؤى التي راحت تنبئق في خياله .. أمه .. أبوه .. أبوه عامل

الدريسة ، وشاربه الغزير الكث الذي ينثني فجأة عند أطرافه .. عـزب الدريسة حيث مرتع طفولته وصباه .. العزب التي تقيمها المصلحة في مكان ما بين محطتين للعمال الذين يصلحون القضبان .. المجتمع المغلق المقفول على من فيه كل قاطنيه من العمال .. الحياة يزاولها الناس معا .. الاسرار ملك للجميع والفقر موزع بالعدل على الجميع .. والزوجات يستحممن معا في صباح الجمعة ويتباهين بما حدث ليلتها ، والأزواج يغطسون معاليتطهروا في الترعة .. العزبة يتولاها النساء من الصباح فتبدأ الخناقات التي لا تنتهي على الأوز الضائع والبط .. البيض هو العملة السارية بين النساء والسجاير اللف هي السارية بين الرجال والنقود هي العملة التي لا بد من سريانها بين الرجال والنساء وإلا كان ماكان . في كل عزبة ذئب يلتحي أحيانا لحية ويتستر أحيانا بزوجه ، الرجال قد لا يعلمون والأطفال والنساء له بالمرصاد . في كل عزبة بخيل منبوذ يجمع المليم فوق المليم وأمله قيراط أرض يشتريه في بلده . في كل عزبة سني مهووس يسخر منه الرجال وتتبرك به النساء . في كل عزبة زوجة جميلة وغيرة ومشاحنات ، وأطفال يولـدون بالـعشرات ، ونامـوس ومــلايين الحشرات ، وكلاب وعواء كلاب تحرس الفقر والقلل والستر ..

فى كل يوم مشكلة وشكلة وزعيق وشجار ، ومحاولات للريس أن يفرض سلطانه ومحاولات من العمال أن ينزعوا عنه السلطان . وكلام من الكادر وكلام عن الخصم ، ونساء يبحثن عن الحبل ورجال يبحثون عن السلف ، ومناطيل صفراء فى صفارها رقع ، وطاقيات صوف طويلة وأحذية من مخلفات الجيش المصرى ثقيلة ، وصفير قطار آت وصفير قطار ذاهب ، وبنت بكر تفتح الشباك وتتأمل الآتى والذاهب وتتنهد وتحلم بالبندر والأفندية وثلاث أساور قشرة ..

في كل يوم شكلة وشكلة وزعيق وشجار ، وما يكاد اليوم ينتهي والشمس

تغيب و دخان المواقد يهمد و دخان القطار ينقطع ، حتى يؤوب الرجال إلى البيوت فى الشتاء وإلى ما أمامها فى الصيف ، و توضع الطبلية و حولها الأفواه ، وينتهى عشاء ما كاد يبدأ ويعقبه استرخاء و حديث قصير متباعد بين الزوج والزوجة فيه من النوم أضعاف ما فيه من اليقظة ، وفيه من التفاؤل أضعاف ما فيه من البيقظة ، وفيه من التفاؤل أضعاف ما فيه من تشاؤم . الزوجة قلقة والزوج راسى ، المرأة خائفة والرجل يؤكد ، الزوجة تتثاءب والزوج يغمغم متعبا: بكره تتعدل .

وهو والأولاد ..

النهار لهم .. نهار كله جرى ونط واستحمام فى الترعة ، وعد « فلنكات » السكة الحديدية ، ومحاولة السير دون معاونة فوق القضيب الواحد ، وعمل « أزنده » تقدح الشرر من الزلط تشبها بالآباء ، وصيد العصافير بالنبال والحصى الصغير .. وأروع لعبة وضع مسمار على القضيب حتى إذا ما مر عليه القطار بططه ورققه وأصبح حادا كالسكين ، والتين الشوكى الكثير الذى يغطى جانبى الخط الحديدى ، وموسم التين الشوكى والمطاردات التي لا تنتهى مع التاجر الذى يشتريه من المصلحة و يخفره .. هو والأولاد ..

كلهم مثله مرضوا بالبهارسيا والانكلستوما والحصبة والملاريا والرمد ، وخرج بعضهم بصفره ليس بعدها حمرة ، أو بطحال .

والشيخ زيدان وكتابه والمدرسة الإلزامية وعلقها ، وابتدائي بالبدلة .. أول بدله والطربوش الكالح الحقير ، والتفوق في الإبتدائية ٨٥ ٪ مجانا في الثانوية . أبوه فرحان وأمه تريده صنايعي وكفي . أبوه يريده مهندسا يعمل أيضا في السكة الحديدية مثل رئيس رئيس رئيس رئيس . أمه ترقيه من الحسد وأبوه يربه بنطلونه الذي يشبه الغربال ويقول : يا الأول يا كده .. ويكون الأول . وبعد توجيهي الويل .. الألم .. الكفاح الرهيب من أجل جنيه ،

خمسين قرش لحمزة في غربته في بلاد الناس في إسكندرية . عام مضى و لم يبق · إلا ثلاثة أعوام .. يا مسهل يا رب ! وفي هذا كله يبوظ .. بوكر وكنكانُ وروم حامض ونساء ذوات شعر أكرت وروج فاقع الحمرة كختم السلخانة فوق الذبيحة ، وكذب على أبيه ونصب على أصدقائه ، ورسوب عام وإخفاء الرسوب وإيهام أبيه إن ﴿ الأول ﴿ نجح ، وخداع ومناورات . الأب يكفر .. المطالب تخنقه . أمه تتعلم شغل المناديل بأويه . العزبة كلها تساعد حتى الريس يدفع كل شهر نص جنيه . أخوه الأصغر منه يخرجه أبوه من المدرسة ليكمل هو فهو الأكبر والأقرب إلى قبض الماهية . ٦ مارس والمظاهرات واللجان والمؤتمرات ، أخوه عامل مناورات في السكة الحديد والقطار يلهف قدمه ذات صباح .. ستة شهور في مستشفى المديرية . أخوه يعود إلى العمل بقدم واحدة خفير مزلقان . حمزة يتخرج ويعمل في مصنع .. أول ماهية يطبع بها منشور النقابة ، سياسة واجتماعات ومناقشات وكفاخ ومواعيد ، البوليس السياسي يتعقبه .. أول فصل القضية التي حاولوا تلفيقها ، معتقل ٤٨ .. عشرون شهرا في الطور وهاكستب وسجن الأجانب في إسكندرية . يوم الإفراج . كلما قدم لمصر مستر أو مارشال قبضوا عليه .. في كل مناسبة وطنية أو عالمية الحجز في القسم أياما قد تمتد إلى أسابيع حتى ليستطيع في أول كل عام أن يضع قائمة بالآيام التي سيزور فيها القسم كا توضع أيام العطلات الرسمية في أول النتائج ... بدلته الواحدة التي فصلها عقب تخرجه ، ونظارته التي عملها في وحدة الجامعة بجنيه ، وحذاؤه الذي هو ثاني صاحب له . النقود التي يرسلها لأبيه أحيانا ، والشبشب الأسود الذي طلبته أمه و لم يستطع إرساله ، أمه لا تزال تطرز المناديل بأويه وأبوه ابيض شاربه وكبر و لم يصبح بعد « ريس » ، وأخوه لا يزال يعرج ويغلق البوابة للقطار ويفتحها حين يمر ، وأخته نبوية عانس لا زالت ، وعزبة دريسة أخرى يعيشون فيها .

تدعو له أمه بالهداية وأبوه يتحدث بأخباره إلى الرجال ويلعن الحكومة ومصلحة السكة الحديد ، والعزبة كلها تنسج حوله أقاصيص بطولة ويقول الصغار إذا ما مر القطار .. دا رايح لحمزة .

ــ انت مش حتنام يا حمزة واللا إيه ؟! .

ـــ أيوه حنام يا بدير .

وفى اليوم التالى وفى حوالى الخامسة دق الجرس ، وكان بدير قد خرج إلى عمله بعد الظهر وفتح حمزة وفوجىء بفوزية أمامه بدمها ولحمها . وابتسمت وقالت وهي تدخل :

\_ أنا طول السكة خايفة لاغلط فى الشقة ، إنما كويس .. أصلى كنت عند واحدة صاحبتي هنا فى الدقى فقلت أفوت أعرف البيت ..

ومع أن حمزة لم يصدق حجتها في المجيء إلا أنه لم يدر السر في الراحة العميقة التي أحدثها مجيئها في نفسه .

وحالت فوزية ببصرها في الشقة وقالت:

\_ إيه ؟ هو صاحبك دا مليونير ؟ دى شقة فخمه قوى !

وجلس على مكتب بدير وجلست هي على الفوتيل الذي أمامه ، وما لبثت ن قالت :

> ــ قول لى .. مش ممكن أشرب قهوة ؟ فقال حمزة على الفور وهو يغادر مكانه :

\_ ممكن قوى جدا .. بس كده ؟ ..

وذهب إلى المطبح الأنيق ذى الفريجيدير الضخم والبوتاجاز ، والطلاء الأبيض الناصع الذى يلون جدرانه وأرففه ودواليبه ويحيله إلى شيء يكاد يقترب من حجرة العمليات كثيرا ما فكر حمزة أن ينام فيه ، وسمع صوتها يأتيه من بعيد :

ــ عاوزه كباية كبيرة .. سكر مظبوط وحياتك ..

فرد عليها بصوت مرتفع:

\_ بس کده ؟ ..

وبحث بعينيه في الدولاب حتى وجد كوبا يصلح ..

وبعد برهة كان ينقل أقدامه بحرص وهو يحمل صينية عليها كوب القهوة المضبوط وفنجان سكر زيادة صنعه لنفسه وماء مثلجا ، وما إن رأته حتى ضحكت وقالت :

\_ ياه ! أشكرك جدا ! .. دا انت ولا جروبى ! وأخذت رشفة من الكوب ثم قالت :

\_ تصور إنى إديت ست حصص النهارده! أنا دماغى خـــلاص .. والمشكلةإنى بعد ما بارجع البيت بافتح مدرسة تانية لاخواتى ..

\_ انتى ليكى إخوات ؟

ــ بنتين أصغر منى ..

\_ وحلوين زيك كده ؟

قالها جمزة مدفوعا بطاقة الحديث ليس إلا ، وأنب نفسه بسرعة وفظاعة على ما قال وكأنه ارتكب إثما ..

وساد سكوت لم تكن تسمع خلاله إلا رشفات القهوة . وكان من العسير والمكتب يفصلهما وكل يتحاشى النظر فى وجه الآخر ويتلهى باحتساء القهوة ، والهدوء مخيم وجميل والظلام قد بدأ يدب إلى الخارج والجو يوحى بالصمت . . كان من العسير استئناف الحديث . ولكن حين بحث حمزة بيديه وأخرج سيجارة من درج المكتب قالت فوزية :

\_ مش قلتلك .. حتبقى كيف !؟

فقال حمزة وهو لا يزال يبحث عن الكبريت:

ــ آبدا، أصل الواحد أعصابه ..

وأخيرا أشعل السيجارة وقال وهو يكح:

\_ أظن نبدأ العمل ..

ـــ آيوه ..

\_ بقى شوفى يا ستى .. أنا بقيت زى الفار فى المصيدة بعدما فقدت كل اتصالاتى ، ودلوقتى انتى الصلة الوحيدة اللى باقية لى . فاهمانى إزاى ؟ أنا معرفشى استعدادك إيه ، معرفشى إذا كنت فاضية .. ممكن تشتغلى والا متشتغليش ...

وقاطعته فوزية :

ـــ بقی شوف یا سیدی ! بلاش مقدمات و حیاتك خش فی الموضوع ، عایز ایه ؟!

ـــ عایزك تروحی لواحد وتقولیله إنك متصلة بی ، وتوضبی معاه إزای أقدر أقابله ...

ـــ اسمه إيه وساكن فين ؟ ...

\_ اسمه حسن محمد حسن ما انتى لازم تعرفيه .. مش فاكره الجدع الطويل الضخم اللي كان معايا في الحيمة يوم ماجيتي ..

ــــ أيوه ...

\_ أهو ساكن في القبيسي في حارة كشك نمرة ٥

ـــ اكتب لى العنوان .

\_ أهه .

ــ عاوز حاجة تانية ؟

\_أيوه ، ده عنوان الأوضة اللي كنت ساكن فيها وده مفتاحها .. تروحى هناك وتفرزى كل الورق اللي تلقيه مهم هاتيه معاكبي ، وإذا كان ممكن تجيبيلي الغيارين اللي هناك . وخلي بالك البيت لازم مراقب ..

- \_ حاجة تانية ؟
- \_ أيوه تبعتى الإيجار لصاحب البيت فى جواب مسوجر على نـفس البيت .. وآدى الفلوس ..
  - \_\_ بس ؟!
- \_ بس .. كلمينى بقى عن جمعيتكم ، فيها كام مدرسة .. استعدادهم إيه ؟ ممكن يعملوا إيه ؟ ..
  - \_ شوف ..

\_\_\_ وأخذ حمزة ينصت إليها ويكتب في ورقة اسمه وحضرة المحترم وفوزية وأشياء من هذا القبيل ، ويحسن في خطه وأحيانا يرسم دوائر وزهور ، وكان ينصت ووجهه إلى الورقة . ورفع مرة بصره إليها . كان الضوء في الحجرة يأتى من النجفة قويا باهرا ، ويتكفل الكريستال المدلى يبعث الحياة فيه وإعطائه ألوان طيف جذابة تبرق وتختلط بدخان سيجارته الذي كان قد تجمع وانعقد حول البلور وعشش بينه ، وأحال النجفة إلى خميلة ذات زهور وأكما يلفها ضباب صبح ندى .

وكانت فوزية جالسة قبالته على طوف الفوتيل تتحدث وتنفعل لكل كلمة تقولها وتكاد تقوم وتقعد ، وقد استدارت إليه بوجهها الذى أشاع فيه التعب حمرة وأشاعت القهوة في الحمزة حياة ، وبشفتها الصغيرتين المكتنزتين ويديها ذواتي الأصابع النحيلة الطويلة التي تنتهي بأظافر من ورق الورد .

واكتشف حمزة من نظرته تلك أن فوزية أنثى وأنثى جميلة ، نـــادرة الجمال ..

وسكتت فوزية فجأة وضيقت عينيها وزمت شفتيها ، ثم قالت بلهجة تقريع بحب

\_ انت سرحت واللا إيه ؟

فأجاب بسرعة وهو يعود من جولته:

\_ أبدا أبدا . . أصلى كنت بافكر في حاجة كده .

\_ طيب أقدر أكمل ؟

ــ طبعا طبعا .. أيوه .. كنا وصلنا لفين ؟

ومضت لحظة وهي ساكتة ثم قالت في مزيج من اللوم والعتاب:

\_ كنت بقول إن بهية دى واحدة من أحسن العناصر اللي في المدرسة إنها ..

واستأنفت كلامها والعتب لم يغادر نبراتها بعد وعيناها لا تتركان عينيه ، وتقول له بمعدل مرة في الدقيقة :

ـــ معايا ؟ ...

فيرد في التو :

ـــ معاكى ..

إلى أن قالت : فإيه رأيك بقى ؟ ..

واعتد حمزة وبدا عليه الجد ، بل حتى كلامه خرج جادا فيه ثقة مطمئنة وإصرار زائد وكأنه قد أصبح شخصا آخر .

- خليكى على اتصال دائم بيهم .. فهميهم أن المعركة لم تنته .. فهميهم أن الشعب بيستعد لانقضاض أشد وأقوى . الظروف اللى بنمر بيها ظروف طارئة .. نكسه لا أكثر ولا أقل إنما الغليان مستمر . دى حاجة .. والحاجة التانية من كلامك فهمت أن فايزه عندها مشكلة وافتكر أن أحسن حل لها .. وأخذت فوزية تنصت باهتام شديد إليه وتود أن تلتقط الكلمات حتى قبل أن تصنعها شفتاه كلمات ، كان في كلامه حكمة وكان يقول لها أشياء غريبة ويحدثها عن حلول تبدو لبساطتها ساذجة ولكنها في الوقت نفسه ممتعة تحار فوزية وتستغرب كيف لم تفكر في حلول مثلها .. وأخيرا قال وهو يغادر

کرسیه:

\_ أنا منتظر ، وأتمنالك التوفيق .

وقامت هي الأخرى ، وتمطت متثائبة وهي تقوم .

وسمعا مفتاحا يدور في الباب الخارجي أعقبه وقع أقدام ثقيلة وحيدة في الصالة ، وصوت غليظ يغني أحدث أغاني عبد الوهاب إذ ذاك :

\_ على إيه بتلومني .. بتلومني ليه ؟

فقال لها:

ــ دا الأستاذ بدير المحامي .

وفى أعقاب كلماته دخل بدير وهو يقول:

\_ یا ما قلبی شکا .. یا ما دمعی ..

وسكت فجأة حين وقعت عيناه على فوزية وحملق فيها كأنه يحملق إلى إنسان له أربع أيد ورأسان .

وقال حمزة :

ــ جیت بدری یعنی ؟

وكافح بدير طويلا ليقول:

\_ أصلى .. خلصت بدرى .

قالها وهو يزال ينظر إلى فوزية ويكاد ـــ لولا الحياء ـــ أن يسأل عمن تكون .

وتنحنح حمزة وقال:

\_ يا أستاذ بدير .. أقدم لك الآنسة سميحة .. تلميذتي .

فقال بدير وقد عاد إليه ذهوله:

\_ تلميذتك ؟

\_ أيوه ، مش قلت لك إنى حاادى دروس خصوصية .

\_ دروس خصوصية ؟

ــــ أيوه .

\_آه! دروس خصوصیة! طیب یا أخی .. مش تقول م الصبح دروس خصوصیة؟ أهلا وسهلا .. شرفتی یا آنسة سمیحة .. أهلا وسهلا! وسلم علیها ، وفی الجو الذی ظل فترة تسوده علامات الاستفهام والتعجب قالت فوزیة:

\_ الساعة كام ؟

فقال حمزة:

\_\_ تمانیه ..

فقالت وهي تلتقط حقيبتها:

\_ ياه أنا اتأخرت قوى .. سلام .

فوقف بدير كالمطعون قائلا:

\_ أبدالسه بدرى .. دا احنا بدرى قوى . تمانية إيه يا راجل دى ماتجيش سبعة وشوية . اقعدى والله .. أسمعك مزيكة . عندى عربى وافرنجى ، تحبى إيه ؟

فقالت فوزية وهي تعلق الحقيبة في كتفها :

\_ معلش والله .. سلام .

ويبدو أن اللهجة الفاترة التي نطقت بها جملتها حسمت كل شيء . وسار الاثنان حتى الباب الخارجي يودعانها . وابتسم بدير وهو يغلق الباب وراءها ابتسامة واسعة ذات معان ، ثم لكز حمزة قائلا :

\_ بقى بتدى دروس ؟ .. فى إيه يا ترى ؟

\_ بقى دروس! .. يا نمس! ..

وعاد حمزة يبتسم وهو يقول قاصدا أن يفهم بدير من قوله أنه يحاول تغيير مجرى الحديث:

- \_ الأخبار إيه ؟
- \_ ألا عرفتها إزاى دى يا واد ؟
- \_ يا جدع سيبنا من الحكاية دى .. الأخبار إيه صحيح ؟
  - \_ بيقولوا مفاوضات .. بقى دى تلميذتك يا دبور ؟
    - \_ مفاوضات! إزاى ؟
    - \_ رئيس الوزارة طلب مقابلة السفير الإنجليزى.
      - \_ سمعت الخبر ده فين ؟
- ــــمن واحد صديقي صحفي .. بقي دروس ؟ .. دا كان لقيته مكتوب في الزمان ..
  - \_ فين ؟
  - \_\_ أهه ..

وناوله الجريدة وانكب عليها حمزة من فوره ، بينها كان بدير يخلع ملابسه ويقول :

\_ یا خویا الجدع ده بیقول إنه مختفی وبیعرف النسوان دی ازای ؟ .. والواحد زی الشحط و ما یعرفشی یکلم مرة . قسمتنا کده یاسی بدیر .. نصیبنا کده . بت حلوة عاجبها فی حمزة إیه مش عارف ؟ علی إیه بتلومنی .. بتلومنی لیه .. یا ما قلبی شکا یا ما دمعی بکی .. ما رحمتنیش لیه ؟

وفى الساعة السادسة والنصف صباحا استيقظ حمزة فجأة منتفضا وكأنها قد حدثت أهوال أثناء نومه ، وعرف بعد ثوان أن الذى أيقظه هو جرس الباب الخارجي الذي كان يدق دقا متواصلا .

وفى الثوانى التالية استعاد وعيه وأصبح على استعداد لمجابهة الخطر . وهز كتلة الشحم واللحم التي تكون الأستاذ بدير الراقد بجانبه محاولا إيقاظه ولكن عبثا ما كان يحاوله ، فما كان يظفر على تنبيهه لبدير أن الباب يدق إلا بغمغمات وتأوهات ، وأخيرا قال بدير وهو بين اليقظة والمنام :

\_ دا لازم .. بتاع اللبن الله يخرب بيته .. روح افتحله .

وقام حمزة وهو نصف مكذب متوقعا أن يجد بدل زجاجة اللبن فوهة مسدس ، وفتح ( شراعة ) الباب .. ومرة واحدة فوجىء بفوزية واقفة وفى وجهها قلق كثير . وفتح الباب في الحال فقالت في همس سريع خطير :

- \_\_ اسمع .
  - <u> ايه ؟</u>
- \_\_ حسن اتقبض عليه.
  - \_\_ اتمسك ؟
    - ـــ أيوه .
- \_ إزاى ؟ مش معقول ! .. طيب ادخلي الأول .. أدخلي .. مش معقول ! .. قولي لي بالضبط إيه اللي حصل ؟
- ـــ رحت لقيت واقف قريب من البيت راجل باين عليه كده .. أهو

ماعجبنیش شکله والسلام . فشکیت وما رحتش علی البیت .. رحت علی قهوة فی الحارة کانت لسه بتفتح و سألت علیه الجرسون و قلت له إنی قریبته .. فبص لیه کده و استغرب و خاف منی شویه .. و بعدین حکیت له حکایة طویلة کده فقال لی إنهم راحو له البیت من یومین و خدوه .. فر کبت تاکسی و جیت علی طول .

- ــ جيتي على طول ؟

وسكت حمزة ولم يتكلم فقد راح يهز رأسه بين الحين والحين وهو يردد:

\_ غريبة .. غريبة .

ثم التفت إليها قائلا:

ـــ رحتى له إمتى ؟

ـــ دلوقت .

\_ دلوقت ؟

ــ أيوه ، ما انا قلت أروح بدرى قوى أضمن وأحسن .

وابتسم حمزة رغم ما به وقد أعجبه منها ما قالت ثم قال:

ــ طیب حصل خیر .. استنی شویة .

وغاب لحظة في حجرة المكتب ثم عاد ومعه ورقة صغيرة وقال:

ـــ أطلبي التمرة دى ، وإذا ردت قولى له إنى عايز أقابله .

\_ طيب .

ـــ ضرورى النهارده .

ــ ضروري .

وجاءهم صوت بدير من غرفة النوم:

ـــ إيه يا حمزة ؟ .. مين ؟

فرد حمزة: بتاع اللبن .

ثم التفت لفوزية وقال:

\_ إذا ماردتشي النمرة ابقى كل ما تفضى اضربيها .

\_\_ حاجة تانية ؟

\_لأ ..

\_ طيب أنا جايه بعد الضهر عشان الحاجات الباقية .. سلام .

\_\_ سلام .

وفى حماس مضطرب سريع اختفت فوزية وأغلق حمزة الباب ، وعاد على مهله إلى حجرة النوم ويداه خلف ظهره وزوبعة فى عقله .. حسن « أبو على » كا كانوا يسمونه الذى كانت الأمور تتعقد أحيانا وتشتبك ويظل هو صامتا ، ثم يتكلم آخر الأمر .. يقول كلمة أو اثنتين .. ولا يرفع صوته ولا يجادل كثيرا ، فقد كان يعمل كثيرا لا بتهور واندفاع ولا ببطء وشك ، وإنما باتزان وتؤدة واستمرار ..

كان فى الفترة الأخيرة متعطلا وقد فقد العمل ، وكان ليل نهار فى المعسكر يحرسه ويبنيه . وكانوا دائما فى حاجة إلى كلمته الواحدة أو كلمتيه الاثنتين .. والآن !

وقال له بدير:

\_ هو اللي جاب اللبن .. إيه ؟ واحدة ست واللا إيه ؟

ــ أبدا .. راجل .

ـــ أمال اتهيأ لي إنى سمعت صوت نواعمي .

\_ لازم كنت بتحلم .

ــ يجوز .

قالها بدير وهو يرعد ويبرق ويموء ويتثاءب ويعود للنوم.

وجلس حمزة على حافة السرير يفكر في فوزية وكيف استيقظت لا بد في الرابعة صباحا لتأتيه في السادسة والنصف بعد جولتها الرهيبة .

ولم يفكر في هذا إلا هنيهة ثم دلف إلى المشكلة الكبرى ( الأسمنت ) .. كان هو وحسن الوحيدين الذين يعرفان مكانه ، وقد قبض على حسن وهو لا يشك أبد في إخلاصه ولا يمكن أبدا أن يفقد الثقة فيه لحظة واحدة ، ولكن الطبيعة البشرية لها حدود والاحتمال مهما طال لا بد أن ينتهى ، ولا أحد يستطيع أن يخمن ما قد يحدث . فلا بد من نقل ( الأسمنت ) من مكانه اليوم ..

بل الآن ! وكيف يكون هذا ؟ تلك هي المشكلة .

واستمر حمزة يفكر حتى بعد أن استيقظ بدير وارتدى ملابسه وجلسا يتناولان الإفطار . وللمرة العاشرة أو أكثر راح بدير وهما على المائدة يتأسف ويشرح له نظريته :

\_ مش كده أحسن بزمتك ؟ خدامين إيه ؟ أولا كل الخدامين بلا استثناء حرامية .. وثانيا بيكلفو أكثير .. وثالثا تبص تلاقى الواحد منهم مشاركك فى عيشتك .. على إيه ده كله ؟ غسيل ؟ جبت غسالة بالكهربا . كنس ؟ جبت برضه مكنسة . طبيخ ؟ مالوش لزوم آكل فى المطاعم أحسن . وإن هف على الواحد حاجة يبقى يعملها بنفسه على الأقل يضمن نضافتها ويتسلى لذيذة جدا .. مشفتش انت المكنسة اللى بالكهربا ؟ أصلى كسلت اليومين اللى فاتو .. إنما دى حاجة مدهشة قوى .. شوف .

وقام بدير من على المائدة وفى فمه بقية من طعام ، وأحضر المكنسة ووضع وقام بدير من على المائدة وفى فمه بقية من طعام ، وأحضر المكنسة ، وضغط على الزر ولكنها لم تعمل ، فأصيب بالدعر وانحنى عليها يرى ما هنالك ، ولما أتعبه الإنحناء وجعله يتفصد عرقا جلس على الأرض ببدلته وأخذ يفحصها بعناية ويجرب ..

وكان حمزة قد انتهى من تفكيره إلى قرار ، فلا بد أن يذهب هو وينقذ

« الأسمنت » مهما حدث ، ولتكن مخاطرة وليقبض عليه ، ولكن لا بد من إنقاذ الأسمنت فقال لبدير :

\_ أنا رايح أجيب هدومي النهارده .

فرد بديروهو لا يزال منهمكا:

? as \_\_

\_ عاوز شنطتك الكبيرة.

ـــ هم .

ـــ وسبلي المفتاح .

\_\_ إيه ؟

\_ بس يا خويا البتاع البارز ده ليه ؟ يمكن هو السبب ؟ وفجأة اشتغلت المكنسة فذعر بدير للمفاجأة ، ثم ما لبث أن ابتسم قال :

\_ شفت مدهشة ازاى!

ولكن حمزة أجاب:

\_ هات المفتاح .

\_ مفتاح!

واضطر حمزة أن يعيد ما قال ، ويمد يده آخر الأمر ويتناول المفتاح . وخرج بدير .

وذهب حمزة إلى غرفة النوم حيث الحقائب الغالبة موضوعة على قاعدة ــ الصغيرة منها فوق الكبيرة ــ مكونة هرما مدرجا من الحقائب الأنيقة .

واختار حمزة أكبرها . وجرب طربوشا من طرابيش بدير ولكنه وجده أوسع من رأسه ، و لم يجد ما يصلح له إلا طربوشا قديما مهملا فنظفه ما أمكنه وحشاه بورق جرائد ليستطيع ارتداءه .. وقبل أن يغادر الشقة نظر إلى شكله في المرأة الكبيرة الموضوعة في الصالة واطمأن إلى وضع الطربوش وإلى حبكة المنظار الأسود وإلى حواجبه التي كثفها بسواد حصل عليه من رماد قطعه ورق أحرقها .

وغادر المنزل وهو ينظر إلى الناحية البعيدة عن البواب حتى لا يلحظه ، واستوقف أول عربة قابلته . وقال للسائق : باب الخلق . ومضت العربة .

كانت الدنيا لا تزال صبحا والشمس توزع صفرتها على الناس والأشياء بسخاء ، وتألم حمزة لمنظر الناس وكأن قد مضت شهور وهو في سرداب تحت الأرض خرج منه يومها . كانت فيهم ملامح أهل القاهرة الذين يعرفهم ما في ذلك من شك ، ولكنهم كانوا غير الناس الذين راهم لشهور طويلة قبل الحريق .. كانت زحمتهم هي هي ، وإسراعهم هو هو ، ولكن كان يخيم عليهـ صمت بغيض، وكانت سرعتهم غريبة هي الأخرى فهي ليست سرعة الإنسان النشيط ولكنها سرعة المرعوب ، سرعة الذي يجرى خوفا مسن الكرباج . وكان الترام لا يزال يعوى ويسير والعربات الكارو تتأرجـح وتجعجع وتركض أحصنتها ، والتاكسيات لا تزال تحوم حول الزبائن ، والدكاكين مفتحة الأبواب والكناسين يعملون ، وأحيانا تسمع في سماجة الصبح ضحكات وشتائم .. ولكن كل ما كانت تقع عليه عيناه كان خاليا من الحياة ، كله خال من أية حياة . الناس شخوص ، والحركة في الشارع تدور وكأنها تدور على شاشة باردة في فيلم رسوم متحركـــة ، والحديث والضحكات تخرج لا معنى لها أقرب إلى الأصوات التي تخرج عن الأحجار إذا سقطت أو الأخشاب إذا احتكت ، منها إلى أصوات تخرج عن أفواه بشر . وتساءل حمزة: أين الروح في هذا كله ؟ وهل يصدق إنسان أن تلك هي

القاهرة التي كانت قبل ٢٦ يناير ، وهؤلاء هم الناس الذين قاموا بمظاهرة ١٣ نوفمير والذين أمسكوا وزيرا ذات يوم من تلابيبه وقالوا : أين السلاح ؟ ومن العتبة مضى التاكسى في شارع محمد على .. حتى الموسيقى التي كانت تعزفها فرقة صغيرة كحيانة تزف إعلانا عن فيلم في سينها الحلمية .. حتى تلك الموسيقى كانت أقرب إلى نهيق حمير أو عواء أبقار منها إلى نغمات الات .

ووصل التاكسي إلى باب الخلق.

وأوقفه حمزة وحاسبه . وركب تاكسيا آخر كان قادما من شارع الخليج قال للسائق :

\_ حود في شارع الدرب الأحمر واطلع على باب الوزير.

وهدأ السائق من سيره وهو يجتاز الشوارع الضيقة المتلاحمة المزدحمة ، وهدأت كذلك بقية الحياة الباقية حتى انتهت في آخر الأمر إلى أصوات عمال الأحذية في الحوانيت المتباعدة المتناثرة وهم يدقون المسامير في القوالب ، وطرقات صانعي النحاس وهي تترى في استدامة مملة على السندان .

وعند باب الوزير غادر حمزة العربة حاملا الحقيبة وهو يتلفت فى كل اتجاه ويزن كل رجل يصادفه . وصعد فى الطريق المؤدية إلى المقابر وعيناه أمامه وخلفه وعلى جانبيه ، وحين وصل إلى المرتفع سار فى اتجاه المدافن ، وما كاد يمضى بضع خطوات حتى أشرف على أولها وتوقف حينئذ و دار بعينيه باحثا . وفى الظل الذى يجاور مقبرة وجد هناك رجلا يبدو عليه أنه يمت بصلة ما إلى المكان .

وحدق حمزة في الرجل وفي عمامته ووجهه الأسمر وعينه الحولاء والجلباب

\_ سلام عليكم .

\_ عليكم السلام ورحمه الله وبركاته.

الصوف البني الذي يرتديه ، واطمأن إلى أنه ما دام أحول فلا يمكن أن يكون بوليسا فقال :

- ـــ والله ماتعرفشي سيد فين ؟
  - \_ سيد مين ؟
  - ـــ سنيد اللي بيشتغل هنا .
- \_ ما هو فيه لامؤاخذة في دى الكلمة سيدين .. سيد شطا وسيد محمد إبراهيم .

و لم يكن حمزة قد فكر فى مشكلة كتلك فقال :

ــ سيد يا أخى .. الطويل قوى ده الرفيع .

\_ آه قول كده امال .. سيد محمد براهيم .. أيوه انت لازم قصدك سيد محمد براهيم .. أيوه انت لازم قصدك سيد محمد براهيم .. مش كده والله أنا من غير مؤاخذة غلطان ؟

ـــ هو .. هو من غير مؤاخذة راح يعمل زى الناس وجاى .. زمانه جاى . اتفضل ! هو حضرتك يعنى لا مؤاخذة عايز حاجة ؟

ـــآه .. أصل أنا طالب في كلية الطب وباجي آخذ منه عضم .. بس ده بيني وبينك ..

— عبب يابيه ، هو انا لامؤخذة عيل صغير والا عبيط ؟ دانا ياما أفندية وبهوات ولاد حلال زى جنابك جولى كتير .. كانوا بيبجوا بعربيات فخفخة قوى ويقفوا هناك هنا هه وأروح أنا أجيب لهم العضم أشكال وألوان ، ويقولوا لى عايز كام ياعم سماعين أقول والله مايتبعنى ولا ملم .. هو انا اشتريته والا تعبت فيه ؟ من هنا لهنا يتحايلو على واللي يديني نص جنيه واللي جنيه .. ومرة واحد اداني بريزه ، طب مش كله حاكم صوابعك مش زى بعضها .. ومرة واحد اداني بريزه ، طب تصدق بإيه ؟ صعب على وادتهالو تاني .

\_ هو حضرتك بتشتغل هنا ؟

\_ إلا دى .. دانا مولود هنا وإن مت بإذن الله حموت هنا واندفن هنا وأشار إلى مقبرة قريبة ، دانا جانى على باشا ابراهيم الله يرحمه ويحسن إليه ياخذ منى عضم .. كان أياميها لا باشا ولا حاجة كان زى حضرتك كده لابس طربوش برضه .. أمال ! دانا هنا وأبويا كان هنا وجدى هو اللى ناشىء الملك دا كله . طب تصدق بإيه ؟ أنا مرة جبت لواحد بيه زى حضرتك كده جثة كاملة وادانى يومها عشرة جنيه فى إيدى دى اللى بكره حياكلها الدود .. أنا هنا ؟ وإن ماكنتش انا هنا يقى مين هنا ؟ بس تقف عند باب الوزير وتقول سماعين أبو دومه فين يجيبوك لغاية عندى .. أيها خدمة يابيه ؟ عايز بقى عضم مشكل والا هيكل بحاله ؟ قول بس وفى دقيقة تبص تلاقينى جايلك اللى انت عاوزه .. عايز إيه جنابك ؟

\_ أنا عايز سيد .

\_ آه سید .. زمانه جای . أصله من غیر مؤاخذة راح یعمل زی الناس .. ماهو أنا وسید واحد مافیش فرق كلنا إخوات .

وجاء سيد ، بدا من بعيد لطوله ونحافته وكأنه شاهد قبر هبط فجأة على الأرض وأخذ يمشى ، وما إن لمحه حمزة حتى أسرع إليه تاركا أبو دومه يقول : \_\_ أى خدمة يابيه ؟ كلنا إخوات .. بس تقول فين سماعين أبو دومه ألف من يدلك .

وسلم عليه سيد بحرارة ، ولم يتبادلا كلمة واحدة حتى ابتعدا كثيرا وتاها في كثرة المقابر ، وحينئذ قال سيد :

\_ خير ان شاء الله ؟

\_ اسمع یا سید .

? 41 \_\_

- \_ انت فاكر حسن ؟
- \_ أوى ! ماله ؟ دا واد جدع قوى .
  - \_\_ اتقبض عليه .
  - \_ یا نهار اسود! ازای؟
- \_ كده .. لازم ننقل الاسمنت النهارده .
  - \_ وحسن اتقبض عليه ؟
    - \_ أيوه ماقلتلك .
- ـــ يا خسارة ! يافتاح ياعليم يارب ! ماتخدونى بقى يا أخى .. الواحد قرف من العيشة دى .
  - \_ حييجي يوم ناخدك بس كل حاجة بأوان والا إيه ؟
    - \_ وحنعمل إيه ؟
    - \_ ياللا هاته عشان نعبيه في الشنطة دى .

ومشى سيد وقد اكفهرت ملامحه وتغضن وجهه المتغضن وازداد نحولا . ومشى حمزة وراءه يراقب أقدامه الحافية الكبيرة وهى تترك آثارها على الرمال ، وجلبابه الذى عقد ذيله من ناحية والعقدة تتأرجح لكل خطوة ، وكانت المقابر تسبح فى هدوء يوم الشتاء ذاك . . هدوء مهيمن كبير أكبر من السماء والأرض ، وأشعة الشمس ما تكاد تصل حتى يشلها الهدوء فتكمل رحلتها إلى الأرض زاحفة عليلة . وكانت رياح باردة تهب . . رياح ذات طعم غتلف تماما عن رياح المدينة وكأنها تهب من فجوة خاصة فى أحد المدافن ، والقبور متراصة مزدحمة تكاد تحسبها قطيعا مهرولا من ركائب مسرجة ، ولا يستطيع الإنسان أن يميز شيئا بذاته فهو يرى القبور من خلال يوم الشتاء البارد ، ويحس بالريح من خلال القبور والزمهرير ، ولا يرى الشمس إلا مضيئة مدفنا أو زاحفة أشعتها فوق تراب حفرة . . وتنبه حمزة من تأملاته على

آثار أقدام سيدوهي تنقطع وتؤدى إلى باب فتحه سيدوأ حدث فتحه في الهدوء الشامل صريرا مزعجا . و دخل سيدو دخل حمزة وراءه .. كان المكان مظلما لا يتسرب إليه الضوء إلا من خلال شقوق موجودة بين ألواح نافذته . وكانت هناك رائحة لا تستحب لا لأنها كريهة ولكن لأن فيها شيئا ما ينفر .. كانت بلا ريب الرائحة التي تصاحب عملية تحول الإنسان إلى تراب .. وما أشد نفور الإنسان من رائحة تحوله إلى تراب !

وانقض سيد على بقعة في ركن المكان وأعمل فيها أصابعه ، وظل يعمل بلا هوادة وحمزة قد مل الوقوف فوضع الحقيبة وارتكز عليها . وتكشف التراب الذي كان يزيحه سيد عن ( مجاديل ) مصنوعة من أحجار طويلة موضوعة بعضها إلى جوار بعض وتغطى فجوة .

وأدخل سيد أصابعه الجافة بين مجدالين وناضل بقوة حتى اقتلع واحدا . وخف حمزة ليساعده ولكن سيد رفع إليه وجهه الذى كان مغطى بتراب وبعرق كثير يلمع في ظلام تضيئه رقائق الضوء وقال :

> ــ عنك انت يا أستاذ خليك مستريح .. هيه! ` قال « هيه » وهو يعتل ويقتلع حجرا آخر .

وبعد أن رفع الأحجار كلها وجفف عرقه بجلبابه حدق في الحفرة .. وحدق حمزة كذلك ، وتبين بعد أن تعودت عيناه ظلام الحفرة أن بها درجات تؤدى إلى القاع ما لبث سيد أن هبط عليها بغطائها .

وجاءه صوته بعد فترة مخنوقا محشورا:

\_ خد يا أستاذ .

وفى وجل قليل هبط حمزة ثلاث درجات ومديده وقبض على الشيء بيد من حديد ، وفى حرص بالغ وضع ( الجربندية ) التي كانت من مخلفات الجيش ، وضعها بجوار الحائط . وما كاد يفعل حتى جاءه الصوت المخنوق :

\_ خد يا أستاذ.

وتناول ( جربندية ) أخرى .

وثالثة ورابعة .

وخرج سيد في النهاية قائلا:

\_\_ الحاجة تمام يا أستاذ ؟

\_\_ تمام .

وأحضر حمزة الحقيبة الكبيرة وفتحها وأمر سيد أن يمسك . وفي دقة بالغة عالج ( أبزيم ) أول جربندية حتى رفع غطاءها وتناول أول قالب ( ديناميت ) وتفحصه وشمه واطمأن إلى أن الرطوبة لم تنفذ إليه ، ووضعه بحرص أيضا في ركن الحقيبة .. ثم مد يده واستخرج قالبا آخر وأرقده في قاع الحقيبة . ومضت ساعة .

وتنفس حمزة بارتياح وهو يقول لسيد:

\_ ابقى اتخلص من الجربنديات دول .. إرميهم إحرقهم إتخلص منهم السلام .

وأجاب سيد بإيماءة الفاهم من رأسه .

وحمل سيد الحقيبة وهو النحيف رغم إلحاح حمزة ، وعادا من نفس الطريق . وما أن وصلا إلى أول المقابر حتى وجدا هناك أبو دومه ومعه آخر . وطلب حمزة من سيد أن يحضر له عربة ، ومن بعيد كانت تأتيه الكلمات التى يتبادلها أبو دومه وصاحبه :

\_ وبياخدوا العضم ده يعملوا به إيه يابو دومه ؟

\_ أنا عارف يا خويا بيدرسوا عليه .. بيركبوه ويعملوه بني آدم تا ني .. حد عارف ؟

\_إلا أنا سمعت يابو دومه إنهم بياخدوا العضم ده يسحروا بيه ويعملوا بيه

عمولات ، وإنهم لاهم دكاتره ولا حاجة .

وجاء التاكسي .

وحمل حمزة الحقيبة برفق شديد ووضعها إلى جواره وقال لسيد:

\_ شد حيلك .

فقال سيد:

ــ شدوا حيلكوا انتوا .

وقبل أن تنطلق العربة وقف أبو دومه وأشار لحمزة مودعا:

ــ مع السلامه يابيه .. أيها خدمة .. بس عند باب الوزير تقول عمى سماعين أبو دومه فين ألف من يدلك .. مع السلامة .. كل اسمنت وانت طيب !!

ولم يسمع حمزة الجملة الأخيرة ..

## **Y**

حين استقر مرة أخرى فى شقة بدير جلس على الفوتيل ووضع الحقيبة بجواره على السجادة ، وراح يفكر فى تفاصيل ما حدث منذ أن غادر ترب باب الوزير قاصدا العباسية حيث يقطن صديقه السيد محمد رشدى . كان وهو يصعد بالحقيبة إليه ليطلب منه أن يبقيها عنده يكاد يجزم بما حدث ويكاد يخمن الارتباك العظيم الذى انتاب رشدى وخروجه و دخوله أو دة الجلوس عدة مرات ، وصوت امرأته حين علا ، والابتسامة الحزينة الحجلة التى ظلت طول الوقت لا تغادر وجهه والكلمات ترتج عليه محاولا أن يعتذر بالأولاد

والحالة الصعبة ، قائلا آخر الأمر إنه لا يستطيع أن يخفى أى شيء ... كان حمزة حائرا .. هل يحقد على رشدى أم يرثى له ؟

ويكاد يكون لدى البعض رغبات خفية تراودهم أحيانا أن يضبطوا غيرهم متلبسا بلحظة ضعف ، ليروى الواحد منهم نفسه بالتشفى به وإذلاله وإثبات قوته هو وجبروته وصلابته .. غير أن رغبات مثل تلك لا تسراود إلا الضعفاء .. وكان حمزة أبعد عن أن يفكر في التشفى أو تحقير صديقه لموقفه ذاك ، فقد كان يعلم أن لكل إنسان قدرة محدودة على المضى في الطريق ، وإن على الذين في استطاعتهم مواصلة المسير أن يرثوا للمتخلفين وألا يفقدوا فيهم الأمل .

ولكن مشكلة الحقيبة كانت لا تزال قائمة وبدير لن يسمح أبدا أن تمكث في شقته ثانية بل لو علم لما أبقاه هو . وعليه أن يودعها في مكان أمين ، وأين المكان الأمين في ظروف كتلك ؟

ودار المفتاح في قفل الباب .

ودخل بدير وما أن رأى الحقيبة حتى قال:

\_ جبت المدوم ؟

\_ أه .

ــ وخدت الشنطة الكبيرة ليه ؟ إياك عندك هدوم كتير ؟

ـ اه .

وكان بدير يتكلم وهو يروح ويجيء مبتهجا ويدور في الحجرة وينظر أحيانا إلى الحقيبة . ولا أحد يدرى مصدر النزوة الغريبة التي راودته والتي تراود الناس كلما رأوا حقيبة كبيرة أن يجلسوا عليها ، وقال بدير وهو يكف عن مشيه ويهبط بجسده الضحم فوق الحقيبة :

ــ هه .. وازيك ؟ مالك مبوز كده ؟

\_ واندفع حمزة يصرخ:

\_ أوعه .. أوعه .. قوم .

وانتفض بدير واقفا فى ذهول لا يدرى سببا لهذا الصراخ المفاجئ . وقال حمزة فى نبرات متقطعة محاولا إصلاح الأمر :

\_ أصل .. الهدوم تكسر .. الشنطة ماتستحملش .

\_ يا خويا خوفتني .. هي هدومك قزاز والا إيه ؟

\_ أبدا .. هه .. أما اشيلها أحسن .

ورفع حمزة الحقيبة وتكلف جهودا شاقة ليستطيع أن يبدو أمام بدير وهو يحملها فى خفة وكأنها تحتوى ملابسه فقط . وعاد إلى الحجرة وجلس صامتا ناظرا فى ساعته . كانت الساعة الرابعة وما تبينها حتى أحس بجفاف فى حلقه وبشىء من الرهبة ودق القلب . . أحس بهذا كله دون أن يدرى له سببا . كل ما فى الأمر أنه تذكر أن ما بعد الظهر قد حان ، وما بعد الظهر ميعاد فوزية . ودار حديث مابينه وبين بدير ، ولكن الحديث الحقيقى كان يدور بين حزة ونفسه . وكان الحديث يدور حول فوزية .

\_ ماذا حدث ؟

لقدتم أول لقاء بينهما وكل شيء هادئ وعادي .

فلماذا أدمن بعد ذلك التفكير فيها ؟

ولهفته على لقائها فى مصر الجديدة لم تكن أبدا لهفة لقاء عادى .

وما الذى فعلته فيه أصابعها الطويلة النحيلة وهي تلتف على يده بقوة تصافحه ؟

وما تلك الإشعاعات الظاهرة التي تنبعث من عينيها كلما نظر في عينيها فتسلبه إدراكه ؟

وما مصدر تلك القوة الغامضة التي تدفعه إليها ذون وعي أو تفكير كما

يندفع الحديد إلى المغناطيس ؟

أبدا .. لم يحس بشيء كهذا في حياته . كان يستلطف بنات وأحيانا يهذر مع بنات ويقبل بنات ويصادق بنات ولكنه لم يشعر أبدا بإحساس خفي مثل ذاك الذي بجذبه بقوة لا يستطيع مقاومتها إلى فوزية ؟

هناك شيء ما محير يحيط بتلك الفتاة .. لا بد أن في الأمر سرا لا يدريه . إنه لا يحبها إذ الحب في نظره علاقة لا تنمو هكذا بمجرد نظرات وكلمات ولقاءات . الحب الحقيقي علاقة مادية يقتضى وجودها زمنا وعشرة وتجربة بمر بها الرجل والمرأة فتصهرهما في بوتقتها .. فإذا لم يكن يحبها فماذا يدفعه إليها ؟ ولماذا أصبح حلقه يجف وقلبه يخفق كلما مرت بخياله أو سمع اسمها أو حتى إذا جاء في حديثه مع بدير ذكر لأى كلمة فيها الفاء والواو والزاى .. أو حتى الزاى وحدها ؟ ولماذا راح دون وعى منه يستعرض كل النساء اللائي رآهن خلال رحلته إلى باب الوزير ويقارن أيضا دون وعى بينهن وبينها وتكون هى الرابحة دائما .. بل كل النساء إلى جوارها رجال أو هن أقرب ؟

لماذا هذا كله ؟ ولماذا دأب فى الأيام الأخيرة على حلق ذقنه كل يوم والوقوف أمام المرآة طويلا ؟ ولماذا يغالط نفسه ويدعى أنه يرى فى المرآة أمامه إنسانا وسيما ؟

ولماذا راح يفتش عن لمحات جمال في نفسه . واكتشف الآن فقط أن أنفه جميل وأسنانه ناصعة البياض وذقنه الغزير كلما جار عليه بالموسى وهو يحلقه أصبح له لون رمادي باهت يتلاءم تماما مع لون بشرته ؟

إنه شخص علمي يؤمن بالعقل والعلم ولا بد من تفسير لتلك الظاهرة .. لابد من وجود سبب ، ولا بد أن يدرس انفعالاته حين تأتى ويراقب نفسه ويحصى عليها حركاتها وسكناتها ، ويتفحص فوزية بدقة إذ لا بد له من العثور

على تفسير.

ومع أنه كان جالسا فى حجرة المكتب بعيدا عن باب الشقة إلا أنه سمع حفيف الأقدام التى تصعد السلم وجف حلقه للحفيف وازداد جفافا حين توقف الصوت لدى الباب ، ولم ينتظر دق الجرس بل انطلق من فوره وفتح الباب ليجد فوزية واقفة على عتبته تحمل حقيبة من القماش بيد ويدها الأخرى على الزر ، وحين ابتسمت له عبقت الدنيا برائحة بسمتها واستحال شخصا آخر . . لا نقاش ولا جدال ولا علم ولا عقل . . قلب يخفق ، وريق ينضب ، وعرق خفيف ينبت ، وطاحونة دائرة فى رأسه ، وقوة خارقة تدفعه مغمض العينين إليها . . وجاءه صوتها ساحرا فى لطفه رقيقا عذبا يقول :

\_ إيه ؟ .. مش عايزني أدخل ؟

وتعثرت بسماته وتعثر اضطرابه وهو يقول:

\_ أبدا .. أبدا .. اتفضلي .

\_ ياه .. انت مؤدب قوى النهارده .

ودخلت فوزية وسبقته إلى حجرة المكتب .

وأحس باطمئنان أبدى حين احتوتها الشقة ، وهبط الخوف الذي كان يملأ صدره ولا يدعه يستريح .. الخوف من أنها لا تجيء ، أو إذا جاءت يحدث حادث مثلا ولا تدخل الشقة ، أو يكون وراءها عمل آخر فتأتى لتعتذر ، أو يقبض عليه قبل حضورها .

وقام الاستاذ بدير يرحب بها فى ضجة ، ومع أنها كانت قد اختارت أن تجلس على الفوتيل و لم يتركها إلا تجلس على كرسى إلا أنه ألح عليها بإمعان أن تجلس على الفوتيل و لم يتركها إلا بعد أن نفذت إلحاحه .. وانطلق إلى المطبخ وعاد بعد ثانية بزجاحة عصير فواكه مثلجة وقدمها وهو يعتذر بأن الزجاجة مش قد المقام .

وبعد ما انتهت ضجة الترحيب سكت الثلاثة .. سكت حمزة لأنه كان

يتأمل فوزية ولا يحس بأدنى رغبة فى الكلام ، وسكتت فوزية لأن كلامها كان يحتم انفرادها بحمزة وكان يبدو على بدير أنه أضيق الثلاثة بالصمت وأنه يود فتح أى باب للحديث ويود إطالة الجلوس .

غير أن الباب ظل مغلقا لا يكاد يجسر أحد على فتحه ، و لم يجد بدير فائدة فخبط على فخذيه وهو يقول :

\_ طيب .. هه .. أسيبكو بقى للدروس وأقوم أنا .

ومع هذا لم يقم وكأنه ينتظر أن يشفق عليه أحدهما ويستبقيه ، غير أن واحدا منهما لم يقل حرفا .

واعتدل بدير في تراخ وترك الحجرة ، وظل يروح ويغدو في الشقة ويغنى أحيانا ويدخل عليهما الحجرة ويبحث في أدراج المكتب عن أشياء ولا يجدهذه الأشياء ، وهذا كله يحدث وحمزة وفوزية لا ينطقان بحرف ، حتى إذا ما قال بدير أخيرا وقد فتح الباب الخارجي وأمسكه بيده :

\_ هه .. أوروفوار بقى .

قال الاثنان : أوريفوار .

واستعادت فوزية نشاطها المتيقظ ولمعة عينيها والتفتت إلى حمزة قائلة : \_ الهدوم أهه .. وآدى الورق والباقى مكنشى فيه حاجة مهمة ، وآدى وصل الجواب المسوجر .. والنمرة مردتش .

ــ نمرة إيه ؟

\_ الله ! انت نسيت !

\_ لا أنسى إزاى .. مردتش ؟ انتى عارفه معنى كده إيه ؟

\_\_ إيه ؟

\_ إنى خلاص فقدت آخر صلة لى باللجنة .. والله كل ما تلقى نفسك فاضية اضربيها يمكن ترد .. يمكن يرجع .

\_ فيه حاجة تانيه ؟ لأ

ووجد شيئا يدفعه إلى أن يضيف :

\_ أهو دلوقتى إتعزلنا احنا الاتنين .. يعنى كأننى 3 فى جزيرة معك . . وسرح خياله مع التعبير .. فى جزيرة معها هى والطبيعة واللامسئوليات .. كم يبدو هذا رائعا ! وهل ستسير حياته كلها هكذا معارك وكفاح وتربص وحذر ؟ كم تبدو الراحة والمتع الصغيرة التي لا يزاولها حلوة .. كم يبدو بيت هادئ وزوجة وأولاد جميلا ! أحيانا يهفو إلى قضاء يوم على شاطىء البحر فى مصيف ، أحيانا يود الذهاب إلى الأوبرا ، أحيانا يريد أن يرى أوروبا .

وعاد يريد أن يحدق فيها و لم يجد لديه جرأة كافية ، بل لم يعد في استطاعته أن تلتقى أبصارهما ولا عاد يرى فيها الإنسانة التي من لحم ودم والتي تعود أن يراها ، بل أصبح ينظر إليها وكأنها استحالت إلى شيء معنوى له قدسية وخشوع ، أصبح يراها كما يتأمل العاشق القمر فلا يجد فيه كوكبا آخر يضئ بأشعة الشمس المنعكسة ، وإنما يرى فيه وجه الحبيبة وأسعد ما عاش من ساعات ، والهمسات الدافئة وكل الذكريات .

وكان الصمت قد طال حتى بدا وهو فى أشباه أحلامه يحس به ، ويحس أن لا بد له من نهاية فقال لها :

ـــ تعرفي إن كل معلوماتي عنك لا تتعدى إنك مدرسة وسكرتيرة اللجنة وبس ..

- ـــ وعاوز تعرف إيه ؟
  - ـــ كل حاجة .
- ــ ياه .. دا انت الظاهر فاضى .
  - ــ وورانا إيه ؟

وبدأت تتكلم بعد تردد و حمزة يستمتع بكلامها و بحالة السلبية التى تملكته والتى كان سعيدا بها . هى الابنة الكبرى لمدرس أيضا و لها أختان و ولد ، أبوها تعلم فى المعاهد و تخرج من دار العلوم ويدرس العربى وله فى كل مشكلة رأى ويعتبر نفسه عصريا بكل ما تحمل تلك الكلمة من معان . وبينه وبين أقربائه الذين يكونون جيشا عرمرما من موظفى الدرجة السابعة فما تحت ما صنع الحداد حين قالواله : عيب تشتغل بنتك . مط لهم شفتيه وقال : ما عيب إلا العيب ، والذين يعملون أشرف من الذين لا يعملون . وحين نقلت إلى طنطا وكان لابد أن تسكن هناك بمفردها وأشفقوا عليها من المصير قال لهم : اللى ما يقدر يحافظ على نفسه حيحافظ عليه غيره ؟ وحين رآها بعض ذوى قرباها يحمولة على الأعناق فى عابدين فى مظاهرة ١٣ نوفمبر وهى تهتف وذهبوا إليه يستنكرون ويتبرون قال : كلموها هى .. أنا أبوها مش سيدها .

ليس هذا فقط بل إنه يحفظ رباعيات الخيام ، ويرى أن نصف مشاكل العالم تحل بعد حمام دافئ . وأن الوسيلة المثلى لإخراج الإنجليز من مصر هى ما اتبعه غاندى ، وأن المعيز والمغازل أقوى مليون مرة من المدافع والدبابات ، وإن كان يستدرك بعد هذا ويقول : بس ده رأيي الخاص .. وأنا أحترم رأيك جدا مهما كان .. أنا كما يقول فولتير : أنا وإن كنت لا أرى رأيك إلا أننى مستعد أن أفقد حياتي دفاعا عن حقك في إبداء رأيك .

وقطعت فوزية حديثها فجأة قائلة :

\_ قوللي ؟

ــــ أيوه .

\_ انت لابس البدله ليه ؟

وتذكر حمزة كل مادار في يومه الطويل وقال:

\_\_ أصلي خرجت ..

\_ خرجت ؟ إزاى ؟ إزاى تخرج ؟

\_ كان لازم .

٩ سا\_

وتردد حمزة مرة أخرى ولكنه آثر أن يفضى إليها وقال:

\_ حسن كان يعرف مكان ديناميت مخبيينه ، فكان لازم أروح بنفسى

وأجيبه .

\_ دینامیت ؟

\_ أيوه ديناميت .

\_\_وجبته ؟

\_ جبته .

\_\_ فين ؟

\_ جوه .

? lia\_\_

\_\_ أيوه هنا .

\_ إزاى مخليه هنا ؟ مش خطر ؟

\_\_خطر .

\_ وهنا مش كويس!

\_\_ مش كويس أبدا.

\_ لازم ينشال .

ــ لازم .

\_ وحتعمل إيه ؟

\_\_ **حنقله** .

\_\_ فين ؟

- \_ ما اعرفشي .
- \_وده کلام ؟
- \_ معلش .. لازم أوجد حل .

وسكت وسكتت وهي تهز ساقها الموضوعة فوق الأخرى في عصبية ، وأخيرا قالت :

- \_\_ تشرب قهوة ؟ أنا عايزه قهوة .
  - \_ تعرفی تعملی ؟

ـــ طبعا أعرف! انت فاكرنى مثقفة متعفنة! دانا اللى شايله بيتنا كله وشغله .. دلوقتى حتشوف القهوة!

\_ ورينا شطارتك .

وبعد قليل رجعت وقدماها تزحفان ببطء وعلى الصينية كوب لها وكوب آخر له ، وبخار القهوة يتصاعد ويملأ الغرفة برائحتها التى يتفتح لها الشم والبصر .

وأخذبت فوزية تحتسى قهوتها فى رشفات سريعة حتى أتت عليها وحمزة ما يكاد يتذوق كوبه ، وسألته فوزية ونشوة بهيجة تطل من عينيها :

- ـــ إلا قوللي .
- \_ أقولك إيه ؟
- ــ انت بتشتغل إيه ؟

وضحك حمزة ضحكة طويلة مغتصبة وقال:

\_ اننى لسه لدلوقتى ما تعرفيش .. خمنى باشتغل إيه ؟

\_ مدرس ؟

وضحك حمزة مرة أخرى وقال:

ـــ اشمعنى يعنى ؟! .. لا .

- \_ طالب ؟
  - \_لأ .
- \_ محامى ! أمال إيه صحيح ؟
- \_ تسمعي عن الناس اللي بيسبغوا الهدوم أهو أنا منهم .
  - \_ كنت بتشتغل في مصبغة يعنى ؟
    - وضحك حمزة وأجاب:
- \_ لأكنت باشتغل كيماوى في مصنع شركة الحرير.
- \_ أمال إيه اللي خلاني أفتكرك مدرس .. انت لازم سبت الشغل بقى ؟ \_\_\_ ياما سبت شغل . \_\_\_ ياما سبت شغل .

ونظرت إليه فوزية ، أكانت علامة إعجاب نظرتها ؟ لا يدرى فقط جعلته تلك النظرة يخجل ويسقط عينيه إلى الأرض .

وقالت فوزية في عصبية مفاجئة :

ــ تعرف أنا النهاردة كنت حاضرب الناظرة! إيه ده ؟ الناس بقى دمهم تقيل قوى .. ناظرة آخر رجعية وسخافة فى العالم . تصور هى بنفسها اللى بتفتح كل الجوابات الواردة للمدرسة وتقرأها .. امبارح فتحت جواب لى .. الله ماتشرب القهوة .. انت سارح في إيه ؟ بتبصلى كده ليه ؟

وكان حمزة تائها فعلا فى وجهها لا يكاديعى ، وعيناه مثبتتان على بشرتها يرى كلماتها ولا يسمعها ، ويراقب ذرات النور وهى تتساقط على ملامحها الدائمة الانفعال ، ويفكر فى أشياء كثيرة لا يعرف ما هى .. وانتبه فجأة على سؤالها فقال :

- \_ أبدا .. آه .. أصل أنا ساعات باسرح كده .
  - \_ الظاهر إنك تعبان .
    - ــ أبدا .. أبدا .

\_ أمال عينيك شكلهم غريب ، وبتبص كده .. كده .. كده فيـه حاجة ؟

- \_\_ أبدا .. أبدا .
- \_ طيب أنا لازم أمشى .. ياه ! أنا اتأخرت قوى .
- \_ تمشى ازاى ؟ لسه بدرى .. لا يمكن حتمشى دلوقت .
  - \_ لا ، لازم أمشى .
  - \_\_ لسه بدری جدا .. مش ممکن ..
  - \_\_ طيب أقعد خمس دقايق ، لغاية لما تبقى تمانية .

وأحب حمزة أن يشارك في حديث يجعلها تبقى فسألها:

\_ هيه .. عاملة إيه ؟

فقالت وهي تقف في ضيق عصبي مفاجئ:

\_ تعرف أنا النهارده كنت حنفجر .. الناس خلاص استسلموا .. عاملين زى التمساح الميت مهما تنغز فيه مايحسش .. إيه ده ؟ ده لو كانوا عشرين مليون دوده ما كانوش استموتوا بالشكل ده .

وكان حمزة مستمتعا بحالة الاسترخاء السلبي الذي كان يستقبل بها حديثها وملامحها ولكنه لم يعجبه كلامها الأخير، وتردد برهة بين أن يسكت ويواصل الاسترخاء وبين أن يرد فينشب جدل يعكر الجو الحالم الذي ساد الغرفة. ولكنه وجد نفسه يقول:

\_ بس انت غلطانه إذا كنتى فاكره إن الشعب مستسلم .

\_ غلطانه ازای والناس میتانه خالص ؟ دا ولا کأن البلد بلدهم وملك حقیر عمال بیخون ویلعب بقضیة البلد زی ما هو عایز ..

\_ انتی شایفه الظاهر بس .. وعمر المظاهر ما تصلح أساس للحكم فاهمانی ازای ؟ ( جمهوریة فرحات )

ــ يا شيخ مظاهر إيه ؟ احنا أصلنا شعب مسالم استعمر آلاف السنين وخد على الذل .. حتى الحرب الأخيرة ماحركتشى فيه ساكن .. أصل طبيعتنا الزراعية وأرضنا السهلة وجونا اللى مفهشى تغيرات كبيرة مش ممكن يخلق شعب مقاوم زى الشعب اليوناني مثلا .. احنا ناس عاديين ومش ميالين للعنف .

ـــ برضه أنا مصر أن دى نظرة سطحية محضة .. شعبنا ده فيه قوة مقاومة لا يمكن تصورها .. قوة مريعة مستخبية ورا السبح والصهينة وضرب الدنيا صرمه .

ــ بس الزمن عمل عمله فى الناس يا حمزة والظلم اللى استمر آلاف السنين ترك أثره .. انت مش متصور ..

ــ أنا متصور كل حاجة .. والظلم اللي بتقولي عليه ده مش أضعف المقاومة دا زودها .. فاهماني ازاى ؟ انتى لو كنتى في إسكندرية يوم ٦ مارس وشفتى العيال وهم فاتحين صدورهم وداخلين على المترليوزات ماكنتيش تقولى كده .

- ــ دا كلام بيني وبينك بنقوله احنا بس .. إنما الحقيقة ..
  - \_ أبدا الحقيقة إن ده حصل فعلا وشفته انِا بعيني ..
- ـــ حصل إزای ؟ مش معقول .. هو ده معقول حد يدخل على الرصاص بصدره ؟

ـــ بس ده فعلا حصل .. كان الانجليز الاربعة فاتحين المدافع والرصاص زى المطر ، والعيال كانوا واقفين فى الميدان فعلا ونازلين فيهم ضرب بالطوب والحجارة .

ـــانت حتجننی ! اسمع یا حمزة .. أنا مش ناقصة حماس .. مفیش داعی تبالغ . \_ بشرفى ما ببالغ .. أنا كنت فى المظاهرة يومها .. ومش أنا بس اللى شفت .. على الأقل ٠٠٠٥ واحد شافوها يوم ٦ مارس .

\_ كان في اسكندرية الكلام ده ؟

ــ اه.. يوم ٦ مارس بالذات ده كان يوم تاريخي بالنسبة لي شخصيا .. كنا أيامها بنمر بفترة رهيبة من تاريخنا .. كنت طالب في كلية العلوم في اسكندرية وكل يوم والتاني مظاهرة ومؤتمر ، وكان لي صديق اسمه أمين كان طالب في كلية الحقوق .. دلوقتي بقي وكيل نيابة .. قابلته في الصيف اللي فات . كنت أنا وهو ما نكاد نسمع عن مظاهرة أو إضراب إلا ونطير على هناك ، وكان لأمين بالطو مربعات مشهور جدا في المظاهرات كان أصله بالطو جبردين وقلبه ، والجبردين قماشه من جوه مربعات .. كنا لما نعرف إن فيه مظاهرة يلبس هو البالطو ويجرى على هناك .. وكانت مصر بتتوالى عليها حكومات صدقى والنقراشي والبلد كلها ثائرة وواقفة ضد أى تسليم في حقوقها . وكنت أنا مجرد طالب عادى من اللي بتشفيهم يملوا الشوارع في المظاهرات .. خرجت من بيتنا الصبح ، واسكندرية يومها كان مفروض إنها في حالة حداد على الشهداء اللي ماتوا في ٢١ فبراير في القاهرة .. وليلتها بالليل كان في البلد رأيين : رأى ينادى بوجوب أن يمر اليوم هادئا وهذا كان رأى الإخوان ، والرأى الثانى كان بيصر على أن تقوم مظاهرات واسعة النطاق لتخلد اليوم ويصبح جديرا بذكري الشهداء . وانتصر الرأى الثاني والصبح كانت البلد كلها تعج بالمظاهرات . خرجت من البيت وفت على أمين وذهبنا للبحث عن مظاهرة نشترك فيها.

وعند تحطة الرمل وجدنا مظاهرة كبيرة ممتدة من المحطة إلى شارع سعد زغلول ، ولأول مرة كنت باشوف مظاهرات مش فيها طلبه وبس ، إنما فيها طلبة وناس كبار وناس بجلاليب وتجار وكمسارية ترماى وعمال وأولاد من

اللي بيلموا سبارس ويمسحوا جزم وصبيان ورش .. الأولاد اللي بيقولوا عنهم الغوغاء . ومرت المظاهرة بكشك استعلامات إنجليزي كان مبنى بالأسمنت المسلح وأصبح مكانه الآن منتزه ، مرت من أمام الكشك و كانت له شباييك بتطل على محطة الرمل وعليها يفط مكتوبة بالإنجليزى تحمل تعليمات إلى العساكر . بعض الأولاد اللي بيمشوا دائما على حواف المظاهرات حاولوا خلع يافطة فمنعهم الرجالة الكبار ، إنما كما يحدث في مثل هذه الأحوال الناس وقفت والتفت حول الكشك .. وانتبه الناس له وكأنهم لم يروه من قبل . وكانت نتيجة توقف المظاهرات أنها تفرقت حول الكشك فحاصرته . أنا كنت في الناحية البعيدة من شارع سعد زغلول فسمعت من الناس إن الكشك فيه سلاح وإن الواحد ممكن يدخل ويشيل زي ماهو عايز. وحكاية السلاح دى عندى حساسة جدا .. فمثلا أنا مرت على فترة أيام أن كنت في توجيهي وأولى جامعة كنت عاوز مسدس وبس .. كانت كل حياتي متبلورة في حصولي على مسدس .. مش المهم استعمله في إيه المهم كنت عايز مسدس وبس .. وسمعت مرة أنا وأمين إن مصر الفتاة بستصرف مسدسات لأعضاءها ، فاتفقنا أن يدخل هو فيها فإذا أعطوه مسدس أدخل أنا أيضا . وتستطيعي أن تتصورى مبلغ شوقى ورغبتي فى دخول الكشك فى تلك الساعة عشنان أقدر أحصل على مسدس .. الميدان كان ساعتها مليان ناس ، عدد كبير جدا من الناس ، وما شعرت بنفسي إلا وأنا بابحث عن باب الكشك .. لقيته ولقيت ناس داخلين فيه .. دخلت ، دخلت كده من غير أى تفكير ولا عقل .. كان فيه إحساس غريب كبير بيحركني .. الكشك من جوه كان مظلم وكان الواحد أول ما يدخل يلاقي أوضه كبيرة واسعة من غير شبابيك وفيه باب بيؤدى إلى أوضة ثانية جوانية .. ويدوبك أصبحت في وسط الآودة البرانية ومعايا ناس إلا وسمعنا أصوات غامضة .. تك .. تك ..

تك .. سريعة وورا بعضها . أنا عمرى ما سمعت مترليوز بيضرب ، وماكنتش أتصور أن صوته لما يضرب بيكون واطى كده .. شعرت برهبة شديدة :. وجدت الناس خارجين من الأوضة الجوانية جرى ، وبعضهم بيقع على الأرض وينام ، وبعضهم بيصرخ وكل اللى قادر يجرى ييجرى .. فجريت خرجت بره وفضلت أجرى بعيد عن الميدان والحتة كلها لغاية ما طلعت على الكورنيش وأنا مذهول ومش فاهم حاجة ومش عارف حاجة . اعتقدت إنى لازم أصبت ولسه لم أشعر .. وأنا كنت سمعت إن الواحد لما بيضرب بالرصاص لا يشعر بإصابته فى الأول . فتشت جسمى كله لقيتنى سليم ، ومن غير ما أدرى لقيت نفسى راجع للميدان .. ولقيته ساعتها منظره رهبب جدا . الكشك ولو إنه كان كشك استعلامات كل ما فيه أشغال مدنية ، إلا أنه كان فيه أربع عساكر إنجليز ومعاهم أربع مترليوزات وقاعدين مستعدين فى الأوضة الجوانية من الصبح ، ومنتظرين الناس لما يدخلوا عليهم مستعدين فى الأوضة الجوانية من الصبح ، ومنتظرين الناس لما يدخلوا عليهم فيروحوا فاتحين عليهم المدافع .

فلما الناس جريت ومات اللى مات واتعور اللى اتعور ، العساكر خافت وراح كل واحد منهم مصوب مدفعه من شباك ونازل ضرب فى الناس اللى فى الميدان علشان يبعدهم عن الكشك .. وفى دقيقة كان الميدان اللى كان بيموج بالناس فضى خالص . كل أصحاب البدل اختفوا لما أصبحت الحكاية جد .. وكل أصحاب الجلاليب استخبوا فى مداخل العمارات اللى بتطل على الميدان ، وكل أصحاب الجلاليب استخبوا فى مداخل العمارات اللى بتطل على الميدان ، وتعرف مين اللى فضل واقف لواحده فى الميدان والضرب شغال من كل ناحية ؟ تعرفى مين ؟ الأولاد اللى الإنسان لا يعرف لهم أهل ولا يعرف لهم البس ولا صنعة . عيال صغيرين أكبر ما فيهم لا يزيد عن ١٥ سنة .. سمر ومعفرين وشعرهم منكوش وهدومهم خرق .. يعنى اللى فضل هم اللى بيسموهم الغوغاء .

وقفت أنا فى مدخل عمارة قريبة ، وكان ممكن أضرب وكان ممكن أموت ، وكان عقلى بيراودنى أن أرجع إنما كانت قوة خفية بتمنعنى منع عن الحركة . وقفت أتفرج ، المدافع نازلة ضرب والأولاد غير مكترثين إطلاقا ونازلين ضرب بالطوب والحجارة .. تصورى ! بيضربوا طوب قصاد مترليوزات .. والحاجة المذهلة إن الواحد منهم كان يصاب زميله اللى بيضرب جنبه ويقع ويموت وهو واقف ونازل ضرب بالطوب ..

وبعد شوية لقيوا إن الطوب أصبح لا يجدى .. فبصبت لقيت واحد منهم راح قالع جلابيته الخرق وبلها بنزين من عربية واقفة ووطى وفضل يجرى لغاية ما قرب من الكشك وراح رامى الجلابية المولعة من الشباك جوه الكشك ، وكان ده بداية تحول فى المعركة .. بقى الأولاد يجروا ويجيبوا أى حاجة .. ورق .. خرق .. خشب ، ويبلوها بنزين من العربيات ويجروا والرصاص حواليهم وفوق دماغهم كأنه ناموس بالضبط ، ويفضلوا يجروا ومش يحدفوها من بعيد وخلاص ، لأ يصروا على أنهم يوطوا خالص لما يقربوا جدا من الكشك ويروحوا حدفينها من نفس الشبابيك اللى بتضرب منها المترليوزات . لما اشتدت المعركة بقوا يدخلوا على الحلواني المطل على الميدان . ويجيبوا كراسيه ويولعوا النار فيها ويطلعوا وهم بيصرخوا صرخات الحرب ويجروا ويرموها غلى الكشك .

وبدأت النار وامتلأ الميدان دخان .. دخان كثيف جدا . وأصبحت المنطقة كلها مليانة دخان ورصاص و نار وصراخ و تكتكة مترليوزات .. و في وسط الدخان ، و في وسط الهول دا كله تبصى تلاقى العيل من دول أسمر لونه زى التراب و عريان و جسمه مهبب وبيز حف على بطنه و شايل كرسى مولع و الرصاص حواليه و هو ماشى بالكرسى في ثقة و اعتداد و مصر على توصيله لحد الكشك .

وفي مدخل العمارة اللي كنت واقف فيه مع الناس كنا عمالين نبص ونستعجب ونخبط كف على كف . كنا زى ما نكون بنتفرج على أبطال قصص خرافية عمالين يقوموا بأعمال خارقة قدام عينينا . كان شيء عجيب يذهل . كانت لحظة من اللحظات اللي تشوفي فيها شعبنا ... الشعب اللي بيقولوا عليه طيب ومستسلم .. اللي بيقولوا عليه ساذج ومتسامح .. تشوفيه فيها عملاق .. تشوفيه فيها مارد لا يمكن لأى قوة أن تقتله .. تشوفيه في العيال اللي كان أكثرهم يمكن يومها مافطرش واللي كان الرصاص بيدبحهم دبـح ، وعمالين يقاوموا ويحاربوا وعارفين إنهم بيحاربوا الإنجليز ، وعـارفين إن الإنجليز معاهم مدافع وإنهم هم ممعاهمش حاجة ، ومع هذا مصرين على حرق الإنجليز الأربعة اللي قتلوا الناس مهما مات منهم . كنت واقف وجسمي فيه حمى ، وعيني بتشوف حلم غريب تكشف لي فيه شعبنا على حقيقته .. كتير جدا شفناه في أوقات ضعفه وكتيركنا بنلعنه ونستهين به ، إنماكنت عايزكل اللي بيمطوا شفايفهم لما تيجي سيرة الشعب .. كنت عايزهم يكونوا هناك ويشوفوا الميدان مليان جثث .. شبان وطلبة وعمال مفروشه جثثهم على الأرض والإسعاف عمالة تحول .. كانت بتيجي عربية الإسعاف مش تشيل واحدوتمشي ؟ لأ .. كانت بتنتظر لما تتملي جثث وتطلع وييجي غيرها يتملي ويمشى .. والناس مش عايزة تتحرك من مكانها .. والغوغاء اللي بيقولوا عليهم عمالين يتقتلوا ومابينتهوش كان بيتهيأ لى إنهم بيزيدوا .. كان بيتهيأ لى إنهم عمالين ينضم لهم أولاد من تحت الأرض فعلا . كل العيال اللي في إسكندرية كل ما كانوا يسمعوا وهم بعيد عن المعركة كانوا بييجوا جرى عشان ما تفوتهمش . والعجيبة إن في وسط دا كله ، في وسط الموت والدم والدخان والرصاص فجأة تحولت أنظار الأولاد إلى طيارة ركاب كانت فايته واطيه جدا وقعدوا بيصوا عليها ويشاوروا ويهللوا ، في نفس الوقت اللي

بيضربوا فيه بالطوب وبيرموا الخرق المولعة . وكان البوليس المصرى جه ووقف فى أول شارع سعد .. ما كانش بيعمل حاجة أبدا ، وكان العساكر والضباط شايفين الأولاد الأبطال عمالين بيقعوا واحد ورا الشانى وهمه حينفجروا من الغيظ .

وحاولنا أن نقنع ضابط إنه يتدخل ويأمر العساكر المسلحين بضرب الإنجليز ، فبقى يكاد يبكى وهو بيقول إنه لا يستطيع ، وإنه ليس لديه أوامر .. بل بكى فعلا .

ونجح الأولاد أخيرا .. الكشك ولع كله وبقى كتلة نار . ونط اتنين من العساكر اللي كانوا جواه رافعين أيديهم وسلموا نفسهم للبوليس فأحاطهم بقوات كبيرة علشان يقدر يحافظ عليهم .. وبقت بنادق العساكر المصريين هي المرة دى اللي بتضرب عشان تحمى الإنجليز .. والعسكرى التالت ما طلعشى أبدا وقالوا بعد كده إنه اتحرق .

أما العسكرى الرابع فنط من الشباك اللي كان قريب من العمارة اللي كنت واقف في بابها وطلع جرى . فواحد ابن بلد اسكندراني كان واقف جنبى في مدخل العمارة طلع جرى وراه وراح مشنكله فوقع في الشارع ، فراح بارك فوقه وحط رجله على صدره وطلع من جيبه مطوه لها سلاح طويل وسنها شوية على حجر الرصيف ، وبعدين راح دابحه من الودان للودان . ومسح المطوة وحطها في جيبه ، وتف على العسكرى ومشى .

بعد كده شفت العسكرى ده فى المستشفى الأميرى كان راقد فى أودة كبيرة قوى ومليانه جثث الشبان والأولاد اللى ماتوا .. كان ضخم زى العجل وراسه كبيرة وشعره أحمر وزوره مقطوع لغاية العضم .

تانى يوم رحت الكلية لقيت الطلبة عاملين مؤتمر . ومؤتمرات زمان كانت أكاديمية قوى فكان العميد والأساتذة بيحضروها . قعدت أسمع .. وكان فيه أستاذ بيخطب .. كان لابس بدلة نظيفة قوى وقميصه بيلمع ووشه محلوق ناعم وعمال يتكلم بصوت واطى وبرزانة مصطنعة عن أن القوة مش ممكن تخرج الإنجليز .. وإننا لو حسنا أخلاقنا ومعنوياتنا وروحانياتنا فلن يستطيع الإنجليز البقاء في بلادنا .

فقمت واقف وقلت: ده كلام فارغ. فبان على وجهه الغضب الشديد مش لأنى باسخف كلامه إنما لأنى قاطعته وخرقت النظام .. فراح قايل: اللى عايز يتكلم يبقى يبجى هنا ويتكلم .. يجب أن نتعلم النظام لأن النظام هو الذى سيخرج الإنجليز . إحنا علشان شعب فوضى ظللنا مستعمرين .. مين عايز يتكلم ؟ انت ؟ تعالى .

وشاور على فرحت قايم فى عاصفة من تصفيق الطلبة لأنهم كانوا الظاهر متضايقين جدا من كلام الراجل .

وصلت إلى المنصة وأنا كنت يومها عمرى ما خطبت ولا أعرف أخطب ازاى . ولكن اللي حصل إنى انفجرت ، وكل ما قلته كان هو اللي شفته فى محطة الرمل . كنت باتكلم بحماس فقط . كنت بقول اللي حسيته واللي آمنت به . ومش فاكر أنا قلت إيه إنما فاكر إنى أنهيت الخطبة بحاجة زى كده : لن يخرج المحتل إلا بالقوة وبالقوة فقط سيتحرر الشعب .

واستقبل الطلبة كلامى بتصفيق وهتاف كالرعد وفضلت الهتافات أكثر من ربع ساعة . والظاهر إن الأستاذ لم يعجبه أن يهزم أمامى فبعدما هدأت الهتافات طلع على التختة بطريقته اللبقة المهذبة علشان يرد على الخطبة الطويلة بتاعتى . . فمسك طباشيرة وكتب ردا على كلامى من أن القوة وحدها هى طريق التحرر ، كتب : العلم = قوة . .

وراح قاعد تاني ..

وهلل الطلبة وأعجب بعضهم بالرد واعتبروه بليغ . \_

وتملكني ضيق شديد وحماس ، فرحت طالع وماسك الطباشيرة وأضفت الكلمة دى :

العلم ( في بلد مستقل ) = قوة

وهاج المدرج وماج.

وكان سيعقب المؤتمر انتخاب مندوبين عن الكلية في اللجنة التنفيذية للجامعة كلها وانتخبت .

وكان ده أول الطريق ...

## ٨

كان حمزة يتحدث وينساب التاريخ القريب من بين شفتيه ويغرق فوزية فى فيض من الأحداث والمواقف والذكريات ، وتتشنج أصابعه وهمى تحدد وتجسد ، وتتحرك أيديه ملوحة ، ويتقارب حاجباه ويبتعدان ، ويهتز منظاره ، وترتجف نبرات صوته وترتعش وكأنها لا تنطق الكلمات فقط ، ولكنها تعزف أيضا لحنا عارما يصاحب ما كان ويخلد المواقف .

وكان حديثه يملأ الحجرة بالأحداث ، ويحيل الأثاث إلى مواقع ، والجماد إلى كائنات حية تقاوم وتصرخ وتموت . ولهذا مضى وقت طويل قبل أن تكف فوزية عن تحديقها في لا شيء وتسترد نفسها وتعود إلى الحجرة ، وإلى الليلة ، وإلى الدق ، وتنظر إلى حمزة الجالس أمامها لا يتحدث ولا يتحرك ولا تطرف عيناه .

وقالت:

\_ ياه !.. دا فعلا لينا تاريخ .

فرد حمزة في بطء:

ـــ تاریخ وبس ؟

وسبح كل فى واد ، ثم عادا حين قالت فوزية :

ــ أنا قلت لغاية الساعة تمانية ودلوقتي قربت على عشرة .

وأضافت بلا حماس:

و فى خطوات تعبة تكاد تتخاذل أخذت طريقها إلى باب الحجرة الذي كان مغلقا .

وفتح لها حمزة الباب وخرج الضوء من الحجرة ينير جزءا كبيرا من الصالة ، وسقط النور على كرسي فيها وعلى إنسان ضخم جالس فوقه .. كان بدير .

\_ الله .. انت هنا ؟

ـــآه مارضتشيأزعجكو ..قلت أقعد هنا أما تخلصوا .

و لم یکن هناك وقت .. سلمت فوزیة وأسرعت خارجة وظل بدیر جالسا فی مكانه .

وما كاد الباب يغلق حتى دق الجرس وفتح حمزة .. كانت فوزية .

ـــ أنا نسيت حاجة .. نسيت أخد الشنطة .

\_ تخدیها إزاى ؟ مش ممكن .

ـــوالله مش عايزة نقاش كتير .. حاخدها يعني حاخدها .

\_ تودیها فین ؟

\_ عندنا .

\_عندكم . بس ؟

\_ عندنا كويس جدا .

ورأى حمزة من تصميمها ومن نظراتها أنها لن تتزحزح عن قرارها .

فمضى إلى حجرة النوم وعاد حاملا الحقيبة الكبيرة . وكان بدير ينظر ولا يتدخل ولكنه قال :

\_ الله .. إيه الحكاية ؟

فقال حمزة:

\_ أصل سميحة حتاخد هدومي عندها .

ـــوليه ؟ وده يصح ماهو ده بيتك يا أخى ..

\_ لا أصل الهدوم عايزه غسيل .. و ...

\_ ما الغسالة اللي بالكهرباء هنا .. أهه .. أغسلهملك دلوقتي .

\_ لا .. لا .. معلش .. كده أحسن .

وردت فوزية:

\_ معلش يا أستاذ بدير علشان خاطري .

فقال بدير:

\_ يا ستى الغسالة هنا والله .. في نص ساعة تغسل ياما ..

\_ معلهش .. المرة الجاية .

ـــآه .. الظاهر دى بقى والله حاجات خاصة ما اعرفهاش إنتوا أحرار . وشدت فوزية على يد بدير ، ولمعت عيناه كثيرا وقبضتها القوية تغوص في أصابعه المنتفخة بالسمنة .

وعاد حمزة بعدأن أوصل فوزية وأركبها عربة .. وماكاد يغلق الباب وراءه حتى ابتسم بدير ابتسامة حملها كل ما يملكه جسده الضخم من مكر ، وقام واقفا وأمسك بكتف حمزة قائلا :

\_ قوللى بقى يا شاطر .. كنتوا بتغملوا إيه ؟ أظن حتقوللى درس ؟ وابتسم حمزة فى رثاء و لم يجب ، فاستأنف بدير جادا هذه المرة : \_ صحيح قول لى يا حمزة .. وصلت معاها لفين ؟

- \_ هي مين ؟
- \_ احنا حنلف على بعض ؟ وصلت والا ما وصلتش ؟
  - \_ يا جدع بلاش هزار في الحاجات دى .
- ـــ بستها ؟ أنا ميهمنيش حتى إذا كنت وصلت إلى ما بعد البوسة .
  - \_ يا بدير بطل كلام فارغ .
  - ـــوحياة أبوك لانت قايل .. عملت معاها إيه ؟

و لم يأبه حمزة بالرد عليه ونفض يده منه . وتجسدت له الحكاية مرة أخرى وبصورة جذابة جديدة . وراح عقله يدور حول نفسه ونغمات حزينة تتصاعد من وجدانه وأنات وعذابات وقهر .. تلك الشابة الممتلئة بالحيوية والحركة ذات الجسد الدقيق والملامح الدائمة الانفعال الدائمة الابتسام .. تلك الشابة الصغيرة قد أصبحت عزيزة جدا عنده .. حتى بعد جلسته الطويلة تلك معها لا يزال يهفو إليها كما يهفو مدمن التدخين إلى سيجارة الصباح ويحن الى وجودها كما يحن عباد الشمس إلى الشمس والنبات إلى الماء ، وكما يحن الغريب إلى أرض الوطن .

لماذا كلما تذكرها يدوخ تفكيره ويكاد يهوى ؟ لماذا إذا خطرت بعقله تخطر خلسة وخلف ستار وكأنها جريمة ؟

وقال بدير وهو يدخل في بنطلون بيجامته :

ـــ قوللي يا حمزة ؟

وقال حمزة دون انتباه:

\_ إيه ؟

\_ إلا بشرفك وشرف والدك ما عملت في البنت دى حاجة ؟ ورد حمزة في غضب لا يستدعيه الموقف وبلهجة حادة :

\_ بطل تخاریف یا بدیر .. وبلاش سخافة فاهمنی ازای ؟

- \_\_ يعنى مؤدبة ؟
- ـــدى من أحسن البنات اللي قابلتهم في حياتي .. وانا أمنعك إنك تتكلم عنها بالشكل ده ، فاهمني إزاى ؟
- ـــ أمال بتسلم على الواحد كده ليه ؟ مؤدبة يعنى ؟ انت وذمتك بقى . وأخيرا رقدا جنبا إلى جنب فى الفراش وكان السرير يحتل منــتصف الحجرة ، والغرفة وثيرة فيها أشياء كثيرة أنيقة ولكن لاروح فيها ولا انسجام .

وكان بدير يقلب صفحات ( المصور ) كعادته حين يستعد للنوم ولكنه لم يكن يقرأ ، وفجأة ألقى المجلة فوق ( الكومودينو ) واستدار إلى حمزة ، واستجار السرير وهو يستدير :

ـــ قوللي يا حمزة .. هو فيه قاعدة إنه إذا كان الواحد بيحب واحدة يبقى لازم تكون بتحبه ؟

ـــلأ .

۔۔ طب یعنی مثلا افرض مثلا ، مثلا یعنی إنك بتحب واحدة وعایز تعرف إذا كانت بتحبك والا لاً تعمل إیه ؟

- \_\_ أنام .
- \_ لا .. أنا بتكلم جد .
  - ــ وانا بتكلم جد .
  - \_\_ أمال أنام إيه يعنى ؟
- \_ تنام شوية فتصبح الصبح أعصابك أهدأ وتقدر تفكر .
  - \_ وإن ماجنيش نوم ؟
    - \_\_ تاخد منوم .
    - ـــ بيعمل صداع .
      - ـــ تاخد سم .

\_ طبعا .. ما هو المسألة يايكون فيها وطنية وكفاح يا بلاش .. ياكلام في السياسة يا مافيش كلام .. يا أخى ما تفضونا بقى وتخلوا الناس يكلوا عيش .

\_\_ متخلى انت الناس تنام .

وكان حمزة في الحقيقة لا يريد أن ينام ولكنه يريد أن يهدأ كل شيء ويبقى عقله يعمل ، يريد أن يستعيد الغيبوبة اللذيذة التي يدللف إليها كلما اتخذ فوزية مادة لتفكيره . كانت أحاسيس متناقضة تحاصره ، كان يريد أن يسبح إلى كل ما يستطيع أن يصل إليه خياله من مدى ، وكان شيء ما في نفسه يكبحه ويوقفه ويبعث في نفسه رهبة وخوفا . كان يحس أنه شيئا فشيئا لم ينظر إلى فوزية كزميلة في الصف ، كان يحس أنه شيئا فشيئا تبدو له المرأة التي في الزميلة ، وكلما بدت حاول طردها ، ويهرب منها إن فشلت محاولته . ولكنه مهما يفعل فإنه يغوص دائما إلى التفكير فيها .. في الزميلة المرأة المكافحة الجميلة المتجددة الحيوية الدائمة الانفعال .. وانتبه على قول بدير :

\_ بس والله يا حمزة انت ما تعرفش أنا باقدرك قد إيه ؟ أنا بيعجبنى تفكيرك جدا .. وبيعجبنى الذكاء اللى بتعالج بيه المشاكل .. ففيه مشكلة أهيه .. إن كنت جدع حلها .

\_ مشكلة إيه يا بدير بس ؟ الساعة تيجي واحدة .. خلينا ننام .

\_ ياأخى ما طول عمرنا بننام جد علينا إيه ؟ اسمع .. والنبى لانت سامع .

<u> - ايه ؟</u>

\_ فيه واحد صاحبي واقع في مشكلة.

\_ يا أخى وده وقته ؟ ما صاحبك ده يستنى للصبح حيموت يعنى ؟ \_ أصلها بجد مشكلة حياة أو موت .

وهنا جلس حمزة في الفراش ومديده وظل يبحث عن زر النور المغلق في السرير حتى وجده ، وأشعل النور وقال :

ــ خلاص بلاش نوم .. نحل المشاكل .. آدى النضارة ونـدور على ألسيجارة الباقية .

وأشعل السيجارة وراح ينظر إلى بدير الذى كان يرقد بجسده المرتفع كجسد الدرفيل ، والذى لم يعتدل و لم يحرك رأسه من فوق المخدة ، وإنما قال وعيناه تائهتان فى السقف مفتوحتان كالفنجان :

- \_ اسمع .
  - \_\_ إيه ؟
- ــ افرض إنك بتحب واحدة جدا .
  - \_ طیب فرضت .
- ـــوما تعرفش إذا كانت بتحبك والالاً .. تعمل إيه ؟
- \_ أولا \_ أنا مش سفسطانى علشان أقعد أفرض حاجات فى الهواء .. لازم أعرف إيه هى المشكلة ؟ ومين صاحبها ؟
- ــ ثانیا ــ ماتحاولش التنكر لأن عیبك إنك كداب فاشل و مش معقول ، یعنی إنسانیتك تحبك دلوقتی و تهتم بواحد صاحبك و مشكلته الساعة اتنین . فقوللی بتحب مین بقی سعادتك ؟
- ـــ والنبى بلاش الحداقة دى يا تحى .. والا إيه يعنى ؟ افرض حتى الشخص ده هو أنا .. افرض إن أنا بحب واحدة وعايز أعرف إن كانت بتحبنى والا لأ .. افرض ..
  - \_ ما افرضش .. بتحب واحدة فعلا والآلأ ؟

فسكت بدير طويلا وأطبق أجفانه على عينيه ثم حملق في السقف وقال : ـــ اظن كده .

\_ بتحب مین ؟

ــ واحدة .. حلوة .. قوى قوى .. بحبها .. جدا .

ونام .

ولم يكتشف حمزة أن بدير كان نائما وهو يحدثه إلا بعد فترة . فأطفأ النور وظل جالسا يحلم وأحيانا يضحك وأحيانا أخرى يفكر جادا في إيقاظ بدير وقضاء بقية الليلة في الحديث .

9

وفى السابعة من صباح اليوم التالى كان بدير لا يزال نائما أيضا ، وكان حمزة يقوم باحتياطاته اليومية ففتح نافذة حجرة المكتب قليلا وتمم على البوابين الموجودين فى العمارة المقابلة واطمأن إلى أن عددهم لم يزد مخبرا . ثم فتح النافذة كلها بحيطة وأطل برأسه وراقب أبواب البيوت الممتدة أمامه كلها والمكوجى والبقال ، ثم أخرج رأسه كثيرا ليتمكن من رؤية صف المنازل الذى توجد فيه العمارة واطمأن أخيرا إلى أنه لا جديد هناك وأنه لا تزال أمامه بحبوحة من أمان .. وراح يتجول فى الشقة .

لم تكن به حاجة إلى التجول فالصباح كان له برودة الثلج ، والشقة كانت مظلمة ونوافذها مغلقة والبرد يفرخ في ظلامها ويتكاثر ، وهو قد اكتفى و بالبلوفر الذي ارتداه فوق البيجامة وكان يأبى أن يرتدى أحد أرواب بدير الصوف ذات الدفء الفاخر المعلقة فوق الشماعة ، فقد سمعه يقول مرة إنه لا يحب أن يستعمل أحد أشياءه .. ولهذا فمن لحظة أن وضع قدمه في الشقة لم يتطفل على شيء من أشيائه حتى الفوطة ، لم يكن لديه فوطة وجه فكان يجفف رأسه ووجهه في و جاكتة بيجامته والنظيفة ثم يغسلها ويعلقها حتى تحف

ورغم البرودة فلم يكف عن تجواله .. كان هناك شيء يؤرقه فلا يستطيع ( جمهورية فرحات ) معه أن يستقر على قرار أو مكان . فتح حجرة المكتب .. كان مزيج من النور والظلام يغطى المكتب ذا السطح الزجاجي اللامع والفوتيل الذي أمام المكتب .. هناك جلست مرارا . ثم حجرة النوم ، بدير لا يزال يغط في نومه وقد اختلى بالسرير ومد أطرافه كلها إلى آخرها ليستمتع بالفراش .. هرم الحقائب موجود تنقصه الحقيبة الكبيرة .. ترى أين ذهبت بها ؟

وغادر حجرة النوم واتجه إلى المطبخ .. المنضدة الرخامية البيضاء والفريجيدير .. والبوتاجاز لا يزال يحمل سطحه آثار القهوة التي كان يصنعها بالأمس .. القهوة .. ما أجملها حين تشرب القهوة ويحمر وجهها .. وتبتسم وتنسع عيناها الضاحكتان بالتساؤل وبالدهشة . ودق جرس الباب وفتحه وهو نصف ذاهل .. وتسلم اللبن وأخذ الجرائد التي دسها البائع منذ الصباح الباكر أسفل الباب وراح يعد الإفطار .. فقد كان من العبث أن ينتظر حتى يصحو بدير ، وغلى اللبن وأعد الشاى وحفلت المائدة الراقدة في ركن من الصالة بأدواته ، وأيقظ بدير وجلسا أخيرا يتناولان الطعام ويتبادلان

وقال له بدير وهو يغادره إلى المكتب إن الخادمة العجوز ستأتى وأعطاه نقودا لكى تعدلهما « صينية » في الفرن .

وانكب خمزة على الجرائد حين أصبح وحده .. وكان له غرام غريب بقراءة الجرائد ، كان يقرأ الصفحة حرفا حرفا ولا يدع شيئاً إلا وفكر فيه وحلله ، ولا يدع خبرين إلا استنتج منهما ثالثاً .. وكان ولعه بالأخبار جزءاً صغيراً من حب استطلاعه الكبير .. كان به شغف دائم إلى معرفة الحادث حتى قبل وقوعه وإلى الاستاع للخبر من أكثر من مصدر حتى يصل إلى حقيقة أمره .

غير أن انكبايه لم يطل .. فقد وضع الجرائد جانبا وخلع منظاره وفرك

عينيه ولم يرفع أصابعه عن عينيه ، بل ظل واضعهما فوق مقلتيه وقد أسند رأسه إلى ظهر الفوتيل وقتا غير قليل . كان يؤنب نفسه كثيرا . . كيف سولت له تلك النفس أن يحس بإحساسات أخرى غير رباط الكفاح بينه وبين فوزية ؟

كيف ؟

وضايقه الجلوس .. فقام وظل يدور في الشقة .

ودق الجرس.

وفتح .

ودخلت المرأة .

وعاد إلى جلسته على نفس الفوتيل فى مكان فوزية المختار . وأحيانا تبدو حلول أعقد المسائل فى ومضة .. وكان هو قد استقر على حل .

إنه رجل يؤمن بالعلم ويؤمن بالحب ويؤمن أن الناس و جدوا ليحيوا و يحبوا و يسعدوا ، فليس عيبا أن يحب فوزية إذن . ولكن هل هو يحبها فعلا ؟ وهل مكن أن يقع إنسان مثله في الحب بمجرد أن يقابل فتاة مثلها بضع مرات ؟ أليس الحب عشرة و تجربة هائلة تذيب الإنسان في الإنسان ؟ وأين هذا مما بينه وبين فوزية ؟

وأتاح له الصباح أن يجعل عقله أكثر سيطرة على نفسه ، خاصة وأن الصباح كان باردا برودة ترد الصواب ، برودة تجعل الإنسان يرى الأشياء في وضوح ، بل وتفقد أشياء كثيرة ما يحيطها من بريق وتبدو على صورة أقرب ما تكون إلى الواقع الذي مسح عنه الخيال .

ليس هكذا تخيل الحب ، ولكن ما يحس به ناحية فوزية ليس عبث أطفال أيضا ولا هو وهم . . إنها أحاسيس حقيقية تجرفه وتغرقه وتأخذ عليه كل مسالك تفكيره فلا يملك أمامها إرادة ولا روية ولا عقل . هذه حقيقة علمية

أخرى .. وهو رجل يؤمن بالعلم .

ولكنها حقيقة ناقصة إذ أنها لا يمكن أن تكمل أبدا .. ولا يمكن لهذه الأحاسيس أن تتجسد وتصبح حقا إلا إذا كانت هناك أحاسيس أخرى تقابلها عند فوزية .

فهل هناك أحاسيس مثل تلك ؟

وهل تحس فوزية ناحيته مثلما أو نصفما أو ربعما يحس به ناحيتها ؟ هل ؟

كان السؤال بسيطا ، حتى حرف الاستفهام فيه صغير وساذج ، ولكن الإجابة عليه تحتاج من حمزة ربما إلى مجلدات فكرية ومراجع ذهنية ضخمة إذ لم يكن هناك جواب واحد شاف . لم تكن هناك علامة واحدة أكيدة تنفى أو تؤيد . كل ما يستطيع أن يفعله هو أن يراجع لحظة فلحظة وحركة فحركة ومرة فمرة كل ما دار بينهما وكل ما بدر من فوزية ناحيته ، نظراتها .. دائما فيها بريق ، ودائما عيناها لا تطرفان ولا يتطرق إليهما خجل .. نظرات دوغرى .. لا تخفى شيئا ولا تعنى غير ما ظهر منها .

كلامها .. واضح وصريح .. فيه الحماس البالغ .. فيه الثقة ، وليس فيه أي شيء آخر .

سلامها .. دائما له نفس قوته ، ودائما أصابعها تضغط نفس الضغطة وبنفس القوة . لم تمكث يدها في يده أكثر من اللازم مرة ، و لم تتراخ قبضتها أو تلين مرة ، و لم يتدلل لها بنصر و لم يتشنج بجنصر ..

أو .. أمن المعقول أنها كانت تعنى شيئا آخر حين سألته عن عمله ؟ ولماذا اهتمت بسؤاله ؟ أكانت بهذا معجبة به ؟ أممكن أن يحتمل السؤال واحدا على ألف من أى احتمال آخر ؟ وحين نظرت إليه و خجل من نظرتها ، ربما كان فيها شيء تلك النظرة .. ولكن أى شيء هو ؟ إعجاب ؟ احترام ؟ حب ؟

استنكار ؟

أممكن أن تكون البهجة التي تقابله بها ؟ ولكنها منذ أن عرفها تقابله مبتهجة ، وفي كل مرة نفس كمية البهجة لا تنقص ولا تزيد .

وحين جاءت أول مرة إلى الشقة ، لقد اتفقا في مصر الجديدة أن تأتيه يوم الجمعة فجاءت الخميس قائلة إنها كانت في زيارة صديقة ، أممكن أن يكون هذا صحيحا ؟ أم أنها حجة ؟ وإذا كانت حجة .. أممكن أن يكون الدافع إليها سببا يمت إلى العاطفة ؟

أممكن أن يكون إصرارها على الحضور إليه وفي المواعيد بالدقة يحمل هدفا آخر غير ارتباطهما في معركة ؟ خاصة وإن هذا الارتباط قد ضعف بضعف اتصالاته ؟

أممكن أن يكون تنفيذها الدقيق الرائع لكل ما يكلفها به يحمل طاعة غير الطاعة التي تفرضها علاقة الجندي نحو زميله وقائده ؟

أمكن كل هذا ؟

كان حمزة قد وصل فى تفكيره إلى آفاق مثل تلك وأبعد ، ولكنه كان كعادته يوغل فى الخيال والافتراض ثم يعود به برد الصباح إلى طبيعته التى تأبى أن يتحكم فيها شيء غير العلم . والعلم يقول إن أقصر ما يوصل بين نقطتين هو الخط المستقيم . قد يكون أصعب الطرق ولكنه دائما احسنها . فليجرب إذن الخط المستقيم .

وحين انتهى إلى هذا استراح وانطلق بلا وعى يصفر وغادر مكانه وذهب يبحث عن الصعيدية العجوز وقد شعر برغبة في الحديث وفي الضحك بل وفي الغناء .

و لم يجد المرأة إنما وجد ( السلطة ) معدة والشقة أرضها تلمع بالغسيل والمسح . وفى هدوء سمع المفتاح يدور فى الباب . ودخل بدير يحمل كيسا من البريقال و أبو صره ، الضخم الحجم .

\_ الله .. حمدالله على السلامة ! يعنى جيت بدرى النهارده .. الساعة بدوبك اتناشر .

\_ والله بصيت لقيت نفسى زهقان يا حمزة .. الواحد الأيام دى ملوش نفس للشغل مش عارف ليه .

\_ ليه ؟

\_ لازم ليلي التي في الدقي مريضة!

\_ لیلی مین یا شیخ ؟ انت عارف أنا باتأثر من الحاجات دی .. ما یغرکشی دا محسوبك واد تقبل یعجبك .

\_ إزاى!

\_ أنا مش امبارح كنت باسألك عن حكاية .

. ol \_\_

\_ النهارده لقيت الحل .

\_ بالذمة ؟ إيه ؟

\_الحل بسيط جدا .. مفيش داعي الواحد يتعب نفسه ويحاول يعرف .. يستني ويتقل لما هي من نفسها تقع بعضمة لسانها وتتكلم .

ــ يعنى لما تعترفلك هي بحبها ؟

ـــ معقول .. معقول جدا .

ودخل بذير حجرة النوم وعاد وقد ارتدى الروب وهو منهمك في تقشير برتقالة ضخمة ، وقال وفمه ممتلىء بنصفها :

- \_ هي الولية فين ؟
- \_خالتك أم عبده . لازم راحت تجيب الصينية .. مافيش أخبار خاصة ؟
  - \_ مافيش .. بس فيه إشاعة كده أن الوزارة حتستقيل .
- ـــ ماهي أدت دورها .. خلصت على المعركة وأعلنت الأحكام العرفية .
- \_ والله الحكاية بقت نيله قوى .. تفتكر يعنى حنفضل كده على طول ؟
- \_ طبعا لأ .. بس لا يمكن حايحصل أى تغيير إلا إذا استؤنفت معركة القنال .
- \_ يا جدع بطل بقى .. ماراحت الهوجة بتاعة زمان دلوقتى والناس خلاص سكتت ، وكل واحد بيقول ابعد عن الشر وغنى له .
  - \_\_ أبدا .
- \_ أبدا ازاى ؟ كل الناس كده .. ما انت أهو مثلا .. كنت عامل زى النحلة زمان وادى انت مستخبى وساكت دلوقتى .

وضحك حمزة وسأله:

- ـــإنت فاكر ان أنا مستخبى خايف من الحكومة ؟
  - \_ أمال يعنى أنا اللي خايف ؟
- \_ انت لسه برضه مش فاهم يا بدير .. أنا مختفى وباتفادى القبض على مش علشان خايف من السجن أو الاعتقال .. أبدا .. أنا شايف بس إن الشعب محتاجنى ومحتاج لغيرى عشان ننظمه وندخل بيه معركته الفاصلة ، ولذلك أنا باعتبر نفسى أمانة من أمانات الشعب لدى نفسى لازم أحافظ عليها ولازم أحميها عشان تقوم بدورها .
- \_انت يا أخى عايز تمخولني والاتاكل بعقلي حلاوة ؟ بقى عايز تقول ان نفسك يعنى أمانة لدى نفسك .. إيه يا خويا الكلام ده ؟
- \_ بعدين نبقى نتناقش في المسألة دى .. بس المهم دلوقتي إنك توافقني

على إننا لا يمكن أن نتخلص من الوزارات الخاينة دى إلا باستئناف الكفاح المسلح ضد الإنجليز ، لأن هم العدو الأساسي .

- ـــ والله ما اعتقدش .
  - **ب**ليه ؟
  - \_ ما اعتقدش.
    - ــ ليه بس ؟
- ـــ مزاجي كده ! الله ! أنا حريا أخي في مزاجي .
  - \_ طيب أمال تعتقد إيه ؟

\_ أصل شوف .. على ماهر ده راجل ناصح قوى .. دا أنا أعرفه معرفة عائلية واحنا حتى نسايب .. رجل ناصح قوى لازم تلقاه موضب مقلب محترم .. مشده المهم .. الواحد جعان قوى .. الله يخرب بيتك يا ام عبده .. يكونشي الولية غلطت وبدل ما تروح الفرن راحت جهنم .

وجلسا إلى المائدة فى انتظار هلال ( الصينية ) . وكان حمزة ساخطا على ذلك التأخير فقد كان يريد أن ينتهى الغداء بسرعة حتى يغادر بدير الشقة مبكرا بعد الظهر ليكون أمامه متسع من الزمان والمكان لما قرر أن يقوم به . ولكن بدير لم يزعجه التأخير بل بدا مستريحا إليه ، ولا يهمه إن لم تأت أم عبده أبدا .. وكان هذا غريبا .

وزالت الغرابة حين جاءت الصينية وتناولا الغداء واقتربت الساعة من الرابعة ولم يبدعلى بدير أية علامة تشير إلى أنه يود التحرك من مكانه ، وحين سأله حمزة مذكرا إياه بميعاد المكتب قال وكأنه يفضى بشيء مفروغ منه :

والله مكسل النهارده .. مش رايح .. مليش نفس .. إيه اللى الواحد خده يعنى ؟ الصبح في المحاكم وبعد الظهر في المكتب ... نفسى في يوم كده ما أروحش .. نفسى كده .. حيجرى إيه ؟ حتخرب الدنيا ؟ أقله الزباين

تعرف قيمة الواحد .. مش رايح .

وكان عناده هذا الذى يشبه عناد الأطفال مثار ضيق شديد لحمزة . فمع أنه لم يكن بينه وبين فوزية أى ميعاد إلا أنه كان يعتقد تماما أنها لا بد قادمة فى الخامسة من ذلك اليوم .. ليس هذا فقط بل أن ما سوف يدور فى تلك المقابلة خطير خطير ، وإذا بالاستاذ بدير هكذا وبدون مناسبة يحرن .

وحاول حمزة بشتى الطرق أن يثنيه عن عزمه هذا وأن يجمل له الخروج ويتكر له محاسن لا يتصورها في عمل ما بعد الظهر ، ولكن بلا فائدة .. وانتهت المحاولات بحفيف الأقدام الذى دق له قلبه بشدة هذه المرة ، وبالشبح الحبيب يبدو على زجاج الباب .. وكالعادة وقبل أن تدق الحرس كان حمزة يفتح وكانت فوزية أمامه متعبة مبتسمة ، وفي ابتسامتها الحياة وحتى في تعبها نشاط ما بعده نشاط .. ولاحظ حمزة بريقا غريبا جديدا في عينيها . ودخلت ، وارتبك بدير و لم يستقر في مكان واحد ، غادر الحجرة وما كاد حمزة ينفرد بها لحظات حتى كان قد عاد وعلى فمه ابتسامة وجلس دون أن ينطق حرفا ، ثم قام وعاد بعد قليل بزجاجة عصير الفواكة المثلجة والاعتذرات المرافقة لها وجلس ، وقبل أن يحدث شيء آخر قام حمزة وغاب وترك بدير صامتا مع فوزية الصامتة هي الأخرى ، وعاد يحمل الصينية وينقل وترك بدير صامتا مع فوزية الصامتة هي الأخرى ، وعاد يحمل الصينية وينقل قدميه باحتراس والقهوة يتصاعد بخارها من الكويين والفنجان الصغير الذي

وما كاد يضع الصينية حتى قال بدير من فوره: \_ تسمعى فريد الأطرش.. عندى كل اسطواناته ؟ فأجابت فوزية فى شيء قليل من الامتعاض:

كان قد صنعه لبدير:

\_ لا .. إذا كانت عندك حاجة كلاسيك يبقى أحسن .. ولو إنى .. وأرادت أن تقول شيئا ولكنها سكتت ..

وكان حمزة لا يتاح له أن يستمع إلى كثير من الموسيقى ومع هذا كان يختلس لحظات استهاعه اختلاسا عند بعض أصدقائه ، وأحيانا كثيرة كان يذهب إلى متحف الفن الحديث حيث يستمع مع شلة المغرمين الدائمى الجلوس هناك .. يستمع معهم إلى بيتهوفن وموزار وبرودين ، ولكنه كان دائما يفضل تشايكوفسكى ويرى فى موسيقاه عواطف يعبر عنها بأقصى ما قد يستطيع فنان .

ولم يطمئن حمزة لبحث بدير فقام هو بنفسه ينقب معه فى درج الأسطوانات الملحق بجهاز البيك آب الأنيق ، ولم يجد من كل الموسيقى الكلاسيكية إلا و مارش العبيد التشايكوفسكى ، وكان لهذه الأسطوانة بالذات مكانة خاصة فى نفس حمزة فقد كان يرى فى نغماتها أنين البشرية كلها تحت لسعات العسف ، وبحثها المرهف عن المصير .

ودارت الأسطوانة.

وما بدأت تدور حتى أغلق بدير ( شيش ) النافذة ، وبقيت الحجرة فى شبه ظلام وجلس يستمع فى أدب ، ورغبته فى التأدب أكثر من رغبته فى الاستاع .

وبدأت الظلمات تتراقص وكل شيء يموج والحجرة تخفق بأنات تحوم كالأشباح ، وآلام سوداء تمور ثم تصهر ثم ترق وتشف حتى تبدو من خلالها أضواء الأمل . وفوزية جالسة تسترق يدها الطريق إلى كوب القهوة وتختلس منه الرشفة في سكون وامتنان ، ثم تسند رأسها إلى ظهر الفوتيل المواجه للمكتب وتسرح بعينيها تهيم بهما في الحجرة ، وأحيانا تلتقيان بعيني حمزة فتبرق عيناه ويبتسم وتعود هي إلى سرحانها ورشفاتها المختلسة .

والشيء الوحيد الذي لم يرتح له حمزة هو القلق الذي لا يهدأ والذي كان يبدو في نظراتها حتى وهي تسرح بعينيها . والظاهر أن بدير أحس فجأة بشيء ما ، شيء مثل ألا مكان له في كل ذلك ولا مكان لأدبه أو ضخامة جسده ، فقد انتصب فجأة واقفا ثم غادر الغرفة . وقال له حمزة :

- \_ على فين ؟ خير .
  - ــرايح .. بقى .
    - \_\_ فين ؟
    - \_ المكتب .
- \_ الله! ما انت قلت ...

و لم تتح له الفرصة ليكمل كلامه فقد كان بدير يجيبه وصوته يبتعد ، وقبل أن تتم المحادثة كان بدير قد غادر الشقة وصفق الباب خلفه .

وسألت فوزية :

ـــ الله .. ماله ؟

ـــ مش عارف .. غريبه .. دا ما كانشى عايز يروح المكتب .

وانتهى « مارش العبيد » .

وبحث حمزة عن شيء آخر يسمعانه فلم يجد .

وعاد إلى مكانه ، وبدلا من أن يفتح الشيش أوقد لمبة المكتب فأضاءت سطحه الزجاجي اللامع ، وأضاء النور المنعكس من السطح وجه فوزية فأضيفت إليه روعة جديدة .

والحقيقة أن أحاسيس جامحة تملكت حمزة وهو يلتهم وجهها الدقيق المسمسم التهاما . كان لو أطاع براكين ثائرة تدور في أعماقه لقام واختطفها ووضعها تحت إبطه وحارب من أجلها الدنيا ، أو لاحتواها بين ذراعيه وأخذ يضغط عليها حتى تستحيل إلى شيء دقيق صغير يغلق عليه ضلوعه ولا يتركه أبدا .

كان يتساءل فى ضيق عما أبقاه بعيدا عنها كل تلك المدة ، إنه يعرف من لحظة أن رآها أن ما يحسه الآن سيكون النهاية حتما .

ساعة أن رآها لم يفكر لحظة واحدة أنه يمكن إلا أن يراها .

وبلا مناسبة برقت فى خاطره صورة فوزية حين رآها أول مرة .. حين دخلت الخيمة منحنية .. صغيرة .. نحيفة .. ترتجف من البرد ، وذهبت الصورة خاطفة كما جاءت فوجد نفسه فى التو يتساءل : مالها فوزية ؟ وعلى ماذا أحبها هذا الحب كله ؟ ولماذا يجعل منها إلهة ؟ أليس ما يعنيه الآن وما يدور فى خاطره انفعالات الحالمين والمنحلين والمتعفنين ؟ أليست هى نفس الخواطر التى يضحك بها الكتاب الناعمون على الناس ؟ مالها فوزية ؟ إنها جالسة أمامه لا ضخامة فيها ولا ألوهية .. صغيرة كالتلميذة .. متعبة .. غلبانة .. من الممكن أن يناقش معها أى موضوع .

ـــ اسمعى يا فوزية ! عِملتى إيه فى المدرسات ؟ فأجابت فوزية :

\_ ماشیین کویس قوی .. فیه واحدة منهم اتجوزت والا اتخطـبت معرفشی .. لا یارپی .. اتجوزت .. واتنین کمان بیحاولوا یتجنبونی الأیام دی .. إنما الباقی کویسین .

- \_ والشنطة عملت فيها إيه ؟
- \_ نقلتها النهارده عند محاسن.
  - \_ عند مین ؟
- محاسن أحسن واحدة فيهم .. دى إنسانة رائعة .. تصور إنها مستعدة تخبى ناس من الهربانين عندها في شقتها .. مستعدة تعمل أى حاجة .. تدفع فلوس .. تجمع تبرعات .. وحتى مستعدة لو اقتضى الأمر تروح القنال .. اسمع يا حمزة .. إحنا مش حينفع كده .. لازم نشتغل أكتر من كده بكتير ..

داحنا ماعملناش حاجة خالص.

وكانت تتكلم بلهجة حامية وتوجه الحديث إلى نفسها أكثر مما توجهه إليه ، فأجاب حمزة من فوره :

\_ كويس جدا .. إحنا حنبتدى من نفسنا .. فانتو وأنا حنعمل نواه للعمل الضخم اللي بينتظرنا .

وظلت فوزية تهز رأسها تباعا وهى تحملق فى حمزة وتراقب حماسه فى إعجاب مخلص .. حتى لتخاف عليه من الخطأ ومن أن ينطق بحرف لا يقع فى نفسها موقعا حسنا .. وقالت فى انفعال :

\_ أيوه .. فعلا .. لا بد من الاستمرار بأقصى قوة .

\_ بالضبط .. إنما ازاى .. دى عايزة استعداد ، وعايزة جهود وإصرار . فاهمانى ازاى ؟ ولا بد حنوصل .

\_ لا بد .

وران عليهما صمت لم يستمر سوى لحظات خاطفات ، ثم بدأ حمزة يتململ في مكانه ويبتسم محاولا أن تكون بسماته جادة على قدر الإمكان ثم قال:

- \_ بس فيه موضوع تانى عايز أناقشك فيه .
  - \_ موضوع الفلوس ؟
  - \_ لأ .. موضوع .. خاص كده .
    - \_\_ خاص ؟
      - ـــ أيوه .

وعاد ينظر إلى فوزية ليؤكد ثقته بنفسه ، ولكن اضطرابا عظيما ألم به وهو يرى أن من أمامه لم تعد فوزية .. لم تعد الصغيرة .. المتعبة .. المتحمسة .. التي تكاد أن ترتجف من البرد .. إنها أمامه قبس من نور ساطع براق لا يستطيع مواجهته .. إنها تكاد تستحيل فى عينيه إلى شىء مقدس كقسم المكافحين .. كالتضحية .. كأمل الملايين فى يوم الخلاص . ولكنه لم يعد فى إمكانه التراجع .. عليه أن يستمر :

\_ فيه موضوع .

\_ إيه .. إتكلم يا حمزة .

وابتسمت .. يالبسمتها تلك وفى ذلك الوقت بالذات! البسمة التى تذيب الإرادات إن شاءت وتصنع الأبطال إن أرادت .. البسمة التى قد يواجه الإنسان جيشا ولا يستطيع مواجهتها .

- بقى شوفى يا فوزية ، أقصر خط بين نقطتين هو الخط المستقيم ، وأنا مش عارف أبتدى ازاى . . إنما دى حاجة مليش بيها أى دخل . . حصلت غصب عنى . . بصيت لقيت حاجات عمالة تتجمع وتشراكم لغاية ما ماقدرتش استحمل فاهمانى ازاى ؟ . . وإذا كنت بكلمك النهارده فلأنى معنتش قادر أستنى لبكره . . خلاص فاض الكيل فاهمانى ازاى ؟

وتساءلت فوزية في دهشة كثيرة :

\_ إيه الحكاية .. إيه المشكلة ؟

فواصل حمزة كلامه وهو كثيرا ما يحدق فى سطح المكتب الزجاجى المضيء وقليلا ما يحدق فيها :

ــ المشكلة إنى أنا من مدة ابتديت أحس ناحيتك بإحساسات تانية غير إحساسات زمالتنا في المعركة وزمالتنا في الكفاح .. قاومت هذه الانفعالات من أول دقيقة .. إنما كان بيحصل حاجة غريبة قوى .. فكل ما كنت بقاومها كل ما كانت بتزيد بشكل خطير .. والمشكلة إنى حسبت إنى لازم أناقش معاكى بصراحة المسألة دى .. فإيه رأيك ؟

وبدأت فوزية تتخذ أهبتها للرد ، ولكنه واصل كلامه :

\_ أرجوك حاولى تاخدى المسألة بعمق وبشكل جدى .. أنا عمرى ما مريت بحالة زى اللي أنا فيها دى .

وبدأت فوزية تستعد للرد ولكنه استطرد قائلا:

ـــ المشكلة خاصة جدا ..ومهماكان رأيك فيها .. ومهماكان جوابك فأرجو إن ده لا يؤثر على العمل اللي بنؤديه مع بعض .. أهم شيء هو المعركة باستمرار .

واعتزمت فوزیة هذه المرة أن تردولکنه استوقفها بإشارة راجیة من یده : \_\_\_\_\_ أرجوكي برضه إنك تفكری أكثر فی المشكلة .. مش عایزك حتی تتكلمی دلوقت .. فأنت لا تتصوری أهمیتها عندی .

وهنا قاطعته فوزية وأرغمته على التوقف وانطلقت تقول :

\_ متنكلم بصراحة أكتر .. متقول يا أخى إنك بتحبنى وتنتهى وإنك عايزنى أحبك .. مش هى دى المشكلة ؟ مش هى دى الحكاية اللى اجتمعنا علشنها ؟ إحنا ورانا إيه غير كده .. لا كفاح ولا يحزنون .. فضينا للحب . وحاول حمزة أن يقاطعها ويتكلم ولكنها استمرت :

\_أناكنت فاكرة إن الناس اللي زيك حاجة تانية .. كنت فاكره إن العمل الخطير اللي وراهم أهم من الحاجات التافهة اللي بيجرى وراها كل الناس . وهنا أصبح الحوار من الصعب أن تعرف قائله ، وأصبح صاحب الصوت الأعلى هو المسموع حين رد حمزة قائلا :

\_ دى مش حاجات تافهة يا فوزية .. دى حياتنا .

\_ حياتنا أسمى من كده .. حياتنا وراها حاجات أهم من كـــده .. المفروض إننا نحترق عشان غيرنا يعيش .

\_ أبدا .. إحنا يجب نعيش وتكافح علشان الناس تعيش .. إحنا مش رهبان ولا ملائكة .. إحنا بني آدمين .. إحنا عايزين نجيب وكل الناس تحب .

ـــ بلاش كلام فارغ .. حرمانا هو الضريبة اللي بيفرضها علينا الكفاح . ـــ إذا عملنا كده نبقى شواذ .. نبقى بنخرف وكفاحنا يبقى كلــه نريف ..

\_ طبعا .. أمال حتقول إيه غير كده ؟ أنت عاوز تفلسف انحلالك .. إنت اللي كلامك كله تخريف .. أنا اللي غلطانه .. مش ممكن كنت أتصور .. دا منتهى الانحلال .. إنت بتخون دورك وثقتى فيك .. إنت انتهيت .. أنا لازم أناقش زملاءك دا منتهى الشناعة ..

وكان وجهها يشحب باستمرار كمن طعن غيلة ، ونقاط عرق تبزغ فوق جبينها وتتجمع نقاط أخرى من غضب جامح فوق أنفها الدقيق ، وملامحها ، وما كادت تلفظ كلماتها الأخيرة حتى كانت يدها على حقيبتها وحتى كانت أسرع من نداءات حمزة عليها وهي تأخذ طريقها خارجة . وحتى لم تقفل الباب وراءها .

ظل حمزة على الأقل ساعتين لا يدرى أين هو ولا فى أى مكان من الكرة الأرضية يستقر ، كانت أفكاره كثيرة يزدحم بها عقله .. يمسك الواحدة فتهرب وتختلط بالأخريات ، ولا يستطيع أن يفكر فى شيء بذاته ولكنه يحس دائما أن هناك أشياء تتلاطم فى مخه وتسد عليه مسالك تفكيره .. ويذكر أجزاء من المحادثة ويستعيدها ويستعيد بدقة الكلمات التى قالتها ويتأملها ، ثم يرجعها مكانها فى ذاكرته ساخطا لاعنا ..

كانت ـــ ربما لأول مرة ـــ تخونه ثقته في نفسه ، وهو لن يخدع هذه النفس بعد الآن . كان في قلبه شعور دائم أنها لا بد تحبه أو إن لم تكن تحبه فهي على الأقل لن ترفض إذا طلب منها أن تحبه ، أخداع ما كان يحسه في أحاديثها وإشاراتها من علامات لذلك الانتظار ؟ كان يحس دائما أنها تود أن تقول له شيئا مثل ما قاله لها الليلة وأن الحياء فقط هو ما يمنعها .. من أين جاءه ذلك اليقين ؟ .. يا لحمقه وغبائه وضياعه .. أقصر خط بين نقطتين ! .. كلام فارغ وسخافات .. كان يجب أن يكون أكثر لباقة .. كان يجب أن يحسب حساب الفشل .. كان يجب أن يعد العدة للرفض .. كان لا بد من استعمال الدبلوماسية . أحسب المسائل العاطفية بغبائه مشكلة من مشاكل الكفاح اليومي من السهل طرحها على بساط البحث بطريقته الساذجة العقيمة تلك ؟ آمان سوداء ظلت تلاحقه وتطارده وتخرق عقله كمسامير حامية ، تمنى أن يدهمه وابور أو يختفي بطريقة ما من الوجود حتى لا يراه الناس وحتى لا يزي نفسه . وراح یکز علی أسنانه ویضغط بیدیه فوق ضلوعه وتنقبض کل عضلاته محاولة أن تجعله ينكمش وينكمش حتى لا يبدو للعيان ، ومضى ( جمهورية فرحات )

يكوم على نفسه أحقادا ذات لفح رهيب ويذيقها من ألوان التأنيب والتقريع ما لم يذقها إياه في حياته كلها ، وقد أفاق من الأحلام التي عاشت معه أياما طوالا ليجد جبهته تقرع البلاط ، ويجد نفسه ممددة على الأرض الجرداء حزمة جافة من فشل لا أمل فيه .. ولم يكن ما حدث فقط هو ما يكتم أنفاسه بل ما هو آت كذلك ، فقد فقد بفقد فوزية عنصرا هاما من عناصر كفاحه ، ومناضلة قوية إذ قطعا ستبتر كل صلة لها به ، بل يحتمل أن تنفذ تهديدها وتناقش قصة و حبه ، التافه مع بقية زملائه أعضاء اللجنة العامة للكفاح المسلح . وحين يتصور ماذا يكون موقفه حين تحيطه هالة الزملاء متعجبة مستنكرة .. حين كان يتصور هذا يتوقف فكره في الحال ويأبي أن يمضى ، ويأبي إلا أن تبتلعه دوامات أخرى من الألم الهائل .

وجاء بدير بعد منتصف الليل . لم ينتبه إليه حمزة كثيرا فقد لاحظ أنه فى حالة انبساط غير عادى وأنه يتكلم باستمرار ودون توقف ويضحك ، وأنه خلع ملابسه وظل بالفائلة والسروال فى جو ملتهب بالبرد . وأنه أخيرا جلس أمامه وتطلع إليه كثيرا قبل أن يقول :

- اسمع یا حمزة یا حویا .. بقی انت عندی علی العین والراس ، مستعد أخبیك وأروح معاك فی ألفین وستمیت داهیة .. انت عارف أنا باعزك قد إیه حتی من أیام المدرسة الثانویة ، ومفیش مرة جتنی تطلب فلوس إلا أما ادیتك نص اللی معایا .. وأنا راجل بتاع مزاج ، وانت بصراحة داخل فی مزاجی . عاجبانی شخصیتك یا أخی ، حد شریكی ؟ أنا كده واللی مش عاجبه یشرب بیرة زی ماشربت .. أنا كنت عایز أقول إیه ؟ أقول إیه ؟ أیوه یا سیدی.. أیوه.. بقی انت فی عینی دی بالمناسبة ستة علی ستة ودی ستة علی أربعة وعشرین .. انت فی ننی عینی كان ، إنما الست اللی بتجیلك دی اللی اسمها یه ؟ هو بتجیلك دی اللی اسمها یه ؟ هو بتجیلك دی اللی اسمها یه ؟ هو

انا عبيط ؟ هو أنا مش فاهم ؟ آه الست دى مسألة تانية يا خويا يا حمزة .. فحكاية الدروس دى طبعا لا تخيل على ولا تخيل عليك .. ويمكن البوليس يكون مراقبها ، يمشى وراها ، يتحك فيها ، تكون مشبوهة ، تكون قابلت واحد مشبوه تودينا احنا الاتنين فى داهيه .. آه زى ما بقولك كده وربنا المعبود .. دا مافيش أبسط اليومين دول من المرواح فى داهية .. وأنا بصراحة من غير أى إحراج لك أو لى .. انت عايز الصراحة .. عايز الصراحة يعنى .. أنا مش عايزها تيجى هنا .

وسمع حمزة هذا وانفعل ولكنه سكت فعاد بدير يقول:

\_ أيوه هي الصراحة كده .. وفيه أحسن من الصراحة ؟ أنا راجل مش بتاع لف ولا دوران .. انت في عينيه من جوه .. إنما هي .. حد ضامن ؟ حد بيقرا على ضهر إيده ؟ حد عارف حاجة ؟ مين عارف ؟ يمكن .. يمكن قوى .. ما يمكنشي ليه ؟ هو لولا شوية البيرة اللي ملخبطني دول كنت كلمتك أحسن من كده .. الله يخرب بيتك يامين النهارده .. آه ما أنا لما بزعل بشرب بيرة ، ولما بفرح بشرب برضه بيرة .. إلا من حق طيب .. أنا شربت بيرة ليه النهارده ؟ يا ترى كنت زعلان والا فرحان النهارده لما شربت ؟ حاكم أنا لما بزعل بشرب مع الجدع ده اللي اسمه دايما باانساه .. الباجوري .. حاكم أنا لما بزعل بشرب مع الواد منعم وأنا شربت مع منعم النهارده .. يقي لازم كنت زعلان .. زعلان قوى .. آه .. ما هو بصراحة كده يا حمزة انت في عنيه من جوه .. إنما هي .. حد ضامن ؟ حد عارف ؟ يمكن .. ما يمكنشي ليه ؟

ونام حمزة لدهشته نوما عميقا .

وحين استيقظ في الصباح كان بدير لم يكن قد فرغ من استيقاظه بعد ، فقد كان يفعل هذا على دفعات ، ووجده حمزة حينئذ جالسا على طرف الفراش . يفرك عينيه ويتثاءب ، وما إن لمح عينى حمزة تفتحان حتى قال وهو يموء : \_\_\_ اسمع يا حمزة .. صباح الحير الأول .. والله أنا عايز الشنطة ضرورى . فقال حمزة في امتعاض :

\_ هي هتروح فين يا أخي ؟ اشمعني افتكرتها دلوقتي ؟

\_ أصل عايزها ضرورى .. دى كان شنطة المرحوم والدى .. وزى ما قلت لك بقى خليك فاكر .. لما تيجي الست دى تفهمها .

\_\_ أهي مش جاية. .

\_ ليه ؟ حتيجي بكره يعني ؟

\_\_ولا بعده .

\_ الله .. هو حصل حاجة ؟

\_ لا أبدا .. ظروف .

ـــ إيه يعنى ظروف إيه ؟

\_ ظروف .. هو انت لازم تعرف كل حاجة ؟

\_ لا مش لازم .. إنما حصل حاجة يعنى ؟ سوء تفاهم ؟

\_ إنت مش مش عايزها تيجي ؟ أهي مش جاية .

\_ بس يعنى والسبب إيه ؟

\_ إنت مالك يا أخى .. خلاص .. ماعدتشى جاية .. استريح . وانتظر بدير قليلاثم سأل ولعله كان بسؤاله يقصد إعادة الحديث إلى مجراه بإلا :

\_ طيب .. والشنطة ؟

\_ يا أخى ماتفلقنيش بقى .. ما قلت لك حجيبهالك .

وحين غادره بدير إلى عمله مضى حمزة ينزف.

كانت جروح المساء قد بدأت تنبح ، وما أشد إيلام جروح المساء إذا طلع

عليها صباح.

كان بدير قد تركه وحيدا مع إحساسه القاتل بضياعه و تفاهته و خيبته حتى راح يراجع حياته كلها ، ولم يخرج منها إلا بحفنة من المواقف المخزية والقذارات ، وخيل إليه أنه لم يفعل شيئا في حياته يستحق معه أن يعيش .. بدا له ماضيه ساعتها أبشع من ماضى الخائن وأوهى من حجج المتردد . وكم هى قاسية ساعات الألم .. إنها بقدر ما ترهف الإحساس تحرقه ، و بقدر ما تفيد فى تجنب الخطأ تضر بالكائن الذى سيتجنبه أبلغ الضرر .. إن السعادة لا بد أن تكون هى الحياة بلا آلام .

تكون هي الحياة بلا الام . وكما راجع حمزة ماضيه أتى على حاضره أيضا ، وأية مهانة وجدها وهو يرى نفسه فاشلا مختفيا والأيام تنقضي والمعركة تخمد جذوتها وتهمد نيرانها الراقدة تحت الرماد ، وهو جالس يلعب ويحب ويناقش مشاكله الخاصة . ومن لحظة أن فتح عينه لم يستقر على حال ، جلس ووقف وخبط رآسه بيده كثيرا وراح يلصق جبهته أحيانا بالحائط ويفكر ، وهو في وضعه ذاك مستعد أن يطحن الجدار برأسه في أية لحظة .. وبدا له يوم الشتاء البارد الذي كان فيه يوما سقيما مريضا تفوح منه النتانة ، كغريق استخرج من الماء بعد أيام .. بل رأى كل أيام الشتاء وكأنها جيف متراصة ينهشها برد كالح أغبر ، شتاء .. وخيبة .. وعزلة .. وبدير .. وفوزية .. ووجهها الذي طالعه مخيفا حين تنمرت ملامحها .. ماذا أحبه فيها ؟ وأى شيء فيها يستحب ؟ وأية أحلام بغيضة وتصورات مخدرين عاش فيها وهو حبيس جدران بيضاء وأيام سود . وغلى دمه بأحاسيسه تلك وكأنه يكتشف لحظتها فقط أنه قد هرب من السجن الأميري ليواجه حتفه في ذلك السجن الحقيقي الذي يحيا فيه ، ويحيا لماذا ؟ ويختبيء ليفعل ماذا ؟ كل ما فعله أنه أحب ، وكل ما اختباً من أجله كان هو اللحظات التي يقضيها مع معبودة الفؤاد .. هراء ما فعله و هراء ما يفعله ، و هراء تلك الساعات التي تمضى والأيام التي تنقضى والمعركة تموت ولا تنتظر ، هراء .. لن يخرج الإنجليز ترتيبه و تنظيمه وقيادته المزعومة للمعركة و هو مختبى ه في القاهرة .. مكانه هناك في التل الكبير أو القرين أو الإسماعيلية أو أية مصيبة .. يجب أن يغادر ذلك المكان فورا .. يسافر الليلة .. و يحارب الليلة أيضا .. يجب ! وأمه جالسة زمانها على جوال قديم أمام بيتهم في عزبة الدريسة تطرز المناديل و تتطلع إلى ابنها الكبير ؟

والرصاص الذي كان يتحدث عنه ، و ٢ مارس والأولاد الأبطال وفوزية التي كان ينظر إلى كفاحها على أنه كفاح تلامذة مجتهدين ، فوزية هذه تقول : لنا تاريخ ، وهو يقول \_ هو الأستاذ القائد الذي كان عليه أن يتعهدها ويسقى عودها ويقدمها لشعبه مكافحة صلبة \_ هو يقول فيه موضوع خاص عايز أناقشه .. عواطف بتنمو .. مش قادر .. يا شاطر .. يا حدق يا روميو . وما محل مش قادر هذه من الكفاح ومن معركة الوطن ؟

وتعود الجروح إلى النزيف ، وتعود أسنانه تئز وعضلاته تنقبض وشيء داخله يهيب به أن يحطم ويقتل ويثور أو ينتحر .

ومر اليوم بلا بدير على الغداء وبه بلا غداء ، ثم جاع فى العصر فمضى إلى المطبخ يبحث وأسكت ما وجده آهات ، وولد المطبخ والمائدة الرخامية وعليها آثار بن آهات .

ـــ وفى الخامسة فوجىء أكبر مفاجأة .

دق جرس الباب وفتح ، وروع بفوزية واقفة تلهث وشفتها السفلى ترتجف محاولة أن تبتسم ، وأهدابها تسترخى على عينيها وهي تقول وكأن ليس بها رغبة في الدخول .

\_ أنا جيت .

وتمتم حمزة بأشياء ، وخطت إلى الداخل في تراخ وأغلقت شيش النافذة

وأشعلت مصباح المكتب وأضاءت الحجرة بالضوء الباهت المنعكس، وجلست على نفس الفوتيل ووضعت ساقا غير ثابتة فوق ساق ثم قالت : ـــ عايزة قهوة .. في كباية كبيرة وحياتك .

## 11

كان المطبخ لحمزة في ذلك الوقت نجدة أتته من حيث لا يدرى ولا يعلم ، فالمطبخ ودورة المياه وزنازن السجن وكل تلك العلب المبنية الصغيرة التي لا تكاد تسع الإنسان ، في هذه الأماكن يحس الإنسان أنه أقرب ما يكون إلى نفسه ، ويحس حالما يغلق الباب عليه بأ مان غريب ، وكا نه قد أصبح بينه وبين العالم ومآسيه سد منبع . وكان حمزة وهو يعد القهوة يحس بالمطبخ ببياضه ونظافته وكأنه أحته العانس الطيبة التي تعود أن يعترف لها بأدق أسراره دون حياء أو ندم أو رغبة ، ولذلك ترك عقله يتشتت وتذهب كل قطعة منه في ناحية ، حتى أنه وضع البن والسكر في الكنكة ثم وضعها على الموقد دون أن يضيف إليها ماء حتى تصاعدت رائحة السكر المحترق ، فتنبه وباشر إعدادها مرة أخرى بحرص أكثر . . كان يحس بنفسه خفيفا خفة غير عادية وكأنه بالون ممتليء بغاز أخف من الهواء ، وكان يحس بالسعادة ويريد أن يتجاهل إحساسه ممتليء بغاز أخف من الهواء ، وكان يحس بالسعادة ويريد أن يتجاهل إحساسه با حتى لا يحزن ويبأس حين يفقدها .

كان به فرح غير عادى ورهبة غير عادية أيضا . إن مجيئها ليس له إلا معنى واحد . . إنها استجابت وجاءت ، وأن الظلام الذى تراكم فى نفسه وشوه أمامه طريق المستقبل قد انقشع فجأة وحفل الطريق بنور باهر فياض . إنه بالأمس وحين طرح ذات نفسه أمامها فإذا بكلامها ينهال عليه لاسعا ملتها ، وإذا بالأكم العظيم يجتاحه وقد قدم لها قلبه فكوته بالنار . . أحس بالأمس أن كل

شيء قد انتهى وإن الأمر لم يكن سوى وهم عابر أيقظته منه قرصة واقع أليم. كان بالأمس وبعدما حدث يبحث في نفسه عن بقية باقية من عاطفة تجاهها فلا يجد.

ولكن ماذا حدث ؟ أمجنون هو ؟ وهل نفسه أرجوحة صبيانية تصعد في لطقة إلى السماء ، وما تكاد تتكامل اللحظة حتى تكون مرة أخرى وجهتها الأرض ، وما تكاد تبدأ لحظة جديدة حتى تكون مرة أخرى وجهتها السماء ؟ لقد أحس وهي واقفة على الباب تقول له : « أنا جيت » عبر شفتها الراجفة الباسمة ، أحس أنه حقيقة يحبها حبا كفيلا بملء الكون كله ، حبا لو وزع على ملايين من الناس لأشعل في قلب كل منهم نارا ، وأحس بأن الأمر جد وأن عاطفته ناحيتها لم تكن عيبا و لم يكن انحرافا ولا جريمة ، وإنما كانت حقيقة مادية ظلت تترسب طبقة وراءها طبقة في أعماقه . ليس هذا فقط ، بل إنه أدرك فجأة أنه كان يحبس عواطفه في قمقم وياً بي عليها الانطلاق ، وإنه كان مثل الميت من الجوع حين يذهب في زيارة ويجيء الطعام ألوانا أمامه وياً بي منالك الحياة .

لاذا يلف ويدور ويسخط ويبتئس ويضحك على نفسه وينوح ؟ لقد أحبها وهى الآن معه .. له .. جاءته بملء إرادتها وباختيارها ؟ .. لماذا هو مغرم بإقامة العراقيل واختلاق السدود والطريق أمامه واضح وصريح وفوزية كلها على قيد خطوات منه ؟ ولماذا هو واقف كالعبيط يفكر ويحلل ويصنع القهوة ويدعها تنتظر ويؤجل اللحظة الحاسمة ؟

وقبل أن يتحرك حمزة شعر بيد توضع على كتفه ، نفس الأصابع النحيلة الطويلة وكأنها امتدت إلى قلبه مباشرة ومست شغافه ، والتفت إليها ليجد نفس وجهها الذي لا يمل رؤيته ، ونفس ابتسامتها ونفس عينيها العسليتين ،

وكم كانت جميلة عيناها ، وكم كان جميلا أن يحدق فيهما ويرى صورته واضحة وناطقة حتى بنظارته ومنعكسة على كل حدقة من حدقتيها ، صانعة ستارا رقراقًا محلى بصورته ومسدلا فوق عسيلة عينيها ، لا يخفى جمالها بقدر ما يبرزه ويثيره .

كانت هناك ويدها على كتفه ، والقهوة فى يده ، وفوزية فى قلبه ، وحمزة فى عينيها ، وابتسامتها لا تزال ترتجف ورجفتها فى أنفاسه ، تتلاحق ، وأفكارها معلقة بأنفاسه ، وأفكاره غائبة ، والغيبة فى ملامحها ، وغيبتها طالت ثم جاءت ، ومجيئها سعادة ، والسعادة فى صدره ، وفى صدره رضاء ، ورضاؤها واضح ، وفى وضوحه هيام ، وهيامه خائف ، وخوفها يتلاشى ، وخوفه يمت إلى الأمس ، وبالأمس كان يهدر وهديره الآن مسموع ، وهديرها فائر ، والقهوة هى الأخرى قد بدأت تزن تفور .

وصعدت يدها في تردد واجف إلى رأسه ، ومرت بأصابعها بسرعة في أرجاء شعره فنكشته وهي تقول :

\_ هيه .. إزيك ؟..

وعاد ينظر إليها ، كانت حافية وقد خلعت حذاءها وجوربها وكانت تضيق بالأحذية والجوارب ، مرتدية شبشب بدير وقدماها صغيرتان دقيقتان تائهتان في كبره ، وأصبعها الصغير كان يرقد منكمشا على نفسه وملتصقا بشدة في الأصبع الأكبر الذي بجواره كأخ صغير أصابه ذعر فمضى يحتمى بشقيقه . كانت واقفة ، رائعة وهي واقفة ، فيها كل ما كان لها من حيوية ونشاط وتتأمله بطريقة لم يعهدها . . طريقة مختلفة تماما عن طريقتها الدغرى في الكفاح . ففي نظرتها حنان رقيق وفي وجنتيها حمرة وفي ملامحها سرحان في الكفاح . ففي نظرتها حنان رقيق وفي وجنتيها حمرة وفي ملامحها سرحان تائه ، يحملق فيه ويبحث ويكاد يبأس من البحث فينبض ويدق ويهمس بأشياء وأشياء .

وقالت مرة أخرى :

\_ مش كويس إن أنا جيت يا حمزة ؟

وأحس ل و حمزة وهى تنطقها بنكهة تمشت فى أوصاله .. كان مجرد أن يتصور كلمة و حمزة و تتصاعد حروفها من مكان ما حول قلبها وتحمل دفء أنفاسها وتتجمع الحروف فى فمها وتتعطر برضابها ، ثم تتكامل وتنهيأ وتودع شفتيها منطلقة إلى الفضاء وقد تشبع كل حرف فيها بذكريات حبيبة عن رحلته الغالية .. كان مجرد تصوره هذا يجعله يحس براحة عميقة وكأنه هو لا اسمه الذى نبع من مكان ما حول القلب وكأنها بمجرد أن تنطق اسمه تبعث له مع كل حرف منه بآهات حب وإعزاز .

ومع ذلك فقد كانت لا تزال به رهبة ولا يزال مترددا غير واثق .

وعبثت بشعره عبثة أخرى سريعة وقالت:

\_ أنا غلطت امهارح .. وفضلت طول الليل أأنب نفسى .

<u>\_</u> ليه ؟ .. على إيه ؟

۔ لأنى كنت امبار ح بغالط نفسى ، بغالط شعورى لك فى طول المدة اللى فاتت ، بغالط حتى شعورى بتاع أول امبار ح .

الموضوع أصله كبير قوى ومفيش داعى نتكلم فيه دلوقت . خد الجواب ده اقراه .. مش دلوقت .. خليه بعدين قبل ما تنام أحسن .. حتلقى فيه كل حاجة . أنا كنت معقدة قوى يا حمزة .

أنا ساعات كده بتطلع في دماغي حاجات وأصمم عليها.

\_ ده عيب المثقفات .

وتلجلجت فوزية كمن يريد قول شيء ثم يعدل ، وأجابته :

۔ ودا برضه عیب المثقفین . لیه ناقشتنی امبارح ؟ . لیه کنت عایز و تقنعنی ، بحبك ؟ لیه هاودتنی وقتلت لحظة الحب الجمیلة دی بالنقاش ؟ الحب لا يناقش وإذا نوقش يدبل . الحب يتاخد .. يتاخد كده ! قالت هذا وشبت على أطراف أصابعها وقبلته فوق شفتيه .. واحمر وجهها وتلاحقت أضلعها صاعدة هابطة وتوقفت كلماتها ، وعادت تنظر إليه بتدله وعاد هو يحتل عينيها .

وبلغت العصبية بحمزة حدا لا يوصف .. أخذ منها الخطاب ووضعه في جيبه وضحك وأسرف في الضحك ، ونظر إلى قدميها وأحس بالبرد يلسع أقدامه ، وصعبت عليه فوزية وأحس بها ضعيفة صغيرة ، وخجل وابتسم ونظر إليها ، و لم يستطع الاحتمال فأحاطها بذراعيه وجذبها ناحيته بقوة . و لم تنتظر فوزية فقد شبت مرة أخرى على أطراف أصابعها وقبلته ، وضمها بقوة أكثر وأحس بجسده يتفصد أنهارا وبملايين من قطرات سعادة وافدة تسبح مع دمه ، وكان وجهه لصق وجهها ورقبته ترقد في منحدر جيدها وشريان رقبتها ينتفض ويحس به يضغط على جلد وجهه ضغطات مقشعرة وسريعة ومملوءة بالانفعال . ورفع رأسه حتى واجهها وأصبح لا يرى عينيها فقد كانتا لصق عينيه ، وشفتاها في ارتعاش دائم كارتعاش الخائف ، ولمعة عرق تكسو شفتها العليا ، وأنفها الدقيق ترتجف فتحته وتتسع وتضيق كلما مرت به أنفاسها اللاهثة ، وهبط بفمه على فمها واحتوت شفتاه الغليظتان فمها الصغير الذي كان لا يزال يرتجف ، وضم شفتيه وأحس بفمها يستكين إلى فمه وتذهب عنه قشعريرته وينعم باطمئنان دافي .

ولم يكن لحظتها غائبا عن الوعى .. كان فى أتم وعيه . لم يكن ينظر إلى نفسه وكأنه لا يزال قطرة فى محيطها ولا كانت هى القبس المتجسد ولا المعنى المجرد الذى له قدسية لا يجرؤ على الدنو منها . كانت صغيرة دقيقة بين ذراعيه ، وكان الفم الذى يطبق عليه هو فم فوزية الثائرة الزميلة ، والقلب الذى يدق بعنف فى حضنه هو قلب امرأة ناضلت وتناضل ، والرأس الذى بين راحتيه

هو ما يدور فيه القلق الدائم الشريف على مصير شعبه ، والأصابع التى تضغط على ذراعيه وتسترفقه هى نفسها الأصابع التى حملت حقيبة الديناميت وحملت إليه الجنيهات ، والتى من يدرى ماذا تحمل غدا .. لم تكن هناك أنثى فى ناحية و زميلة كفاح فى ناحية ، و لم يكن نصفه حمزة الثائر ونصفه الآخر حمزة الرجل ، بل لم يكن هناك فوزية وحمزة كان هناك لقاء ضخم رائع نبضات قلبها تحرك قلبه ، وأنفاسها تصب فى أنفاسه ، وصدرها ملء صدره ، وفم واحد أصبح لهما ، وأذرع تحيطهما ، والتحام لا ينتهى يؤلف بينهما ويضم شتات إنسانين و فرحتين و تاريخين ، و حياتين طويلتين بكل ما فيهما من عناد وبسمات ، ويأس وأمل ، وماض و حاضر ، ومدرس و عامل دريسة ، وأم ماتت وأم على قيد الحياة ، ورجال ونساء و عائلات وذكريات .

وفارت القهوة وسالت غزيرة على جوانب الكنكة ، وأغرقت شعلة الغاز وتصاعد طليقا يملأ المطبخ ، وتنبهت فوزية وكأنما تفيق من حلم طويل غريب ومدت يدها تقفله وهي لا تزال تحيا في روعة الحلم و لم تكن تعرف كيف يقفل ، وكاد حمزة في ارتباكه أن ينسى هو الآخر أي مفتاح يدير .

وعادا إلى الحجرة ذراعا فى ذراع ، وعينين تنهلان من عينين ، وأحلاما فى أحلام ، وسعادة تكمل سعادة ، وبلا قهوة .

وبالتأكيد لم يكونا هما الشخصان اللذان غادرا نفس الحجرة من وقت قليل .. كان قد تحدث في كل منهما حادث سريع خاطف غير مجرى حياته ، وكأن أحدهما كان موجبا فلامس السالب وسرت كهربا ، أو كان حرفا لا معنى له لاقى حرفا آخر فصارا كلمة لها وقع وثقل ومعان .

وجلست فوزية على الفوتيل وجلس جمزة على ذراعه العريضة وكأنه لم يعد يحتمل أن يبتعد عنها لحظة ، وفتح فمه يقول : فأغلقت فمه بأصابعها الرقيقة قائلة:

ـــ استنى شوية .. خلينا ساكتين .. أحيانا بيكون للسكون معنــى وسكوتنا حيدى معنى للسكون .

وإن كان حمزة لم ينطق بحرف إلا أنه لم يسكت بل راح يتأملها بعينيه وأصابعه ولمسات شفتيه ويخاطبها بكل ما يملك من لغة السكون ، وما أبلغ لغة السكون ! وكان حديثه مع شعرها فيه كلام وكلام .. وقد راح يجوب بأنفه ويوسده خصلاتها السوداء الكثة وتنفذ إليه تلك الرائحة التي تتدغدغ لها أغصاب أنفه وتسكر .. خليط من عرقها وزيت شعرها والنظافة التي كانت تشع منها كانت لها رائحة هي الأخرى كرائحة قلب جوزة الهند الأبيض ، أو مكنون الوردة إذا فرقت عنه أوراقها وشممته .

وقال حمزة وهو مغمض العينين مفتح الحواس:

\_ أنا كان حبك بالنسة لى ترف ، دلوقتى أصبح ضرورة .

فردت وفمه هو ما كان يلتقط الكلمات .. وقالت وهي تتدلل وأحيانا يكون الدلال له أنوثة :

\_ انت عارف أنا رجعت ليه ؟

\_ ليه ؟

فقالت: رجعت ...

وسكتت لحظة ثم أضافت : عشان ..

وسكتت لحظة ثم أضافت وهي تبتسم:

قررت ...

إنى ٠٠

ثم سكتت كمن لا يدرى ما سوف يقوله ، ثم خرجت الكلمة رغما عنها:

أتجوزك ...

واحتواها ذراعاه مرة أخرى وشفتاه وقال:

\_ وده أحسن قرار في حياتي حاقوم بتنفيذه .

فقالت وأصابعها تتعانق خلف رقبته :

\_ أنا كنت خايفة أحبك لانتهى .. أنا با أحس إنى بابتدى دلوقتى .

ورفعت وجهها إليه .. كان فى عينيها ندى بكاء وكان فى عينيه احتقان نشوة .. وقال وهو يأخذ وجهها الصغير بين كفيه وفى صوته حشرجة انتصار :

\_ انت عزيزة عندى جدا يا فوزية . أنا مش باحبك حب عادى . . أنا حبيت مصر فيكى . حبيت النيل اللي ف دمك وبياض القطن اللي ف وشك وشمسنا الحلوة اللي عسلت ف عنيكي .

فقالت وفي صوتها دموع فرحة :

\_\_أنا يا حمزة زمان كنت بحفظ وأقول شعر .. نسيتنى اللى فات ومن هنا ورايح حقول حمزة .

\_ كلامك جميل يا فوزية .. إيه كلامك ده ؟

\_ دلوقتی هو الحلم اللی ینطق الساکت ویحرك الصخر ویخلی الحدید یقول . فوق حب الاستطلاع الذى ينفرد به حمزة كان الخطاب من فوزية ، وبعد ماذا ؟ أهوال جسام . ولهذا كان الأرق الذى يحس به ناحية المظروف الموضوع فى جيبه شيئا طبيعيا ، كان لا يمكن أن ينتظر كما أرادت فوزية إلى ما قبل النوم حتى يعرف ما فيه ، ولهذا سرعان ما جمع أرقه وقال :

\_ إيه رأيك أنا مش قادر استنى ، لازم أقرا الجواب .

وعارضته فوزية قليلا ولكن قرأ فى ملامحها أنها لن تغضب فأخرج الخطاب باحتراس من جيبه وتأمل المظروف السميك على مهل كالذى يتهيأ لالتهام وجبة دسمة . كان واضحا أنه خطاب طويل ، واحتار حمزة أيستبشر بطوله أم ينزعج .

وقال لها قبل أن يفض الخطاب :

\_ انتی متأکدة إن مافهش حاجات زی و لازم نحترق ونترهبن ، ؟ فأجابت فوزیة :

ـــ يوهوه يا حمزة .. بلاش تعذيب .

فابتسم وفتح شيش النافذة وفض الخطاب ، وقرأ كلمة حمزة التي في أوله وأحس لها وهي مكتوبة بخطها بنفس فرحته حين سمعها وهي ترددها ، وتأنى وهو يتأمل الكلمة ثم وهو يلقى على فوزية نظرة أخيرة قبل أن يدلف إلى محتويات الخطاب .

\* \* \*

كان أهون عندى أن أموت قبل أن أقف منك هذا الموقف .. أنا ياحمزة أخجل حتى من أن أسمح لنفسى أن أناديك أو أكتب اسمك ، قلت لك أمس

إنك « تخون دورك وثقتي فيك ، ويبدو أن الإنسان حين يكون مذنبا يتهم غيره بنفس ما يقترفه . كيف أبدأ ؟ وكيف أزف إليك أنباء الإنسانية التي أحسست نحوها ( بإحساسات أخرى غير إحساسات الكفاح ؟ يكفي أن أقول لك إنني مثلت أمامك دور البطولة وإنني فيما يظهر كنت موفقة إلى الدرجة التي لم تلحظها أنت .. كل ما عرفته عنك من سعد قبل أن ألقاك أنك وطنی مخلص ومکافح من حدید ، وحین دخلت علیك الخیمة ورأیتك والبندقية أجزاء بين يديك وسوادها يلوثك ، ونظرت إلى بعينين ساهمتين ثابتتين من خلف نظارتك ، تلك النظرة التي لا تزال راسخة في عقلي ، قد يموت ولكنها لن تموت . . قررت من ساعتها أن أعرفك معرفة وثيقة ، ورحت أفتح لخيالي وديانا رحبة وأماني خضراء جميلة ، وأنا حين جلست لأكتب لك هذا الخطاب عاهدت نفسي على ألا أكتم عنك شيئا بالمرة ، ولا تحسب أن هذه مهمة سهلة .. فليس سهلا أن يقر الإنسان بأخطائه فما بالك حين يستخرج خفایا نفسه ویعرضها أمام عین أخرى غیر عینه حتى لو كانت عینك . لهذا فاعلم يا عزيزي أنه لم تكن هناك لجنة مدرسات بالمعنى الذي تناقشنا حوله وحول تنظيمه ، كانت هناك بعض مدرسات متحمسات وكنت أكثرهن حماسا .. وأطلقنا على أنفسنا اللجنة .

وحين وعدتك بإحضار التبرعات التي جمعناها لم نكن قد جمعنا شيئا و لا حتى فكرنا في الجمع ، ولست أدرى ما دفعني إلى الكذب عليك ووعدك بإحضار التبرعات في اليوم التالى . وحقيقة أحضرت لك السبعة والعشرين جنيها ، ولكن أتدرى كيف جاءت وبأى اسم اقترضت ؟

لقد درت على زميلاتى أقول لهن أن أبى مريض وأطلب منهن سلفة ، ودفعت من عندى سبعة جنيهات و لم أترك حتى الطالبات .. كنت أود مفاجأتك بمبلغ كبير ، مائة جنيه مثلا ، حتى أبدو ضخمة فى عينيك .

كان كل همى هو أنت والظهور أمامك .. و لما جاء ٢٦ يناير لن تستطيع أن تتصور مبلغ فرحى حين أمكن أن أعثر عليك بعدها .. ليس ذلك لأننى كنت مهتمة بقضيتنا الوطنية هذا الاهتمام ، وإنما لأنى كنت قد بدأت أهتم بك وأفكر فيك ، وأنا كنت طالبة في كلية الآداب ورأيت مئات الطلبة وقابلت في حياتي عشرات الرجال ، ولكنى لم اهتز و لم أحفل بأحد غيرك و كأنهم جميعا كان ينقصهم شيء وجدته لديك ، أو كأننى أنا كان ينقصنى شيء ووجدته عندك . وأنا قرأت كثيرا وآمنت بما آمنت أنت به من نظرة علمية للمجتمع .. ولكنى ما كنت أتصور أن يوجد إنسان مثلك يهب النظريات التي في الكتب ما وهبته أنت لها ، ويضحى بما كنت على استعداد للتضحية به ، ويتكلم عن أعقد المشاكل ببساطة كما كنت تتكلم .

وإذا كنت قد ناقشتك أحيانا وتحدثت معك عن الكفاح والعمل والواجب ، فما كان ذلك لإيمانى بل كان لأننى وددت دائما أن أرضيك . ولما عثرت عليك بعد الحريق وعرفت أنك مختف ، اجتذبت انتباهى الحياة الغريبة التي كنت تحياها ، الحياة التي تعادى فيها حكومة ويطاردك فيها بوليس الدولة ، الحياة التي تتنكر وتلبس من أجلها النظارات السوداء والطرابيش ، والتي فيها حذر وذكاء وتربص وقلق .

كانت حياة مثلها رائعة بالقياس إلى حياتى القانونية الراكدة .. تلميذات وبيت وكراريس وطبيخ . اجتذبتنى إلى حياتك وما فيها من مغامرة ، مغامرة كانت تضرب على وتر حساس فى نفسى . فبرغم اهتزازى بشخصيتك وإعجابى بك كنت أتصور أن لجنتكم هذه تحيطها أسرار وعملكم كله طلاسم ، وأن لكم مثلا رؤساء يختفون فى بيوت تحت الأرض متزمتين وصارمين ويرتدون ملابس غامقة ويملون عليكم أوامرهم بالتليفون ، ومن يخالف هذه الأوامر يضرب بالرصاص وهو ماش فى الشارع . وكنت (جمهورية فرحات)

دائما أتصور رئيسكم الكبير شابا صغيرا وسيما .. أبيض وله شعر أسود وقد شاب فوداه ويرتدي دائما حلة سوداء ، جالسا طول النهار يتلقى الأخبار ويتكلم مرة واحدة في اليوم ثلاث أو أربع كلمات فيأخذها مساعـدوه ويشرحونها في صفحات فلسكاب كثيرة ويوزعونها عليكم لتنفيذها .. لا تضحك يا حمزة فقد وعدتك أن أصارحك بكل خلجات نفسي وسأفعل. اجتذبتني أنت وحياتك والأسوار التي تحيط بكم تماما .. ولهذا فلو لم تعرض أنت على أن أتصل بك في مخبئك لعرضت أنا عليك ، ولا يمكن أن تتصور مبلغ سعادتي وأنا أحس أنني أقابل شابا يعيش حياة الخفاء تلك ، ولا يمكن أن تتصور ما كنت أحس به وأنا ذاهبة إليك آتية من عندك أنظر إلى الناس الجالسين معي في الأتوبيس وأشعر أنني الوحيدة التي تحيا في سركبير خطير. وانعكس هذا الإحساس على تصرفاتي فكنت أبدو أمام زميلاتي المدرسات جادة متزمتة ليفهمن أن قديكون السر في جدى هو النشاط ( الخطير ) الذي كنت أقوم به . وكان إذا سألني أبي بالصدفة أين كنت ، أتعمد أن ألمح في إجاباتي إلى أشياء يفهم منها أن لي حياة أخرى سرية أقاوم فيها الأعداء ، وكنت أذهب مثلا إلى زميلة من زميلاتي لتأخذ حصة أخرى بدلا مني فتسألني عن السبب ، فأبتسم لها ابتسامة رثاء وأقول :

\_ وهل أنا مثلكم نائمة ؟ الدنيا تتحرك .

وأزوم لتفهم من كلامي ما يحلو لها الفهم ، وكنت أكبت أحيانا شعورا صبيانيا كان يراودني . مثل أن يقبض على معك وتنشر الصحف في ثاني يوم صورتي وتحتها شيء مثل أخطر فتاة في الشرق الأوسط .

وهكذا عشت في إطار من الغموض فرضته على نفسى وكأننى كنت أود أن يعرف الناس جميعا ما أقوم به في الحفاء . ومن جهتك أيضا كنت مع بدايات عواطفي ناحيتك أشك أنك أحيانا تجيب إجابات غامضة وأنك

تراوغني وتكذب.

وكنت أود دائما أن أتعمق فيما يحيط بك وباللجنة من أسرار ، حتى سمحت لنفسى بقراءة بعض الأوراق التى وجدتها فى حجرتك ولدهشتى وجدت ما فيها أبعد ما يكون عما انتظرته من أسرار .. كانت القصة فى نظرى مغامرة ليس إلا ، أحب فيها البطل الذى هو أنت وتنتهى بوادى الخيالات الذى تنبت فيه الأمانى الخضر .

وحين حكيت لى عن يوم ٦ مارس ورأيت فى عينيك الإعجاب الذى يقرب من التقديس ( بالغوغاء ) والرصاص يخترق أجسادهم العارية ، استفززت فى كل نعرتى للبطولة وكل المعانى المثالية ، وصممت أن آخذ الحقيبة التى فيها الديناميت لأخفيها لدى وبهذا أتوج على عرش ثقتك .

إلى هنا كنت قد نجحت فى تمثيل دور البطلة أمامك و لم يكلفنى النجاح شيئا سوى بضع مبالغات وأكاذيب . و لم أكن أتصور وأنا أعرض عليك أن آخذ الحقيبة إلا أن أمرها بسيط وستمر مسألتها كا مرت مبالغاتي السابقات .

ولكن ..

ما أن أصبحت في العربة وحدى مع الحقيبة .. أى ما أن دخلت بها بعيدا عنك وراء الكواليس حتى انتابني شعور مفاجئ بالخوف من أن تكون الحقيبة فيها ديناميت حقا ، إذ أننى بينى وبينك كنت لا أعتقد في صحة محتوياتها و كأنك أنت الآخر ممثل »! فوضعتها فورا على الكرسي وفتحت أقفالها ومددت يدى ووجدت تلك القوالب الصغيرة المرصوصة وتخيلت أنها لا بدحجارة أو طوب مثلا . واستخرجت واحدا منها وضغطت عليه وشمته فوجدته مادة غريبة لم تصادفني في حياتي ولا شممت رائحة مثل رائحتها أبدا .. وأغلقت الحقيبة في الحال وجلست أرتعش وأنظر إليها وأحس بوحدتى معها في العربة وكأنني طفل أدخل نفسه من بين الحديد في قفص الأسد ،

وكان أول ما خطر لى أن أتخلص منها مباشرة .. أما كيف فلم أجد لى عقلا أفكر به .

وأمرت السائق أن يغير من اتجاهه وييمم ناحية النيل لتتاح لى فرصة للتفكير ، وظللت أرتعش وأفكر حتى وصلنا إلى الجيزة وكنت قد اهتديت لطريقة كانت مثلى في نظرى .. أغير العربة وأذهب بأخرى إلى شارع فؤاد وأقف بها أمام عمارة من العمارات التي بها بابان ، وأنزل وأقول للسائق انتظر لحظة وأدخل من باب وأخرج من باب آخر .. وفعلا وصلت بى العربة أمام الأمريكين وهبطت منها والسائق ضامن أنى سأرجع إذ حقيبتي كانت لا تزال في عربته .. ودخلت من الباب الرئيسي وخرجت من الباب الذي على الشارع الجانبي .

وأسرعت في المشي .

ولن تتصور يا حمزة كثرة الأشياء التى فكرت فيها فى هذه الدقائق القليلة . كنت أنت أول من خطر لى بوجهك ولحيتك ونظارتك وابتسامتك الهادئة التى لا تثور والتى لا تفارقك ، وحجرتك فى سطوح أعلى عمارة فى شارع المبتديان ، وملاءة سريرك السفرى التى بليت من الوسط فقطعت ثم وصلت حتى تصبح الأجزاء البالية إلى الخارج ، والمنضدة الصغيرة التى فى ركن الحجرة وأدراجها وما فيها من أوراق لا أسرار فيها ، وصورة أخيك وهو يرتدى بالطو وجلابية وطربوشا والتى كتب على ظهرها بخطه .. إلى شقيقى العزيز الأستاذ حمزة ثم بيتا من الشعر عن المحبة الدائمة والإخلاص المقيم ، وفانلتك القديمة التى فيها خروق كثيرة والتى كتت على ما يبدو تستعملها وفانلتك القديمة التى ألمت المراكمة فى كل مكان بالحجرة ، وجهاز الراديو المصنوع صناعة علية ولعلك أنت الذى صنعته ووضعته فى صندوق من الأبلكاش الأغبر ، والخطاب الذى كتبه لك أخوك على لسان أبيك يقول لك فيه إن أمك

صحتها « مش ولا بد » وأنها باستمرار تشتكى من المغص وتدوخ وعندها صداع دائم ، وصورتك مع دفعتك وقد وضعت فوق رأسك علامة × ، وفردة الشبشب المقطوعة المهملة التي تحت السرير ، والجوابات الغرامية التي حاولت إخفاءها أسفل الجريدة التي فرشت بها درج المنضدة والتي تقول لك فيها « المخلصة لا » تقول أواه حمزة ، ومنظرك يوم قابلتني مشمرا بنطلونك وجوربك ممزق وفيه طين ، ثم وأنت تهز رأسك في إصرار وتقول شعبنا ده فيه قوة مقاومة لا يمكن تصورها .

ثم تبينت فجأة أنى هاربة كاذبة مخادعة لئيمة ، خنتك وأنت الذى أوليتنى كامل ثقتك ، وليس ذلك كل ما تبينت فلأول مرة منذ عرفتك فكرت فى هذه الثوانى بالذات فى القضية التى تدافع عنها أنت دفاع المستميت ، تصورت كم من الجهد بذلت لتشترى الديناميت وتخفيه ثم تعود وتأخذه ، وكم من النقود أنفقت وكم من المرات عرضت فيها نفسك للقبض والموت والمنسف ، وتصورت كم ضحيتم لتهيئوا الناس للكفاح وتقيموا المعسكر وتدربوا وتعدوا بلادنا للوقوف فى وجه العدو ، وتصورت حسن الخشن وهو يعزم على بالشاى وقد قبض عليه ، وأولاد ٦ مارس الذين ماتوا وعلى أفواههم بسمات ، والحمسين عسكريا الذين قتلوا فى مذبحة المحافظة ، وأقسم لك يا بسمات ، والخمسين عسكريا الذين قتلوا فى مذبحة المحافظة ، وأقسم لك يا تطوعت مختارة لأخفى الحقيبة ، وأننى أنا التى تقوم بهذا الدور القذر وتريد تطوعت منها وحرمانكم جهود أيام وليال وحرمان شعبى من سلاح من أسلحته ، وكأننى جاسوسة من جواسيس الأعداء .. ولا يمكن أن تتخيل مبلغ الاحتقار الذى شعرت به لنفسى ولتفكيرى .

ولو كنت متاكدة أننى سأموت ماكنت ترددت فيما فعلته حين استدرت وعدت أجرى وألهث ، ودخلت من الباب وخرجت من الباب الآخر ووجدت السائق يبحث عنى بعينين زائغتين ، فركبت وقلت له : شارع خيرت .

وحين استقر بى المقام داخل العربة شعرت كأننى أفقت من كابوس مزعج ، وبدأت أتصور مبلغ جريمتى لو كنت قد تركت الحقيبة فى العربة ، إذ فضلا عما فكرت فيه ألم يكن من المحتمل أن يعتقد السائق أن فيها ملابس أو أشياء ثمينة فيأ خذها إلى بيته ويفتحها ويخطئ فتنفجر وتنسف البيت بمن فيه ؟ ألم يكن من المحتمل أن يأخذها إلى القسم وتقع أو ترمى فتقتل عشرة أو عشرين أو مائة من الأبرياء ؟

وظللت أحدق في ظهر السائق السمين العجوز الطيب وأفكر فيما كان ينتظره ، وأزداد حقدا على نفسي واشمئزازا منها .

وجين وصلت البيت أشفق على السائق ذو النوايا الطيبة فحملها عنى إلى شقتنا ، وقلت لأبى إنها ملابس فريق المرشدات التى اشتريتها لهن يومها ، وما دخلت حجرتى وأغلقت الباب ووضعت الحقيبة تحت الفراش حتى رقدت فوقه وقضيت هكذا ثلاث ساعات .

وإذا كان لكل إنسان نقطة يتحول عندها مجرى حياته ، فهذه الساعات الثلاث حولت مجرى حياتي .

حقیقة كان لی اهتهام دائم بالمسائل العامة .. فحین كنت فی الكلیة كنت أسهم فی كل أوجه النشاط بقسط وافر حتی رشحت نفسی فی انتخابات الاتحاد مرة ، ولكن زمیلاتی الطالبات لم ینتخبننی علی اعتبار أن ترشیحی ما هو إلا و تقلیعة ، و و لفت نظر ، لا أكثر ولا أقل .. حتی السیاسة كنت أهتم بها وأتابع أخبارها ولكن الاهتهام شیء والإیمان شیء آخر .. واهتهامی بهذه الأمور كان فقط محاولة منی لأثبت للرجال أننی لست أقل منهم . وهكذا كانت صلتی بلجنة المدرسات وصلتی بلجنتكم . لم أكن أومن إلا بك

أو بالأحرى بتمسكى بك ، أما القضية وعملك وكفاحك فكان سواء لدى أن تكون مسئولا عن معسكر التدريب أو مدرسا زميلي أو حتى طالبا .. إلى أن كان ذلك اليوم الذي واجهت فيه حقيقة ما تكافح أنت من أجله ، وكانت حقيقة هائلة ..

فلم یکن ما تقوم به مجرد عمل ککل الأعمال بل کان کفاحا رهیبا من أجل غیرك ، و لم تکن تختفی لیطاردك البولیس و تستعذب المطاردة والمغامرة ولکنك تفعل هذا لتكمل دورك من أجل وطننا .. اکتشفت أنك أنت مهتم بالقضیة الکبیرة قضیتنا کلنا ، وأننی فقط مهتمة بذلك الهدف المحدود .. علاقتی بك .. مهتمة بنفسی .

والإنسان يظل يمضى فى الحياة مؤمنا بما شب عليه وتعلمه من أفكار وفلسفات ومبادئ دون مناقشة للأسس التى يقوم عليها إيمانه ، إلى أن يحدث حادث مثل أن يمرض بالسل نتيجة حياة كلها سهر وعربدة ، أو يقترف جريمة ويقبض عليه .. حين يقع ويشعر أنه يهوى يبدأ حينئذ فقط فى مراجعة الخطوط العريضة لحياته وتأمل إيمانه والتشكك فى أفكاره وفلسفته وآرائه وتحميلها وزر ما اقترف ، أو قد لا يشك فى نفسه وإنما يظل مغمض العينين يعتبر أن ما حدث له كان قسمة ونصيبا وكان مكتوبا ، وأن الدنيا والحظ هما السبب . وقد أدركت ليلتها أننى دلفت إلى مهاوى ما كنت أعتقد أبدا أن فوزية التى أتق فيها وأومن بها تدلف إليها .

وأخذت أتفحص حياتى وأتوقف عند تصرفاتى وأراجع علاقاتى بالناس ، وإحساساتى الداخلية التى لا يطلع عليها أحد سواى ، والطريقة التى أحدد بها مواقفى من الشرف والحيانة وأقيس بها ما يصح وما لا يصح والفارق بينهما ، وأدركت بعد هذا كله أن الحقيبة قد أنقذت بمعجزة .. وأن الطريق الذى كنت أمضى خلاله فى الحياة كان يحتم أن أترك الحقيبة وأهرب من مسئوليتها

لأنى كنت لا أفكر إلا فى نفسى وذاتى وسلامتى ، ولا أفكر فيما أقوم به من عمل قدر تفكيرى فيما يعود على بالنفع من هذا العمل .. وبعض الناس لا تبدو أنانيتهم فى نظرهم شذوذا ولا قبحا ، والبعض الآخر يدرى ولكنه يتعامى حتى إذا ما واجه ذاته ورأى فيها الأنانية مجسدة فلا بدأن يستبشع تلك النفس ، ولا بد ستتفتح عيناه على حقائق ما كان يراها كفرد لا يؤمن إلا بنفسه ولا تتعدى نظرته حياته هو ورغائبه فقط .. سيرى حينئذ الناس والعالم والقيم والمسئولية من زاوية جديدة .

وكنت أنا الأخرى وكأنى ظللت مغمضة العينين طوال حياتى ثم فتحت عينى لأجد نفسى وسط شعب كادح عريق .. كنت أراه كل يوم ولا أحفل به ولا أفكر فيما يمكن أن يكون مصيره ، ولأجد السائق العجوز الطيب الذى كدت أقتله ، ولأجد أبناء الشعب من أمثالك أنت وحسن وسعد والآخرين .. شبان في صلابتهم فولاذ يعملون من أجل الناس الذين أمر أنا بهم مرور الكرام وأتسلى على حسابهم ، وأعشق شبابا ورجالا آمنوا بالغوغاء والحفاة والمظلومين جميعا وعقدوا العزم على أن يذيقوهم السعادة وهم

وأخذت كلمات كنت أسمعها منك ولا أعيرها التفاتا تومض أمامى وتأخذ بيدى ، ولأول مرة فهمت أن النظريات التي كنت أقرؤها في الكتب لم تكتب فقط من أجل أن يقرأها الناس وإنما هي تعبير عن واقع علمي موجود وملموس يأبي بعض الناس لسبب أو لآخر أن يراه .. فهمت أن المجتمع الذي أوجد فيه ما هو إلا جسد حي كبير وما أنا إلا خلية من ملايين خلاياه . ولا حياة لي إلا داخل ذلك الجسد أردت أم لم أرد .. ولا أستطيع أن أعمل غير ما يعود عليه بالنفع وإلانبذني وتخلص مني ومت .

ومقياس حياتى ليس هو ما أنعم به فى لحظات حاضرى لأن تلك الجياة تموت

معى وتفتى .. إنما المقياس الصحيح هو ما أقدمه لذلك الجسد ، لأن ما أقدمه سيحيا مع المجتمع طالما المجتمع حى وسأحيا معه أنا الأخرى .. إنكم وأنتم تفنون من أجل الناس لا تفنون ، وإنما الذين يقولون .. أنا ، وحياتى ، والمحافظة على كيانى وعمرى ، ومصالحى ، هم الذين يموتون . أنتم تربطون وجود كم بوجود مجتمع سيظل قائما أبدا ، ووجودهم الموقوت المحدود إذا قيس بكم يعد لا وجود ، ولن أحكى بقية ما فكرت فيه .. فقط أقول لك إننى أدركت أنى ضللت الطريق ومشيت فى درب يؤدى إلى خارج الجسد الحى الكبير ، ويقودنى فى النهاية إلى داخل نفسى الضيقة المحدودة ودائرة رغباتها الصغيرة لأجف فيها وأموت ..

وكنت أنت بعد الثلاث الساعات مثلما كنت دائما قائدى فى ذلك الطريق الجديد ، اعتزمت أن أضع يدى فى يدك وأتعلم . وأكبو ثم أنهض لأواصل المسير .

وإذا بى آتى إليك أمس وأنا حريصة ألا أشعرك بالمعركة التى دارت فى نفسى ، وحريصة على أن أستمر فى القيام بدورى ولكن فى الاتجاه الصحيخ ، وحريصة على أن أكبت كل إحساس ذاتى وأحاول أن أراك من جديد وأفكر فيما تقوله من جديد وأتعلم منك الألف باء ، وحريصة على ألا أقول غير الحق ، ومع هذا سامحنى يا حمزة فيومها غلبتنى الرواسب الكامنة فى نفسى وكذبت عليك ، وقلت إنى نقلت الحقيبة عند محاسن وإنها رائعة ، فالحقيبة كانت وما تزال تحت فراشى .

كنت آتية وفى ضميرى كل ما أملكه من إرادة لأحاول أن أصلح نفسى وأتعلم منك ، ثم أفاجاً بك تقول ما قلت و تعترف لى أنك أنت الآخر ضعفت مثلى وأحسست ناحيتى . . إلخ . . ولك أن تتصور مبلغ خيبة الأمل التى أصبت بها . ومبلغ الضياع الذى و جدت نفسى أعانيه . . وقلت لك ما قلت

وقلت لى ما قلت ، وخرجت من عندك وأنا لا أدرى ماذا أفعل .. وخطر لى كا أسلفت أن أنتحر وقد انهار كل شيء أمامي .. قبلها بيوم انهارت نفسى ويومها انهرت أنت .. فماذا كان باقيا لى ؟

وكنت أظن أنني سأظل ثلاثة أيام بلياليها أفكر فيما حدث ، ولكن ما إن وضعت نفسي على الفراش حتى نمت .

واستيقظت في منتصف الليل وجلست أفكر .. فيك . لماذا نخدع أنفسنا أحيانا ونتبرأ من عواطفنا وكأنها قذرات وتهم ؟

ظللت في الفراش ساعات كثيرة أفكر في أحسن الوسائل لذبحك وتأنيبك ولفت نظرك .. كانت دوامة تدور في رأسي ، فلسبب ما كنت لا أتوقع أن تجبني ، أو إذا أحببتني لا تصارحني بهذا الحب ، وكأن البطل الذي في خيالي يجب أن يفعل هكذا ، ولسبب ما حين يحاول أحد الطرفين أن يعترف للآخر يمثل المعترف إليه دورا سلبيا أو حتى يأخذ موقف المدافع عن نفسه ، ولسبب ما غرم على أنفسنا أن تنال ما تشتهي بكافة الحيل والعقبات .

ولا تدهش حين أقول لك إنى فكرت فى قطع صلتى بك نهائيا على اعتبار أنك و خنت ثقتى فيك وأنك اتخذت القضية التى تدافع عنها وسيلة لتحقيق مآربك الخاصة )! وإنه أولى بك و أن تترك الكفاح للناس الذين وهبو أنفسهم للقضية ). أقطع صلتى بك وأحاول أن أجد طريقة لخدمة الشعب الذى آمنت به وأجد قائدا آخر و لا يفكر فى ذاته ويهب عواطفه للناس أجمعين ).

ثم قلت إن هذا ليس بعقاب كاف ، بل يجب أن أكتب خطاب توبيخ حافل بأقذع الشتائم وأرسله لك على عنوان بدير ويكون هذا آخر شيء أفكر في ناحيتك .

ونمت .. وصحوت في الصباح وأنا على عزم الليل . وطلبت من الناظر

أجازة عارضة يوما لأتفرغ للتفكير في الانتقام . وهداني العقل إلى أن أكتب لك الخطاب ولكن بدلا من أن يكون هناك احتمال لتسرب محتوياته لبدير أذهب بنفسي وأدق الباب وأقابلك بمنتهى التجهم وأعطيك الخطاب من على الباب وأنزل فورا . وطوال تفكيري كانت الصور في ذهني تتغير ، ولكن دائما كانت ( فهماني ازاى ) ترن في أذني وتتردد وكأنها تهزأ بكل ما أفكر فيه ، وجعلتني لازمتك أفكر فيما قلت لى كلمة كلمة وأزنها جميعا وأحاول حقيقة أن أفهمك ، وسألت نفسي سؤالا لأكيل الضربة الأخيرة لأوهامي وانتقاماتي ما ذنبك ؟ وهل حرام أن تحبني ؟

وهل هذا مستحيل ؟ وهل هناك تعارض بين أن تحب وبين أن تكافح من أجل كل ما أنت مؤمن به ؟

وأيضا لن تنصور مبلغ فرحتى للسؤال الذى ألجم أوهامى ، كدت أصرخ وأهلل لتلك الفتوى ، ولكنى لم أجد وقتا فقد ردتنى إليك ( فاهمانى ازاى ) التي كانت لا تزال تنبح في أذنى وتجعلنى أتصورك بعد ما قلته لك ، وأيقنت أنى لابد آلمتك أشد الألم . . أنت يا أعز إنسان .

وتنفعل صورتك فى خيالى بهذا الألم وتنطقه ملامحك ، وأتلوى أنا من العذاب وتزأر كل حشاياى تمنع عنك الألم وتناديك وتستعطفك . أنت الذى طالما تأملتك وتأملت خلجات حماسك وأحببتك وآمنت بك . . أنت الإنسان الكبير الذى يخدم أكبر قضية تعبر لى عن عواطفك التى طالما انتظرتها وتحرقت شوقا إليها . . وأركلك هكذا ا

أنا ولو إنى فتاة إلا أنى نادرا ما أبكى ، ولقد بكيت وأحببتك وأنا أبكى ، وهفوت إليك وإلى غزارة ذقتك وشعرك المنكوش ودمك ولحمك وسرحاتك ونظارتك الحبيبة الملحومة ، وحتى فانلتك التى تبدو فتحتها بالية من بيجامتك .. أحببتك وهفوت إليك ، وتصورت أنى ممكن أن أموت أو يمثل

بى أو أجـــر ، إنما لا يمكـــن أن أتصور ألا أذهب إلـــبك أو أراك . وأنا على يقين أنى حين أدق الباب سوف تفتح لى باسما .. لا لأنك تحبنى وكدت تفاتحنى ، ولكن لأن الإنسان الذى فيك أوعى من أن يـرفض خطئى ، ولأن قلبك كبير لا يصد طارقا حتى لو كان الطارق أنا .

## 14

ووضع حمزة الخطاب بجانبه وعقد وجهه فبدت فيه مأساة ، والتفت لفوزية وقد أتعبها التحديق فى أدق ملامحه لترى فيها انفعالاته بما يقرأ حريصة على أن تخفى تحديقها ذاك . رفع حمزة رأسه والتفت إليها وسكت .. ولم تجرؤ هى الأخرى على النطق .. وقال أخيرا فى كلمات بطيئة والمأساة لا تزال فى وجهه :

> ــ تعرفی إنتی تستاهلی إیه علی الجواب ده ؟ فقالت فوزیة فی اضطراب :

> > \_\_ إيه ؟

وقام حمزة فجأة واحتضنها وقبلها ثم قال :

\_ تستاهلي أكتر من كده .

\_ لا .. اسمع يا حمزة ما تخليش الحكاية تنقلب هزار .

ــ بقى ده هزار ؟ أنا فعلا مبسوط من الجواب .

\_ مبسوط ليه ؟

۔ تفتکری لما تعرفی بعض أخطائك وتحاولی تصلحیها مش يبقى حاجة تبسط ؟

\_ بس .. دى أخطاء كبيرة .

- \_ الأكبر منها هو إنك عرفتيها .
- \_ وأنا ماكنتش مؤمنة بقضيتنا!
- \_ مفيش خاجة اسمها ماكنتش مؤمنة يا فوزية .. إنت كنتى دايما بتتحركي تجاهها وده هو المهم . فاهماني ازاى ؟ الدافع باستمرار بيبقى مختلف عند الناس بس ما دام الهدف سليم خلاص .. دايما الهدف هو اللي بيطور الدافع .

\_ أنا ما اخبيش عليك كلامك بيبسطنى .. بس خايفة اكون بتقوللي كده عشان يعنى العلاقة اللي بيننا .

فعلا لولا واثنق منك ، وانك حتمشى وإنى حساعدك وانك حتساعدینی ، كنتی ممكن تعتبری كلامی تبریر .. بس ..

\_ بس إيه ؟

\_\_ المسألة مش بتاعة يوم .. إنتى اتغيرتى وكل يوم حتتغيرى .. وأخذ القرارات شيء وتنفيذها شيء تانى ، فاهمانى ازاى ؟ كل أما حتخطى خطوة لقدام حتثقى فى نفسك أكتر وتخطى أسرع .

\_ أنا مستغربة إنت واخد الحكاية بالبساطة دى ازاى ! إنت قريت الجواب ؟ وفهمته كويس ؟

\_ الظاهر إنك كنتى متوقعة أضربك مثلا عشان يبقى الموقف درامى قوى .. إنتى نسيتى حاجات كتير وحملتى نفسك كل الخطأ .. نسيتى إن فترة نشاطك كانت فترة إقبال من كل الناس على المساهمة في القضية ، وإن الفترة اللي بدأت فيها اللي بتسميه مغامرة كانت فترة إرهاب ، يعنى الفترة اللي بتظهر فيها الانحرفات والمغامرات .

\_\_ بس انت مثلا ...

\_ انتي واخده عني فكرة مثالية قوى .. أنا مش بطل ولا كلام من ده ،

فاهمانی إزای ؟ أنا من دم ولحم وعندی نفس المشاكل الجنسية والنفسية اللي عند كل الشبان اللي زيي .

وأنا برضه لما اتصلتي بيه كنت مبسوط لأنى حاشتغل مع واحدة حلوة زيك ، وبرضه لما ابتديت أعجب بك وأدخل فى الغميق كنت فاهم إن فيه تعارض . . أنا إنسان زيك تمام .

\_\_ يعنى واثق فيه يا حمزة ؟

\_ أهى دى مسألة فيها نظر.

وضحك ، واغتصبت فوزية ضحكة وسألته :

\_ يعنى لسة بتحبنى ؟

\_ على فكرة أنا مش مؤمن بمبدأ السؤال ده.

\_ ليه ؟

\_ دا سؤال لفظى .. إحنا بنحس الحب زى ما بنحس الخوف والفرح والكره .. فعشان تعرفي إذا كنت لسه بحبك واللا لأ إسالي نفسك .

\_ وإذا سألتها وقالت إنك بطلت ؟

\_ ابقى في الوقت ده أقرصيها من ودانها وقولي لها تبطل كدب .

\_ إنت رايق .

\_ يعنى لازم أعيط عشان أثبت لك ؟

\_ لأ .. عايزاك تقول الحق .

\_ يعنى عايزه أكدب عشان أقول ( الحق ) اللي انتى عايزاه ؟ أنا ما أقدرش اقول إلا الحق .

وقبلها قائلًا لها ﴿ الحق ﴾ كل الحق في فمها .

وتقبلته فوزية ساهمة .

فسكت ثم ابتسم وقال:

- \_ بقى مش أنا اللى ليه الحق انى أسال ؟
  - \_\_ تسأل إيه ؟
- \_ لحسن يكون الحب راخر صفى عندك على حاجة ؟
  - ـــ يوه يا حمزة .. كفاية تعذيب .. كفاية بقى .

ودلفت من الكلمات إلى الدموع ثم إلى البكاء .. وانكفأت على ذراع الكرسى والدموع تنهمر وتبلل الذراع ، ومدت يدها تطلب منديلا ولم يك لديه واحد نظيف .

فأسرع إلى الحمام وأحضر ﴿ فوطة وش ﴾ قائلا :

ـــ لا مؤاخذة .. إذا ما كانتش كفاية لما تتبل كلها أجيب غيرها .

وازدادت نهنهاتها وشهقاتها ، فجلس حمزة على كرسى وأسند رأسه إلى الحائط وقال :

\_ معلهش .. قليل من البكاء يصلح المهج .. الدموع وسيله فسيولوجية لغسل العيون ، فإذا از دادت غسلت القلوب أيضا .

ولكن فوزية انخرطت فى بكاء مؤلم لا يصلح فى تلافيه الهذر . وما أدرك حمزة هذا حتى ترك مكانه ولف ذراعه حولها ورفع وجهها إليه ، وانبثقت فى صدره لوعة عذاب حادة حين رأى عينيها الباكيتين ورأى كأن شمس يوم حزين تغرب فيهما ، وقد تحول البياض الناصع إلى شفق ، وتوهجت العسلية المذهبة بأشعة الغروب كما تتوهج سنابل القمح حين يغيب وراءها القرص الأحمر ، والدموع تتساقط حزينة هى الأخرى تبكى وتدمع وتولد فى عيون الآخرين الدموع .

ووجد نفسه يهدهد عليها برفق واحتراس وكأنها مصنوعة من دقائق زجاجية لاتحتمل لمسه ، وكان يفعل ذلك بدهشة غير قليلة فتلك أول مرة كان يهدهد فيها على إنسان أو حتى قطة ، فما باله بفوزية وهي مستكينة إلى التجويف الدافئ الكائن بين جنبه وذراعه ، والتي يحسها بعضلات صدره هشة أليفة ، ودموعها متلألئة يكاد من كثرتها وتتابعها أن يتذوق طعمها فى فمه ، وشعرها يجذب أنفه برائحته ورائحتها وهى مطمئنة إليه بكلها .. وبالشمس الغاربة فى عينيها .. وبمكرها ومبالغاتها .. وبكل ما تحمله له من حب .

كان البيت من البيوت التي تقع في حواف الدقي ، وكانت النافذة تصنع بروازا مربعا للوحة حقيقية تغرب فيها الشمس نفسها عبر البيوت البعيدة والمزارع التي لا تنتهي ، وجو الغروب يشحن بمقدمات التغيير العظيم الذي سيطراً على الكون بعد ذهاب الشمس .. وكانت شعاعات صفراء وحمراء قد اخترقت النافذة وبرزت من اللوحة وأضاءت الحجرة . وأحس أنه قد أصبح إنسانا اخر .. شاعرا أو موسيقارا .. أو فنانا مشحونا باً حاسيسُ مرهفة ناعمة هفهافة تتصاعد من نفسه وتملأ الجو الذي تضيئه لهثات شمس أخيرة ، بأبخرة معطرة وسحابات خفيفة مصنوعة من ذرات إنسانية خالصة . أحس أن قلبه يذوب وكأن عددا لا نهاية له من العواطف الدقيقة الضعيفة الواهنة يتسرب إلى ذاته الحديدية وينهشها ويشبعها نبضا ولينا وألفة ولا يستطيع مقاومتها ، ويدفعه العجز إلى حنين جارف للبكاء وكأن لحنا جنائزيا تأتيه أنغامه من بعيد لا تشمئز له نفسه ، ولكن يثير فيه أشجانه ويداعب أو تار حزنه المهملة في نفسه فتروح تعزف هي الأخرى وتنوح ، ويتصاعد حزنها ألحانا تحرض على الحزن والعجز، وتغرى بأن يفضفض الإنسان عن نفسه بالدموع

وآثر حمزة أن يتكلم ، وخرج صوته غليظا قد جرحه البكاء الذي لم يتم ، وكانت فوزية قد هدأت واعتدلت ومضت هي الأخرى تتحدث في وجل . وغابت الشمس .

وحل المساء.

وكان أحد أمسيات الشتاء وبدأت نسمات تهب .. نسمات ليس فيها جمود اليأس وإنما كان لها مخملية الأمل .. وكان حمزة قد أضاء النور وأصبحت الحجرة تسبح في بحر من عواطف متدفقة . كان في جوها ضحكات قصيرة مختصرة وطويلة لانهاية لها ، وأيدتدق على أيد ، وقلق بال ، وتنقلات سريعة متلاحقة من حادثات فاتت إلى لحظات تصنع الحاضر ، إلى ومضات عيون والتماعات خدود وبسمات راجفة كمناديل حريرية معلقة تجف ، وكلام كثير يريد أن ينطق ، ورهبة من الكلام .. وحمزة يجلس فلا يركن إلى الجلوس، ويتمشى في المساحة القليلة الباقية في الحجرة بغير أثاث فلا يركن إلى المشى ، وأسلاك خطط طويلة تخرج من رأسه لتمتد إلى الغد وبعد الغد ومئات السنين ، وفوزية تبدو فرحة تنظر إليه وتتحسه بعينيها وتتأمله كالشيء الثمين الذي تقلق حوزته حتى وهو بجانبها ، وفي قلبها وعينيها كانت قلقة لا تكاد تستقر على حال ، ولا تكاد تصدق أن حمزة أصبح لها وإنها ستصبح زوجة ذلك العزيز الثائر الذى يتوهج بمنطق لماع مشع ينفذ إلى الأقــوال والأشياء فيفصصها ، ويتأمل تركيبها وقانونها كاكان بفعل ﴿ بالبريتا ﴾ ، ثم يصدر عليها حكمة في بساطة وبلا ضوضاء.

ابتسامته وابتسامتها كانا هناك حين فتح الباب فجأة وظهر بدير مصفر الوجه جامد الملامح ترتعش أصابعه التخينة الشاحبة ، وخطا خطوة واحدة إلى الداخل وتوقف قليلا ، وجاب الحجرة كلها بعينيه وتفحص فوزية بدقة ، وكذلك فعل بملابس حمزة ثم قال له : تسمح .

وتبعه حمزة المذهول إلى الخارج ، وأغلق بدير الباب ومشى إلى حجرة النوم ، وما كادا يصبحان في الحجرة حتى التفت بدير قائلا في مرارة غريبة على صوته :

\_\_ أنا مش قايل دى متجيش هنا ؟

\_ دی مین ؟

فقال بدير وعيناه إلى الأرض وأسنانه تتضاغط :

\_ الشرموطة بتاعتك اللي في الأوضة التانية .

وكاد حمزة أن يصفعه ، وفعلا قام بعمل المقايسات اللازمة بين حجمه وحجم بدير والمسافات التي على يده أن تقطعها لتستقر على وجهه ، لولا أنه عاد إلى وعيه ورأى أمامه طفلا ضخما لا يستطيع أن يمد عليه يده .

\_ تفتكر إن دى طريقة يا بدير ؟

ــ ما هو مافیش إلا كده .. أمور الشرمطة دى ما أعرفهاش .. أنا راجل صعیدی .. يمكن يبان على إنى متساهل إنما في الحاجات دى أنا صعيدى قح .

\_ ویصح وانت صعیدی قح تشتم ناس متعرفهمش کده ؟ . کده ؟ \_ \_\_\_ بلا یصح بلا ما یصحش .. انت خلیت فیها یصح .. أنا قلت متجیش .. فما دام جت تبقی انت و هی بره علی طول .

ـــ سيبنا من التهويش ده وبلاش جعير وقول لى إيه حكاية التقاليـــد الصعيدية اللى ظهرت فجأة دى ؟

ـــ ما فيش حكاية .. بره يعني بره على طول بلا أي تفسير .

وألقى عليه حمزة نظرة أخيرة أيقن بعدها أن لا فائدة من مناقشته وإنه فى حالة لا يعى معها ما يقول أو بفعل ، بل إنه فى حالة قد يرتكب معها جريمة . و لم يكن حمزة يتصور أن المسألة ممكن أن تتطور إلى هذا الحد وإنها ستتفاقم إلى أن تصل إلى هذه الدرجة .

واشار إلى فوزية وتقدمها إلى باب الشقة بعد أن جمع حوائجه القليلة ووضعها فى الحقيبة القماش ، وأغلق وراءهما الباب ومضيا يهبطان السلم . وفوجئا ببدير يطل برأسه من باب الشقة قائلا فى صوت مخنوق : \_\_ الشنطة الكبيرة .. تلاتة بالله العظيم إن ما كانت تجينى لأدفعك تمنها غالى .

وأغلق الباب . وخيل لحمزة وهو يهبط بقية الدرجات أنه يسمع وراء الباب المغلق شهقات وتهنهات .

وبعد خطوات كانا يحتويهما ظلام شوارع الدق ، حيث الليل والأشجار والفوانيس الغازية الشاحبة المتباعدة ونقيق الضفادع في الخرائب الكثيرة وهي تستقبل مقدم الربيع .

وكان هناك نقيق مشابه في رأس حمزة يعلو ويعلو . كان في رأسه بدير الذي زامله عاما في مدرسة ثانوية وقابله بعد ذلك في القاهرة صدقة ، ونشأت بينهما منذ ذلك الحين علاقة لا هي سياسية ولا شخصية ولا لأن فيه اتفاقا في الأمزجة ، ومع هذا ظلت قائمة لا تموت ولا تنطفيُّ .. اختفي حمزة عنده حين جاء بيفن إلى مصر ، ومع ما حدث فلم يكن ساخطا عليه بقدر ما كان ساخطا على نفسه إذ الخطأ خطؤه .. كان من الواجب أن يحاول بجدية أكثر أن يكشف عن الإنسان الذي في بدير وينميه . إنه حتى وهو يطرده كان يحس ناحيته بالعطف والحب والآلم ، وهي مشاعر نادرا ما كانت تطرق باله . وخيل لحمزة أن نظرته إلى بدير وإلى الناس عامة تغيرت ، بل لا بد أنها تغيرت ، ولا بدأنه كان مخطئا إلى حدما في استيعابه للجماعة البشرية . كان يؤمن أن الناس تتطور ولكنه يدرك الآن أنه كان يرى ذلك بطريقة آلية . أن فهمه للناس كان شيئا كهذا : المجتمع يكون كسرا اعتياديا له مقام يعد بالملايين وبسط يعد بالآحاد أو العشرات ، وإن المجتمع يتطور بتناقص البسط مع المقام . وكل إضافة تبسط على حساب المقام ، وكل إضافة للمقام تنتزع انتزاعا من البسط ، وإن الإنسانية ستظل في عذاب وحروب حتى يُطاح 

الصحيح. إنه يدرك الآن أن فهمه ذاك كان ناقصا .. إن الناس ليسوا أرقاما ولإرادتهم ولعواطفهم دخل فى تطورهم المحتوم .. إن الناس ليسوا آحادا وعشرات لا تملك إلا أن تتكاثر وتتناقض وتصنع التاريخ بحركتها ، ولكن الناس زهرات الحياة اليانعات فيهم أرق ما أبدعته الحياة من إحساس ، وأثمن ما استطاع التاريخ أن يضيفه على البشر من عواطف ، وإن الإنسان يمضى فى الحياة وحوله هالة من أحاسيسه وعواطفه وأفكاره لها قدسيتها ولها هى الأخرى قوانين ووجود . وكأنما كان ينقص حمزة أن يحب وأن يمضى وفوزية بجواره فى ظلام الدقى ليحس بها كالينبوع الفياض الذى يغذيه بالهام جديد يرى على ضوئه الناس وأعماقهم ، ويرى ما فى أعماقهم من نيل وجمال ، ويرى فى بدير بذور الإنسانية التى كان عليه أن يتعهدها ويروبها ..

وسألته فوزية وهو يلمح السؤال يلح عليها:

ـــ ماله بدير ؟ إتجنن .

\_ لا .. حبك .

\_ حبنی ؟ حبنی إزای ؟

ــدا مشحبك وبس، دا بيغار عليك كان، وعشان كده طردنا .. هو انت حد يشوفك إلا إما بحبك ؟

ـــ غريبة ! يمكن .. أنا كنت حاسة إن نظرته لى مش عادية أبـــدا . وبعدين ..

ـــولا قبلين .. بدير كويس بس دى حاجة عارضة .. أنا حسيبه لما يبرد شوية وبعدين أبدأ أتصل به تاني .. الحقيقة أنا اللي غلطان مش بدير .

ــ ودلوقتي رايحين فين ؟

۔ أعرف شوية ناس .. حنجرب .. معاكى فلوس لحسن حناخـــد تاكسيات كثير .

- \_ تروحي انت بقى .
- \_ أروح إزاى ؟ أنا معاك لغاية أما أشوف حتروح فين .
  - \_ الساعة ستة ونص دلوقتي .
    - \_ انشا الله تكون اتناشر.

وكانما كانت هناك مؤامرة متفق عليها .. الطالب الذى يعرفه فى الجيزة مش موجود ، وعلى الباز لا أحد يعرفه فى العنوان الذى ذكره له ، وقريبته الساكنة فى شارع خلوصى وجدزوجها جاء من السفر وظهر رفضها واضحا فى عينيها ، وكان التاكسى لا يزال حائرا بهما كنحلة ضلت طريقها إلى خليتها .. وشوارع القاهرة نهار وحاراتها فجر وأزقتها ليل بهيم .

والأحياء كثيرة شبرا وعابدين والسيدة ومصر القديمة والأزهر وطولون وشارع فؤاد والدرب الأحمر .. وينايات ضخمة ، خمسة أدوار وعشرة وعشرين ، ومئات الآلاف من النوافذ وآلاف من الأبواب والبوابين ، وعمارات نام سكانها وعمارات لم تنم وعمارات لا تنام ، ورواد سينات ورواد شوارع وفسح وكباريهات ، وملابس سهرات ، وما بعد ظهر ، وبدل وأصواف ومعاطف ، وفساتين فاقعة الألوان ، ونساء جميلات في فتارين من البودرة والروج قد تقمصتهن فوريرات تعالب ودببه ، ويمكن نمور وأسود . وإشارات مرور حمراء وخضراء وصفراء ، وأنوار نيون بكـــل الألوان ، وعمال نظافة وعمال بلا نظافة ، وعساكر سود وبيض على عجلات وعربیات و داوریات ، ومبانی بنوك هائلات ترقد ثابتات كأحدث أهرامات الأهلى ومصر والكريدى ليونيه والأمة العربية وبنك المستعمرات . وما وراء البحار ، وخواجات وأروام وجريج ومن كل ملة ولون ، وجامعي . أعقاب وأصحاب عربات وشحاذين ، وأناس ينتهي يومهم وأناس بيدءون اليوم ، وأموات وأطفال يولدون ، وراديو يذيع آخر الأنباء وبرقيات

ومواعيد ، وأسعار تهوى وأسعار ترتفع ، وأناس يهوون ويرتفعون بلا أسعار ، وخمور تخلط وحشيش ، وعمليات اصطياد وصفقات ، ومشاورات لتأليف الوزارة ، وحناطير تنتظر وكاديلاك وتاكسيات تتجمع في أكوام كالذباب كلما بصق مكان رواده ، وسواقين يتشاتمون ويمسون ويهزرون ، وهؤلاء جميعا لهم مكان يأوون إليه وأمكنة لا يأوون إليها ولاحتى يعرفونها ، وفوزية وحمزة يتسللان وسط هذا كله يحتميان من الظلام بسواده ومن النور بالعربات .

ورهيب ذلك الإحساس الذي يعترى الإنسان حين يرى هذا كله ويعيش داخله ، وهو مدرك أن لا مكان له فيه ..

## وحمزة يسأل:

- ــ طب والعفش يا فوزية حنجيبه منين ؟
- \_ مش مشكلة .. حاخد أودة النوم بتاعة أمى .
  - \_ حتقولي لبوكي إمتى ؟
  - ــ الليلة .. ضرورى حيوافق .
  - \_ حتى لو عرف أن أبو يا عسكرى دريسه.
    - \_ عسكرى إيه ؟
      - ــ دريسه .
      - \_ دريسه إيه ؟
    - \_ عامل بيصلح سكك الحديد .
      - \_ أبوك عامل ؟
        - ـــ أيوه .
      - \_ يعنى من صميم الشعب ؟
        - ـــ أيوه .

- \_ يعيش أبوك .
- \_ تعیشی انت .. تفتکری أبوکی حیوافق ؟
- \_\_أظن كده .. مش عارفه .. بالكثير حيمط بوزه ويقول : انت حرة .. دا مستقبلك اتصرفي فيه .
  - ــ يعنى مش حايرفض ؟
    - \_\_ مش ممكن يرفض.
      - \_ يعيش أبوكي .
- ــ وبعدين .. الدنيا دى كلها ومش لاقيين مكان نبات فيه الليلة بس!
  - \_ لازم حنلقى .
  - \_ يعنى بالعافية حنلفى ؟
- \_ أيوه بالعافية .. أنا متفائل ومـع ذلك مش مصدق إننـا خــلاص حنتجوز .
  - \_ اعتبر الموضوع ده منتهي .
    - \_ دا لسه ما ابتدأش.
  - \_ دا انتهى من أول يوم شفتك فيه وايديك فيها جاز في الخيمة .
- \_\_وحيبقى لينا ليلة دخله ؟ تعرفى ليلتها حا اعمل إيه ؟ حاقفل الباب ورايا واقول :
  - ـــ يا زميلة فوزية حنتناقش .. ماتتكسفيش .
    - ــ يا جدع انكسف انت .
      - \_ احنا لسه قفلنا الباب ؟
    - ــ هس .. الراجل ده باين عليه مخبر .
      - ــ مش باین .
      - \_\_ أنا أراهن .

\_\_ لو حتى بالك كنتى عرفتى إنه مش مخبر .. لأنه أولا ماشى فى وسط الشارع وماشى يتلفت .. وباين عليه بيدور على حاجة .. أهو لقاها .. ووقف يستنى الأتوبيس .. وأهوه ركب .

- \_ دا أنا غبية قوى .
- ــ لا .. يمكن جديدة .
  - \_ وحا اتقدم ؟
  - \_م .. م منظور .
- \_ تعرف إنك لذيذ .. أناكل دقيقة باكتشف فيك حاجات تتحب .
  - \_ وأناكل دقيقة يا أحس بالتغيير اللي عملتيه في نفسي .
    - \_ أنا عملت تغيير ؟
      - \_ كثير ..
      - \_ مثلا ..

- مثلا .. كنت واخد الكفاح بشكل بطولى .. كنت فاهم إنى يا اضحى عشان الناس فلازم يحبونى ويفردولى مكانه كأنى مسيح ، فاهمانى ازاى ؟ ودلوقتى شعرت بقضيتنا كبيرة وبدورى فيها متواضع ، وكل ماباشوف ظلم ياشعر إن اللى يا أعمله مهما كان قليل .. مثل تانى .. كنت حاسس بالغربة وإنى صحيح بقوم بدورى اللى بيخدم الناس ، إنما كنت بعيد عنهم .. إنت خلتينى أشعر بأتى ارتبطت بالمجتمع ارتباط وثيق .. إنى بقيت منه .. إننا كلنا عيلة ، فاهمانى إزاى ؟ أنا وانت اندمجنا فى كل الناس وأصبح تعدادنا بالمليون . أنا وأنا ببص للناس حاسس كده .. شايف دول اللى مروحين واللى جابين ، واللى راكبين على العربية الكارو دى ، والمتشعبطين على السلم ، واللى قاعدين ع القهوة دول ؟ دول شعبنا .. شايفاه إزاى مضروب ومبعثر ؟ أنا حاسس دلوقتى إنى با أحبه أكثر وإنى عايز أفنسى مضروب ومبعثر ؟ أنا حاسس دلوقتى إنى با أحبه أكثر وإنى عايز أفنسى

علشانه ، وحاسس أكتر بحاجته للقائد اللي يلمه ويوصل بيه زى ما بتقولى للحب ولبكره ، فاهماني إزاى ؟

\_ تعرف الكلام ده على لسانى كنت عايزه أقوله .. تعرف أنا اكتشفت اكتشاف خطير !

\_\_ إيه ؟

ـــ أنا مابقتش فوزية .. أنا بقيت فوزية وحمزة .

\_ وتعرفي أنا اكتشفت اكتشاف خطير!

\_ إيه ؟

\_ أنا مش حا اتجوزك بس ، دا أنا حا اتجوز بيكى المجتمع ، فاهمانى إزاى ؟ \_ أنا مش حا اتجوزك بس ، دا أنا حا اتجوز بيكى المجتمع ، فاهمانى إزاى ؟ \_ أنا بيتهيأ لى إن كل كلمة من كلامك ده بتخلينى أحبك أكثر من الأول .

\_احنا يا فوزية فى كل لحظة حبنا بينمو .. لأنه جزء من حبنا الكبير للناس والقيم الإنسانية ، والناس بتتحرك وتتطور .. وهو برضه النهارده مولـود وباستمرار راح يكبر ..

\_ ولما تتجوز ؟

ــ حاييقي شباب .. في عز شبابه .

\_ انت الليلة دى رائع .

\_ أنا شاعر بقوة جديدة .. بطاقة من النشاط بتسرى في تفكيرى ونفسى و تكويني .. دلوقتي حاسس بعمق أن بلدنا بلدنا فعلا ، والناس دول ناسنا ، وإننا لازم نعيش .

والليل يمضى لا يحفل بالمدينة ، والمدينة تحيا غير حافلة بالليل ، بناياتها الكبيرة تبدو صغيرة وبيوتها عشش نمل وشوارعها أضيق من ثقوب الابرة ، والناس كثيرون كثيرون .. وفوزية بجوار حمزة وفى كيانه ، وذراعها حول

ذراعه ، وصدرها قریب من صدره ، وفی عینیها بریق وتحد والعیون کثیرة ، والخطر فی کل خطوة .

وفى مكان من شارع الملكة ، والعربات طائرة كالريح والأسفلت يمتد طويلا أسود يلمع بضوء المصابيح المنمقة الموضوعة على جانبيه ، خطر له خاطر فتوقف فى الحال وقال :

ـــأما احنا مسطولين صحيح . ما أروح عند صاحبتك دى اللي قلتي إنها مستعدة تخبى ناس .. اسمها إيه .. ما .. قولى معايا .

فأجابت وهي تضحك:

ــ ما فيش داعى تتذكر اسمها .

**... ليه ؟** 

ـــ لأنها موجودة هنا بس .

قالت هذا وهي تشير إلى رأسها .

ومن شارع الملكة إلى السكاكيني وإبراهيم باشا والعتبة مرة أخرى ، ولا أمل ولا شروع في أمل ، وفي شارع عبد العزيز قرر حمزة أن يذهب إلى حجرته في المبتديان ويقضى فيها الليلة . هناك خطر ولكن ليس هناك مفر .

ووقف فى الظلام المجاور لدار العلوم وأرسلها تستكشف . وعادت إليه بعد قليل مسرعة قائلة إنها رأت أربعة لا بد أن يكون أحدهم بخبرا .

وابتعدا بسرعة عن المنطقة كلها عن طريق شارع الفلكي وكان ما معهما من نقود قد انتهى ، فاقترض حمزة من نقود السلاح التي معه على أن يسددها حين يحصل على مرتبه عن نصف الشهر الذي انقضى . وسأل فوزية أن تذكره أن يكتب لها توكيلا لتذهب وتصرف المرتب من مقر شركة الحرير . وكان حمزة قد قررر أن يحاول مرة أخرى مع قريبته التي في شبرا ويقضى عندها الليلة بالعافية أو بالرزالة وليكن ما يكون ، ولكن قريبا من باب اللوق قطع

حديثه الساخط وسألها:

\_\_ مش ده سعد ؟

\_ آه .. هو صحيح .

كان سعد مقبلا من بعيد هو وثلاثة شبان آخرين ، وكان واضحا جدا بينهم بقصره واصفراره ونحافته ، وكان يرتدى هذه المرة بدلة كحلية أنيقة ويضع منديلا أبيض في جيب سترته الأعلى .

وتفتحت أمام حمزة أبواب الأمل على سعتها إذ لابد أن يكون لديه مكان ، بل لا بد أنه على صلة ما باللجنة وممكن أن يعيد اتصاله . وطلب من فوزية أن تنتظره ثم أسرع ناحية سعد وزملائه ونادى عليه . و لم يسمع إذ كان الأربعة في تلك اللحظة منخرطين في قهقهة عالية تفرفوا على أثرها في أرجاء الشارع يضحكون . ثم عادوا يتجمعون . وقبل أن يصل إليهم حمزة كانوا قد توجهوا إلى عربة ﴿ فيات ﴾ واقفة على الرصيف المقابل لمحطة باب اللوق و دخل الثلاثة فيها . وقبل أن يدخل سعد كان حمزة أدركه وأمسك بكوعه ، والتفت سعد وامتلاً وجهه بدهشة واسعة الأطراف وقال :

\_ هاللو .. هاللو .. حمزة .. انت فين ؟

وعانقه عناقا حارا وقبله على جانبي رقبته ، وسأله حمزة :

\_ انت فين يا راجل ؟ بقى كده ما تجيش في الميعاد .

\_ أبدا مش صحيح .. دا ما حصلشى أبدا .. بالشرف رحتلك يومها قبل الميعاد بربع ساعة وفضلت واقف بعده بيجى نص ساعة لما نشفت من البرد .. بشرفى انى رحت ، وبالأمارة ..

\_ طيب بالأمارة الميعاد كان فين ؟

واحتار سعد وقلب رأسه وقد تزمتت ملامحه يمينا ويسارا وفوقا وتحتا ، وعوجها مرات ثم قال : آه آل .. طبعا .. كان عند قصر النيل .. أيوه بالضبط عند قصر النيل .. لأ .. أنا في حكاية المواعيد دى ظبط قوى . وابتسم حمزة وقال له :

\_ طیب و إیه رأیك إن ماكانشي فیه بینا أي مواعید أبدا .

وتوقع منه حمزة أن يضحك أو يقهقه ولكنه عقد جبهته قليلا ثم قال:

\_ أبدا .. شوف .. شوف انت ناسي إزاى بقى .. شوف مين اللي مابيجيش في المواعيد وينساها .. عرفت بقى .. عرفت ..

وقاطعه حمزة .. قائلا :

\_ أنا مختفى يا سعد وعايز مكان الليلة لأن فيه ظروف خلتنى أسيب المكان اللي كنت فيه .

\_\_ مختفى ؟

ـــ أيوه هربان ، فاهمني ازاى ؟

\_ هربان!

ــ ما عندکشی مکان ؟

ـــطیب و هربان لیه یا حمزة .. مش کویس کده . ما افتکرشی فیه داعی لهروبك .. ما افتکرشی حد یعرف عنك حاجة .. مافیش داعی أبدا .

\_ اسمع يا سعد . . مفيش داعى انت تضيع الوقت ، أنا لا بد عايز مكان دلوقت حالا . . فإيه رأيك ؟ دلوقت حالا . . فإيه رأيك ؟

وقبل أن يجيب سعد تصاعد صوت أنثوى من داخل العربة يقول:

ـــ يالله يا سعد .. يالله يا سونه اتأخرنا .

ـــ جى .. جى يافتفت .. جى بسرعة .. بس فيه حاجة مهمة .. جى .. ثم التفت لحمزة وقال :

ـــ بس مكان إيه يا حمزة .. مكان فين ؟ أصل دول جماعة قرايبــى ومدعوين .. أيوه مدعوين في فرح .. فرح ابن خالي .. زميلي في المدرسة دا كان عفريت قوى معرفشي إيه اللي خلاه يجوز .

وهنا سمع سعد و حمزة صوتا أنثويا قبيحا صادرا من أنف و حلق و احدة من داخل العربة ، و احمر و جه سعد الأصفر جدا .. و ثنى جذعه مرة أخرى وصاح فى غضب :

\_ إيه قلة الأدب دى .. دا مش كلام .. مش أصول كده يا خوانا .. مش طريقة .

وقوطع سعد بصوت مماثل يرد عليه ، وهذه المرة كان صادرا عن شاب ، وهنا ابتلت حمرة وجهه بقطرات من العرق ثم قال لحمزة :

فأجاب في صوت منخفض:

\_ والله يا حمزة انت عارف أنا ساكن مع أهلى .. ومش عارف أعمل إيه .. مشكلة غريبة .. طب مش تقوللى من يومين ثلاثة مثلا كنت عرفت أتصرف . كنت عرفت أعمل حاجة .. لا مؤاخذة يا حمزة .. باردون .. قال سعد هذا وابتسم ابتسامة واسعة جدا ومفاجئة تشبه الضحكة ، ثم انقض على أذن حمزة في التو بابتسامته تلك وهمس :

\_ أصل الليلة عقبال عندك زى ما انت شايف فيه شغل عاجل قوى . واقشعر جسد حمزة ، ولم يكن ذلك لهمسة سعد وإنما لإحساس غامر هبط عليه فى تلك اللحظة .. الإحساس بالحذر ، الإحساس بالموجة الصاعدة وهى تببط و تتلاشى ، ثم يبدأ التراجع الذى يسحب معه كل ما كان عائما فوق الماء ، وكل الفقاقيع ، وكل ما ليس له جذور .. الإحساس بأنه واقف على شاطئ رملى والماء يتسرب تسربا خفيا وينسحب عائدا إلى البحر ويسحب معه رمالا كثيرة ولا يتبقى إلا ما تحت قدميه فقط .

ووجد سعد يقول:

\_وانت فین یا حمزة ، فین أراضیك ؟ ابقی خلینا نشوفك یا أخی ، لازم نشوفك . دا ولا كأننا كنا نعرف بعض ، دى مش أصول أبدا ، كلام فارغ .

ولم يصدق حمزة أن كلاما كهذا ممكن أن يختم عاما طويلا من اللقاءات والاجتماعات والمعارك .

وكان يود أن يهب فى وجهه سابا لا عنا مذكرا إياه بماكان ، وبمنابر كلية الحقوق التى ارتجت بخطبه ، وبما ظل يقوم به من كفاح إلى أسابيع قليلة مضت .

ولكن الظروف لم تك تسمح ، ثم أن حمزة نفسه كان في تلك اللحظة يملؤه الشعور القوى بالحاجة لا إلى سعد \_ ولكن إلى أو تاد حديدية تحمى ما فوق الشاطئ من الجذر المنسحب .

وقال له حمزة أخيرا:

\_ انت مش مكسوف من نفسك ؟ بقى انت ما تقدرشى تشوفلى مكان الليلة بس .

ـــانت عارف یا حمزة انت مش غریب . ماعندیش أی فكرة . لو كنت قلتلی . . لو أی حاجة تانیة ممكن أعملها أنا مستعد أی حاجة ، بشرفی أی حاجة تانیة . . أیوه ما قلتلك جی یافتفت قلتلك جی . . إیه ده ؟ دا مش كلام . . عن إذنك بقی . . أوریفوار . . أوریفوار یا حمزة . . خلینا نشوفك . و كان حریا بحمزة أن یستسلم لما ألم به من اشمئزاز ، ولكنه ناضل و سعد يهم بركوب العربة و قال :

\_ طیب .. ونشوفك ازای یا سعد ؟

فأجاب سعد ورأسه داخل العربة وجسده خارجها:

\_ أنا بقعد على قهوة ماتاتيا فى العتبة .. هناك شلة بلعب معاها شطرنج .. إبقى خلينا نشوفك .. أوريفوار .

ومضت العربة وفيها ضحكات وبقايا أصوات الحلوق.

وعاد حمزة إلى فوزية وما حدث كان مرتسما بكل تفاصيله على وجهه ، فلم تكن ثمة حاجة للإضافة خاصة وأن فوزية قالت له :

\_ أنا لمحت بنتين في العربية .

فغمغم حمزة و لم يجب.

كان قد قرر أن يذهب إلى قريبته فى شارع خلوصى . ونادى على تاكسى وقد تهيأ لتنفيذ القرار .

لقد عرض نفسه منذ خروجه من بيت بدير إلى مئات الفرص التي كان يكن أن يراه فيها رجال البوليس السياسي ، وهو ليس غريبا عنهم فصورته يعرفها معظم المخبرين ، وقد قضى سنوات يعتقل ويراقب ويحجز ويتحرى عنه . كان لا بدإذن من الذهاب إلى شبرا ، وقالت فوزية وهو يهم بالصعود : \_\_ يا أخى ما بلاش عناد وتيجى عندنا .

\_ قلتلك يا فوزية ميت مرة مش ممكن .. أولا مفيش مكان عندكو ليه .. ثانيا حتى لو فيه مكان ما أرضاش .. أنا لأن ده وضع مش طبيعى أبدا وحيكون صدمة كبيرة على أبوكى ، ثالثا حتى لو كنت مجوزك فبتكو فى شارع خيرت جنب وزارة الداخلية على طول ، فاهمانى ازاى ؟

إطلع من فضلك يا أسطى على شبرا.

وماً كاد حمزة يستقر في العربة حتى انتصب أمامه فجأة شبح سيد .. فأشرق وجهه بفرحة غير عادية وقال :

ــ بس وجدتها .. وجدتها .

- ـــ هي إيه اللي وجدتها ؟
- -- خلاص .. اتحلت المشكلة .. لا بد سيد يعرف مكان أو حتى أنام معاه .
  - \_ سيد مين ؟
  - ـــ حقولك دلوقتي .

ونظر حمزة في ساعته ، وكان يخيل إليه أنها على الأقل تعدت الحادية عشرة من كثرة ما لف ودار ، وفوجئ بها لا تكاد تتعدى التاسعة والنصف إلا ببضع دقائق . ومع هذا خاب أمله وغامت ملامحه في الحال . إذ هو يستطيع العثور على سيد في النهار فقط أثناء عمله في الجبانة أما في الليل فأين يعثر عليه ؟ ومرة أخرى أشرقت ملامحه وقال في فرح صبياني :

- و مره الحرى اسرفت مارحه وهان في فرح صبياني . ــ عند باب الوزير تقول فين عمى سماعين أبو دومة .. ألف من يدلك .
  - فتشبثت فوزية بذراعه قائلة :
  - \_ إيه .. مالك يا حمزة ؟ إنت اتهبلت ؟
- ۔ لا .. أبدا ، أكيد أبو دومة عارف مكان سيد وح يدلنا عليه .. فرجت .. ضاقت فلما استحكمت حلقاتها فرجت .. وكـنت أظنها لا تفرج .
  - ــ إيه أبو دومة وسيد والشعر ده ؟
- ـــ دلوقتی حتعرفی کل حاجة .. یا أسطی من فضلك اطلع بینا علی باب الوزیر .

وقبل أن تصل العربة إلى الميدان قال لها:

ــ أظن بقى تسيبينى هنا وتروحى ، فاهمانى ازاى ؟ ودقت فوزية أرض العربة بقدمها كالطفل الغاضب وقالت :

ـــقلتلك مش مروحة ، انشاالله أبات أنا وانت وقفين فى الشارع .. لازم أشوفك حترسي على إيه .

وأوقف حمزة العربة وحاسب السائق ، ثم طلب منها أن تنتظره على محطة أتوبيس ١٩ إذ أن منظرهما معا قد يسترعى الانتباه فى حى الأغراب فيه قليلون .

ومضى وحده .. وأصبح فى باب الوزير وقال فى سره : يا سلام على العظمة ! تقف عند باب الوزير وتقول فين أبو دومة ؟ تقولشى ابن طولون . طب فين أبو دومة .. هو معقول حد يعرفه ؟

وكان الميدان الضيق قد خفت فيه حركة الناس ، لا يبقيه ساهرا إلا القهاوى التي تحده من كل الجهات والناس القليلون الماشون قد كورهم البرد على أنفسهم ومضوا يتدحرجون في صمت شتوى حزين إلى مضاجعهم .

و حمزة له خبرة فى السؤال لا تجارى من كثرة ما سأل عن ناس وأشخاص ، ولهذا جاب الميدان كله قبل أن تختار عيناه ( جرسون ) قهوة أنوارها قليلة وتقع فى طرف الميدان . وبعد مساء الخير والذى منه سأله عن اسماعين أبو دومة ، وهز الرجل رأسه وكأنه ينفى عن نفسه تهمة . وسأل ثانيا وثالثا ورابعا و لا أحد عمره سمع عن اسم كهذا . وكانت الناس وهو يسألها تنظر إليه باستغراب ، لهذا كان من الواجب إنهاء كل شيء ومغادرة الحي قبل فه ات الأوان .

وكاد حمزة ييأس لولا أنه رأى رجلا جالسا على أحد القهاوى وأحس من منظره أنه ممكن جدا أن يكون حانوتيا . و ذهب إليه مباشرة وساله ، وأنزل الرجل ساقه التي كانت موضوعة فوق الأخرى ونفى و تأسف ، ولكن يبدو ( جمهورية فرحات )

أن أحد الجالسين بجواره كان قد استمع للسؤال ، إذ بعدما استدار حمزة نادى عليه وقال :

> \_ حضرتك عايز اسماعين أبو دومة مين ؟ مش بتاع الجبانة ؟ \_ أيوه تمام .

ـــآه .. دا بيقعد عند بتاع عصير القصب قريب هنهه .. تمشى من هنا كده على طول لغاية عامود النور اللى هناك ده .. الدكان على إيدك اليمين على طول .

ومشى حمزة حسب الوصف وانتعاشة أمل تشجعه ، و لم يكن في كلام الرجل أية مبالغة فقد وجده حمزة هناك جالسا على دكة خارج الدكان بنفس جلبابه الصوف البنى وعمامته وشاربه المشوش الذى يلتوى عند طرفيه فيبدو كقرنى ثور .

\_ السلام عليكم .

\_ وعليكم السلام ورحمة الله وبركاته .

قالها الرجل وهو يمد فمه إلى • غابة جوزة • كان آخر يمسكها .

وانتظر حمزة حتى شد أبو دومة ما طاب له الشد فى نفس واحد وساً له وهو يغالب ابتسامة كان يريد إيقاف تنفيذها :

\_ ما تعرفشي والله سيد اللي بيشتغل في الجبانة فين ؟

وكان أبو دومة في هذه الأثناء يخرج دخان النفس .. أخرج ملء مدخنة من فمه ثم انتظر قليلا وأخرج من أنفه ماسورتين رفيعتين كثيفتين لون دخانهما كلون البخار ، حتى خيل لحمزة أنه سيصفر بعد هذا ويتحرك .

وقال أبو دومة فى أدب ولا تزال سحابة الدخان قائمة ، ولا تزال بقايا الدخان تخرج مع الكلمات :

\_ سيدمين ؟ ما هو لا مؤاخذة ف دى الكلمة فيه سيدين .. سيد شطا

وسيد محمد إبراهيم .. الله ! حمدالله على السلامة يا بيه .. يا ألف مرحب .. أصل لا مؤاخذة ما تأخذنيش .. الدنيا ليل والعتب ع النظر . يا ألف مرحب ! ده نور إيه ده ؟ حمدالله على السلامة .

وكان قد قام واقفا وسلم على حمزة وشد على يده .. وأكمل و لا تزال يده في يد حمزة :

\_ والله يا بيه إن جنابك ابن حلال .. أنا كنت لسه فى سيرتك من شوية .. ألف حمدالله على السلامة .

وكان حمزة ينظر إلى الرجل وترحيبه ووجهه الجاف الأسمر الخشن الذى جمده البرد، وذقنه النابتة وشاربه .. وعينه الحولاء التي يخيل للإنسان أنها ليست في محجرها كالعين الأخرى وإنما موضوعة بطريقة ما فوق طرف شاربه وكأنها الكرة الأرضية التي تدور ويحملها قرن الثور .. كان حمزة ينظر وهو يراقب فم الرجل الواسع يتفتح عن الكلمات المصرية الحلوة التي صنعتها إنسانية شعب عريق .. الكلمات التي قد لا تصفى على الربع ولكنها رائعة في نفسها وكأنها رسل محملة بالدفء والسلام . كان قد أمضى ساعات طويلة وهو غريب بين مصريين ، مبعثر مشتت في الأزقة والحوارى ، فكأن للكلمة الواحدة التي فيها نبض من ترحيب أو احتفال فعل السحر ، فما باله وهو يرى في وجه الرجل فرحة حقيقية بلقائه و ترحيبا به أيما ترحيب ؟

وقال حمزة وهو منفعل:

\_ الله يسلمك يا عم اسماعين .. والله إنك وحشتنى قـوى .. إنت وسيد .. هو فين أمال ؟

فرد أبو دومة ولا تزال يده في يد حمزة:

\_ إنت مادريتشي حصل إيه .

وسقط قلب حمزة فجأة وسأله بلهفة:

ــ مش الواد يسيبنا هنا كده وحنا كناع الخير والشر سوا ويروح يشتغل في الوابور . الله يخزى شيطانه البعيد . طب تصدق بإيه ؟ والله إن سيد محمد إبراهيم ده جانى زى ما جيتنى جنابك كده من كام شهر .. سلام عليكم يا عم سماعين .. قلت له سلام ورحمة الله وبركانه .. قاللى عايز آكل عيش .. قلت له والنبى إن ما أكلتك بإذن الله فطير ما أبقى سماعين أبو دومه .

ــ والوابور دا فين يا عم اسماعين ؟

ـــ أنت من غير مؤاخذة رحتش سجن مصر.

\_ ليه يا عم اسماعين ؟

\_ أهو بيشتغل في الوابور اللي وراه على طول .. يعنى من غير مؤاخذة تخش السجن كده يبقى هو على يمينك على طول .

\_\_ وقاعد فين امال ؟

ــ حد عارف له حته .. أهو مطرح ما بييجى عليه الليل بينام .. باينه بيبات في الوابور .. باينه بيروح عند قرايبه محدش عارف .. حمد الله على السلامة يا سعادة البيه .. أنا وسيد واحد .. كلنا أخوات .. أنا والله سيد ده كنت أعزه زى الأسطى حوده تمام .

\_ الأسطى حوده مين ؟

\_ إبنى لا مؤاخذه .. أنا وسيد مفيش فرق .. هو كويس كويس إنما لا مؤاخذه أصل شغلنا ده عايز صبر وطولة بال . ليه ؟ يوم فيه وعشرة مافيش .. واللي بيروح أكتر من اللي بييجي . وسيد مالوش خلق .. نفسه ضيق .. ما يقدرشي يستحمل ، ما يستحملهاش إلا اللي زينا كده واخدين ع الشقى .. ألف حمدالله على السلامة .. أنا وسيد واحد .. كلنا اخوات .

وكان حمزة فى ذلك الوقت يختنق فى واد ضيق فقد انهارت فجأة آمال رحلة طويلة عريضة .. والعمل ؟

\_ لا .. أبدا يا عم سماعين .

\_ ولا يهمك .. والله من يوم مامشيت من هنا وأنا مشغول عليك وعلى الأسمنت .

<u>\_\_ إيه ؟</u>

\_ إزى الأسمنت ؟

ودارت رأس حمزة دورات كثيرة قبل أن تستقر على ما يقوله أبو دومه .

\_ كيف عرف ؟

\_ هل أخبره سيد ؟ وكيف يمكن أن يسكت أبو دومه عن شيء كهذا وهو لا يحتمل السكوت !

\_ أسمنت إيه يا عم اسماعين ؟

ـــ إبيه ..

قالها أبو دومه وهو يلوى رقبته ويضم ذقنه إلى صدره كمن يقول : إطلع من دول .

وخاف حمزة أن يستطرد الرجل في الكلام أمام صاحب المحل والرجل الآخر الذي كان ممسكا بالجوزة . فاستأذن منهما وأخذ أبو دومه على ناحية وأعاد سؤاله ، فإذا به يعرف من المرة الماضية أنه كان حاضرا الأخذ الديناميت وأنه ليس بطالب طب ولا دكتور .

واستغرب وذهل ، الرجل يعرف كل شيء ومع هذا تظاهر بالعبط كل هذا التظاهر وسأله :

\_ وانت عارف كنا بنعمل بيه إيه ده يا عم اسماعين ؟

\_ إلا عارف .. هو أنا عيل يا سعادة البيه ؟ بتعملوا بيه إيه ؟ مش من غير مؤاخذة كده بالمفتشر بتموتوابيه الانجليز . أنا ياما شفت وياما رأيت يا سعادة البيه .. إنت جنابك فاكرني شوية .. هو تفتكر إن فيه حاجة تبقى في جبانة باب الوزير وما اعرفهاش ؟ دانا ما بقاش سماعين أبو دومه .. دانا عارف كل طوبة هنا .. وكل شقفة هنا خابزها وعاجنها .. إنما صوابعك مش زى بعضها .. فيه ناس تبقى مش عارفه حاجة وتتكلم وفيه ناس تبقى عارفه كل حاجة وتسكت . طب تصدق بالله ؟ قول لا إله إلا الله .. قول .. تصدق بالله ؟ أنا سنة سعد باشا جم الانجليز يفتشوا الترب فرحت قايل لاتنين منهم : جرج « جورج » جرج .. وانت زجزج جرج ، بری کود .. وانت بری كود .. زجزج كويس كتير .. وشاورتلهم راحوا ماشيين ورايا .. ورحت واخدهملك عند السبيل وقلت يا سيد يا رفاعي مدد .. حاكم دول تعابين فلازم الواحد يستعين عليهم بسيدنا الرفاعي . وكان في إيدي زقلة رحت عاينها وطاخ طيخ طاخ طيخ وينزلوا الاتنين ساكتين ، ورحتلك خافي رمتهم ولا حد شاف ولا حد دری .. وياما وياما بس الواحد أصله ما بيرضاش

وهنا كان حمزة قد قرر أمرا فقال :

\_\_ اسمع ياعم سماعين ..

ـــ أيوه يا سعادة البيه .. أنا وسيد واحد وزمتي وديني .

\_ مش عارف حته أقعد فيها يوم والا اتنين ؟

ــ عايز بقى من غير مؤاخذة شقة والا أوضة ؟

- \_ أنا مش عايز أوض وشقق ، فاهمني إزاى ؟
- ــ فاهمك إزاى إيه ؟ أنا فاهم قوى يا سعادة البيه .
- ــ أولا بلاش سعادة البيه .. دى أنا اسمى .. اسمى حمزة .
- ــــ أهلا وسهلا .. ألف مرحبة يا سى حمزة افندى .. باب الوزير نور والله .
- ـــــإنت مش فاهم ياعم اسماعين .. أنا مش عايز أوضة والاشقة .. أنا عايز حتة بعيد عن الناس .
- ـــ تبقى من غير مؤاخذة بقى تروح الدراسة .. هناك حاجات زى طلبك كده كثير .
- \_ أصل يا عم اسماعين المسألة إن دلوقت الحكومة بتمسك الناس اللى كانوا بيضربوا الانجليز .. ودلوقت بتدور على .. فأنا عايز استخبى فى مكان مايشوفنيش حد فيه .. تعرفشى حاجة زى كده ؟
- \_ إلا آعرفشى حاجة ؟ وده اسمه كلام يا سى الأفندى ؟ بقى عمك سماعين أبو دومه ما يعرفشى بخبيك .. يا سلام .. أى خدمة يا سعادة البيه .. أى خدمة .. بس كده ؟
  - \_ تعرف صحيح ياعم سماعين ؟

وكان حمزة يسمع كلام الرجل ولا يفكر فيه ، فعقله كان قد عاد يستأنف البحث في ذاكرته عن مكان إذ كان واضحا أن كلام أبو دومه تهويش ونتش ليس إلا .. ولذلك سأله وهو يبتسم في مرارة عسى أن يرفه عن نفسه بالسماع :

\_ فین یاعم سماعین ؟

وسكت أبو دومه ، وازدادت ابتسامة حمزة وهو يرى الرجل قد وقع فى المأزق ووضع أصبعه على صدغه وراح يفكر . وأخيرا رفع رأسه وتهلل وجهه وقال :

\_ أعرف لوكاندة .

فرد حمزة مباشرة:

\_ لوكاندة إيه يا عم اسماعين ؟ مقدرشي أروح أى لوكاندة .. كلهم مراقبين .

ودعا أبو دومه إلى وضعه التفكيرى ، وفكر حمزة أن يسلم عليه ويمضى ولكنه لمحه يهز رأسه باستنكار ، وتهتز طاقيته الصوف التي تعمم عليها وهو يقول :

- ـــ بس حترضي تروح هناك يا سعادة البيه ؟ مش معقول .
  - ـــ معقول قوى .. أرضى قوى .. فى أى حتة .. فين ؟
    - \_ هناك في الملك ده .
      - \_ هناك فين ؟
    - ـــ في أي حوش من الأحواش بنوع الجبانة .

وضرب حمزة الفكرة في عقله وخرج بنتيجة مدهشة فقال:

ـــ قوی .. قوی .. أرضی قوی .. أنا عایز أی حتة ، فاهمنی ازای ؟ ـــ فاهمك ازای !

\_ لا مؤاخذة يا عم اسماعين أنا بقولها كده بس \_ صحيح ممكن أقعد هناك .. دانا أروح قوى .

\_ تحب يقى جنابك حوش مطرحين وصالة والاحوش مطرح واحد ؟ أؤمر .. أى خدمة ؟

\_ انت بتتكلم جد ياعم سماعين .

وظهرت غضبة لينة على وجه الرجل وقال:

ـــ إنت مش واسك ( واثق ) في ياسي حمزة أفندى ؟ عيب ولا مؤاخذه يبقى شنبى على مره .. دانا مره واحد قاللى انت كذاب فحطيت صباعى فى عينه و خدته الإسعاف يومها وبقت حكاية .. هو أنا عيل لا مؤاخذه ؟ أما أبو دومه يقول كلمة تبقى هى الكلمة .. طب والله نظير كلامك ده لمقعدك فى مدفن داود باشا نفسه .. اتفضل .. ما تتفضل يا سعادة البيه .. اتفضل نوصل للبيت بس .. أصل المدفن مقفول يقفل .. قافلينه اصحابه .. ح

وانطلق أبو دومه فى حماس بالغ ، ومضى حمزة وراءه وهو يكاد يضحك إذ من المجنون الذى يصدق أبو دومه ؟ ولكن الرجل واصل سيره حتى بلغا الميدان فهز حمزة كتفيه كمن يقول لنفسه : خليك مع الكذاب . واتفق مع الرجل على أن ينتظره عند نفس المكان من الجبانة الذى وجده فيه فى المرة الأولى ، وذهب حمزة إلى فوزية الواقفة وقبل أن يصل إليها سألته بلهفة :

\_ هيه ؟

ــ بس يا ستى .. حنام مع سعادة داود باشا في أوضة واحدة .

\_ بلاش هزار يا حمزة .. لقيت حاجة ؟

ولم تصدق فوزية هي الأخرى ، ومع ذلك مضت معه ، وراحا يصعدان الطريق المؤدية إلى المقابر . وعند نفس الجدار وجدا هناك أبو دومه واقفا وقال له حمزة .

ــ دى مراتى يا عم اسماعيل.

ولما وجد حمزة المسألة فيها اثنين إنجليز قتلوا وواحد فقد عينه أضاف:

\_ دى مراتى .. عندنا أربع عيال .. معذبينا قوى يا عم اسماعيل .

ــربنا يزيد ياسي حمزة أفندي .. أنا الآخر الأسطى حوده ابني شفته على

كبر إنما واد يعجبك .. دلوقتي حتشوفه .

وبعد خطوات قليلة كانوا أمام عش مصنوع من خليط من الحجارة البيضاء والصفيح وبراميل الزفت المفرودة . وكان القمر قد بدأ يصعد إلى السماء والنور يأخذ طريقه إلى الأرض . وبدت الأحواش والمدافن كالبيوت الصغيرة المكدسة ، و لم يكن من فرق بينها وبين بيت أبو دومه إلا أنه أحقرها جميعا وأفقرها بناء . . حتى ليظن الإنسان أنه قبر أقيم لتخليد ذكرى الفقير المجهول .

وكان يرقد أمام العشة البيت كلب قد وقف شعره من البرد يشبه الكلب الذي رقد مع أهل الكهف في غارهم مئات السنين .. بلا طعام أو شراب ، يشبهه في أنه هو الآخر يبدو وكأنه هو وأجداده أجمعون قد جاءوا الدنيا صائمين وغادروها صائمين .

وخبط أبو دومه على الباب المصنوع من الصاج وقال:

ــ يا أسطى حوده .

وخبط مرة أخرى .. وفتح الباب وخرج صبى صغير لا يتعدى العاشرة يرتدى جاكتة عسكرية صفراء تصل إلى ما تحت ركبته .. وقال له أبو دومه : \_\_ هات ياسطى حوده حتة سلك عشان تيجى تفتح بيه القفل .

وخرجت وراء الصبى امرأة .. طويلة ترتدى ثوبا أسود وطرحه سوداء ، وحين سقط القمر عليها أضاء وجهها فبدا أبيض حلوا .. وقالت :

ــ خيريا ابو محمود .. فيه إيه ؟

فأجاب أبو دومه بنفس صوته المرتفع:

\_ ما فيش .. أصل حمزة مضاضى الإنجليز .. وبينه وبين الحكومــة شوية ..

فهمس له حمزة:

ــ ياعم اسماعيل.

\_أصل لا مؤاخذة يا سي حمزة .. مفيش بيني وبين أم محمود سر ، احنا ع الحير والشر سوا .

وسألت المرأة حمزة بصوت جميل وكأنما صنع من « ملبن » أنشـوى خالص :

ــ هو الأفندي من الفدائيين ؟

وعجب حمزة وهي تنطق « الفدائيين » نطقا سليما ليس به أي اعوجاج فسألها :

> \_ إنتى تعرفيهم يا ست أم محمود ؟ فأجاب أبو دومه :

ـــ إلا تعرفهم .. هي كانت تعرف حاجة الا هم ؟ دى متعلمة بتقرا الجراتين وتكتب ، واسمع أنا وهي الراديو تفهم هي كل حاجة زى البربند وأنا ولا كأني سمعت .. دى في السياسة إكس .. طب بنت ملك الانجليز اسمها إيه يا أم محمود ؟

وضحك حمزة وفوزية ، وضحكت كذلك أم محمود .. ورد الأسطى حودة الصغير بسرعة :

\_ اسمها ( الدع بت ) يابا .

فقالت أمه:

ـــ يا واد مش اسمها كده .. قلتلك .. اسمها إليزابيث .

وتولى حمزة شرح موضوعه لأم محمود .

وبعد قليل كان الركب يتحرك وحمزة وفوزية وكأنهما فى حلم . كان الأسطى حودة على رأس القافلة وفوزية مع أم محمود التى كانت تحمل فوق رأسها لمبة أم ساروخ وفى يدها إبريق كبير وقد انخرطتا بسرعة فى الحديث وكأنهما تعارفتا منذ عام ، وكان حمزة وأبو دومه يمشيان صامتين غير أن الأخير سرعان ما قال وهو يلكز حمزة :

\_ شوف ياسى حمزة النسوان .. أعوذ بالله .. ما يصدقوا إلا وهات ياكلام .

فقال له حمزة: إلا يا عم اسماعين اتجوزت ازاى ؟

\_ اتجوزت إزاى إيه ؟ زى الناس قسمة ونصيب .. رحت لا بوها الله يرحمه بقى ويحسن إليه ..

- وبتحبها يا عم اسماعين ؟

\_ أحبها يعنى إيه ؟

\_ مش عارف تحبها يعني إيه ؟

\_ آه .. قصدك ع الحب ده اللي بيسرسع في الراديوات .. لا .. لا معندناش كلام فارغ من ده يا سي حمزة .. دى مراتى .. أهلا وسهلا .. ألف ألف مرحب .

دا انت نورتنا والله .. طب تسدق بایه ؟ أنا حلمت امبارح حلم اللهم اجعله خیر ..

ثم رفع صوته وقال موجها الحديث لامرأته:

\_ مش قلتلك الصبح ع الحلم اللى حلمته ليلة امبارح يا ام محمود ؟
و لم ينتظر إجابتها ومضى يقول : حلمت خير والصلى ع النبى إن الهاتف
جانى فى المنام وقالى : هوه : قلت هوه : قاللى الفرج جايلك شايل شنطة ..
صبحت الصبح أخبط كف على كف وأنا عقلى ح يشت .. يا ربى فرج إيه اللى شايل شنطة ؟ قوم شوف .. ادحنا .. أهلا وسهلا .

وكان حمزة يستمع ويحاول تقدير ما سوف يدفعه ويليق بمقام و الفرج اللي شايل شنطة ، مع أنه كان على شبه يقين إن كلام أبو دومه كله فارغ و لا يدخل عقله . وكان أبو دومه يتكلم بلا توقف وأحيانا يصغى إليه حمزة . ومعظم الأحيان يتأمل ما حوله . . قبور ، وقبور ، وأحواش عليها زهمة ولا صوت ولا هواء ولا حياة ، ونور القمر مجرد كفن أبيض كبير يغطى المبانى ويفرش الأرض ، وأم محمود على رأسها ( اللمبة أم ساروخ » ترتد نارها ودخانها إلى الوراء ويتصاعد من شريطها الشرر ، ويبدو نورها الشيء الوحيد الذي أفلت من لون الكفن وثار في وجه القمر ، وأصوات وقع الأقدام على الرمال التي تكاثفت حبيباتها تحتمى من البرد والليل والموتى ، هذه الأصوات تاتى مكتومة ، وأحيانا سمع حمزة معها صوت أبو دومة الذي بدأ يلهث :

— اتنين في رقبتي .. الأسطى حوده .. وبسلامته أبو دوم .. على اسم جده .. الله يرحمه ويحسن إليه .. الفاتحة له .. حوده عال .. قلت يا واد وديه في ورشة مكانيك أقله يطلع أحسن منك .. حاكم ماتلقاش ياسي حمزة أفندى حد يرضى تطلع أحسن منه إلا أبوك .. المرحوم أبويا كان يقوللي كده .. عليه رحمة الله .. الفاتحة له وأمواتنا وأموات المسلمين .. بسم الله السرحمن الرحيم .. كان لازم نقرا الفاتحة قبل مانخش على أسيادنا الموتى ونستأذيهم .. معلش يا سيادى الفاتحالكو .. بسم الله .. آمين .. الإنجليز .. ولاد كلب عايزين الحرق .. أنا مرة وأنا ف شبابي ..

ويبدو أن انخراط فوزية في الحديث مع أم محمود جعلها تنسى المكان الذي تمضى فيه والزمان ، إذ سرعان ما توقفت حتى وصلها حمزة وأدخلت يدها بسرعة حول ذراعه وكانت ترتجف وتقول:

ـــ أنا خايفة موت يا حمزة ...

\_ من إيه ؟ ماتبقيش صغيرة أمال .

فقالت وهي تلتصق به أكثر ووجهها شاحب :

ـــ أنا بترجف يا حمزة .

وسألها حتى تتكلم وتنسى: ــ انت كنتى عمالة بتكلمى معاها فى إيه ؟ فقالت وأسنانها تصطك:

دددى .. وووليه ك ك ك ويسه .. ج ج ج ج جدا دددا ... ت ت ت ت ت ت صور ب ب ب ت ت ت ح ب .. جوجو جوزها أ أ وى .. بتقول أ أ أ ي ع عندها أ ح ح ح س س س ن من أ أ أ نور و جج ج دى ..

وخلع حمزة و جاكته وألبسها إياها بالقوة فصنعت بها ما صنعته جاكتة العسكرى بحودة ، وكانت كل رجفة منها تعتصر نفسه اعتصارا . لقد كان يتساءل عن التجربة التي تذيب الإنسان في الإنسان وما تخيل أبدا أنها ممكن أن تكون على هذه الصورة ، وهو يرتجف من البرد وهي ترتجف من البرد والحوف تائهين في العالم الآخر ، وحوده وأبواه يقودانهم من ممر ... ممرات جرباء متشابهة وصور لآلاف الأشباح تترامي ، وجلد فوزية وكذلك جلده قد تحبب وأصبح كجلد الطائر بعد نتف ريشه ، والمشوار لا يبدو له آخر ، وليلة طويلة لا يعلم أحد كيف تنتهي .

وفجأة قفز حمزة مذعورا مخلوع القلب ، فقد صرخت فوزية بجوار أذنه تماما صرخة مشحونة بالرجفة والذعر المروع .. وظلت تصرخ بلا انقطاع وتقول :

ـــ رجليا رجليا رجليا .

وانحنى حمزة وقلبه لا يزال مخلوعا يرى ما فى رجليها .. ثم ضحك ضحكة هستيرية طويلة وهو يمد يده ويجذب عرف الكافور الجاف من بين قدميها ، و لم تصدق فوزية و لم تكف عن الاستغاثة حتى حين أراها العرف . وما أن تبينته أخيرا حتى انهارت مغمى عليها ، وتلقفها حمزة قبل أن تسقط وأبو دومه يقول : يا حول الله .. يا حول الله .. داحنا كنا وصلنا .

وحملها حمزة على كتفه ، وخيل إليه من فرط ما كان يحس به ناحيتها أنه يستطيع حملها الليلة بطولها ، ولكن بعد خطوات قليلة بدأ ينوء ويلهث ، ويسأل أبو دومه .

ولم تكن هناك حاجة للسؤال .. كانوا قد وصلوا وكانت فوزية قد عادت إلى وعيها . ولدهشة حمزة لم يعرف أنها أفاقت إلا حين أحس بشفتيها تلثمان جانب رقبته ، وقد ينسى حمزة أشياء كثيرة ولكنه لن ينسى أبدا ملمس شفتيها الباردتين الذى أحسته رقبته فى تلك الليلة من ليالى الشتاء . وخطر لمخاطر .. لم يكن عبثا ما قاله لها الليلة إن حبهما فى نمو دائم ، وأشياء قليلة جدا تلك التى يكون الإنسان مستعدا أن يفقد حياته من أجلها مثل .. مبدئه .. وشرفه .. وبلده .. وفى تلك اللحظة أحس حمزة بعمق وبيقين أن فوزية أخذت مكانها جنبا إلى جنب مع مبدئه وشرفه وبلده .

وكان لا يزال يحملها ويلهث ويجاهد ليبقى حاملها ولا يفكر فى إنزالها ، ولم وفوزية وقد أفاقت تماما لم تفكر هى الآخرى فى التنازل عن مرقدها ، ولم تهبط إلا حين شعرت بحمزة قد أصبح لا يكاد يستطيع الوقوف قائلا وهو يلهث :

\_ أنا دلوقتي بقيت زي طرزان تمام .

وفى ذلك الوقت كانوا واقفين أمام بناء كالفيلا المكونة من دور واحد ، وكان حوده عاكفا على الباب ، والقفل وأمه تمسك له بالمصباح ، وأبو دومه واقف فى مكان تستطيع عينه المتحركة أن ترى فيه تقدم ابنه وترى فيه حمزة وفوزية دون أن يتعب نفسه ويستدير ، وأيقن حمزة بعد ما هدأت أنفاسه ورأى حودة وما يصنعه . . أيقن أن أبو دومه فعلا كان يعنى ما يقول . . وتعجب كثيرا وكان ذلك مستحيلا .

ومال على أذن فوزية يهمس لها بهذا وبغيره ، وأفاق من همساته على خبطة

أطارت عصافير السكون .. وأرجفت فوزية وأرعشتها .. وفتحت الباب .. . ورفعت صوت حودة قائلا :

\_ اتفضلوا .

وابتسم أبو دومه ابتسامة أوسع من فمه وقال وعينه وأسنانه تتلألاً في ضوء القمر:

\_ صدقتني بقي يا سي حمزة ؟ الأسطى حودة دا ولد ..

وكانت الرحلة كلها كوم والدخول إلى ذلك المكان كوم آخر .. رفضت فوزية أن تطأه واستاتت على حمزة لا تريده أن تتحرك وقالت :

\_\_يلعن أبو أى حاجة فى الدنيا . تعال بات عندنا و خلاص ، انشالله حتى يتقبض عليك .. مش معقول نبات هنا .. دانا اجننت .. أنا مالى .. هه .. هه ..

وكانت عائلة أبو دومه قد دخلت وفوزية لم تكف عن اضطرابها ، وولد قربها في نفس حمزة مشروع قبلة .. وقبلها مرة ومرات وبادلته فوزية قبلاته . وكان حمزة كلما دار ببصره في مستعمرة الموت تلك احتضنها أكثر وأطال من قبلاته حتى خيل إليه أن فمها قد تضخم وتلمظ وأصبح كثدى نافر .

وسمع صفيرا مزعجا ، وانتفضت فوزية فى حضنه ، والتفت فوجد الأسطى حودة هو الذى يصفر وأمه تخبطه على كتفه وأبوه ينهره ، والأم والأب قد أعطياهما ظهرهما ..

\_ لا مؤاخذة يا عم اسماعيل.

واستدار الرجل إليه ؛ وكاد حمزة يسقط على ظهره من الضحك ـ وهو يرى فى ضوء القمر واللمبة أم ساروخ ـ وجه أبو دومه الخشن الجاف ذا اللحية والشارب والفم الواسع يراه وفيه ابتسامة ضيقة خجلة ، وملامح تجرب ـ ربما للمرة الأولى ـ خجلا يكاد يقترب من خجل الأنثى .

و دخلت فوزية معه وقد نسيت في خضم ما حدث إصرارها.

كان الباب الخارجي يؤدي إلى فناء صغير تحتله حديقة مهملة فيها شجرتا كافور طويلتان ترعب وشوشة أوراقهما . وهناك باب داخلي آخر كان حودة بلا ريب قد عالجه وفتحه ، ويؤدي الباب إلى صالة يتدلى من سقفها شمعدان فيه ما يزيد على العشر شمعات قد احترق منها جزء صغير وكانوا قد أوقدوها جميعا ، والصالة مؤثثة بكنب و أرابيسك » يدور مع الجدران ، وكذلك عدد من الكراسي من نفس النوع ، والحجرة التي على اليسار فيها أثاث مماثل ، وكذلك مائدة طعام كبيرة وحولها كراسيها ، والتي على اليمين فيها سريران ومراتبهما وملاياتهما ولوازمهما مكومة في ركن ومغطاة بغطاء ، و فى كل من الحجرتين شمعدان كبير أضيء . ويقابل باب الصالة الخارجي باب داخلي قال أبو دومه وهو يفتحه :

ــ أهو ده قبر المرحوم داود باشا نفسه .. الله يرحمه .. الفاتحاله .

وبدا من خلال الباب المفتوح قبر مغطى بقماش من حرير أخضر لماع وحوله شبكة من النحاس الأصفر ، وكانت الأضواء تتسرب إليه فيبرق النحاس ، ويبدو القبر كله وكأنه أحد صناديق القراصنة الضخمة التي كانوا يملئونها بما اختطفوه من كنوز .

وكان الجوكله مشبعا بتلك الرائحة التي تتوالد في المكان إذا طال عليه الإهمال والإغلاق .

وقال أبو دومه وهو يحول بعينيه ويبتسم ويتفكر:

ــهیه یا سی حمزة .. کویس ده ؟ والا أو دیك مدفن ألفت هانم أحسن ؟ اللی یعجبك .. زی ما انت عایز .. أی خدمة .. والنبی أنك طردت عنا وحشة .

وأجاب حمزة :

ــ دا كويس قوى يا عم اسماعين . أنا الحقيقة مش عارف أشكرك إزاى .. بس المهم دلوقتي عايزين نرجع فوزية عشان تروح .

\_ ليه ؟ ماتخليها تبات معاك .. أقلها تونسك .

\_ لأ .. معلشى يا عم اسماعيل . أصل الولاد لوحدهم ، فاهمنى ازاى ؟ \_ \_ فاهمنى ازاى ؟ \_ \_ فاهمك ازاى .. أخ .. لا مؤاخذة ما تآخذنيش نسيت .. أيوه الولاد صحيح .. دا زمان بسلامته أبو دومه بيسرخ .. يارتنا كنا جبناه ويانا .

واقترح حمزة ثانية أن يوصلوا فوزية .. ولكن أبو دومه استمهله ، وخلع جلبابه وقال وقد أصبح بالفائلة والصديرى واللباس ذى الأرجل الطويلة والدكة ذات الثلاث شعب :

\_ بس لا مؤاخذة .. خمسة بس نوضبلك النومة .. إيدك يا أم محمود .. شيل معايا يا حودة .. أصل التراب مالى الحتة .

وحقيقة كانت أكوام من الغبار تغطى كل شيء ، خاصة ذلك الكوم الذي فيه معدات الفراش .

وحاول حمزة أن يمديده ولكن غضبة أبو دومه جعلته يتوقف عن محاولته . وخرج حمزة وفوزية بناء على إصرار أبو دومه وزوجته حتى لا يصيبهما العفار .. وقفا متلاصقين وحولهما أعشاب متوحشة ، وبجوارهما جذع الكافور الغليظ ووشوشة أوراقه .. والقمر يطل عليهما باستغراب ويتابع ما يدور فى الجبانة كطفل محب للاستطلاع ، ويستسم ابتسامته الساذجة الخالدة .. وقالت فوزية :

\_ أما راجل عجيب أبو دومة!

ـــ تعرفي أنا لغاية دلوقتي مش مصدق .

\_ وحتديله كام ؟

\_ على الأقل جنيه .. شوية والله .

- ــ يا أخى ماتيجي معايا وبلاش العندده ..
- ــ دا مش عند یا عزیزتی .. دا عقل . فاهمانی ازای ؟
  - \_ وحتبات هنا لوحدك ؟
    - \_ حاخاف من إيه ؟

قالها حمزة وهو خائف فعلا لمجرد التفكير فى مصيره حين يذهب عنه الجميع ، ويبقى وحده .

- ــ و بتقللي مانتاش بطل .. حد يقدر يعمل كده ؟
- ــ انتى عارفه المثل اللي بيقول بطل رغم أنفه .. أهو أنا بالضبط .

ونظرت فوزية إلى السماء والقمر .. وما حولها من معالم صماء بكماء وقد أفرخ بعض روعها وقالت :

- ـــ دى ليلة تاريخية يا حمزة .. حنبقي نفتكرها سوا .
- ـــ معلش یا فوزیة .. کل حاجة بتبقی صعبة لما الواحد بیکون فیها ، وبعدین لما بتفوت وتصبح ذکریات بتبقی جمیلة .
  - ــ تعرف إنك ساعات بتقول حكم .
  - ــ وانتى ساعات بتمدحيني من غير داعي .
  - وسكتت فوزية وكأن سكوتها إجابة ، ثم قالت :
- ـــ أنا يا حمزة باستغرب جدا على أبو دومه ده ومراته .. تصور واحدة حلوة بتقرا وتكتب زى دى تجوز ليه واحد زيه .
  - \_ وليه ماتجوزوش ؟
  - - \_\_ أحس إزاى يعنى ؟
  - ــ أصغر منه بكتير ومركزه أحسن.
- ــ شفتي بقي إن ساعات حكم الناس البساط بيبقي أحسن من حكمنا .

شفتی بقی إنها مابصتش لحاجات من دی . لازم فیه حاجة عجبتها فیه .. لازم . الست دی باین علیها معدنها سلیم جدا .. دی لازم فی یوم من الأیام یبقی لها دور .

فضحكت فوزية وسألته:

\_\_ إزاى بقى ؟

فأجاب حمزة :

\_ انتى بتساليني أنا ؟ البركة فيكى .

وجاءهما من الداخل صوت أبو دومه يدعوهما إلى الدخول .

وتأمل حمزة الفراش الفاخر والنظافة التى أصبحت عليها الحجرة ، ونظر إلى الرجل يشكره فوجد وكأن كل ما كان فى الحجرة وفوق كومة الفرش من غبار وتراب قد انتقل إلى وجهه ورأسه وملابسه ، و لم يترك حتى رموش عينيه ولا نهايات شاربه المشوشة فعلق بها وأضفى عليها رماديته ، وكذلك كانت أم محمود والأسطى حوده الصغير حتى بدت سحناتهم فى ضوء الشموع تستثير الضحك .

وقال أبو دومه وهو يمسح التراب الذي دخل حلقه وسود لسانه معلقا على فخامة المكان :

\_\_ أصل كان الله يرحمه نظاجة قوى .. هو اللى بانى الملك دا كله قبل ما ينتهى أجله .. عليه رحمة الله . هه ، كويس كده ياسى حمزة ؟ عجبتك الحتة ؟ أهو عندك أبريق الميه وبكره الصبح إن عشنا إن شاء الله أم محمود تجيبلك دور كان .. وأهو الأسطى حوده بعد ما يخلص الشغل يبقى تحت إيدك .. إحنا لينا بركة الا انت .. دانا والله الدنيا ماهى سايعانى .

وقال حمزة في نفسه إن الوقت قد حان فانتحى به ركنا من الحجرة وأخرج من جيبه الجنيه وقد طبقه في يده حتى لا يراه أحد وقال : \_ احنا متشكرين جدا ياعم أبو دومه .

قالها وهو يمد يده ليسلم عليه ، ومد الرجل يده وما أن أحس بملمس الورقة حتى نفض ذراعه كله بسرعة وارتسم على وجهه غضب وقال وقد رغرغت عيناه بالدموع:

\_ الله ! إيه ده ياسي حمزة ؟ انت بتشتمنى ؟ هو أنا راجل واطى ؟ أنا فقير ، فقير إنما برضه عندى مروءة .. والا اكمنى يعنى فقير ؟ دا انت ضيفى ياسى حمزة .. وانت راجل متعلم وتفهم .. دا الحمد لله يا أخسى ربك ساترها . لا لا لا ياسى حمزة انت والله كأنك قلعت الجزمة وضربتنى .. دا انت كأنك تفيت في وشى .. روح يا شيخ الله يسامحك .

## 10

وعادت القافلة كما جاءت لتوصل فوزية ، وظل حمزة وقتا طويلا صامتا يفكر فى دهول مقرون بفرحة وثمة عواطف كثيرة تجتاحه . كان يفكر فى ما كان من أبو دومه و يخجل من نفسه ومما أطلقه على الرجل من أحكام ، ويفعل هذا برهبة وكأنما تفتحت عيناه على مخبأ حقائق مجهولة . وفى النهاية قال لفوزية :

\_ شفتی بقی یا ستی اتجوزته لیه ؟ راجل عجیب .. کل یوم بیمر علی الواحد فی المعرکة بیتعلم منه حاجات کتیر . أنا کنت طول عمری باتکلم عن الشعب و بیخیل لی دلوقتی إنی ماکنتش مدرك بعمق إیه طبیعة الکلمة دی .. فهمانی ازای ؟ أبدا دی مش کلمة بتطلق جزافا .. دی حقیقة حیة ، إحنا عایشین فیها .. یعنی أبو دومه ده تفتکری الواحد کان ممکن ح یلمس حاجة زی اللی حصلت اللیلة إلا من خلال المعرکة .. کان عمره حتنفتح له الکنوز

الموجودة وعايشة فى قلب الناس ومغطيها الألم والحاجة .. تعرفى أنا حاسس بتغيير كبير بيطراً على من يوم ما عرفتك .. فيه حاجات كتير ماكنتش شايفها شفتها ، وحاجات ما كنتش لا مسها خلتينى ألمسها وأقدرها .. أنا كنت باكافح زمان لأنى كنت مجرد إنسان حاقد على الظلم والأعداء ، إنما الاستعمار ممكن ينتهى والظلم ممكن يتشكل والقضية مداها أبعد من كده بكتير .. القضية مش قضية الأعداء ، لأ ، دى قضية الشعب وأهدافه ، اللى يحلها هو إيمان الواحد بالشعب أو لا وقبل كل شيء ، فهمانى ازاى ؟ يعنى زمان كنت ثائر عشان كنت حاقد فقط على الأعداء ومؤمن بضرورة زوالهم .. دلوقتى بكافح لأنى مش بس باكره الأعداء ، إنما لأنى أو لا حبيت الناس وأمنت بضرورة سعادتهم .. كان زمان اللى بيحر كنى هو الحقد والحقد أجله قصير ، دلوقتى اللى يبحر كنى هو الحقد والحقد أجله قصير ،

كان القمر قد غاب والظلام الدامس قد حل ، والجبانة أصبحت بحلكتها التامة وكأنها قبر خانق كبير ، ومع هذا مشت فوزية تستمع لما يقوله وقد صنعت كلماته ما لم تصنعه في نفسها قبلاته ولا صدره الدافئ ، فأذهبت عنها كل روع و لم يعد في كيانها ذرة خوف ..

واستطرد حمزة بنبرات تحفل بإيمان نظيف ليس فيه شوائب وكأنما ينطق بلسان كل المثل العليا التي حلمت بها وصاحبتها ، ويخرج حديثه همسا قويا يكاد يؤرق الموتى ويحيى العظام وهي رميم :

\_ أناكان ممكن أقعد اتكلم كتير عن حبى وإيمانى بالناس ، إنما دى معانى مجردة مش ممكن توجد إلا بالعمل ، واحنا ضيعنا وقت كتير ولازم نبتدى .. ونبتدى بالناس اللى حوالينا . إحنا قدامنا حاجات كتير لازم نعملها ..

فقاطعته فوزية قائلة في حماس:

ــ بس الناس اللي حوالينا مش شايفه فيهم حد ينفع .

\_\_ إزاى مافيهمش حد ؟ شوفى يا فوزية .. صحيح فيه ناس أحسن منهم بس لازم تعرفى إن فى كل إنسان جزء طيب ونضيف وثورى وعلى استعداد لخدمة المجموع ، وجزء آخر وحش وفردى ومناقض له تمام . فهمانى ازاى ؟ تجربة الاختفاء والإحساسات اللى باحملها ليكى علمتنى إنى أعامل الأجزاء الطيبة فى الناس ، وصحيح أحذر من أجزاءها الأخرى إنما لا أعاملها . لازم حنلقى فى كل واحد من اللى حوالينا حاجة كويسة ، علينا إننا ننميها ونكبرها وبكده نخلق منهم ناس كويسين . فاهمانى إزاى ؟ يعنى نساعد الجزء الصالح فيهم على أنه يقهر الجزء الضار ، وبكده الناس حتنظم وتقاوم لأن المقاومة هى مجموع الأجزاء الصالحة فى الناس ، وهى دى اللى بتدفع المجتمع لقدام ، وهى دى اللى بتغير .

ـــ بس يعنى يا حمزة واحد زى .. زى سعد مثلا .. إيه الجزء الصالح اللي فيه ؟

\_ كويس جدا اللي جبتى المثل ده .. سعد أكيد فيه جزء كويس إنما لما فقد اتصاله بينا سيطر عليه الجزء الآخر وانحل . ومش ممكن حيتصلح أبدا بأننا نقعد نشتمه ونقول وحش ومتردد . مهمتنا دلوقتى إنه يبتدى يشتغل وبكده بس حيتطور .

\_ أما نشنوف .

\_ أنا متأكد من النتيجة .. أنا زمان ماكنتش بافكر بالطريقة دى أبدا .. دا الواحد أكيد اتغير .. المكان ده قلعة .. واحنا ضيعنا وقت كبير .. لازم نبتدى .

\_ دی مافیهاش خلاف یا حمزة .. بس حنعمل إیه ؟

\_ حافكر الليلة في اللي ممكن نعمله .. وفكرى انتى رخره كان .

و سكتت فوزية قليلا ثم قالت:

ــ تعرف یا حمزة .. حاجة غریبة خالص .. أنا مش عارفة كل حاجة تقولها باقتنع بيها .. أنا بيتها لى إنك ممكن تقنعنى ببساطة إنى مجنونة مثلا . ــ ودى عايزة إقناع ؟

وضحكا . وسألته فوزية عن الساعة .. كانت تدور حول منتصف لليل .

وكانت القافلة قد اقتربت من العمار فودعها حمزة بعد أن أعطاها نقودا لتعود بها ، ووجد عناء كبيرا فى إقناع أبو دومة بعدم مرافقتها حتى لا يراهما أحد معا .

وحين ابتسمت له وهى تكاد تتهاوى من التعب كان صدره يغلى بالحقد على الذين يمنعونه من مصاحبتها ، وكان قلبه يعمر باطمئنان دافئ صنعمه الحب .. الحب العميق الذى بدأت تمتد له جذور ويصبح له تاريخ .

## 17

وأخيرا جدا رقد حمزة على الفراش الوثير والتف بالبطاطين الوبر ، ومدد ظهره المنهك وهو يتناءب ويستمتع بالرقدة وبالدفء .. وكأنها صدر ديك رومى يلتهمه بعد يوم كامل من الجوع . وكان الإنهاك قد بلغ به الدرجة التى يتمنى فيها الإنسان أى مكان يستطيع أن يستلقى فيه حتى ولو كان قبر داود باشا نفسه .

وكان يخيل إليه أنه سيظل يرتجف رعبا إلى أن تطلع الشمس وسيصرخ لدى كل خرفشة أو صوت ، ولكنه وهو راقد وقد ارتاح ظهره ونملت أطرافه كان يحس باللا مبالاة التامة . والسكون الذى حوله أقبح سكون ، والوحدة التى يحس بها باردة رهيبة لا أمل في انتهائها ، والمدفن يعبق بالزمن والقدم

والعصر الذى ولى ، والفراش هو الآخر يملاً أنفه برائحة مقززة ، وكأن المراتب والمخدات والملاءات قد تكون لها صدأ على مر الزمن وأصبح لصدئها رائحة . وهو راقد هكذا في قلب الرعب لم يكن يحس بأى خوف ، وأحيانا تبدو التجربة لا يحتملها بشر ، فإذا أصبح الإنسان فيها تقبلها بهدوء يكون هو أول من يعجب له .

ومضى يستعرض أحداث اليوم الحافل الطويل الذى خيل إليه أنه بدأ من شهر فات . وكلما تذكر مبلغ ما لاقاه من تعب دقت شرايين صدغه ، ثم أصبح دقها هو كل ما يشغل ذاكرته وقد بدأ النوم يحتويه . ولكن قبل أن يغفو هبط الدق الذى فى صدغيه ليرتفع دق آخر فى أذنيه . وارتفع دق الأذنين كثيرا حتى لفت نظره وطرد عنه النوم ، ثم ما لبث أن استرعى انتباهه كله وصحى تماما وأدرك أنه صادر من الباب الخارجي للمدفن . وتثلجت أطرافه فى الحال .. كان الدق مزعجا كئيبا كزئير وحش مذبوح . وشلت كل الحياة فى حمزة و لم يعد فيه إلا أذناه تتسمعان وتلهبان قلبه وأنفاسه .

واستمر الدق يزأر ويستوحش وينهش لحم السكون ثم انقطع فجأة . ومع هذا ظل يتحرك ويكاد لا يتنفس أو يفكر مخافة أن يعيد إليه تفكيره ذلك الدق . وأصبح قلبه هو الشيء الوحيد الذي يتحرك ويصدر صوت الحجرة ، بل في المدفن والجبانة بأسرها . وضايقته دقات قلبه وكأنها منبه ذو صوت مرتفع تقلق دقاته النائم ومن به أرق .. ثم .. بدأت الدقات مرة أخرى .. رفيعة كخناجر حادة .. وقريبة من نافذة الحجرة التي ينام فيها . وتثلج حسده كله وجاءه من الخارج صوت بشع صادر لا بد عن جمجمة هيكل عظمي :

\_ يا أستاذ حمزة .

ولم يدرك أبدا أن هذا هو اسمه أو أنه المقصود ، وحتى حين أدرك لم يتحرك

و لم ينفعل . وتكرر النداء ووجد نفسه يخرج من حنجرته صوتا واجفا غريبا لا يمت إلى صوته يقول :

- \_ مين ؟
- ـــ افتح يا استاذ حمزة .
  - \_ مین ؟ انت مین ؟
- \_ افتح يا أستاذ حمزة .. أنا سيد .

وحشد كل قواه ليرفع صوته ويقول:

\_\_ سيد مين ؟

وجاءه الجواب:

\_ أنا سيد إبراهيم يا أستاذ حمزة .

وتشجع قليلا ، وقام إلى النافذة وهو لا يكاد يصلب نفسه وفتحها ، ومن خلال حديدها لمح في الظلام الذي أضاءه النور الخارج واحدا يرتدي قميص عمال و بنطلونا أصفر ممزقا ، و بدأ الشك ينتابه فقد كان عهده بسيد أنه يرتدي جلبابا فقال :

ــ مين ؟ .. انت مين ؟

واقترب الشخص حتى وضحت معالمه فى الضوء ، فإذا به سيد فعلا بوجهه المستطيل النحيف وعينيه الواسعتين جدا ورقبته الطويلة ذات الحنجرة البارزة . وكما جاء الذعر فجأة رحل فجأة ، وقال حمزة :

\_ الله يجازيك يا شيخ .. نشفت دمى .

وفتح له ، و دخل سيد و سلم عليه بيدين بار دتين كبيرتين وهو يقول : \_\_ أنا بعد ماخلصت شغل في الوابور جاى على هنا علشان طلب في الغورية .. عم أحمد بتاع العصير قال لى إنه كان فيه واحد أفندى بيساً ل على عم اسماعيل .. يا ترى مين ؟ جيت على أبو دومه قال لى على الحكاية .. فقلت

أروح أقضى الطلب وبعدين آجى أبات معاك أونسك .. أصل الجبانة كرب قوى بالليل وانت مش واخد ع الحاجات دى .

وغير مجىء سيد الأوضاع كلها .. ونسى حمزة الجبانة والرعب والبرد وأحس منفعلا بروعة الإنسان . من دقائق كان كالميت فى قبره حتى إذا ما جاء إنسان آخر .. إنسان واحد فقط مثل سيد وأصبحا جماعة ، ذهب الموت والبرد والسكون وغارت الوحدة ، وبدأ يحس بإنسانيته وينطلق لسانه متحدثا ضاحكا .

وما مضت دقائق أخرى حتى كان سيد قد جمع أخشابا من الفناء المهمل ، وأحضر رملا وضعه على البلاط ، وأوقد نارا ليدفىء المكان الذى كان يعصف به البرد . وامتلأت الحجرة باللهب الأحمر الوهاج الذى تشيع مجرد رؤيته الدفء والأمان .. وأطفأ سيد معظم الشموع وأبقى اثنتين وقال :

\_ تشرب شنای ؟

وشد حمزة على يده وكاد يقبله ، فقطرة الشاى فى مكان كذاك وفى ليلة كليلتها وبعد أهوال .. كانت لا تقدر بثمن ، وقال له :

\_\_ یا سلام یابو السید دا انت تبقی واد مافیش منك .. فكرتنی بحسن .. كان یقول لی تشرب شی أقول له : آه ، یقول لی : نعملولك شی . والله وحشنی قوی .. بس حتعمل شای ازای ؟ \_\_ جایب معایا العدة كلها .

وأشار لعدة في منديل محلاوي كان قد وضعها على الفراش الآخر ، ودهش كيف لم يفطن لسيد وهو يحملها .

وحين ارتشف أول رشفة من الشاى وسرت كهربتها فى جسده مر بخياله بدير ، ولا يدرى لم ؟ فقال له فى سره وهو يبتسم : أين أنت يا أستاذ بدير لترى أنى لا أضيع حياتى من أجل الناس عبثا .. كل واحد منهم يستاهل أن

أضيع عمرى من أجله.

وبدأ حديث العمل .. وأنهاه حمزة بقوله :

ــ خلاص من بكره حنبتدى .. حنعمل بكره اجتماع الساعة .. الساعة تلاتة .. كويس ؟

\_\_ احنا بنخلص الساعة تلاتة .. وعلى ماجى هنا تكون بقت تلاتــة ونص .

ــ طيب زى بعضه .. تلاتة ونص .. وتجيب معاك الحاجات .

\_ حاجيبهم إن شاء الله .

وحين انتهيا كان سيد لا يزال جالسا على الفراش المقابل قاعدا ورأسه بين ركبتيه . وكان حمزة قد أنزل البطانية من فوق أكتافه ولفها حول جلسته ، والنار التي بدأت تخمد تضيء وجهه بألوانها التي تمتد من الأحمر الطوبي إلى الأصفر ، وتعبث بملامحه المتعبة .

وكان ينظر إلى سيد نظرات طويلة ، ويتذكر أول يوم قابله فيه قريبا من وزارة الشئون الاجتاعية ورجاه أن يكتب له طلبا ليعمل في الحكومة كغيره من عمال القنال الذين تركوا المعسكرات ونزحوا إلى القاهرة ، والذين كانوا لا يفترقون عنه إلا في أنه لا يحمل ما يثبت أنه كان يعمل في الجيش الإنجليزي .

وسآله حمزة فنجأة :

ــ انت بتشتغل إيه في الوابور ؟

ــ نقاش .

\_\_ نقاش ؟ بتعمل إيه يعنى ؟

\_ بانقش حجارة الطاحونة .

\_ وتعلمتها فين يا ابو السيد الحكاية دى ؟

ولوى سيد رقبته وأدار رأسه إلى ناحية كمن يقول : ياما اتعلمت ..

وعاد وجهه إلى مكانه وراحت ألوان النار تعبث بحبات العرق التي كانت قد احتلت جبهته ، وبعض أجزاء وجهه المستطيل المتغضن المرتكز على ركبتيه الذي لا تستريح ملامحه ، وقال وهو ساهم وعيناه في النيران :

\_\_ ياما تعلمت من يوم ماسبت الفلاحة .. كنت مرابع باشتغل عند واحد بأردبين دره في السنة .. وهجيت .. كنت زهقان وغاوى مكن . كنت أسرق قطن تاني جمعه وأبيعه وأشترى صندوق دخان للأسطى محمد سواق اللنز بتاع عزبة المردنلي عشان يخليني أسوق اللنز وأحرت بيه خط .. كل خط بصندوق دخان و دفتر بفره .

وسكت سيد قليلا ثم انتابت وجهه الرعشة العصبية التي كثيرا ماتنتابه ، وكز على أسنانه وقال :

\_ بس كله إلا الترب ، وأبو دومه ومراته .

وقال له خمزة:

\_ دول ناس كويسين جدا .

وانتابته الرعشة مرة أخرى وهو يقول :

\_ ومراته دي رخرة مناخيرها في السما بنت الـ « ... » .

\_ أبدا يا سيد دى ست كويسة .. هي عملت فيك حاجة ؟

\_ هي تقدر تعمل حاجة ؟

\_ أنت كل ساعة تجيب سيرتها .

\_ هي مين دي ؟ دا أن مكانشي جوزها قادر عليها أربيها أنا .

ـــ انت مشغول بيها قوى .

فارتعش وجهه مرة أخرى وقال:

\_ يعنى مشغول بينت السلطان ياخي ؟ دى .

وبصق مشمئزا.

وراقبه حمزة وهو يضم فمه بشدة ويحك أظافره في أظافره وينقبض وجهه وينبسط . وكان سيد هكذا دائما يحس حمزة كلما رآه أنه في قلق مستمر ،

حتى وهو صامت يضج صدره بالأزمة ويبدو على لسانه كلام لا ينطلق ووراء ملامحه كبت مستطير .

وقطع صمته وقال في صوت يجاهد ليفلت من أسنانه المضمومة: \_ كل اما بشوف واحد متعلم زيك وسايب عيشة لوكس وجاى يناهد ويانا احنا اللي الواحد بتطلع روحه علبال ما يطلع اللقمة، أبقى عايز أقوم على أولاد الكلب أخنقهم واحد واحد.

ثم لاحت ابتسامة شاحبة على وجهه وقال:

ـــوبعد ما يروحوا الإنجليز فى داهية .. أظن مش حنشوفك .

وكانت النار قد خبت وتحولت إلى بصابيص تشع ضوءا أحمر بلون وجه حمزة وسيد وكل ما حولهما من أشياء ، حين قال حمزة :

ــ بس لما يروحوا .. الحكاية يا سيد مش حكاية الانجليز دى حكايتنا احنا .. حياتنا ومستقبلنا على الأقل فى الميت سنة الجليين ، لغاية لما العيشة كلها تبقى لوكس زى ما بتقول .

ثم حل صمت طويل .. ولم يكن ماهما فيه من سكون في حاجة إلى الصمت لتبدو النفوس خلاله كاء البحيرة التي لا يعكر صفاءها موج ، فيكاد يرى الإنسان أعماق نفسه ويكاد يرى حادثات صغيرة عاشت معه لحظة من عمره وأسعدته ثم تهاوت إلى قاعه .

وكانت النار قد خمدت تماما وأصبح لا يضئ الحجرة إلا نور الشمعتين الضئيل ، ونشوة الشاى والدفء قد ذهبت وخلفت وراءها وجوما . وكان لابد إذن أن تنبعث تلك الدندنة من سيد ، خافته أول الأمر وكأنما يوشوش نفسه ثم ترتفع معها رأسه ، ويبدو عنقه طويلا تكاد تبرز منه حنجرته .. ثم يقول يا ليل!

وما أروع الليل حين يقال في الليل وفي مثل ذلك المكان .. ويعلو صوته

رنانا له أنين الناى ورنينه ، يغنى ياليل ويشيع الفجر فى الليل ، وياعين ويستل النوم من العين ، وياليل فيذوب البرد ويهاجر الظلام ، وياعين فترى العين النور ويملؤها دفء ومرح .

ولم يعد حمزة من الآفاق التي حملته إليها كلمات سيد ومواله .. وأحس مرة أخرى بنفسه وحيدا مع العواطف الدقيقة الواهنة التي تتسرب إلى ذاته وتنهشها وتشبعها نبضا ولينا وألفة ، وبدأت الأوتار الخفية تعزف ويخرج لحنها يغريه بأن يفضفض ، وشعر برغبة أقوى منه تدفعه لأن يحكى عن فوزية وقصته معها .

ونظر إلى سيد الذى كان قد سكت وعاد رأسه بين ركبتيه ، وقرر أن يحكى وبدأ بأن سأله : إلا انت ماحبتش أبدا يا سيد ؟ و لم يكن قد انتهى حين قال الفجر .. الله أكبر !

## 1 1

استیقظ حمزة علی شیء یضایقه ویکاد یسد فتحات أنفه . وحین استعاد حواسه و جد للشیء رائحة جمیلة .

وفتح عينيه ورأى شبه الظلام الذى كانت فيه الحجرة ، ثم السقف المزدان بنقوش الفراعنة المقلدة . ثم وردة حمراء كبيرة فوق أنفه .. وبزاوية عينه اليسرى لمح حذاء أنثويا أنيقا مخلوعا وملقى بإهمال تحت الفراش المقابل ، وفوق الحذاء بمسافة قليلة رأى قدما صغيرة تتلاعب أصابعها داخل الجورب . ولم تكن المسافة بعيدة فمد يده وأمسك بالقدم وجذبها ، وفي نفس الوقت تصاعدت موسيقى خافتة تقول :

ــ صباح الخير.

وكان مستعدا أن يبقى على وضعه ذاك مدى الحياة لا يتكلم ولا يتحدث ولا يتنفس ، ولكن الصوت الموسيقى عاد يقول :

ــ بلاش كسل قوم .. عندنا شغل كتير .

وفى بطء جلس ، ووجد فوزية جالسة على الفراش المقابل بوجهها الأبيض المسمسم الحلو ، وعيناها منتفختان قليلا إنما زادها ذلك جمالا وجاذبية ، وكان احمرار خفيف يلون شفتيها . وقال لها بصوت أجس غليظ طير كل ما أحدثته تحيتها من موسيقى :

\_ صباح الخير.

وفتح عينيه وأغمضهما كثيرا ليرى أنها في جلستها تلك أرشق من أصابع عازف كان ، وأنضر من الوردة التي أصبحت في يده ، وأنشط من كل ماقد يعثه صباح شتاء من نشاط . وكانت ترتدى ( بلوزة ) بسيطة و ( جيب ) رمادى ، وبادرته قائلة :

\_ أولا. قوم اغسل وشك.

ووضع حمزة ساقا فوق ساق وهو لا يزال ممددا على الفراش ، وقال فى كبرياء :

\_ أولا \_ دورى لى على النضارة لأنى مش عارف حطيتها فين قبل ما انام .

ثانيا ـــ كان فيه واحد نايم هنا راح فين ؟

ثالثا \_ مفيش ميه عشان أغسل.

رابعا \_ الساعة كام والنهارده إيه ؟

خامسا ــ تعرفي إنك حلوة زيادة عن اللزوم ؟

ـــأولا النضارة انت قاعد عليها وباينة منها حتة .. وأنا جيت ومالقيتشي إلا انت والمرحوم بس ، والساعة الحادية عشرة من صباح يوم الجمعة الموافق

كذا وعشرين من شهر فبراير سنة ألف وتسعمائة واحد وخمسين ميلادية ، وأم محمود جابت الميه الصبح وح احط عليك تغسل ، وانت اسمح لي كداب يا عزيزي حمزة حين تدعى أنى جميلة من غير ما انت شايفني .

وكانت تقول هذا وحمزة قد قام ملسوعا يبحث عن النظارة خوفا من أن تكون قد أصابتها مصيبة لا تحمد عقباها ، ووجدها سليمة والحمد لله فوضعها على عينيه ، وثنى رأسه يمينا ويسارا مدعيا أنه يتفرج على فوزية ، وقال بسخرية :

\_ يا خسارة فضارتى معمولة للنظر بس .. لازم أعمل واحدة تانية لجمالك .

ــ يالله يا حمزة مش فاضين .

وقام ، وفى الفناء الموحش وقف وركع خافضا رأسه وفوزية تصب عليه من الإبريق ، وهو يتعمد أن يقترب منها حتى « تطربشها » قطرات الماء ، وهى تخطو لتبعد عنه فيخطو ويقترب . وهكذا انقلب الغسيل إلى مطاردة مرحة لفا فيها الحوش مرات ، وانتهت بأن صبت فوزية غير قليل من الماء فى ظهره .

وعاد حمزة إلى الحجرة الأخرى وشعره مشعث ، وقطرات مياه تتساقط من وجهه وقطرات أخرى تتساقط في سلسلة ظهره ، وابتسامات كثيرة تنهمر من ملامحه ، وناولته فوزية المشط وهي تقول :

ــ فطارك اهه .

وكشفت فوطة كانت تغطى جزءا من سطح المائدة الكبيرة الموضوعة فى الركن ، فبدت أشياء سال لها لعابه ، فهو فوق شغفه الكبير بالطعام لم يكن قد تناول شيئا منه منذ غداء الأمس ، فإذا به وجها لوجه أمام إفطار فاخر .. فول بالزبدة ، وبيض مقلى ، وجبنة من ذوات الاسم الطويل ، وطماطم ( جمهورية فرحات )

حمراء مقسمة وعليها شطة وخل تماما كما يحبها ، وزيتون أسود وأخضر ، والأهم من هذا وذاك براد الشاى الذى كان لا يزال البخار يتصاعد من بزبوزه .

وقال حمزة :

\_ إنت أروع فوزية فى الدنيا .. بس بدى أعرف عملت البيض ده ازاى ؟

\_ حتعرف كل حاجة يا سيدى .. أصلى جبت لك وابور سبرتو وكنكة وبراد شاى وسكر وشوية حاجات كده .

\_ وجبت فلوس منين ؟

\_ حتعرف كل حاجة بس ماتستعجلشي على رزقك .

\_ طيب تعالى بقى .

وأصرت فوزية على أنها شبعانة ، ولكن ما كادت تنقضى بضع دقائق وهى تتأمل حمزة وهو يقطع اللقم ويحندقها ويحملها إلى فمه بمهارة ، ثم يجيد مضغها ويفعل ذلك بطريقة توحى بأنه لا يأكل وإنما يتعبد ، ويتعبد بطريقة تغرى بتقليده ، ما كادت تنقضى بضع دقائق حتى راحت فوزية تمضغ لعابها وقد تفتحت شهيتها . وما أن أفلت من حمزة دعوة أخيرة حتى انضمت إليه بلا توان وشاركته في الإتيان على كل ما يؤكل .

وقالت فوزية أخيراً .

\_ أنا جبت لك الجرايد .. فاضية مافيهاش حاجة .

\_ إنتى مابتنسيش حاحة أبدا .. أنا مش عارف أقول إيه .. على فكرة قبل ما انسى .. النهارده عندنا اجتماع الساعة تلاتة ونص هنا .. خـــلاص حنبتدى .

وتركته فوزية ينكب على الجرائد كعادته ، وأزالت بقايا الطعام ونظفت

المائدة .. وفوجئت بأنه انتهى منها بأسرع مما قدرته فقالت :

\_ هه .. فاضية <.. مش كده .

ــ ماتستهلشی الواحد یقراها .. بس فیه خبر قبض علی أنصار سلام یونانیین فی اسکندریة .

\_ مالحظتش حاجة تانية ؟

- زى إيه ؟

\_أصلى شفت حاجة كده استلفتت نظرى .. شوفها في صفحة الأخبار الداخلية .

\_ وآدى الأخبار الداخلية .. هيه .. هيه .. هيه مافيش حاجة . \_\_\_ اهيه ياأخي .. بص .

ووجد في العمود المجاور لعامود الاجتماعيات بروازا فيه:

ولدي حمزة:

عد إلى المنزل ، وحقك علينا .

والدك المكلوم: بدير

كان يومها من الأيام الدافئة التي تكثر في أو اخر الشتاء وتنبئ بأنه قد شاخ ، وبدأت أجنة الربيع تتوالد داخله وتنمو وتهدد بقاءه . وكانت هناك شمس ساطعة تتسابق حرارتها وأشعتها في الوصول إلى الأرض ساخرة بالشتاء الكهل ، غارسة أصابعها التي لا نهاية لطولها في جسده ، تكتم أنفاس زوابعه وتقهر برده وتطرد من السماء سحاباته ، نافذة حتى إلى الأحياء تثير فيهم الحركة بعد السكون ، والأمن بعد الخوف والانطلاق بعد التقوقع ، وتدفعهم مثلها إلى مقاومة شتاء طال احتماله ودنت نهايته .

وحين خرج حمزة وفوزية من الداخل إلى الحوش بهرهما الضوء الساطع ، وأحسا لليوم وشمسه بمرح كمرح الأطفال في صباحية عيد .

وجلسا خلف الحائط ينعمان بمقدم الدفء ولم يكن حولهما سكون ولا صمت ، فعلى شجر الكافور وقفت مئات العصافير تتقافز وتغنى وتزاول الحب وتثير باحتفالها الكبير الحياة في قلب الجبانة .

و بعد قليل ضاق حمزة « بجاكتة بيجامته » فخلعها ووضعها فوق راسه ، وراح يحدث فوزية عن اللجنة التي قرر تكوينها منه ومنها ومن سيد وسعد . . وعن مشاريعه لإحالة المدافن إلى ترسانة تستطيع بواسطتها اللجنة أن تقود كفاحا لا يلين لتعبىء الرأى العام وتستأنف المعركة .

وأبدت فوزية امتعاضها لتكوين اللجنة على تلك الصوره متشككة فيما يمكن أن تقوم به عناصرها الضعيفة . . ولكنه راح يحدثها في هدوء واتزان عن نقط البدء ، وعن الأحلام والواقعية ، وعن أن الثوار الممتازين لا يستوردون من الخارج ولا يهبطون من السماء ، وأن عليهم البدء من حيث هم ومن العناصر التي في متناول أيديهم . وكلفها بالذهاب إلى سعد وإحضاره . وكانت وحدثته فوزية هي الأخرى عن خطتها حيال لجنة المدرسات .. وكانت تبالغ في تلك الخطط حتى إنها أبدت استعدادها لتكوين جيش منظم من النساء في ظرف شهور .

وكان حمزة يحس أن مبالغتها صادرة عن حماس حقيقى . و تطرق الحديث إلى أبيها وكلامها معه عن الزواج وموافقته بشرطين : أن يرى حمزة ، وأن يسكنا معه فى نفس البيت . . وكان أمل فوزية كبيرا فى إمكان تنازله عن الشرط الثانى . واتفق معها على أن يذهب لطلب يدها من أبيها رسميا فى نفس الليلة . وكان الميعاد الذى اتفقا عليه أغرب ميعاد لخطوبة . . الحادية عشرة مساء ، على ألا يعلم أحد غير الوالد وألا يخير بعلمه أحدا .

وأصرت فوزية على أن لابد من موافقة عائلته ، وأن مجرد إرساله خطابا لا يكفى ، ولم يكن هناك حل سوى أن تسافر وحدها إليهم لتراهم ويروها ثم تعود برأيهم .

وسألها حمزة إن كانت قد أخبرت أباها عن عائلته ، وكانت قد فعلت .. فقال لها أبوها : ما دام انتى عاوزاه اجوزيه ، انشاالله يكون أبوه عطشجى .. وضحك حمزة كثيرا متسائلا عما يكون رأيه لو عرف أن العطشجى وظيفة كبيرة جدا بالنسبة لعامل دريسة .

وكان حمزة في هذه الأثناء قد توسد فخذها اللينة الناعمة ، والحديث كان يدور في نغمات هادئة مستحبة تغرى بالإبطاء والاستمتاع بكل كلمة ، وأجبرتهما كثرة الدفء على العودة إلى الحجرة . وأخبرها حمزة وهما يدخلان من الباب أنه يرشح أم محمود لعضوية اللجنة . ولم تصدق فوزية وأثارت جدلا طويلا انتهى باقتناعها كالعادة ، وبابتسامة تسليم . ولمعت شفتاها وهى تبتسم في الحجرة نصف المظلمة ، وأحب لمعة شفتها تلك حين استحالت

حمرتها من لون إلى نور . وأحب وجهها القريب منه وكأنه يراها لأول مرة ، بل خيل إليه أن ملامحها قد تغيرت وأصبح لها نكهة كالقهوة حين تحلى بالعنبر . وأحس لرؤيتها الجديدة برغبة جامحة في تذوقها واعتصار كل ما في ملامحها وشفتيها من نار ونور ونكهة ليروى تيارا من القلق اللاسع كان يجتاحه في تلك اللحظة .

و لم يقاوم رغبته تلك ، و لم تقاوم فوزية واقشعر جسده بفرحة حب وهو يحس بها ، بحبيبته ، بفوزية تعتصر شفتيه هي الأخرى في ثورة عارمة مكبوتة ، وظمؤها إليه يكاد يطغى على ظمئه إليها .

وولد فيه ذلك إحساسا غامرا بالاطمئنان ، وبأن ما بينهما من حب قد أصبح لا يختلط بالخوف والرهبة والتشكك والخجل ، وكلاهما قد وثق وأدرك أن ما يكنه الآخر له حقيقة واقعة يلمسها في كل خلجة من خلجات رفيقه وفي كل كلمة ونظرة وضحكة .

كانت قد انتهت مرحلة التسرع واللهفة وبدأت مراحل الاطمئنان . لم يقل لها هذه المرة أحبك و لم تقلها له . إذ لم يعد ما بينهما كلمة تقال ، بل استحالت المعانى إلى أعمال وإدراكات يمليها الحب المصفى .

كانت أفكار كهذه تدور في عقل حمزة وهو ينظر بشغف ، ويتابع حركات فوزية وتقلصات وجهها وطريقتها في إعادة النظام إلى شعرها حين توقفت فجأة عن كل ما تفعله وعضت شفتها السفلي ، فسألها :

\_ مالك ؟

ـــ أتاريني بقول م الصبح أنا ناسية إيه ؟ يا سلام على مخى ! تصور النمرة ردت النهارده ونسيت أقول لك !

واعتدل حمزة فى الحال وكأن نافورة نشاط ضخمة قد تفجرت.فيه ، وسألها : \_ صحیح ؟ طلبتیها إمتی ؟ وقال لك إیه ؟ .. صحیح ردت ؟ إزای ساكتة م الصبح ؟ إزای تنسی ؟ .. مساكة مهمة جدا .. إزای تنسی ؟ .. قال لك إیه بالضبط ؟

ــ الأول كان متشكك ، فلما قلت له أنا خطيبتك ادانى ميعاد النهارده الساعة واحدة قدام محطة السيدة .. معلهش .. مش عارفة نسيتها ازاى ! ونظر فى ساعته بلهفة ، كانت الثانية عشرة والثلث .. واندفع يرتدى ثيابه على عجل وقلبه يدق بالحماس إذ قطعا سيعاو د صلته بلجنة الكفاح المسلح عن طريق زكريا . وسألها وهو منهمك فى ارتداء الجورب :

\_ وما خلتيش الميعاد بالليل ليه ؟

-- حاولت .. قال لى إنه لازم يسافر النهارده الساعة تلاتة .. وإن دى هي الفرصة الوحيدة .

\_\_ يسافر فين ؟

ــ مااعرفش ، ماسألتوش .

و سكتت فوزية قليلا ثم قالت:

\_ آه .. يا سلام على مخى .. وقال لى حاجة كان .. قال لى إنك تقطع صلتك حالا برشدى لأنه ثبت أنه بيشتغل دلوقتى مع البوليس السياسى .

\_\_ ایه! .. رشدی ؟

\_ آه .. دانا فضلت طول السكة أقول رشدى .. رشدى .. رشدى ، عشان ما انساش إسمه .

وفى ومضة اختلط وجه رشدى الدائم الاحتقان المنتفخ بالسمنة ، وعيناه الصغيرتان المدسوستان فى ملامحه ، وابتساماته الخجلة يوم ذهب إليه فى العباسية ومعه حقيبة الديناميت واعتذر وتحجج بالأولاد ، اختلط هذا بأيام أن كان يعمل معهم جنبا إلى جنب فى اللجنة . ولسبب ما أحس حمزة

بالارتياح حين علم بتلك النهاية . كان لا يرتاح أبدا إلى شك رشدى في الآخرين ، وإلى كلماته الضخمة الجوفاء ، وحبه اللزج المفرط لأولاده حتى إنه كان يحمل معه صورهم دائما ويطلع عليها كل من يصادفه ، ولا يتركه إلا بعد أن ينتزع منه كلمة إعجاب أو صيحة ثناء . . أجل ! إنه الآن مستريح ، فمن المستحسن دائما أن نمد الخطوط إلى نهاياتها .

وقال لفوزية حين انتهي من ارتداء ثيابه:

ــ أنا ماشى .. حكاية رشدى دى حمست الواحد أكتر . لازم تروحى لسعد .. بعد شوية .. قهوة ماتاتيا فى العتبة .. ورا الأوبرا .. الميعاد هنا الساعة تلاتة ونص .. ماتنسيش !

\_ ماتخافش .. بس الدنيا نهار وحاسب انت على نفسك فاهمني ازاى ؟ وخرجت « فاهمني ازاى » من فمها حلوة لذيذة كمذاق الآيس كريم في فيظ يونية .

وحين غادر المدفن كان أنفه لا يزال يتنفس رائحة شعرها ، وكان يحس بلوعة لفراقها مع أنه كان متأكدا أنه سيلقاها بعد ساعات .

وكان قد ذهب ما بينهما من غربة وحلت الألفة والتعود ، وأصبحت في نظره عادة حيوية متجددة لا يستطيع عنها استغناء أو فراقا . وكان وهو فى طريقه إلى الميعاد يرى فى وجوه الناس ربيعا قبل الأوان ، وجدية من يعمل ، وبريق الأمل الذى يصاحب العمل . كان الناس قد أفاقوا من صدمة الحريق ورفعوا الرعوس فى خوف أول الأمر وبدعوا يتهامسون بالشائعات ، ثم علا الهمس حين تحققت بعض الشائعات وأصبحت حديثا يقال ، وعرف الناس من الحارق ومن الضارب ، والناس حين يحددون أعداءهم لا يترددون ، وبدعوا يسخرون وانطلقت النكات بادئة برأس الرمح ووزرائه ولم تترك حتى الذيول ، وشد الأعداء من قبضتهم ليغلقوا الأفواه ولكن كانت السخرية قد أضاعت رهبتهم وهونت من شأنهم ، فقابل الناس الضغط بإحساسهم أن لابد من التقدم خطوات أخر ، وشعر الأعداء بالخطر ، وانهالت ضرباتهم هوجاء ومع كل ضربة يزداد تجمع الناس ويتعلمون ويلتفون حول المضروبين ، فيخاف الضاربون ويزداد البطش . .

وكان فى نفس حمزة إشراق لا تصنعه شمس .. ستتكون لجنة أخرى ، وسيلقى زكريا بعد حين ويعاود العمل الرائع الشريف من أجل الناس . ستعود المواعيد واللقاءات والبحث المضنى وراء قضية الشعب . عشرات من الأشياء لا بدأن يخبرها لزكريا وعشرات لابدأن يسأل عنها ، وزوجة حسن محمد حسن وأولاده ، ونقود السلاح التى لديه ، والدبلة ، دبلتين . وبدير لابد من الذهاب إليه فى ميعاد قريب ، العدو قوى وسريع .. سيكونون أقوى وأسرع ، فى الماضى أخطاء لن تعود ، والمستقبل أكيد ، النصر لم يعد أملا لقد أصبح واجبا .

ووصل إلى الشارع المجاور لخط حلوان . ومع كل ما كان يفكر فيه لم يفته أن يلحظ أن هناك أناسا يتسكعون حول الخط ويبدو ألا عمل لهم . و لم يطمئن وفكر فى أن يرجع ولكنه عدل ، فلابد من مقابلة زكريا . وكل ما يحس به مجرد شكوك أما ميعاده مع زكريا فيقين ، فهل يأخذ بالشكوك ويترك اليقين ؟

وقبل أن يصل إلى المحطة دخل فى حارة جانبية وخرج فى شارع الخليج ، ثم مشى بحذر فى الشارع الواسع الذى يصل المحطة بالخليج ، و لم يكن لحظتها ميعاد قطارات فكان الشارع خاويا ، وراى من بعيد وفى المكان الذى أمام المحطة مباشرة شابا لم يشك لحظة واحدة فى أنه مخبر فقد كان يرتدى جلبابا واسعا فضفاضا وكوفية ضخمة ، وتوقف وقرر أن يلغى الميعاد ، ولكنه قرر أيضا أن ينتظر من بعيد ليحذر زكريا حين يجيء . وأثناء انتظاره راح يراقب الرجل الواقف الذى كان يروح ويجيء ويتلفت وكأنما هو الآخر على ميعاد . وخيل لحمزة أنه رأى وجهه فى مكان ما ، ونظر إليه مرات أخرى ليتأكد . . واكتشف مقهقها أن الشاب لم يكن سوى زكريا بلحمه و دمه ، وقد تنكر فى زيه ذاك .

وأسرع حمزة إليه .. وحين أصبح على قيد خطوات منه عرفه زكريا وتقدم نحوه ، وتشابكت أيديهما في سلام قوى اقشعر له جسد حمزة ورفرف بالفرحة . وقبل أن تترك يده زكريا كانت أيد كثيرة مفاجئة قد أطبقت عليهما بعنف . ومرت المفاجاة مرورا خاطفا .

وتلفت حمزة حوله فرأى نفس الأشخاص الذين مهما تغيروا فلابدأن تقرأ العين على وجوههم كلمة مخبرين مكتوبة بحروف من جلابيب وطرابيش وسحنات .

وكان حمزة في كل مرة تحيطه أيد مثل تلك يحس بنوع من الارتياح ، وكأن

مهمته قد انتهت وأصبح عليه أن يستريح ، أو كأن القبض عليه حفلة تتوج فيها بطولته ويعترف له فيها بالجميل ، ولكنه هذه المرة أحس بالإيدى كنصل حاد يهوى عليه فيبتره وينتزعه بعيدا عن معركة الحياة والموت التي يقودها في سبيل الإنسان ، وبعيدا عن فوزية وكل ما يمت بصلة إلى الحياة .

وأحس بأصابع من حديد تدلف إلى زوره وتخنقه .

ونظر إلى زكريا وكأنما كان زكريا هو الآخر يترقب نظرته . و لم يتحدثا بكلمة . وفى ذلك الوقت كانت الأيدى تمسك بهما ريثما تحضر العربة التى ستقلهم أجمعين ، والناس قد بدأ المشهد يسترعى انتباههم ويتجمعون . وتبين حمزة أن الأيدى القابضة عليهما تمت إلى أربعة : أفندى ، وثلاثة بطواقى .

كانت المفاجأة لابد منها .

ونظر إلى زكريا وقالت عينه شيئا ثم توقفت ، ولمعت فجأة تقول ... الآن ..

وتوالت الأحداث مسرعة .

فى نفس اللحظة هوى حمزة وزكريا إلى الأرض فتخلصا من الأيدى التى شلتها سرعة الحركة ، ثم اندفع كل منهما فى اتجاه.وقبل أن يتحرك حمزة نالته صفعة قوية تريد عرقلته و لم تعرقله ، فقط فجرت الدم من أنفه ، ولكنه مرق بقوة اندفاع لا يمكن وقفها .

واختار الحارة الموصلة إلى شارع ( الخليج ) . لم تكن فى رأسه وجهة معينة .. كان يريد أن يجرى ويجرى ويبتعد بكل ما يستطيع عن ذلك المكان . وكانت أهم الأصوات التي تتلقفها أذناه هي أصوات أحذية مطارديه . لقد شعر بهم .. لم يكونوا كثيرين ، لقد نجح هو وزكريا إذن فى جعلهم يترددون وينقسمون . وفوجىء بأصواتهم تعلو وراءه :

\_ امسك حرامي .. حلق .

ولم يكن في الحارة أناس عديدون . كانوا في شغل عنه بالدنيا والدكاكين والزبائن ، ولكنهم حين كانوا يرونه قادما يلهث ورجال بملابس عادية يجرون وراءه وأصواتهم ترتفع من خلفه : امسك حرامي . كان يرى حينئذ في عيون الناس ترقبا و تحفزا . و كان لديه شبه يقين أن أحدهم سيجد بعد قليل في نفسه الشجاعة الكافية و يعترض طريقه و يمسكه ، ولذلك انطلق صوته يجار :

ـــ أنا مش حرامي .. أنا وطني ـ

وانفلت إلى حارة أخرى قبل أن يذهب تحفز الناس وقبل أن ينقضوا عليه ، وسمع طرفا من كلمات قيلت وراءه :

- ـ صهيوني .
- ــ بال شوفي .
- ــ امسك حرامي .
- \_ مش باین علیه .

وجد نفسه فى شبكة غريبة من الحوارى المتداخلة التى تفضى كل منها إلى الأمنورى .. أرضها حفر وطين .. وأبوابها متقاربة .. وحركة بطيئة تكاد تموت وهو المندفع وحده كالقذيفة . إلى أين ؟ إلى أين ؟ وأين المكان الذى يخفيه ؟ أين المكان الحالى من الناس الذى يستطيع أن يأوى إليه بلا واحد يعترضه ويسد عليه الطريق ويقدمه متطوعا للبوليس ؟

واستهات يجرى واضعا كل ما يستطيع من قوة فى ساقيه ، ومع هذا كان يخيل إليه أنه لا يتحرك من مكانه ، أو أنه يجرى ويدفع أمامه كتلا ثقيلة مظلمة من حديد غير مرئى . و لم يكن يعرف إلى أين .. كل ما يراه عيون ساهية لاهية لا تنفتح على آخرها إلا حين يجاورها ، ولا يتحرك صاحبها إلا حين يكون قد ابتعد ويكون صوت مطارديه قد اقترب قائلا :

ــ أمسك .. حرامي .

فقط لو يعرف أين تقوده قدماه .. خيل إليه أنه يطرق أرضا غريبة ، وثمة إحساس يتحرك حركات ملتوية رفيعة في نفسه ويقول إنه ليس على ما يرام ، وأن شيئا ينقصه .

\_ آمسكوه .. حلق يا أخينا .. حرامي .. حرامي .

جاءه الصوت هذه المرة قريبا حتى خاله وراءه تماما ، بل خيل إليه أن الكلمات تخرج من رأسه هو ، ووجد نفسه دون وعى يبتسم .. إن مطارديه يقولون للناس حرامى لينتبه إليه الناس حتى يسرقوهم هم . ما ألطفها مسرحية .. سيقولها ذات يوم لفوزية .

لابد من مكان يختفي فيه .. أممكن أن يدخل في أحد الأبواب الكثيرة التي تمر أمامه ؟ .. فقط لو تطول المسافة بينه وبينهم دقيقة واحدة كان يستطيع التفكير ، إنه الآن لا يفكر ولا يرى أنه يجرى .. ويجرى تقوده غريزة .. وتقوده الجدران .. الجدران المتماسكة المتراصة هي التي تحدد طريقه .. أين هو الآن ؟ إن هذه المباني لا تمت إلى السيدة ولا إلى المدبح ولا إلى زين العابدين . إنها غريبة وكأنه يجرى في قرية من قرى الهند . دخل حارة ليس فيها آحد .. خاوية إلا من عربة من عربات النظافة ذات العجل الكبير الواسع .. العربة بعيدة عنه .. إنه يخاف أن يصطدم بها . هناك قوة تجذبه إليها .. حالا ستشطره . فليبتعد .. فليتجنبها بأقصى ما يستطيع . ولا يستطيع .. جدران على اليمين ، وجدران على اليسار ، وعربة كبيرة هائلة الحجم تسد عليــه الطريق .. لا تدع له منفذا . كيف حدث هذا ؟ كيف ؟ لقد مرت بجواره و لم تقتله . من أين جاء الفراغ الذي مرق منه ؟ الحارة نهايتها تبدو قريبة .. إنه یری آناسا کثیرین متجمعین عند نهایتها .. إنهم قطعـا یتـربصون بــه ، وينتظرونه .. أنه وطني أنا وطني ! وتلفت خلفه .. مطاردوه قد تكاثروا .. أصبحوا عشرات .. لا يمكنه التوقف .. ولكن إلى أين ؟ .. لا بد من مكان خال .. مكان أمين .. بعيدا عن الناس .. يخفيه تماما ، ولا يدع عينا تراه . إنه لا يحس بالتعب .. ولا بالراحة . زكريا لديه فرص أوسع .. إنه عداء سريع . حتى لو أمسكوه سيكون زكريا قد أفلت ولن تموت اللجنة .. لن تموت . الناس الذين عند نهاية الحارة كثيرون .. إنه يقترب منهم في اندفاع أهوج .. إنه لا يستطيع أن يمنع اندفاعه أو يقلل من سرعته .. إنه يقترب جدا من الناس .. الأصوات تنبعث من خلفه : امسك حرامي .. عليه أن ينبه المتجمعين أمامه حتى يتركوه يمر وصرخ :

ـــ أنا وطنى أنا وطنى!

وحتى لم يسمع الكلمات وهي تغادر فمه فقد ضاع صوته تماما حين وجد نفسه في اللحظة التالية في شارع السد وفي ضجته الهائلة التي تتضاعف أيام الجمع . ولدهشته كان الناس الذين خيل إليه أنهم يترقبونه كانوا هم المزدحمين في الشارع لا أكثر ولا أقل ، الرائحين الغادين الذين يتقابلون ويصطدمون ويتلاحمون كالعادة . وكان عليه أن يجرى حتى لا يدركه المطاردون مخترقا الصفوف المتكاثفة من الناس .. لقد هبطت سرعته جدا .. أصبح لا يكاد يستطيع نقل قدميه أو المسير .. فقط المسير .. المطاردون إذن قابضون عليه لا محالة .

وكان أخوف ما يخافه حمزة إذا وجد نفسه فى ازدحام ما أن تسقط نظارته ، ولهذا وبحركة لا إرادية رفع يده إلى انفه يمسك بها النظارة . وروع بأنه لا يجدها . لا على أنفه ولا على أذنيه . كيف حدث هذا ؟ وأين سقطت ؟ لا بد أنها وقعت أثناء محاولة فراره . لابد أنها دشدشت تماما حين سقطت .

الله ! وكيف كان يجرى إذن ؟ كيف استطاع قطع كل تلك المسافة دون

أن يصطدم أو يتعثر أو يسقط ؟ كيف ؟ ثم كيف يمشى الآن بغيرها ؟ إنه فعلا يرى . الأشياء والناس بكل دقائقها ولكنه يرى والرؤية واضحة .

و تطلع إلى الوراء ... و كان قد تعمق داخل الازدحام ... ليقدر المسافة الباقية للقبض عليه . و لم ير إلا قفا ضخما يحجب عنه الرؤية ، وقد سد الثغرة التى ناضل بقوة حتى اخترقها منذ هنيهة ، بل لحمها القفا و كأنه ( قصدير ) بشرى . و مال حمزة إلى اليمين عله يتمكن من التطلع ولكن كانت تسد اليمين امرأة تحمل ابنها فوق كتفها ، و حاول أن يتطلع من اليسار ولكنه و جده مغلقا تماما بشاب يحمل فوق رأسه قفص عيش طابونة ، وصبى جزار حاملا فخذة كندوز ، ومدخنة فرن بطاطة فوق عربة يد ، ورأس حصان يحاور الذباب ويداوره ، ومقطف لا يرى من يحمله و كأنه معلق بين السماء والأرض .

الله ! عليه أن يحدد مكانه بالضبط من مطارديه ليحدد سرعته وإلاضاع . وحاول أن يزاحم ليصل إلى مكان غير مزدحم يستطيع منه الرؤية ولكنه لم يستطع حتى التحرك ، بل وجد نفسه مسوقا رغما عنه بحركة جيرانه وجيران جيرانه إلى الأمام .

وأصابه اليأس والضيق ، و لم يكن في مقدوره أن يفعل شيئا آخر ليحدد مكانه إلا أن يصيخ بأذنيه ليسمع نداءهم المعهود ، امسك حرامي . وأصاخ آذانه ولكنه سمع هديرا هائلا من .. معسلة قوى يا بطاطة .. إمساكية السنة الجديدة ، إمسك شيش بيش .. اسمع يا جدع .. يامساء النجف .. عسل ياتين .. زى صدر البكارى يا رمان .. يا جدع دانا اللي شارى الحلو وبابيعه .. أوعى رجلك .. أيها الناس اتقوا الله في أنفسكم واذكروا يوما عبوسا قمطريرا .. يا أم هاشم .. امشى يابن ال .. اسمع يا جدع وصلى ع الحبيب .. دا الخواجه فلس وباع نصيبه .

وبداله الأمر مستحيل .. مستحيل أن يكون المكان الذي ظل يبحث عنه

ليهرب من مطارديه ومن الناس الذين قد يتطوعون لإمساكه ، أن يكون هذا المكان الأمين هو قلب الناس أنفسهم .

وراح يتطلع إلى الوراء مرات ليتآكد ، و لم يجد سوى شمس وعرق ، وعمم وعصى ، وأكتاف ، وكوفيات وطرابيش ، وشعور سوداء وبيضاء وحمراء بالحنآء ، ووجوه سمر وخمرية ، وحواجب رفيعة منمقة ، وبراقع ، وتجمعات حول بائع الكينا المقوبة للدم والأعصاب ، وعمال ورشة يدفعون عربة قديمة وعربجية يبصقون ويتنخمون ويلعنون ، وأحصنة لها أجـراس تدق ، وعربات تجعجع ، ورائحة سمك مقلي وطعمية ، وعطارة ومـانى فاتورة ، وجعير ، ولبد ، وخناقات وقافيـات . وعلى الجدران ! عــاش الكفاح المسلح .. التحرر طريق السلام . لاعبو فريـق الأسد المرعب ، ومناطيل صفراء ، وطواق صوف ، « وقصرية » فل بارزة من شباك ، وألف آفندی مثله بنظارات وبلا نظارات ، وأولاد بلد ، وطلبة ، وملاءات تنبعج بارداف ، وتضیق عند أوساط ، وتظهر سیقان و « عفـاریت » زرقــاء وصفراء وكبار وصغار ، وأطفال روضة عائدات من المدارس وفي شعورهن أشرطة حمراء ، وناس كثيرين ، كثيرين من أمامه ، ومن خلف ، وعلى جانبیه ، وفی کل مکان .

\* \* \*

وما كاد يضع قدمه على باب المدفن حتى قابله صياح سعد: ــ شفت بقى مين اللى فينا بيتأخر ؟ بشرفى أنا هنا من ثلاته وربع . دا مش كلام دا لعب . . دا هزار . دا مش شغل . إيه اللى أخرك ؟ كنت فين ؟ و كان جاى من غير نضارة !

رقم الإيداع؟ ٢٨١٢/ ٨١ الترقيم الدولى ٥ ــ ٤٨٤ ــ ٣١٦ ــ ٩٧٧

## 



و الرحمة المطابع المحالة المحا